

721

Michigan State Library
11132



MIZORAM STATE LIBRARY

Date of issue

Due Date

Date of Issue

Due Date

249-2, 113

N.B. :- Book lost, defaced or injured in any way shall have to be replaced by the borrower.

James Dokhuma

**THLA
HLEINGA ZAN**

DATE LABEL

MIZORAM STATE LIBRARY

The book taken from the Library is to be returned within **7 days**. A fine will be charged under the rules of the Library for each day the book is kept beyond that time.

Date of Issue	Due Date	Date of Issue	Due Date
31085	13/1/24 - 23/5/12	31108	13/1/24 - 23/5/12
20774	13/1/24 - 23/5/12	31108	13/1/24 - 23/5/12
131 - 11/11/02	13/1/24 - 23/5/12	31108	13/1/24 - 23/5/12
354A	13/1/24 - 23/5/12	31108	13/1/24 - 23/5/12
166/24 - 15/4/10	13/1/24 - 23/5/12	31108	13/1/24 - 23/5/12
143 - 15/4/10	13/1/24 - 23/5/12	31108	13/1/24 - 23/5/12

N.B :- Book lost, defaced or injured in any way shall have to be replaced by the borrower.


THLA HLEINGA ZAN

Mizoram State Library

11132



James Dokhuma



3rd Edition

1998

MIZORAM STATE LIBRARY

Acc No 11132
Acc. by Maw
Class.by born
Cata.by Me
Sub Heading by : _____
Transcribed by _____
Location No

Ku Romani
nghilh loh nan

*"Thlang lenkaw! hmar a hnim chung khua lo ri,
Pialleia nun hlui tham hnu kha min ngaihtir e;
Tah chang ni tam mang e, kumsul hleiten a dang lo,
Auh ruai ruai ka nuam e,
Aw..., kan nun khuarei a chang tur hi."*

— **Romani 1910 - 1972**



*Sakhmingthang zai pianna fam tawh hnu,
Nghilh ni awm lo kumsul puan ang thar changin;
A zaiin lairil a fang leh thin.*

*Hlunchhung nun hraileng a chawi ve lo,
A zai chawi hi fanau chhang ve Rianghluanin;
Tuah thu-ah chang rawh se leng awih nan.*

*Zingphul chhuahtlangah lo ngai ve la,
I zai remin chinlai khuavel a hrut e;
Sappui thiam puang-khawl atang nenin.*

— **by Author**

A BU CHHUNG THUPUI

THUHEMAHRUAI.....	i
1. Thlanthutna	1
2. Khawhar inah.....	10
3. Thian pathumte chu	22
4. Inkhawmpuina lamah.....	29
5. Hmangaih hmel thar	42
6. Thla hleinga zan	59
7. Buhseng ramriah... ..	73
8. Krista aia palai	84
9. "Ka thlarau i ko kir leh dawn si a"	93
10. "Ka tawngtai ang che aw"	101
11. Kapthuama leh Liankhuma.....	113
12. Thankimi mangan a tawp.....	126
13. "Ka hmangaih chauh lo chu" ..	137
14. "I dubzawng ti turin ka lo kal e"	150
15. An tia lawm	160
16. Kohhranah.....	170
17. Khawmu chawi	175
18. Rozami sawi a dik ta... ..	198
19. Japan salah Kapthuama... ..	217
20. "Hmangaihna hi ka tan hmelma"	228
21. Kapthuama a lo thleng... ..	248
22. Lehkathawn.....	264
23. "I tum reng maw lo ni?"	270
24. Nupui a nei ve ta.....	275
25. "Kan tiam ang tal khan aw..."	285

THUHMAHRUAI

Thla Hleinga Zan chawia ka thawnthu ziaak hi Nowgong Special Jail-a ka tan tan tirh lama a bul ka tan a ni a. Kum 1969, May thla niin ka hria. Thawnthu ziaak ngai reng reng lovin ka vawi khat ziaak vena a nih avangin mi thil hre zau zawk leh chinchang hre zawk tan chuan belh chian a daw loh turzia chu hre phak ve siin, a aia tha thiam ang lawi si lovin, ka han ziaak ve chawr a.

Mahse ka ziaak zawh hma-in Gauhati District Jail lama min thawn leh rih tak avang leh kum khat dawn lai Jail Office-ah min hren sak avangin ka chhonzawm thei ta lo a. Office a tanga ka lak chhuah leh theih hma chuan thawnthu dang '**Rinawmin**' tih leh '**Khawhar In**' tih chu ka han ziaksan leh rih a. Nakinah zawng Jail a tanga ka lak chhuah theih tak avangin hun leh ni te chuan min rengdim thiam a, ka tharthawh leh thei ta a. Mite lo ngaiha a chhiat a that tur pawh dawn chang lovin mahni mawl ang angin ka han khual chau chem thiah chawt mai a ni.

Thawnthu ka han ziaak ve takah chuan ka rin aiin thil hriat zau a lo ngai hle mai tih ka hmu chhuak a. Pakhat chauh buatsaih chu eng emaw titiin mahni chungchang leh thiante titi khawchhang a tanga pawhin a tih dan dan a awm ve thei mai chuan ka ring. Mahse pali panga lai ziaak tur chuan keini ang rual hriatna chuan a daih mawh dawn hle-in ka hria. Thil chi hrang hrang, nulat tlangvalna lam te,

(ii)

hmanlai titi leh an tawng, hman duhzawng te, pitar putar tawng kauçheh leh naupang nun thlenga chian a lo ngai hle mai a. Tin, hun inherin nungcha leh pangpar chi hrang hrang par hun a rawn her chhuah-pui dan leh Mizoram chhim leh hmar, chhak leh thlang nuophung leh a ram leikung leh a hmul put thlengin hriat a lo ngai bawk nen. Chu bakah Mizo hnathawh kalhmang te chena hriat a tul bakah Pathian thu thlenga hriat ve deuh a lo ngai a. Chu chang pawh la ni ta lo chuan, mahni ngei pawh mi awmhar mi deuh nih a tulna lai a awm tel fawmin, thu leh hla (Literature) lama hmasawнна eng emaw tal min siam sak thi leh a thawnthu zirtir tha deuh te chu kan han thlir tel ve bawk si a. Chuvangin, keini ang rual tan chuan a khirh vel khoh mai a ni.

Tin, he thawnthu-a hla lênglawng leh lêngzem hla ka zeh zawng zawngte hi a thawnthu rema ka phuah chawp deuh vek a ni a. A tawp bera mi lo pheih hi chu mi hla ka zeh tel awm pawhin ka hre lo. A lo awm a nih pawhin hla awm sa a awm tih hre lova ka phuahchawp nen a lo inang palh ta mai zawk a ni ang. Ka tum ve dan zawngin ruah tham loh ngat nena indarbaktir tum zawng ka ni a le.

Aw le, a tunlai tawng taka a changtute hi tun Indopui Pahnihna (II World War 1939-1945) tan tir lala ralkai rual zen zawn leh nula pasal neih hun ve thawkhat tawb angin ka han nihir a. Mahse

(iii)

khatih hun lai khan kei chu se hnung zui rual chauh
ka la nih avangin ka thil hriat dan a mang lam
hriat deuh ang tih ka ring a. Chuvangin, khatih
laia thil lo thleng leh a hun induh lohna lai a awm
pawhin ka hre lo a ni tih hria-in min ngaihnhathiam
a, min dawihchuam theih ka duh ngawt mai.

James Dokhuma
the Author.

*Dated Gauhati District Jail,
Cell no. 1. 25th. August, 1970*



*Published by James Dokhuma at the R.M. Press & Publications
Kulikawn — 796005 Aizawl. (Copy Rights Reserved)*

Cj 2000

1. THILANTHUTNA

NILAINI zinga Thanṭhuami nu zing tho tur ṭhu chhuak hlawt chuan, "Nizan ka mang tak chu e, ka ngaih pawh a tiṭha lo rum rum e a," a rawn tichhuak a. An pa chuan, "Ho mai mai, ka mang ka mang tih reng mai, engmah i man chhuah lo ang e," a lo tihluk a. Thanṭhuami nu chuan, "Nizan ka mang chu a mi deh dan a dang riau a ni, ka ngaih a ṭha hauh lo mai," tichung zelin a tho ta a. A thawh pah chuan, "Mamte, i û kha han kai tho teh, a lawm ruai tur vei nen kan tlai ang e. Buhzing pawh in deng dawn lawm ni?" a tih lai chuan Thanṭhuami chuan, "Ka hria, ka lo tho dawn," tih leh thawh a rual a, a tho ta nghal a.

An tukṭhuan ei laiin Thanṭhuami nu chuan, "Nizan ka mang chu Kapṭhuama nu ka lo hmu a. Puanrin hi a lo sin a, ṭihna eng ṭhapui pui mai leh ṭhifen duang te, pumtek ṭhi (hmarsai ṭhi) ni-awm tak tak te, ṭhisir te hi a lo khai bawr ṭeuh bawk nen. Zawlbuk sawngka hrul a taikuang tuiah hian hmai a lo pihh bawrh bawrh mai a. Amah lah chuan kumchiri par a lo tawn vul buk mai lehngal. Engti mang emaw teh reng ni ngai dawn ang ni," a ti a. Thanṭhuami chuan ngaihtuah mang hlei lo hian, "Mang ṭha a nih chu mang ṭha, chu lo aliam a mang ṭha a awm chuang hlei nem," a ti satliah ngawt a.

Chutia chaw an ei lai chuan nula tleirawl pakhat hi a lo lut a, "E, k'u Thanṭhuam, in hmelchhiat lai a ni maw? Mahse ka lo kal tho tho," tichungin a lut a. Thanṭhuami chuan, "Ni e, i dam rei dawn a nih kha 'mi hmelchhiat lai nan chu dam reina' an tia ni lawm ni? Eng nge i duh teh khiah? lo leng rawh," a lo ti a. Ani chuan, "Engmah duh dang lem lo e. Hei, in lehkha, nizan kan mikhualte rawn ken a ni a. An rawn thleng tlai em a, tukin a min pek chauh kha a ni lehngal bawk si a. Min pek veleh pe tur che u-in ka lo kal vat a ni," a ti a. Thanṭhuami chuan, "Kan lawm e" a ti a, nula chu a chhuak leh ta mai a. Chaw ei kham veleh Thanṭhuami chuan a han chhiar a. A chhiar bmain a thawntu hming chu a en hmasa tê tê a. Chutah :

Ka pa,

In dam lai a nih ka beisei e, keini pawh mi dang chu kan dam tlang e. Amaherawhchu, ka nu erawh chu nimin tlai, ni suk chen vel a nih lai khan min peih lohsan ta nge nge a. A natna chu ama hri bil pangngai, hmeichhe natna bakah thawhah benvawn a vei kha a ni ber e. Kumin hnuhkawih tan tirh atang khan khawsikin a tlak-buak zui ta a. Chuta tang chuan a khawsik chuan a thlah chuan tak loh avangin a hniam thla hret hret zel a, kar hmasa atang khan a zual deuh ta thut a. Zan nga dawn lai chhing lova kan tlai-varpui hnuin min peih lohsan ta nge nge a ni.

*Mahse, ka pa, min rawn ngaihtuah reng
reng suh ang che u aw. Kan chhiat tawh chung-
changah then leh rualte kan chungah an tha em
em mai a. Ka pa pawhin a tuar thiam khawp a
nia, a damate hi dam teh phawt mai ila. Ka nu
zawng a lo sawi lawk tawh ang leh a duh ang
ngeiin a kal ta a. A nat zual chhung zawngin ka
ni kha a lam a lam thin a, a rawn ngai em en
a. Mahse kar a hlat em si avangin engmah kan
rawn sawi duh lo a ni. Tunah zawng thil a nih
nih a ni zo tawh a, nangni pawhin lung lohah
rawn la reng reng suh ang che u. Kan unauza
pawhin kan tuar thiam viau a nia. Tin, kan lo
lam pawh kan tih ve theih kum tak a ni e.*

*Dam takin u le, in chhungin chibai,
Kaphuama.*

tih hi a ni. Chu veleh Thanṭhuami nu chu a ṭap ta
hawm hawm a. Chutah ṭap thawm hre phak then-
awm-khawvengte chu an lo zuang lut thuai a.
Thanṭhuami pa chuan, "Ṭhuambawih, vawiin chu
tumah feh suh ang che u. Kan pi bul ber leh neih
chhun liau liau-in min boralsan nafam chu kan awm
tur a ni. I lâwmte pawh hrilh thuai thuai la, i pu
Laiawrha te phei chu a len pawh lo leng phei hman-
hmawh nghe nghe teh se. A thlanṭhut leh i te phei
chu hun remchang leh ni dang la thlir ta pawh ni
ila, vawiin chauh na na na zawng a thei thei lo
leng hlawm teh se," a ti a.

Chutia an thawm bre hmasa an kawmchhakpa lo lut chuan, "Engti zai zia nge ni ta Thuamipa ? A va mak teh thut ve," a rawn ti a. Ani chuan, "Kan pi neihchhunin min boralsan a nih awm hi maw, tukin kan chaw ei laiin an chhiat tawh thu min rawn hrilhna lehkhah kan hmu a," a ti a. An thenawmpa chuan, "Chutin a lo na mek a ni maw ? Kan beng hi a var lo khawp a. Nula tlangval awm ve ta lo chu rual hi kan pawl lo lulai em mai a, ât pawh kan hlawn hlal lo," a ti a. Thanthuamipa chuan, "A, keini pawhin engmah kan hre lawk bik lo, khaw kar a hla si. Chuachhapah, kan pi lah chu a that lohna a rei tawhin ngaiah kan neih tawh a. Tunah le, mihring a tling zo ta ngang lova kan hria a ni leh chauh zawk a. Chutih thu lo-ah phei chuan hriat zen zen chi pawh a ni lo," a ti a.

An thenawmpa vek chuan, "Tunah fa engti nge a neih chu le ? An fate pawhin ei an tling hlawn tawh lawm ni ?" tiin a zawt a, Thanthuami nu thung chuan, "Panga an ni, an chhang a khât a, an milai lam an hloh nual bawk nen. An upa ber chu tlangval puitling a ni ve tawh a, a chhang pawh a nula ve er er tawh. Chumi naute chu pahnih lai an hloh a. A tē lam pathum, hmeichhe pakhat leh mipa pahnih an la awm a, an te ber chu kum li kum nga emaw lek a la ni ang, phunchawng-mual kan neih kum a piang kta a ni a, kum nga hmel zawng a hmu ve ta nih chu. Ka ô zawng a fate ei an tling dawg chauha a dam reipui ta si lo a. A rethei kâwmah a tang ve hrim hrim zawng a nie," lungchhe takin a ti a.

An kawthmaipa chuan, "Chu zawng an ngaihtuahawm tawh loh chu, keini te ngaihtuahin nu pawh an nei rei khawp a lawm. Keini kan chhangchhiat berh lai tak a nu boralsan kan fate pawh an awm hi. Ti tê hian thenrual tha zarah, upa-in 'thing delh loh, lung delh loh' an lo ti nâ zâwngin, a dam a dam ta zawng zawi zawiin an lo limik ve mai a nia," a ti a. Thanthuami patea (pami) chuan, "Ni teh reng e â, , , , anni Kapthuama te chu an ngaihtuahawm loh. An nu kha erawh chu a brehawm rei em a, an an chhangchhiat berh thawhmawh lai kha zawng pel ta cheng a, a dam reipui leh ta si lo hi a khawngaihtlak e, tih thu a ni pawh a. Chu thu loah phei chuan Kapthuama pa lah tlangval a la ni a. Chua-chhapah, pa alai a pa taima leh remhria, leiah a lut ang e tihhlauhawm khawp a pa awm mai mai thiam lo-mi a lo ni lehngal vei nen. Kapthuama lah chu a pa siar a pa siar, 'sial rangin sial rang a hring, sakawlin sakawl a hring' tih zawng zawng a neih zova a fel leh em em mai a. Ka u, Kapthuama nau nula, nichin a i sawi kha tu nge ni kha? Ani hlei hlei kha asin fel chu, an in a ka thlen tum reng khan a felzia ka hria a lawm," a tih lai chuan Thanthuami nu chuan, "Kapthuama nau chu Lalhlunchhungi a lawm, a hming pawh ka sak a sin ni nghe nghe," a lo ti a.

Hlo thlawh tul lai ngang a nih avangin thlawh-hma kawng zawh tawh lo nu in awm leh pa in awm chhun thenkhatte nen chuan an thu khawm têt têt a, Chutia an thut khawm lai chuan Thanthuami nu

chuan a mang neih thu leh a ngaih that loh ang ngei a thil a lo awm tâk thu chu a sawi a. An kawmchhakpa chuan, "A lo nih tak chu, mumang mah ni se, 'mang mai mai' tih chi loh nangiang hi chu a lo awm e. Kei ka mang hi upa-in 'mang leh thliah' an tih chi hi zu ni chawk a. Ka man loh ang zawng hlir hian a chhe lam a tha lamin a lo thleng mawlh thung a. Keimah ang maiin nang pawh 'mang leh thliah' an tih ang chi chu i mang kalhmang a nih dawn chu. Tun hma chuan 'Kêlchal mang man' an tih ang hi ka mang kalphung a ni thin a sin maw le. Tlem lai a tang khan ka 'kelchal mang man' tak ngai hauh loh chu," a ti a.

Thanthuami chuan, "Ka pu, 'Kêlchal mang man' i tia law? Kelchal (kelpa chal lam ri ang a lamin) mang man, an tia ni lawm ni?" a lo ti a. An kawmchhakpa chuan, "Tunlai thangthar ho lah hian 'kelchal mang man' ti hian in lam chawk a. A ni hlei nem, a tawng lo chhuahna bul pawh ti hian an sawi ngai hi. Kêlchala chu mihring a ni e, a mumangah Thawngluna hi a lo chawng a. Tual-lai hâr a chawn sa an chhum laklawh lai tak chuan thli vir na zet mai hi z rawn tlêh ta thut hian a lo hmu a. Chu thli chuan tual hâr a sabel zawng zawng leh sisep leh thlangra te chu a rawn thlawh bo zo ta-in a lo hmu a. Chutia Kêlchalan mang a neih hnu lawk chuan Thawngluna chu a chawng ta tak tak a. Kêlchala lo phan lawk ang ngeiin tual hâr a sa an chhum laklawh lai tak chuan thli vir na zet hi a

rawn tleh ta tak tak a. Sabel leh thlangra leh sisep te chu a thangna ram hriat lobin a rawn len bo zo ta vek mai a. Chuta tang chuan mumang lam a hmuh ang taka a taka lo thleng dik sawi nan hian 'Kêlchal(a) mang man' an tihphah ta a. Chuta tang vek chuan, chuti ang thli vir pawh chu 'Thawnga-leivir' an tih phah ta e, zawng an tih ngai hi," a ti a.

Chu pa chuan a thu sawi pah chuan hnangdil hi a vilhvalak mulh mulh a. A tawng zo chuan a tupa hruai hnenah chuan, "Kha Senbawih, Hauhaii zawna," tiin a pe a. An zing a pathlawi pakhat leng ve chuan, "Hauhaii zawna hi kan ti chawk tak a. Eng nge maw 'Hauhaii zawna' hming a put nachhan hi ni dawn maw aw?" a lo ti a. Chu pa vek chuan, "Titi-ah chuan ti hian an ti a: Hmanlaiin chipui an teng a. Chi an ten lai chuan ruah pawh sur hawt si lovin an kiang a luipui chu a rawn lian thli ta phut mai a. Tuilian chuan bawmzâ leh tungchaw te, rapzâ leh maichâm te hi a rawn len thla ta phawk phawk mai a. Mak hi an ti khawp mai a. Chutia mak titak leh a ngaihna hre lo a an thlir thap lai chuan lui hnar lamah thawm an hre ta a. An han en chhoh nak chuan tiaukuangah chuan mipui tlim hmurin an hmu a. Anmahni lah chuan thihna eng thapui pui hi awrh thuah hlawmin an hmu baw k a. Chung mipui zing a pakhat chuan, 'Hauhaii a thi e,' tilauh hian an hria a. Nakinah chuan mipui chu an haw-haw liam ta dur dur hian an hre zui a. Chumi hnu-ah chi tengho ehuan lui hnar a mipui dinna lai chu an han

chian a. 'Hauhzii-zawna' kan tih tâk hi a lo tla ngât a, an ti. Chuta tang chuan a hming hi a pu ta a ni e, an tia lawm," a ti a.

Chumi ni chuan in awm paho leh nu thenkhat te chu an fuan khawm a. Chawlni lo thleng hma-saberah thlanthutna chu kokim zawkin an nei ta a. Thenrual tha an rawn chuangkai nak nak hlawm a. Thanthuami thiante pahnih Rozami leh Lalpianmawii pawh an leng a. Thanthuami chuan a pute chhung thlalak a phawrh a, kawmchar leikapui-ah chuan an en tal tal a. Rozami chuan, "Thuamthian, 'Kapthuama' i tih fo thin hi khawi ber hi nge?" tiin a zawt a. Thanthuami chuan, a hrilh dan dan a, "Hei hi ka pi, tuna thi chu a ni a. Heihi k'u Sanghleia ka ka nu û fapa a ni leh a. K'u Sanghleia bul a ding, ka ni hnung chiaha a mi hi Kapthuama chu a nih hi," a ti a. Rozami chuan, "Kapthuama i tih hi a a hmeltha awm, thlalaka a lan dan ang hi a nih chuan tha ka tih zawng tak a ni," a ti a. Thanthuami chuan, "Ni e, ti ila, a tha em maw ni? Tak tak a, hei hi a lan chhiatna a ni zawk a sin, hetah hi chuan a thla hian amah a ang lo em a, a takah tha zawkin ka hria. Zai pawh a thiam ang reng a sin, an vengah chuan a to ve fu a ni awm e," a ti a.

Rozami chuan, "Zai kher zawng a thiam lo ang, nang reng hian i thiam lo mai a, tu chhun mahin a thiam ka ring lo," a ti a. Thanthuami chuan "Kei lo hi chhun tur an tam em! Kumin kan veng inkhawmpui lo awm turah pawh lo kal a tum a sin.

Chutia hmeltha i tih leh i lo ngaizawng emaw chu ni ang?" a han tifiām a. Rozami chuan "Thuamthiani tak hi chu i timak thin, mi an duh loh tur i hriat lawk pheng avang hian hram mai mai teh suh. Nang ang a ngaihzawng neih ka tum ve hlei nem," a tia. Thanthuami chuan, "Maw ni, i tum lo tak ang, Hmawngchuan-venga awm ve lo tlangval chu ngaihzawn tum awm loh reng a lawm," a han tizui a. Rozami chuan, "Thuamthian, dawt dawt hian pawt pawt teh suh," a tih lai chuan thing pui sem turin in chhung lam atangin an rawn ko ta a. Anni thian zaho chu Thanthuami te inah chuan an tâp nileng ta a.

2. KHAWHAR INAH



CHUTIH hun lai chu Mizoram pum nawm lai tak a ni awm e. Kristiana-in ram pum a hneh tawh a. Sechhun khuangchawi leh kutni vangthla blimhlawpna te pawhin mual a liam zo tawhin chawn leh lam, inthawina puithu leh biak dan âthlak tak takte leh lal leh lal intaina te pawh hmanlai an chang zo tawh a. Khawvel sum par lawrin mi an la tlan rih si lovin, Mizo hnam tlawmngaihna leh aia upa zah thiamna te chuan khawtlang a la tinuam em em a. Khawsakna kawngah mi tin sang hlei awm chuang lova inchen lai hun ngang a nih avangin, rethei nih tibrehawmtu rualawhna te chuan mimir nunah ro a la rel phak rih baw lo. Mirethei leh hak chham te, piangsual leh kuttualleichham te, fahrah leh ramtui-leilo leh tanpui ngai piangte chu an inchhawmdawlin an inpeizawn tel tel thin a ni.

Nula leh tlangval khawlai nun leh an inkawm dan chenin a la thianghlim em em a. Hla lenglawng leh kaihlek zai leh lengzem hla te lah chu an la ching hluar teh chiam baw lo. Sawn pai, inluhkhung leh tunlai ang a fa paih leh fa tibtlak an tih ang te lah chu sawi tur a la awm hek lo. Incheina lam ni se, mahni taksa pianphung tidanglam hial khawpa incheina leplerh leh tevê, nula awmeu leh puipun nikhua chang a lo intekrek leh nula zu in lah an la awm si lo. Nu leh pa ngaihtbiam tur chhuanlam zawng chawp a zankhua khuaa nula rawl leh sibhnip, khawlaia tlangval hmuh ngei tur a nula inlar parh thin pawh tumah an la awm rih lo.

Kohhran lamah ni se, pawl hrang hrang a la awm mumal lo a. Khurbing leh inchawm, thiante inhmuh sakawlh leh pawl dang sawi chhiat pah a Kohhran Member zawn ching lah an la awm na rih hek lo. Tunlai a inti-thlaraumi ang leh zawlnei thu dawng thei pui pui ang te pawh chung hun lai chuan an la tam rih lo, ti ila a sual hial awm lo e. Nula leh tlangval lahin Kohhran hruaitute beng hriatah hla lenglawng sa ngam lo khawpin Kohhran enkawltute pawh an zahawm em em bawh a ni. Chuti ang hun thianghlim leh nun mawi tak karah chuan Kapthuama chuan tlangval nun a rawn tan chhuak ve a. Khawtlang a tlawmngaihna nun rorelna karah a nu a sun a. Chu an chhiat tawh chungchangah chuan an chungah thenrual an tha em em a. A nu ruang thlak zana a pa lawmthu sawi pawhin :-

“Pang a dam a, mihringin ngai kan awh rih t̃êk t̃êk chhung hi chuan, mite that dan hi kan lo hre phak lo a lo ni. Tute mah hi neih sum leh tha leh zung a kan lawm zawh loh tehlu nen, amah upa tawng takin ‘laia nâ, mei bula nâ’ an tih chu a lo dik tak meuh meuh zawng a nih hi. Tun tum kan chhiat tawh thu-a heti khawp a then leh rualten min tuam mawi a, hum leh sin nei lo awm hauh lova in rawn chuangkai ka hmuhin lawmthu sawi dan pawh ka thiam zawk lo. Keini chhung lah hi inlengte lo hirhawi (huinai) dan kan thiam si lo nen, zahthlak pawh ka ti. In mi hmangaihna leh duhsakna lantir zozai hi kan nu hmuh ve-ah leh hriat

ve atan ka va it em! Upa-in, 'tampui mitthiin unau lainâ a kai chhuak a, mikawlh sakawlhin pasaltha a puang zar' tih zawng zawng nei zovin, kan nu min boralsan hi, kan chung a mite thatzia kan lo la hriat ngai loh min hriat chhuahtirtu leh min hmuh fiahtirtu darthlalang thatber a ni a nih hi. Tun hma kha zawng a kan thenawm khawvengte chung a kan lo bengvar loh thinzia te ka ngaihtuahin zahthlak ka ti tak meuh meuh a. Nula leh tlangval ni se, kan ina mawilova inrawn chuangkai hmel ka hmuh te hian.....," a hnuk a ulh ta a. "Aw le, ka lawm em em a ni, i ti mai teh ang. Ti hian hlim takin i zai ang u," tiin lawmthu a sawi a.

Kapthuama te inah chuan hun rei fe chhung chu inriak-tlangval leng haw hma hian paho hi an chuangkaiin an titi thin a. Chung paho zingah chuan pa titi hre tak pakhat 'Khuangapa' an tih 'Zuluaiia' chu a leng ve thin a. An hlimpuuin a titi chu ngaih-nawm an titlang thei hle thin a. A len ve loh zan chuan koh tak nâp khawpin an kim lo hian an inhria a. Zan khat a titi leh lai chuan an khawchhiar chuan, "Khuangapa, kan thu dang a lai chuan, nichin a kan titi kha han chhunzawm leh ta ila. 'Ngamtawna' i tih kna i sawi hmangah lal pawh chu a va han ang em?" tiin a han zawt a. Ani chuan, "Em maw ni dawn le, hmakbawsang thil ngang a ni a. Upa titi bak hriat nei hlawn hek suh i, lal pawh chu a lo ni fa-hmiang. Mahse lal a nih leh nih loh lam ai chuan dawthiam leh ram-palai-lenga chinghne ho zinga tel ve mai mai thin ni-awm a an sawi te hi kan hriat lar zawk chu a ni.

"Tin, a in-hmun ni-a an sawi te chu a lo ni tak ak ngai te a nih chuan, lal pawh ni thei meuh a mawi lawng a nia lawm. A khua leh tui an sawi lah tun can hre hlei lo a. Chuachhapah, nikhua te a lo rei akah hi chuan, zia a engmah vawng ve ta lo chu, nhrilh chhawn, titi a inrochung chhawng chho mai nai ngang hi kan ni a. Kan rual û-ten an sawi dan huan, Ngamtawna chuan farnu pakhat a nei a. Mah-e a nu chuan nausen buchip anih lain a thihsan i. Tichuan, an pa ho chuan an inhnuk tlang ta a. An unau an leikan deuh hnu chnan an pa chuan nupui lang a nei leh ta a, nuhrawn an hrawn ta a ni. An nuhrawn chu Ngamtawna te unau chungah chuan a ual em em mai a. A fahrawnte pahnih chu a ngeih hei ta hlawl lo a. An pa lah chu a thaibawi em nai bawk si nen. Tichuan, Ngamtawna te nuau chu hnawt chhuak ta a. An unau chuan pan tur chuang ire hek lo, ramhnuaiah kamrah leh hnah nêrn ringn an vakvai dun ta rek rek a.

"Hun khawrei tê an vahvaih dun hnu chuan hinghne rual nen an lo inchulnel ta a. Chinghne ual chu an intun nunna bul leh an kutke ber a ni a e, an tia lawm. Chuta tang vek chuan dawi te pawh thiam ta-in an sawi ngai hi. Tin, tuna 'a in-hmun' an tih lai chu nangni chuan in la hmu ve thei lo ang a. Ruanzawl khaw nula hmeltâ phhingpuii te khua atanga Tawi tlang hawi a kal el a, Buanzawl thlen hma hret a Khawhreng peng ul deuh maiah a ni a. Mual pawng in hmun ni-

awm fahranin a la lang a. A mual pawng thut vel te chu lungrem kual ni-awm tak hian a la awm a. Chumi hnuai hret a mualthut chiahah chuan 'a ui no neihna' an tih pawh tlem a chhim-thlang hawi hretah, puk ang reng, ui no neih nan a remchang fahranin a la awm a sin. Tun thleng hian 'Ngama ui no neihna' an la ti ta reng nghe nghe.

"Chuti lai, 'Ngama ui no neihna' an tib thlang chu kham a ni a. Chu khamah chuan a lawm nula hmeltha Rothluaii a zuang thla e an tih, thu ngaih-nawm a tling a sin. Tuna Hualtu ram 'Vuta hmun' an tih tih lai a Vuttaia a lal laiin a khaw nula hmeltha chu Rothluaii chu a ni a. Chutih lai a Vuta khaw tlangval chhuanvawr Suakdailova nen chuan an lo inhmel duh ta a. Chutih lai chu Vuta leh Vancheng lal, Lalpuithanga intai tan tirh lai a ni awm e. Vuta chuan tun a Sangviala khua Sialhau ram a 'Buanhmun' an tihah chuan ram zawn tumin khaw thar a sat a. Mahse a hmun sah sa-ah chuan Vancheng lal Lalpuithanga chuan a lo kai khalh ta mappek a. Chutah le, Vuttaia thirrimin a tuar ta lo 'E, e, ê,..., kan inhrawn dawn zu' nia le," tiin ka luih a tum ve ta a.

Mahse Lalpuithanga chuan a tuar leh ngam si le a, ama khaw pangngai Vancheng (tê)-ah a kir leh ta a Chutia Lalpuithanga khuate let leh chuan Vuta khaw silai awlan puakbung hi an lo hawn daih mai chu niin. Chumi la let leh tur chuan Vuttaia leh Thawm

vunga (Thawmvunga chu Vuttaia te unau zinga upa ber Lalpuiliana fapa Lalsavunga fa a ni) leh ni-chin a kan sawi tak Vuta khaw tlangval chhuan-vawr Suakdailova leh lal vanlung ur a khawsa Hnun-pera nen an pali chuan Vancheng-a an silai tâng chu la turin an thawk chhuak ta a.

A tlangpuin han sawi thuak thuak ila. An va la ta ngei i ti mai ang. Lal intai sa ngang an nih avangin Vuttaia te haw lam mual liam tur chu Lalpuithanga khuate chuan an kap zui ta thuai thuai mai a Mahse Vuttaia leh a hote chuan a leh pawh an leh-hawi duh lo e, an tia lawm. Chutia silai hial a puah takah chuan indo an puang chu a ni ta mai a. Chu chu 'Chhim leh Hmar Indo' an tih fo thin hming-thang tak rawn intanna bul chu a ni. He 'Chhim leh Hmar Indo' tum hian chhim lam chu Rolura thlah tangho an ni ber a. Hmar lam chu Samthang-Zopui Lallula thlahte tang khawm an ni ber bawk a. Vuta kha Hualtu-ah a la awm ta rih a. Chutia indo an tan hnu lawk chuan Vuta khaw pasaltha-ho chuan rammut an tum a. An zingah Suakdailova pawh a bang bil lo. A tir chuan Thawmvunga ho a thawh tum an ni zet a. Mahse Thawmvunga naulaihrilh a tul leh tak si avang leh, thenkhat an ram zawn tum thlithlai a kalte an lo la hawn hman bawk si loh avangin a awmchhun chu an thawk chhuak dawn ta a.

"He 'Chhim leh Hmar Indo' hi Sailo ve ve indona a nih avangin 'thuthlung' an siam a. Chu an thuthlungah chuan 'Rawlralla inbeih loh a, ralpui chauh a inbeih ni se. Tin, khua inhalsak loh ni

bawk se,' tiin thuthlung an siam a. Chung pasaltha pathum te pawh chu rawlral a kal-awm lek an ni nain, anmahni an huai tlang bawk a, 'ralpui' inchhâl ngat a thawk chhuak an ni. Tichuan, tum ruh takin, vahsan lak lai, thla de chho sepui ki tia a nih laiin an chhuak ta a. Hualtu atangin Tlinghlum tlang an lawn liam a, Tuikual an tla thla leh a. Kawng lo hlir a kal ngang an nih avangin khua a lo tlai dawn ta mai a. Chepnep luiin Tuikual a finna zingzum luikam chang-zawl a riah zai an rel ta a. Khua a thum chhilh chhelh tawhja Chutih lai a Suak-bailova vak hrang lawk lai chu sapuiin a lo chang reng a ni chêk ang chu, an mei chhem eng chin leh chin lo maiah chuan a thum chawrh a, a te thawt a. Chu veleh Kawlthiauva chuan a silai a chuh vat a, a han hmet zui zat a, sa chu a insaseng ta nghal a. Mahse a lo seh fuh kher chu niin, a ringruh a chilh tliak a, a dar phei a thler duai bawk a. Mahse a lo la thi chbiah lo deuh a.

"Anni Kawlthiauva te thiandun chuan an thianpa chu an riahhmunah an suan sawn thuai a. Kar lovah a rawn thaw ri bawrh bawrh a, a chat thla ta nghal a. An thianpa ruang chu an singsa sawk sawk a, zanriah an han ei leh rih tê tê a. Chaw an ei kham fel meuh chuan leng len hun zen zawn a lo ni tawh a. Meichher engah an thianpa ruang dahna tur thangtê ang reng na han dawh dun leh sawk sawk a, a velin an meipui chheh tur thing fawm sa chu an chheh hual a. Chutah le, Kawlthiauva chuan,

'Hei le, kan unaupa lah kan ch  n ta der mai si a, kan th  l tum hi Khua-in rem a ti lo a ni ang e. Kan dinhmun heti a lo nih takah si chuan, nang naupang zawk i ni a, duh thlang la, mihring lah indaih tawk kan la awm a. Pakhat chu zualko kal leh theih loh a ni a, a kal lo zawk zawk lahin a hmun lo nghah a   l bawk ang a. Chuvangin, zualko kal nge i duh, a hmun lo nghah le?' tiin a han zawt a. A   tianpa chuan thlan ngaihna hi a hre lo em em mai a. A rilru chuan, 'Kan pahnih hian khua i nghak var dun mai ang, han tidawn ila, kan tlawm bechhe der chu a ni dawn si a. Han zawn dun ngawt dawn ila, hei ang ram chin hriat loh leh khawthim hnuaiah khawimah kan inthlen dawn bawk si lo.   tianpa ngaihdan lah a ni der dawn bawk si lo nen,' ti-a inggaihtuah chungin a ngawi vang vang a.

"A tawpah chuan, 'Nang upa zawkah thlang hmasa la maw le?' a ti a. Kawl  thiauva lah chuan thlan hmasak chu a tum bau mai si lo a. Nakinah chuan, 'A nih leh zualko ka kal ang e,' a ti ta a. Kawl  thiauva chuan a hmun a lo nghak dawn ta a ni. A   tianpa meichher tur chu a'n phelpui sauh sauh a. A   tianpa kal tur chuan, 'A nih mangtha aw le,' a ti a, Kawl  thiauva chuan, 'Mangtha chu sawi loh, mang chhia pawh kan mang hman ngut n  naw le,' tirilru chung hian, 'Mang tha tha le,' a ti

A hnu-a Kawl  thiauva sawi leh dan chuan, 'Kan   tianpa ruang hual vel a kan meipui chheh a en   that chhung chuan a kiang a nghal  nglutar kung sang lo

tê-ah chuan ka lawnsan thin a. Chutah mei a thin thuap thuap ta maw tih veleh chuan kan sa chu kan bul hnaitê-ah chuan a lo la tawm reng chu niin. Kan thianpa thi bua chu a rawn liak ta hlawp hlawp mai a. Chu veleh lui rallehlam a sahuaihrui bukah chuan kan thianpa thlarau chu a ai tuar tuar mai a. Kei chu ka zuk chhuk a, mei ka zuk tuah eng a. Chuti ringawt chuan kan inveng tlaivar zankhua ta mai a. Sapui lahin kian zai rel hek suh, ka thianpa thlarau lahin ai tawp tum hek suh.

“A tuk chawfak her zen zawnah chuan ralkhat hla tak a thiante silai ri ka han ral hriat ta a. Zan khat a ni na vang vangin thangkhat lian chu a hen a lawm le,’ tiin a thlaphan thu a hrilfak e, zu tia. A thianpa zualko kal pawh kha a kal chak bawh a ni ang, an thian zahova an nileng kal kha, mut hun tih theih deuh thaw a kal a ni na a, a tuk feh khalhin zu thleng hman a. Suakdailova thi chu Rothluaii chuan a tuar thiam lo em em mai a, ti hian hla a phuah a:

*‘Lian khuaah tiandar a ri chiar nghian e,
Lualthli hawktui ang kian zai a rel lo e,’*

tiin a tap a tap mai thin a. Pasaltha ramchhuak rawn hlawhtlin châng te hian, Suakdailova thenrual hluite vek ni hlawm si hek, a rilru a tithar ta thin a:

*‘Phaiah tharsa an hawl mi-u-ten,
Kei ka lungdi Sanu’n chawnbanah kai e,’*

a ti a. mittui tla zawih chung hian ramchhuak ho te chu tuibur a lo theh thin e an ti. Vuta pawhi Suakdailova chu a ui kher mai a, a sa bel leh :



KHAWHAR INAH


khawdaingul ber ngang a ni a, Suakdailova thi chuan a thla pawh a tiphang hle a ni awm e. Rothluaii chuti taka a sun pawh chu a hriat thiampui em em a. Chuachhapah, tun hma laiin a u Lalpuiliana fapa Lalsavunga fanu (Thawmvunga farnu) Lalchawngpuii (Laltheri)'n Ruallung awm laiin a ngaihzaung Chal-thanga a lo sun tawh a. Chekah chekah a âtphah lo chauh a ni mai a. Chu a tunu-a retheihzia lo hre tawh ngang chu a nih avangin Rothluaii chu a khawngaih lehzuai a ni.

“Nichin a kan sawi ‘Ngama ui no neihna’ thlang kam ko-ah chuan theichhâwl a ding thin a Chu theichhâwl chu Suakdailovan Rothluaii a lo lawhpui tawh a. Rothluaii lungleng lutuk awm ngaihna hre lo chu, chu theichhâwl kungah chuan a lawn a, tap chung hian, ‘Suakdailo, i tel lo chuan dam hi ka thlahlel zo ngang lo a ni e, ka thlah fal phal mawlh lo a che,’ tih leh a hnuai kham a zuan thlak a rual a, a thi ve ta a ni, an tia lawm.

“Chu chu a lawm khawthlang bla phuah thiam pakhat pawhin a lo hria a:

*Awmlai vei lo Rothluaii famkhua chang e,
A dungthulin kei pawh ka nu,
Lenglen min theihpui lo, dairial chang ing e,’*

a lo tithlu ve hial e, an tih chu,” tiin titi bengvar-thlak tak a sawi a. Tichuan, inriak tlangval lengte pawh an lo hawn tâk avang chuan Khuangapa chuan, Kapthuamapa, kawng te pawh a kham e, kan mutsan



THLA' PLEINGA ZAN

tawh ang che. Nang pawh i meng rei zawn tam ta a, mut chawlh pawh i mamawh e," a ti a. Kap-thuamapa chuan, "Ka mu nasa khawp a sin, chutih kawngah chuan, ka hah hauh lo mai. Nangni zawk hi a nia hah che u ni, mu tawh u, mu tawh u. A zan tina a len pawh engtin nge in rawn len peih zawk ni. Thenrual in tha a, a chhun a zanin to tawh hi in awm reng a, a lawmawm dan hi sawi pawh ka sawi thiam zawk lo. Chhungkuaa awm lai reng reng nei hman lovin in rawn leng a. Tlangvalho ni se, keini min riahpui a mawi loin chhuat dung khat-in an mu bawk a, ka lawm tak tak a ni.

"Lu han sun a, chhungkua chauh a awm a lo khawharthlak dan, tawng khawlo ni hial suh se la ka lo la hre ngai lo a. Kawngkhar ri rek apiang mai hi inleng tur melhin kan lo melh a. Chhuat dung a tlangval mu ngawi reng fahran pawh hian khawhar an lo bnem em em zel niin. Ti khan mang tha tha mangin mu hlawm tawh u," a ti a. Tichuan, paho inleng chu an chai chhuak ta hlawm a. Inleng paho an tin hnu chuan Lalhlunchhungi chuan an inriakte chu thingpui a pe dan dan hlawm a. Hmun a phiat a, thutthlengte a rem fel hnu chuan tlangvalho chuan mutna an rem ve ta a. Tlangval thenkhatin tapchhak a vaimim rawh an ei laiin, kawm-char tukverh biang ngheng a phenglawng lo tum vang vang tawk bo lo. A thene lahin a tuk a an lawm ho tha chan lova an feh kual dan tur lo sawi tawk awm bawk. A mu hmasa thenkhatte labin an ngaih-

zawng te chanchin zawite-in an lo sawi sar sar hlawm bawh nen. Khawhar in mah ni se an hlim thei phian mai a. Kapthuama erawh chu a khua a har ru hle thin a. Tlangval ni ve tawh mah se, a nu a ngaihna chuan a lairil fan tlata a hriat avangin rilru tak a hlim chu harṣa a la ti deuh a ni.

3. THIAN PATHUMTE CHU



HAN̄THUAMI thian bul berte chu nichin a kan sawi tawh an lal upa fanu Rozami leh Than̄thuami nu, mi ina a awm dawn a pa atana a zawn Rohrima fapa, Laiawrha fanu Lalpiannawii te chu an ni. An inkawm ngeih tlang hle a. Anni pathum an kim tawh chuan tu dang an ngai lo a ni ang e tihawl a ni. Nula an ni a, ngaihzawng te chu neih pawh an nei ta ve ang. Mahse chu chuan an rilru a la tibuai teh chiam rih lo. Tin, damchhung khawsak ngaihtuahna leh chhungkaw phur rihna te chuan a la delh hrehawm baw̄k lo a. Chhungkaw mawhphurhna lah an kovah a la innghat rih na baw̄k hek lo. Anmahni an la hrisel tha-in mihring nun hrehawmna thlen hma, nulat vanglai nun hlimna chuan an hma lam hun zawng zawng chu a la hliah bo vek rih a. Incheina leh an ni tin mamawh mai lo chu lungkham leh enghelh dang vak an nei rih lo.

An thian zaho chu an khawsa thei tlangin, khaw khat tlangchhuak fanu vek ngang an lo ni vei nen. Chuachhapah, an hmel leh an nunin mi a lēm tlang leh zelin tlangval inleng chuangkai pawh an hmu hlawm hle. Rozami phei chu a hmelthatin khual a kai hial a. An khaw chhehvelah pawh a hming sawi pawl tak a tling a ni.

Chumi kum chuan anni thian zaho chu hnuh-kawih tan tirh atangin bang lailaw̄k awm hauh lovin

n inlawm chho ngar ngar a. Chumi kum a an hlawhhma hlawm lah chu a har kum tak mai a ni . 'Kangfim bawh zui loh chu neih leh hunah buh ri a tha duh lo' an tih avang a an theh zui a ni a. Kangfim a nih avang chuan hlo a khat hle mai a. Hlo-tung lam chu a zia-awm fu a. Mahse hlo tê lam, hian leh tangzang te, thuro-bawkbawn leh hlahtha e, â. . . . hlo chi tinreng a awm a ni ber e, silai-lo em tih loh chu. Amaherawh chu, buh ei nei hung a thlawhhma hai ngang an nih hlawm avangin ul chhiat a tul chu tumah an awm lo. A buh-kung hu-ah pawh chu lo aliam beisei leh turin a leilung awhin a keng bik tawh lo.

Ni khat chu anni lawmho chu Rozami te lo-ah n feh a, hnuhhrâm thlawh lai a ni a. Thlâmchâr nualah an bung a. Chutia an bun lai chuan an amchang mawng ngawpuiah rengchal a rawn hram a a. Thanthuami chuan, "A...., chu! rengchal a ram tawh," a tithuai a. Rozami u (mipa) chuan Dawthei lawm hriat hun an ti reng a lawm, in awthei tihna a nih mai chu," a ti a. Thanthuami huan, "I hre ve tho si a, nang pawh i dawthei ve ho tihna a nih mai chu," tiin a chhang a. Ani huan, "Dawthei lawm, an ti miau si a, kei chuan awm nei ve hek lo i, ka dawthei ve lo tihna a ni nai lawm ni?" a ti a. Pianmawii chuan, "Dawthei awm an tia mi? Lawm dawthei an ti zawk a sin," lo ti a. Rozami u vek chuan, "A eng a pawh hu ni se a that loh tak reng reng chu. Â.....,

Mawii, hei laksâng ka bmu, nang han la teh, eng ang hmelpu nge pasal i neih dawn?" a ti veleh an vaiin hmasir lamah chuan an pheï ta dial a.

An lawm tlang khawp mai a, Thanþhuami chu a chuhhelh viau lehngal a, "Khawi maw, keiman ka la hmasa ber ang," a ti chuk chuk a, a han la (pawt) ta a. Hang rin ren, tê tak tê, harh deuh mai hi a'n pawt chhuak nalh a. An lawm khawp mai a, an nui dar dar a. Chutah Rozamin a han la ve leh a, lianpui var hleg hlung hi a han phih chhuak ve a. Thanþhuami chuan, "Ka hre mai," a lo ti a. Rozami chuan, "Awi, i ti mak þhin, i hre awm lo em mai i tih te chu Mawithiani a lawm," a ti a. Pianmawii chuan, "Ni e, keimah vek, keimah vek, 'V' tih lam te chu min dem phal chuang hlei lo ang e," a lo ti nghar nghar a. Tichuan, hmalai chawlh an nei zui ta a.

Rozami u chuan, "In ramtanna a rei tawh teh-lul nen blo thlawh pawh in la thiam lo ka ti, mi nek reng reng in tum lo a . . .," a ti hman chauh a Thanþhuami ta pek lah chuan, "Chutin kan nek i duh ang tihngaihna bre hek lo i, in nu nek chauh hi emaw i duh kan tia lawm," tih leh a inring lo chu a nek thut mai a. A fanghma vel lai tla tawp khawp-in Rozami u ding awn þei tawi chu a nek kat ta awn awn a. Thanþhuami chu a nui tlawrh tlawrh a. Rozmi u chuan, "Hma ka han tar hian a fualah in dawn ang a, ka rawn tawlh leh hun a ka dawmna turin hma min pe zel ang a. Tichuan, lehlam hma-



THIAN PATHUMTE CHU

sir kan nek ve leh thung tur hi a ni ngai a,,” tia a sawi lai chuan Thanthuami vek chuan “Leh lam hmasir chu tu nge ni a?” a lo ti thuai a. Rozami u chuan nui tat tat chung hian, “Kan nek chung zelin anin hma a han tar ve leh ang a. Tichuan, a rawn tawlh ve lehna turin keinin hma kan chhawp sak zelah a rawn dawm ve leh thung tur hi a ni ngai a. Nangni alo a, mahni hmazawn zawn a thlawh ngawr ngawr mai te chu, hmatung a hma kan la a nih si loh chuan hlo thlawh a sawt ngai lo, kan then tawn tur a ni ngai,” a ti a.

Thanthuami ta pek chuan, “In lo a har em a nih hi, mahni zawn a kan thlawh lohin tu zawnah nge kan thlawh ang? Chuti ang a then tawn te chu a thiam pawh kan thiam hlei nem, then tur pawh kan neih ve loh hi. Mipa chauh hi then nawlh nawlh ula a ni mai,” a han ti chu on nui ta dar dar a. Pianmawii chuan, “Thuamthiani hi chu i va han zak thei lo,” a lo ti a. Ani Thanthuami ta pek lah chuan, “Eng nge, then tur nei ve miao hek lo i, nang i nei a law?” a han ti zui lehngal a. Rozami u chu a nui char char a.

Chumi kum chuan an khua-ah inkhawmpui lian (Presbytery) a awm dawn a. An thian zaho chuan an la hman ngai loh avangin an nghakhlel hle mai a. Favang thleng thuai thuai se an ti hle a. Hlo thlawh lai apang chuan an hman dan tur chu an mahni rel relin an rel lawk a. A rana rana lo mah

nî se, inkhawmpui turin an inbuatsaih rilru deuh réng tawh a. Pawhchhiat hun a hnai ta a, an hlo thlawh apiang chu thlawh leh tawh loh tur a ni zel tawh a. Kum tir aţang a an nghahhlelh pawhchhiat lengder hun chu an thleng ta nge nge a. Hlo thlo fuh deuh deuh chuan lo an zo ţan ta zauh zauh a. A la zo lote lahin pawhchhiat tih takah an thlo uluk duh tawh lo a, an phulubat mai mai tawh a.

An buh hlawm lah chu a kung thu-ah ngat chuan a ţha em em hlawm ţheuh a. Ruahtuiin a zir a, zuva-in zah a ngaih chuan, khawtlang tumah khual kai lova chhêk kalh thei hmel an pu ţheuh hlawm a. An buh-kung hlawm lah chu : Buh-fabêl tawi hmek hmawk, puan veng awm lova fai ţhah mai leh tâl lian hreih hrawih, hnah hmawr ro fahran pawh awm lova nung hliam hliam vek mai a ni a. A thlawh laiin a har hle hlawm na a, a kungah chuan an lawm hlawm hle mai.

Ni khat chu Lalpianmawii-ten lo an zo dawn a. Ani an lawm zing a chhungruah ber leh thawk zo ber an nih avangin an phur tlang hle a. In aţang a feh tur an chhiar pawbin sawmthum dawn an chhiar thei a. Pianmawii te lo zawh tuk chuan Rozami leh Thanthuami chuan phurhpui tur a awm ringin a rem lo a rem lo-in Pianmawii chu an sawm kual a. Phur tak leh pheikhai zang takin Pianmawii te lo zo tur chuan an inzui liam ta a. Chumi ni chuan khua a ţha em em khawp a, vãn dum chu a lang thiang kul

up mai a. Tlang tinte lah chu bawmtu khawmei
omei) pawh awm lovin a lang thiang tharlam surh
an a briat a. Tlang hla tak tak chen chuan a lo
nai ta beuh emaw tih turin a lang Chiang lehzuol

Hla tak a tlang sang zual bik te erawh chu tlang-
al-chhumin a chim rual hmuk tih mai loh chu khawi
angah mah chhum hmuh tur a awm lo.

Chumi ni chuan van chu thiang hle mah se, tlai
mah ruah a sur dawn tihhriat reng hian chhim-
thlang van mawng Pamânga bahzar chu a hnim kual
raih thung a. Chung lam boruakah Chawngtinleri
puan bang vamur an thlawk siau siau a. Thlawhlai
be-ngul ler a thuro nupa fu thiang inthlahlel chu a
hnai zo sa lovin, hram kurr kurr chung hian an
inngheng hnai seuh seuh a. Thlam-tlaitlan a zohniar
leh zoarchhuang te chuan an dam chhan an mawina
te chu furpui leh ruahtui tlak chhung zawng lo roh
tha-in lo thul-khung bo mah se, fur hnawm thlah
liamtu van daifim leh favang khaw thiang karah
meuh chuan, an duhawmna par chu pho lan tumin
an inpuahchah tan leh ta. Derhken leh par dangte
pawh, khaw hnawm chhung zawng a an zungzam leh
lairil a mawina leh rimtuina awm ngai lo kha, Sep-
tember thla fang meuh chuan, Siamtu ruat angin
nungcha leh mihringte hmaah an zepui chu an rawn
puang zar tan leh tawh bawk a ni.

Chhim thlifim leh hmar thlifim a lo tleh a. Zau
tin buh kung a khat mual leh tlang te chu tuipei

fawn vel ang maiin a rawn chhem fawn chhawkawlh
 hlup hlup a. Buh thli chhem nghin fawn ri hlau-in
 thlawhlai buh kara chhawhchbichip an thlawk chhuak
 a, thlawhlai kangpar tang ro-a fuin an mei an phut
 ngang ngang hlawm bawk nen. Vau ngawpui lamah
 ni se, favang nghakhlel em ema a hun hma hmaa
 lo hram rengchalte chuan an hun tawitê chu zai a
 tihkhah tum ang hrimin, zai tlaivar lam chu tum si
 lo hian an lunglen hla hriat chhun hla khat chaub
 chu an lo kiupui ve vawl vawl a. An fukna thing
 kung pangah ni se, dawlrem tai-rângte chuan mi hla
 lak pawh barah khawn chuang hlei lo leh a mawi
 leh mawi lo pawh thlu chuang miah lo-in, mahni
 aw neih ang angin a lo inpawt te ve tuar tuar a
 Chu hun hlimawm tak chu a tuate pawh chuan hlim
 em em-in an awi mual liam leh dawn a nih chu.

Chawfak a lo hun ta a, zau dang lo zo hmasa chu
 inchei takin an haw ta hlawm a. An rawn au chuah
 chuah a, an feh-em tlang a derhken leh zamzo leh
 sappui (sap-pangpar) têt an thiah te chu a lang sen
 mawi hlawm kher mai. Anni Lalpianmawii te lo zo
 pawh chu thlâm chhungah leng hek lo. Thlam leikâ
 leh thlam hnuziah te chaw an fak zawh chuan hlim
 takin an haw ve ta a. Tlang kawngpui an han
 chhuak a, kawng kam lungpui chungah chuan haw
 hmasaten anni lawm-ho an chhawltuaina fanghma
 tai leh a tuai te an lo dah tlar that a. A pangah
 te chuan a neitu tur hming kaihtawiin an lo ziaq
 bawk a. Kal lam a an tiam ang a di-hnah suih a lo
 chhawltuai tawk lah bo lo, hlim takin an kal ta
 ze a.

4. INKHAWMPUINA LAMAH



KAPTHUAMA pa chuan zan lama a mang-
ah an nu a lo hmuh avang a khawhar tak a zawi
tê a zai chung zelin mei zing a chhem a.

Aw, van Jerusalem thar mawlah khian.

An kal ta hmangaih lenrual lungduh.

*Tah chuan inthenna reng reng a awm tawh lawng,
Lawmin kan intawh leh ang châtuan a tan,'*

tiin. Tukthuan ei kham chuan an pa-fain lo lam
singsa turin an kal ta a. Buh chu a lo tulzum nual
tawh a. A thente erawh chu 'a chawngawi lu' an
tih ang leh 'a nghapui mei' an tih ang chauh pawh
a la awm a. Anni pafa chu mahnilomaha an khaw-
har rilruk tehlul nen, thlâm an zuk thleng chu a lo
khawhar lehzual hian a hriat a. Thlâm chu a lo
thing thiap tawh a. Kapthuama chuan thlâm-nam-
thlak chu a han hawng a. Fur laia a lawmou ngal-
zem chhia bangrel kara a zeh chu mau nget phut te
chuan a lo tlak paw tak thir ther a. Thlamtlaitlanah
a han ding vang vang a, ri te lo leh zau dangte chu
a han thlir vel ruai ruai a.

Chhibungte chu a lo par chhing chheng tawh a,
Chhibung par a hmuh chuan a rilru tê tê hian,
'Nghatui thar a lut nghatun hi a ni maw kha, chhi-
bung par a beh a, a haw thin an tih kha,' tirilru
neuh neuh chingin an thlâm vel chu a hriat a. A
nu a theih lailawk leh deuh hlek lai a kangvara a

zuk feh hram tum a, sawntlung-êl a zam tur leh changtual-lei lai deuh a haite leh chawnteum a tuh te chu a lo rah thiah thiah hlawm a. Chawfak khama a nu haw turin, "Thingtuahah an la duh ang e," ti-a thlâm kawt khiangpui kung a thingkha ro a tun sak te pawh, amah a boral leh tâk si avang a an tuah leh phal loh chu a ngai tê-in a lo la intung bawk a. Chutih lai chuan chung lamah muvanlai nupa hi inchhaih banlek zauh zauh chungin an hram lauh lauh si nen. Thlâm vel anthurte chu an par vi-ve tawh hlawm a. A tlantu khawichhur chuan a kawkel luhkhungin a chik nger nger bawk a.

Kapthuama chu a khua a har hle mai a, a rilru tê tê chuan, "Aw, muvanlai-ah te khian chang thei ila a nuam zawk dawn law maw ni tak chu aw.....Hringnun leh taksa khawvel zet hi chu a va han hrehawm tak em ! Kan hunte lah hi chhum hlim leh romei ang lek a saruak, thlasik thiauchhum ang mai a thlawk bo leh mai thin a ni si a. Kan thlakhlel'ber kan damchhung nunna te lah hi meisi leh puarpawlêng tluk chauh a hnuk fei lo leh zungzam pawh nei lo a ni a. Kan tisa put lai nite lah chu: Manganna te, inthenna leh mittui tlakna nen kan hmang a. Natna leh thihna te, indona leh chhungkaw inghirghona tuilian te lah chuan a chhun a zanin min chim reng mai bawk si tak a. Aw ., ka lo piang ve kher kher hi chu..," tirilru vawng vawng chungin an pafa chuan pawlbuk khum chhuat leh hruith tur mau pu turin chhehrâp an lut dun ta a

" thlenah a pa chuan thlâm hnuaî daihlîmah mau chik a, ani Kapthûama chuan kal pah a chhchhawkw suam chung zelin vau sial pah a perngo kaih ghal turin a kal leh ta a.

Kapthûama pa chu fapa mal a ni a. Farnu pa-
 ni a nei a, chung a farnute (u-te) pathum chuan tual-
 chhungah pasal an nei a. A chhang chiah an tlum
 ber erawh chuan khuandimin pasal a nei thung a,
 chu chu Thanthûami nu kha a ni. Tualchhungah tu
 leh fa a thukpen thliah thluah a, chhungkaw hung
 leh mi piang chhung tak vek an ni nghe nghe a.
 Anni Kapthûama te chhung lah khawtlangah mi
 challang tak an lo ni nen, Kapthûama pa chu mi
 tawng zawk zawk lo, a ruk a fiamthu duh tak si,
 pasalthaa chhal tur chu a ni hauh lo na-in a fapa a
 hming a 'Kapthûama' tia a chawi nachhan pawh thu
 ngaihnaawm a tling a ni.

Kapthûama lah chuan a pa a rawn phawk
 (khawk) leh em em a. Hmelah a nu a chh'in a, a
 tha zawk bawk si a. Nula hmelhriat pawh a hlawn
 hle na-in tlangval lerh a nih loh avangin amah rawn
 ngainatu deuh leh zarpaktu tumah tihlawm bik a
 nei ngai lo. Nula pakhat erawh chuan a lung a ti-
 leng ve deuh hlek na-in a tilang chuang lo. Nulat
 tlangvalna kawngah a pi leh pute hovin an ziln ngun
 hle thin a. Amah a tlangval dawn chauh bawk a,
 nupui pasal hawiin rilru pawh a la hmanng ngai hauh
 rih lo. Mahse a han ngaihtuah ve chang chuan, chu-
 tia nu ho loh a khawsa an nih chu a hrereng a. An

in chhung dinhmun a thlirin thlan sual a hlau rilr hle thin. Nula khual-chhawng tha pur si, pas neih veleh a an nulat lai zia nen a inang ta lo lutu hmeichhe tuar hlelhawm leh hrawn thiam harsa, pa sal te lak hran tum tlat mi, mahni ta bil leh ku kawih hre hlur si, mahni in lam a chuangkai zin dup mi, a luling thei tawh a an in leh lovin a zi ve fu si. Nupa kar tualthu chhiat chang a ta pur chung a mi tawng ngaithla baksak lova anhl chham zuah zuah thin hmeichhe sual. Ei leh bar pasal te chhung thlim a mahni ei intuituah ching pasal te chhungkaw thil nu leh pa in lama a ruk a ral a paipawn ching. Chuti ang chi hmeichhia mawlh chu Kapthuama chuan tawn a hlau ber thin a ni.

Anni chhungkua lah chu an nu dan lai atan. reng a chhungkaw blim thei leh inngeth tlang, pa khatin hritlang hnaptui a tawh chang fahran pawh a tumah inngaihthah lova inlaint thiam leh inngaih tuah tina mi an ni si a. Chhungkua chauh pawhin awm se, fiamthu phawsawlh nen, nula tlangval an nih hnu-ah pawh indem fiam a nui hawk hawk tlang thin an ni si a. Lenna lamah ni se, thenkhat unau ang lo tak a nula rimnaah fahran pawh insawisa a. inkuah thle bawh bawh thin an ni. Hre ngai lo tan phoi chuan unau leh chhungkhat an ni lo ang e, tih tut khawp a inkawm ngeih tlang vek an ni. Chuti ang chu an chhungkaw nun dan a nui avangin a pa in a fate a zibna-ah pawh. Nuthlawi tlawngawi remchang te chu la hmai bik hauh mah suh se, a

ate hlim loh hlau-in tâng dang vuan a nupui neih
 eh pawh a tum tawh loh thu thlengin a lo sawi
 lawh hial a.

Chung thleng thlenga a pan a lo sawi tâkah
 ohei chuan Kapthuama chu nulat tlangvalna kawngah
 fimkhur lehzual a. Tualchhungah pawh nula tih-
 lak fu fu chu an awm tak na-in, an in chhungkhura
 hruai luh meuh tur-awm nula tumah a la hmu rih
 lo. Ani chuan tlemin han saisikin mitmei hmuh
 deuh se zawng a tuate pawh chu a huphurh hauh
 lo. Mahse 'ngaih varung thâwng' an tih ang lek
 fang lo chuan tu lakah mah a hnambet tak tak thei
 rih lo. Hmel eng nei ringawt a duh chuang lo
 a, rilru ngil leh nuntlang deuh ni se. Hmelin
 'puak' lo ti ta lo deuh pawh ni se, â chhe lutuk lo
 leh hnazal mi deuh tal chu ni se a duh dan a ni. Hmei-
 chhia lah hi tlem a hmeltha deuh lah an awmmawh
 duh viau mai lehngal a. Zaidam tak lah hi hna an
 zal vak lo duh emaw a ni a, taima tak lahin thin an nei
 dub riau bawk si nen. Tawngkam an thiam poh leh mi
 rel an ching duh a. Chung mihring khuarel kalhmang
 chu Kapthuama chuan a han dawn velin a tiluhai
 ang reng hle thin a ni. Nula zawng zawngte lahin an
 lenlai hun na na ra chuan an pianpui loh nun ze mawi
 an hawh chawp chu inbelin, an pianpui zepui thukru-
 in mîpa lêm zawng hlin an khawsa theuh bawk si a.
 Fimkhur a ngaiin belh chian an tul hle thin reng a ni.

Vangpui tak tak a lo thleng ta a, thlasik rim a
 lo namjin 'pâng zarah thlasik arpui tiatin a tum' an

tih hun pawhchhiat lengder lai pawhin mual a liam rei leh dawn ta mai. Buhpui hmawr a lo hmin tan a, 'airuah' a lo sur a, furpuin mual a liam tak tak ta. Zongam (buh) pawl a tla tanin buhpui a eng huau tawh a. Chutih lai chuan Kapthuama te unau chu a ni te khua-ah inkhawmpui lian 'Presbytery' hmang paha a ni te kan turin an kal dawn a. An kal dawn tuk chuan 'nghavang lunglen' khua chu a tha em em mai a. Ni chhuak a mawiin khua a thiawng vawl vawl a. Anni unau zin tur chu kawm-char lamah an insiam malh malh a. Chumi tuk chuan ar an talha a pain a vil a. Tap kun bâwm dova thuin a tui hnih mek lai chuan Kapthuama hnenah chuan, "Bawiha, hei in unau-in in zu zin ve dawn chu a ni a. I ni te inah ai mahin i pa Laiawrha te inah innghat u la kei chuan ka duh zawk. I ni te chu i ni te an ni a, innghat ta lo mah ula an vui hauh lo ang a. I pa Laiawrha te erawh chu ler deuh chan an chan avangin an vui ru palh ang e. Phungthluk hi laina siam nghehna bul a ni a. Mami chuan a hreh deuh tak leh nang tal chuan i sahmim bang reng reng ang che. Chaw te phei chu in duh-na lam lamah in ei ang a. Lam a hla-in kan intlawh pawp zen zen thei si lo a, tlawh chhunah chauh zawng an bengvar hram hram ngai e.

Tunah chuan nula tlangval in ni ve tawh a, zah thu lah cheng (awm) suh. A tuate pawh mah-ni in ang vek a khawsak theihna tur an nib hlawn khu. Mami, nang pawh nula i ni ve tawh a, mawi


lak leh fel takin an zu khawsa ngai aw. Heti ang inkhawmpuina-ah hian nula hmingchhia leh mual-pho ta hi an awm leh zauh thin a. Mi sawi hlawh câwngte hian i khawsa palh ve hlahu ang nge. Aw e, hei, chaw ei ka peih a, in bmanhmawh deuh ang e, siam ula i ei tawh ang u hmiang," a ti a, chaw an ei ta a. An chaw ei lai chuan, "Ka sawi tawh ang khan, laina dangte pawh in zu tlawh chhuak vek dawn nia. Bawiha pawh tlangval hawk-lak leh intivei rual ngang hi in ni a. I ni te khua phei chu zu a tam si a, i lo zu in ve dahruah ang e. Inkhawmpui tur a kal in nih hre rengin inkhawm thlâthlam hauh lovin zu awm ula. Inkhawm hlan a veng kilkhawr a lo interek hran te, hla dukdak mang hlei lo khawlai a aupui vak vak mi nih te hi miŋtha awm dan a ni ngai law. Khaw-lai a hmel lang tam-mi nih te leh kalna lam apiang a hmuh tur a awm te hi mi lawilo thawmhnaw a ni ngai.

"Tin, mikhualna-ah reng reng thlenin te chaw eisan khawp a len rei te hi ching hauh bawk suh ang che u. Tunah le, in ingghahna tur te mi dang an ni lova a chuti zawk pawh a. Chuti phei chu ni lo se, mikhual nih te hi thiam a ngai a sin. Mambawih, nang pawhin i tih ve theih tawkah an duai ngai lo e aw. Bengvar chhuahin thlen-in te an puibawm seuh seuh ngai. Buhzing den leh tui-sik khai thu-ah te, chaw ei siam leh thleng seng fahranah pawh an in thiarfihlim mai ngai lo, i

thiam ang angah mawngzang takin an che ve seuh seuh ngai. Tih mi biang-biak hi pawng zah chi a ni ngai lo. Mi mawl biak leh kamtlawm lutuk te a tha lo ang bawkin pâwng tawng tui tam duah lah a mawi nahek lo. Tawngkam thiam lutuk te pheï chu naupang tan a mawi ngai lo. Mahni kum phu tawh a tawng kam hman thiam te pawh mi fel awm dan vek a ni ngai. Ka sawi tawh ang khan— Mi in koh reng rengin u tur chu û-a koh a a, pi leh pu tur lah chuti bawh. 'U-a' 'U-i' intih te hi ching reng reng suh ang che u.

"In û dawn a nih leh tha taka û-a koh mai tur, tichuan, mi an lawm ang a, nangnin fel in hlawh dawn nia. Tin, i pu Laiawrha te leh i ni te hnenah khan, pawltlak veleh i nu lung hi ama vawh vulh ngei a phun kan tum thu rawn hrilh u la. Tunah a rana rana lo la ni rih mah se, a thuphung talin in rawn hrilh dawn nia. Kan tithei ta a nih leh kan la inhrilh leh a khêl chuang lo ang. Hei, hna a tam em em a, hman leh hman lo chung a kal in nih rawn hre reng u la. Thawhtanni-ah chuan eng emaw rokhawh tak bumrotu che u a awm a nih loh chnan hawn in rawn tum ngei dawn nia. Kan ring thar tur lah chu favangah kan vat ve hman ta si lo a. Tunah mang kan chhâl a la ni chauh a. Lo lam tulih min nang tep tawhin i nu lung lak kan la tum si. Nekkum lamah lah chuan kan inchung hi bawh lo thei kan ni tawh bawh si lo a. Chu lo rengah pawh ka khua hi a har ve reng reng a,

INKHAWMPUINA LAMAH



thang chhung pawh hi ka huphurh vhu a ni
ti a. Chaw ei kha chuan anni unau chu inkhawm-
ni chhim tur chuan a ni te khaw lam panin an
am dun ta vang vang a.

Thanthuami chuan thleng hmasate tawngkam
atengin Kapthuama te unau pawh an lo kal ve ngei
dawn tih a hriatin nau a pua a, kawtchhuah lamah
a lo va hmuak a. Kar a hlat deuh avangin an
thleng tlai hle a. Thalai an ni na vang vangin
inimmulah an thleng ve tawk a. An inhmuh chu
an hlim em em a. Thanthuami leh Hlunchhungi
phei chu an inhmuh veleh an inkuah chuk chuk a.
Unau tak tak ni hlawm mah se, kar a blat bakah
langdung hrang, inkal pawh remchang lo tak a ni
, an inhmuh khât hle a ni. Anni Thanthuami te
awh chu pi leh pu te khaw lam ngang a nih avang-
an an zin zauh zauh zawk a. Kapthuama te erawh
hu an puitlin ve hnu-a an zin ve vawi khatna
chauh a la ni, Thanthuami chuan, "Thuama, nang-
ni unau te chuan khawi dang in pan dawn em ni?
Kan inah tur ngai ngar a sin ka lo ruat che u," a
ti a. Kapthuama chuan, "Ni lo ang, duh leh Chhung-
awihhi khawsa se, kei chu ka pa Laiawrha te inah
a inngbat ang, a mawi zawk e. Chawhmeh tui
teuh inneih leh min rawn sawm ula a ni mai," a
ti a. Thanthuami chuan, "Kan mikhual hlei lo te
hu ka va han ko dawn lo che em. I zah loh leh
nangma thu-in i lo kal ve anga a ni mai. Kan
leh pawh inngbat duh hlei lo te chu, Mawithiani

te inah chuan hmeh lovin ei hawng hawng la a nih chu," a han tifiem zui ve a.

Thanthuami leh Lalhlunchhungi chu an pêng ta a, Kapthuama erawh chu Lalpianmawii te ina inngat tur chuan kawngpui zelah. Thanthuami hrilh angin a kal zel a. Pianmawii te in a thlen chuan phawk a chhuah ta pek a. Kawngkhar chu a han hawng duk duk a, a aw a tidanglam a, "Ka pu, min lo mikhual thei ang em?" a ti a. Lalpianmawii pa chuan rang mangkhen hian, "Thleng thei e, lo thleng rawh, lo thleng rawh," a lo tisawk sawk a. Kapthuama chu intimikhual tak chuan a lut ta thum thum a, khumai lam thim chin leh chin lo-ah chuan a inngat a. Pianmawii chuan, "I va han inti-mikhual ve, he lamah hian rawn inngat zawk rawh," a ti a. Pianmawii pa chuan, "Tu khua nge i nih?" tiin a han zawt a. Ani chuan, "Lalburha khua ka ni a. Hei, Kapthuama te unau an lo thleng tawh em?" tiin a han zawt ngial a. Anni chuan, "Tu Kapthuama maw, Phunga fapa maw?" tiin an han zawt let a. Ani chuan, "A pa pheh chu tu a nih ka hre lo. Nizanah an inah ka thleng a, 'Keini pawh kan kal ve dawn a sin, kan thleng ho dawn nia, chutia thlenna tur i briat loh chuan, Lalpianmawii te inah a ni ang,'" a ti a. Hei hi Lalpianmawii te in chu a ni si lawm ni," tiin a han zawt khanglang a.

Chutah zawng Lalpianmawii ngaih a tha ta lo, a hmai bul chenah khawnvarin a va en a. A han en chian meuh chuan Kapthuama lo ni rengin, an

pui dun ta tlawrh tlawrh a. Pianmawii chuan, "Eng-ah nge, 'ka tihder e' te chu i han tih-khanglan ni, kan hai thei tak tak dawn che a lawm, zân zân tak che hian, khawinge i thil ah chu," tih leh a ip-te chu sak a rual a, inchâr lamah a khai pheï sak ta a. "Manilomah a kan lo nghahhlel ruk tehlul che u nen, nangmah maiin em ni i lo kal? Chhungbawih i lo kal ve tur awm ang khan inrawn sawi si a?" a ti a. Kapthuama chuan, "Ani chu sawtah ka ni te in lam a pan ta a nih kha, duh leh, kei ka lo thleng a lawm," a ti a. "Chaw te pawh i la ei awm tawp si lo a, 'ka tihder e' te chu i han tikhawtlai a. Chaw ei ka siam dawn nge i insil hmasa duh zawk em ni, tui ka han lum ang e aw?" a tisawk sawk a. Inkhawm a hun mai dawn si avangin chaw ei a siam sak a, chutih lai chuan an mikhual dangte chu kawm-châr lamah inkhawm turin fahrah khawnvar engah an inchei vel mek a. Kapthuama chaw ei kham chu thukpui lam dawhchho hmawrah pathlang lam hawi a meilum hnung puakin a thu a, mei a zu talh talh a.

Lalpianmawii pu, (a pa pa Rohrima) putar pui tawh chuan, "Khawze Taite, lo hawi teh, Phunga fapa maw i nih a?" a han ti a. Kapthuama chuan, "Ni e," a ti a. Putar chuan, "I hmel chu mei engah ka han en chauh teh ang che. E..., i pu i khaw (phawk) hle mai a., Ralthianga hlaub kha zu ni chia, i pa lah khian i pu a phawk fuh leh em em mai a. I kimtlangah Ralthianga siar zawng i nih hi. I pu kha a tlangval lai chuan pa chak a sin a nih.

A hmeltha si, a awm a khauh si. In la pian ve hma daih a i pu (Kapthuama pa pa) te nen a Hmunsang awm lai a kan inkawm ngeih thinzia te tak kha aw.... I pu pawh min tihre rum rum e â. I pu chu ka lawmpa hlun, hming pawh a inko lova 'Lâwma, Lâwma,' inti thin kan ni a. Chhun leh zan inthen hauh lova hriau leh a brui ang mai a inhnuk inhnuk dun thin kan ni a. Aw .., ka ngai hlawm teh thin e a. Anni lah hmuh tur an awm tawh si lo, kei pawhin rei khaw eng ka hmu tawh lo ang kan tar ta, kan rualpui dam sawi tur an awm ta lo," a ti boh boh a.

Pianmawii pu-in mei eng a Kapthuama hmel a en lai tak chuan Thanthuami leh Rozami chuan inkhawm turin Pianmawii an rawn sawm a. Kapthuama tak pheii chuan tute nge lo lut pawh a hre hlei lo a. Rozami erawh chuan Kapthuama hmel, inchei hranpa lem lo taka a chaw ei kham mei eng a Pianmawii pu-in a hmel a en lai tak chu a hmuh-in, Thanthuami te thlanthut ni-a a thlalak a hmuh chu nep tê niina hria a. Chawplehchilhin Kapthuama suai (chuai) chuan a thinlungah vawm bei ang mai a rang leh lalber thupek ang hrimin ro a rel ta nghal a. A jawngkam khat pawh a dawn hma leh wawi khat chauh a phung-hmuh vuai atang ringawt chuan, Rozami thinlung thir ang a khauh a an sawi thin tlangval tam tak lo beidawn tawhna chu: Kapthuama kimtlang ngaihnoheina chuan kawlphe ang a rangin a rawn em tui zo ta a. A thinlung ohhungrihlah

chuan phelh leh rual loh a nghetin hmangaihna lai-
brui chuan suihtakin a pawt zip ta hmiah mai a ni.
Inkhawm turin an thianzaho chuan an chhuak leh
ta mai a. Ani Kapthuama erawh chu a chauh deuh
avang leh a la insiam ve hman bawk si loh avangin
inkhawm peih pawh a tum lo a. Inkhawm hlanin
Thanthuami te inah a ni hnenah a lêng a. A ni
chuan a lo ngai hle mai a, a nu thih thu leh thu
dang eng eng emaw an sawi dun melh melh a. In-
khawm ban thlengin an nî-vahin an inkawm a. In-
khawm ban hau deuh chuan Kapthuama chu a
jin ve ta a.

5. HMANGAIH HMEL THAR



CHUMI zan aʔang chuan Rozami chuan Kapthuama hmel chu hmuh chian lehzual a chàk ta em em mai a, a tuk khua var thuai thuai se a ti hle a. Lenkhawmna lamah te chuan a mit a len deuh reng na-in ani kal ve ta lo chu tawn tur a awm si lo. Chumi zan chuan Rozami chu a muhil thei ta hlawl lo mai a. Mu meng chung a suangtuah-in, “Dumde leh thingthlavar ang lek a hmel mawi i lo pu a nih teh blauih chuan, i hmelma chu khawfingchat leh varʔian ar khuang a ni ang a. I mawina lah chu thimhmul leh unau hmel-haii hi a ni bawk si ang. Mahse ka mit hian eng laiin nge dum leh var a hai a, ka rilru hian a lawm zawng a hriat loh ngai? Mawi chung-chuang chu zan khawthim hian a hliai chuang lo a, chhun ni eng lah a puang-zartu a ni bawk si ʔhin, Thla mang lai khawthim zanthiang arsate chu a eng fiahi ʔhin ang hian, i mawi duhawmna chuan zaninah ngei diptu leh hliai-tu awm lovin ka thinlungah hmangaihnya khawfing a chahtir ta. Mahse ka vanglai nite leh ka dam-chhung nun hi lo pe phal ta tehreng pawh ni ila, lawm tak a dawngtu a lo nih loh teh hlauih si chuan, he khawvel hi ka tan ʔahna zan leh lungngaihnya chhun khawhar mai a chang zo dawn si a. Khawn-var engin thim a lan ʔhin ang a mi dang aia heti khawp a ka thinlung suan zo mihring hi ka tan pekin awm teh blauih se la chuan, thla bi kim hi

em lua ka ti ang a. Kumpui vei chenin chawp-leh-
ailh niin ka hre tawh bawh ang. Thei phei ila
huan, ni chhuabna khawchhak kawlkil khi ka sawn
la-in, a tlakna khawthlang pawh khu a ramri pel
bawh khawp a kham hlat ka duh hial awm e. A
nih leh min lo hmangaih ve ta lo hlah se la. Ka
dam chhung ni hi hnemtu awm lo thlanmuala hmang
tiak nghal law law turin hnutchhiahin a awm ang
a. Ka nulat mawi vena pawh mitthi vuina pangpar
ang lek a ni bawh ang.

“Aw, hmangaihna daifim, amah atang a luang
chhuak chu ka nun chawm turin a malsawmna dawng
tehreng ila ka va han ti em ! Zanin a ka rilru hi
are Chiang ta se, min hmangaih let ve ang nge min
then hrangtu tur ? Nge, lungngaibnain min thungrul
hial zawk dawn em ni ang ? Ka thian thaberte pa-
hnih lah chu a laina hnai ber te an ni lehngal si
a. Aw, hma lam hun hriat lawk lohna hi chuan lung-
ngaihna leh lawmna ramri-ah min va han dah Chiang
tak em ! Ka nulat incheina mawi ber chu ka rin-
awmna hi a ni a. Mahse rinawm a tun thleng a ka
la awm theih nachhan pawh ka duhzawng mihring
ka lo la tawn loh vang mai a lo ni e. Thuama, i
hming ringawt hi ka chhiatpui ta-in i hmengah ka
chakna zawng zawng a kal ral ta. Khawnge, ka han
muhil tak tak tawh teh ang. Ka awm dan hi nula
tan chuan a atthlakin a zia lo lam deuh a lawm maw.
A eng a mah hma a lo inngaihtuah hah lutuk tur
pawh a ni lo e,” tiin, a timuhil thei lotu a ngaihtuah-

na vak chhuak chu ko kir a sawm khawmin, a thinlung lairil a dah tha a thunun tum ranin muthilh a tum ta a. Mahse chuti chung pawh chuan haider rual lohin a rilru-a Kapthuama a lungkhamna chu meichher buk tak ang hian alh hluam hluam rengin a hria a ni.

Kapthuama thung chuan khawvel a amah tihlim thei(tu) ber tur leh mittui titla tam bertu tur hmeichhia nen khaw khatah an awm tlang tih hre hauh lovin a hun chu a hmang mek thung a. Inkhawmpui lian khaw tin nula fuan khawm 'kei ka ni' inti tam tak zingah chuan tlangval ve ta fam chuan a mit a len ang a. Tha a tih ber chung a rilru ngihat mai turin a inpeih ve diam bawk a. Mahse chung nula fuan khawm zawng zawng zingah chuan Rozami pianhmang mawina chuan a rilru-ah hmun sang a la rawn changin a thinlunga a duh ve theih nan a thiam ang tawkin a lakah a la inlantir ang a. A inpumpekna thinlung chu a chawm nung tawk tura a thungruh theih nan a tawnghmang thiamna hmanrua leh a mawina sllhfen te nen a la intar lang ve dawn a ni. Mahse chumi hun chuan la thunun rih lo mah se, a hnaih hle tawh tih a inhre rih si lo.

A tuk tlaiah chuan mual-inkhawm a awm a. Mikhual an thahnem hle na-in khawtual lo tan chuan mikhual ang vek an ni tho a. Kapthuama leh Pianmawii u tlangval, Kapthuama aia tlem a upa deuh zawk nen chuan mual-inkhawmna chhak mi leikapui ah an ding dun a. Nula tha deuh lo kal apiang chu

Kap̄thuama chuan tu nge a nih a lo zawt zel a. Na-
k̄thah chuan Rozami leh Than̄thuami te chu an
lo kal ho a. Kap̄thuama chuan, "A nih khu, Than-
thuami te nen a lo kal khu tu nge? Khu khu a
that ber zawk khu maw le," tih a zawt a. Ani
chuan, "A .., i la hre na nge? Rozami a lawm, Than-
thuami leh Pianmawii te thiaanu ber, an sawi zin
tehlul nen i hre tawh ang chu ka ti a sin. Nizan
pawh kan ina a lo kal ve nghe nghe kha. Kan veng
nula-ah chuan a thatber a kan neih a ni ve reng a
ni," a ti a. Kap̄thuama chuan, "A lo nih tak chu,
a hming an sawi chu ka hre tawh thin a lawm.
Mahse amah tak ka la limu ngai lo a. Khuti takin
a hmel a tha ang tihngaihna reng reng ka lo hre hlei
nem," a tisatlah chauh a. Tichuan, Kap̄thuama
pawh mual-inkhawm mipui zawng zawng chu dah
bova en khumin, Rozami chungah, Rozami chungah
chauh chuan a ngaihtuahna leh mit chu a nhat tan
ve ta a.

Mual-inkhawm chu an bang ta a. Kap̄thuama
chuan Rozami te lam chu a pan ve ta nghal chat
a. Than̄thuami hnenah chuan, "Hei hi maw in thian-
nu Rozami chu? Chibai pawh ka la buk ve hlei nem
he," tih leh inchibai chu an rual a, an kal tlâng ta
a. Rozami chuan, "Kan veng hi nuam i ti awm lo.
Nimin a lo thleng si vawin lamah lah i hmel a lang
nang hek lo, nuam i tih loh hmel em mai," a hau
a. Kap̄thuama chuan, "Nuam ka tikhawp a sin,
nula lah chu in tha tlangin nangni te in lo'awm si

a. Tun hnu-ah chuan lo zin fo tawh tur a nih hi," tiin a han chhang a. Rozami chuan, "I lo zin leh duh chuang hlei lo ang e, chhungte in neih that tehlul nen. Eng lai a i lo zin kha nge i chhunzawm ang a, i lo zin tehlul ang," a han ti a.

Kap̄thuama chuan, "Tun a ka lo zin hi maw le, tun hma te chuan nangni in awm tih hre tur pawhin ka lo la zin ngai si lo a. Ka tlangval ve hnu a ka lo zin vawi khatna chauh a la ni a. Ka naupan lai chuan tithla ve ngawt ila, ka nu hovin kan lo kal tawh a. Mahse tun chinah zawng ninawm khawpin a nia ka rawn mawm tawh ang ni. Ti i la(h), nangnin engah mah min lo ngai duh awm chuang si lo a," tiin a han chhang a. Rozami chuan, "Engah mah kan ngaih dawn leh dawn loh che i hre lawk thei a nih chuan.., awi, mi rilru i hre thei awm. A nih tunah hian eng rilru nge ka put? min han hrilh teh," tiin cho rilru deuh takin a han chhang a. "Hre thei e, mi rilru chu hre thei deuh ka nia sin. I rilru pawh eng dang a ni lo, hmeichhe rilru i pu a, chu aia fiah leh deuh a briat i duh chuan Zami rilru i pu, a dik ang ti raw?" tihpah a awmze nei tak hian a han nuih sak a. Rozami chuan, "I hre dik khawp mai. Mahse kei aiin i la zawlnei lo deuh a nih chu. Kei chuan chu aia chiang zawkin ka sawi thei a sin," tiin a han chhang ve a.

Kap̄thuama chuan, "Chutia i rilru i briat chian si chuan tunah hian eng rilru nge i put? Chu tal chu min han hrilh ve le. Lo zin leh thinna tlak ril-

uñi put leh put loh a thu pawhin rorel dan kan
ham thei ang chu maw le?" t'in a han fiam zui a.
Ani Rozami chuan, "Chutia 'chuan' i hlahv avang
lo zin i hreh pbah dawn a nih chuan, keini tuma
thu-kha hlawh lo 'michuang' kan awma, mi-chuang
leh mi-chuang kan inkawp hlahv ang a, mi-chuang
lo kan ni ve mai ang chu. Mahse lehlamah hian
tute emaw hi an lo thinrim si ang maw le," a han
tiffiam zui a. Kapthuama chuan, "Lehlamah nangni
in lo thinrim deuh deuh theih nan kan lo zin fo
thin ang a, tichuan. kei ka hlim deuh deuh si ang
a, a that dawn khawp chu," a tih lai chuan peng
an thleng ta a.

Rozami chuan, "Naktuk lamah te pawh kan li
inkawm leh dawn nia, chaw ei tui u le," a ti a.
Kapthuama chuan, "Zaninah pawh kan inkawm ang
chu maw le, a nih nang pawh chaw ei tui le." a ti
a, an inpensan ta rih a. Kapthuama chu Pianmawii
nen an kal dun a, Piarmawii hnenah chuan, "In
thiannu hi ka ngaizawng dawn tlat mai, zanin chu
min rawn biak ngei ngei ang che. Hun phei chu
remchang thei se chuan inkawm deuh pawh ka duh
ngawt mai. Mahse inkhawmpui lai ngang hi a ni
a, hun lah, â, min han biak fe la a ni mai e,"
a ti a, in an thleng ta a.

Zan inkhawm ban a lenkhawmna in a an len
ve tak loh avangin Thanthuami te thian zaho chu
Kapthuama te nen, tlangval dang thlim zak zak
chungin Thanthuami te in lamah an kal ho ta a.

Thanthuami te inchâr leikapui thla eng hnuai a an
 thu ho chu an nuṭapa mitmei an hriat thiam avang-
 in a farnute chuan Rozami leh Kapṭhuama chu in
 chhungah an luhsan ta a. Anni Rozami leh Kap-
 ṭhuama chu leikapui hmawr thlang lam tlangban
 vuan a ding dunin an inkawm a. Kapṭhuama chuan,
 “Pianmawii thu ka rawn chah kha a hrilh che em?”
 tiin a han zawt a. Rozami chaan, “Hrilh e, kha,
 fiamthu i thiamawm ka ti ngawt che a sin. Fiam-
 thu mah ni se, thu tak a ka chhan nghe nghe kha,
 a la hrilh hman lo che a ni ang,” a ti a. Kapṭhuama
 chuan, “Kei pawhin fiamthn mai mai a rawn chah
 ka ni bik hlei nem, tunah pawh hian thu tak tak a
 kawm che ka duh khawp a sin. A nih eng thu
 meuh nge i rawn chah a?” tiin beisei nei hmel tak
 hian a han melh a. Rozami chuan nui seihi chung
 hian, “A la hrilh mai ang che,” tiin zak hmel lek
 lek hian a nui leh seihi a.

Kapṭhuama chuan, “Tunah hian ka farnute han
 tingial ila, an thian thaber i lo ni hlaoh bi tihzia
 ka ti em em a. Nang chuan barah min khawn lo
 pawh a ni mai thei a. Mahse kei chuan i mual-
 phona tur a kawm che ka duh lo a, i hmingchhiat
 theihna tur zâwng a pak chhuak leh tur mi lah ka
 ni hek lo. I hminghliaw theihna tur zâwng a ka
 lawng palh pawhin heta i thian bul ber ka farnute-
 ho an awm a. Anni lahin i hminghliaw theih tur
 zâwng a ka khawsak lah an phal hek lo ang. Anni
 tan kei leh nang chu ‘ka ding ka vei’ tih ang kan

ma. Chuvangin, engti kawng mahin kei chuan i chhiatna tur lam hawin khawsk ka tum dawn hauh lo tih lo hre hmasa la ka duh a ni ..," ti-a a sawi lai chuan Rozami chuan ngaihawm tak hian Kapthuama chu a lo melh nghaih a.


Chutah rilru hlim takin Kapthuama chuan a sawi duh chu a bul a han tan a. "Ka hlimna ber tur i ni tih i inhriat hnu-ah chuan, i hlimna ber tur ka tling zo ve ang em? tih hi ka thil hriat chák ber a ni ta. Nangmah tihlimtu ka nih ve theih dawn loh pheh chuan i hnen a thu sawi tam loh hi ka duh zawk a. Min tihlim thei ber tur ni-a ka hmuh che ang a i chhonzawm ve duh a nih erawh chuan, tun a tang a ka hun lo la kal tur zawng zawng chu i tan ka dah vek tawh ang. Mahse i chhonzawm ve duh lo a nih erawh chuan, kei chu rilru hrehawm reng rengin, ka dam chhung hun chu sun liam kumkhua tur ka ni tawh mai." a han ti a. Rozami chuan, "I thu sawiah chuan ka han lawm phawt ang e. Mahse ka lawm zelna tur chu ka thunun phak loh hi a vawngtu chu i ni tiat si atin a nih hi. Tun a i sawi tak zawng zawngte kha a ri ringawt chu mawi hle mah se, dam chhung nun hlimna tham rêl thei tur leh rin gam ni turin a chawp leh chilh lutukna hian rilru awng a ti kanglang rih zawng a nih hi," tiin a an chhang a.

Kapthuama ve thung chuan, "Rei lo mah se, rilru a den dan a zirin a nghetia a nghet lo thei

tho a. Hmangaihna hi chu a rei avang a ngelnghe, a ni ngawt hlei nem," a ti a. Rozami chuan, "Nil chu a ni khawp mai. Mahse tun kan dinhmunat hi chuan—Chhum tui pai lo leh ruah-mualliam ang chauh i la ni a. Khang i sawi takte kha lo topuiin kang leh ngai lo tur tui-hna ang hrimin lo chei ta che ila, ruahtui hul leh a kangchabin min nang leh ta si se. Kei chu chawmtu nei lo phun sawn theih tawh si loh mahni a râwp ral mai tur ka ni ang a Chuvangin, nunpui tham tur ka nghah tlin rih chu ka tan fing zawkin ka ring," tiin a han chhang leh a. Ani kapthuama chuan, "I tan nghah tlin a ngai lo, a tam tawk e. Amaherawhchu, a hun a la rei loh em avang a nghah rih i duh a nih pawhin a nghah rih chu ka hrial phak a awm hlei nem. Midang ni lo, keimah ngei hi min nghak a ni tih ka hriat chian phawt chuan ka tan a tawk e," a ti a. Rozami chuan, A ni khawp mai, lo nghakin lo ngaichang ta che pawh ni ila, thâl tui kang nghah hi hmeichhe kar a inhauhna thlentu a ni châwk thin a. Chuvangin, tui kang nghak theuh theuh hi kan insual buai mai ang tih pawh ka hlauthawng lo thei bik hlei nem," tia a sawi pah chuan Kapthuama chu ngaihawm tak hian a han melh ralh a.

Kapthuama chuan fiamthu hmel lo tak leh aw khur lek lek chung hian, "Hmangaihna tuihna tam tawk nghah khawtlai ngai lo luang chhuak hi a pan lai tui finriat-in a lo hnar teh hlauh chuan le, fin tur hnu zo lovin leilungah a thâmral ang a. A luang

HMANGAIH HMEL THÄR



paawh hlauthawngin a fawn ngei ang. Zami, ruah
mual-liam chu furpui hmahruai a ni ve-baw a sin.
Mahse chhum tui pai lo chhum ruak chuan mual a
ham a, hmangaihna ruahvarpui chu a sur ta zawk
a ni tih hi i hre duh lo a nih chuan i thu thu le.
Tunah hian nunna tuihruk inthlung luang chhuak
fin tur zawng chu heng thleng thleng hian a lo luang
ta a ni tih hre thiam la ka va han ti em! Chu tui
chu nangma tan chauha luang chhuak a ni si a,"
a han ti leh a.

Rozami chuan, "Engpawh ni se, zanin a kan
inkawm ringawt pawh hi miten lo hre ta se, ka tan
chuan hmingchhiatna a tling tawha. Amaherawhchu,
hmangaihna hian hmingchhiat pawh a huam ngam
avang erawh chuan pawl ka ti lo. Chu chu ka 'in-
nuanna' ni rih se la. Chu bak chu nun danin a la
rawn ziaak chhuak ang a, chetzia-in a la rawa hril
chawm zel ang chu," a ti a. Kapthuama chuan,
"Naktip nakthai lek-ah khian ka haw(ng) leh mai
dawn si a. Chuvangin, tun reilote ka neih chhung
hian, kei chuan kan dam chhung thil tur rel puitlin
ngal ka duh a. Mahse nang chuan han infiah
muangchan rih i duh tih ka hmuhin ka hriat thiam-
pui tho a che. Amaherawhchu, tu nen emaw i mi
baikhin duh phengin hun i am a nih erawh chuan,
hmanhmawh lohna chu keia tan chuan thih ni in-
uk sak ang chauh a ni dawn a. I fimkhur avang
hla deuh hek atang a ka thinlung lan dan hmel-
mang thlir chian rih i duh vang a nih erawh chuan,

palai ka rawn tir ang a, palai chhanah min thlir la, ka lang Chiang ber ang. Kan inhmelbriatna a chawp leh chilh luat avang a i mi hlahuthawwna chu hmangaihna a tang a chhuak a nih chuan, i hlahuthawwna chu tawngkam ringawt a thlamuan zawh i nih dawn rih loh avangin, hun kutah pawh innghat muangchang deuh mahila pawl ka ti hlei nem.

“Amaherawhchu, i tan a hun kut a ka indah chhungin mi dang kutah i lo awm mai ang tih ka hlahuthawng a. Kei chu i tan chauh a awm turin ka indah hrang tawh dawn si a. I sawi tawh ang khan, he kan hun hi a la rei loh em avangin i awih lo mai thei e. Mahse zawi zawi a tawng lian hmangaihna chu—Hmangaih chiah loh avang a tum luihna leh loh theih lohna avang a chher chawp hmangaihna a ni thin a. Kei chuan hmangaihnaah pawh chhiartlak ka ti lo. Hmangaihna tak tak erawh chu: Hun hrin ni lovin vawi leh khatah a a thankin sa-in a piang nghal zawk thin. Tunah pawh, hetia i tan a indah ka tum theih nachban hi hi chu—Ka tum lawk reng a tang a lo kal a ni lo a, i kut kawihin a phu hmasak avang a hmangaih ta che lah ka ni bawh hek lo. I duhawmna chuan min phu em em mah se, ka chung a rilru i lo sen nasat tawh avang a khawngaihna hrin hmangaihna a ni ve hlei nem. I pianphung kimtlang hian mitkhapkar loah min vaw thlu ta mai a ni zawk. Chu i phu rah hmangaihna chu i tel duh leh duh loh a thu a ni ta.

“Kei chuan hnar thlak che pawh tum sateh thin mahila, khawvelah nula tlawngawl ni-a i len tih hi chuan, kawla ni chhuak hian i tan a inpumppek lo thei lo turin min phut ta tlat si zawng a nih hi. Chu avang chuan, ‘i tan ka awm a ni’ tih hi i hriat phawt ka duh a. I lo inhriatna chuan i lakah ka tan kawng zawngtu a lo nih theih hlahh takin nih thu-ah vawin tlai atang khan kawm che tumin hun remchang ka dap tan ta a. Ka beisei phak lohin hei hun ka hmu ta hlahh a. Ka sawi tâk zawng zawng kha i awih emaw, awih lo emaw, ka ka rilru put dan tak hrih theihna tur che hun ka ka hmuh avangin zanin hi ka tan chuan malsawmin awm se la, kumkhuaa ka theihngihl’ leh ngai tawh loh tur zan hlu chn a ni si a,” tiin Kapthuama chuan Rozami chu a rilru put dan a hrih ta vek a.

Rozamin a ehhan ve hma chuan Thanthuami chuan, “Tapchhak lamah rawn thu pheih ve tawh rawh u. Kan mikhualte thawm ka hria, an lo haw tawh dawn a ni ang,” ti-a a rawn koh tâk avangin Kapthuama vek chuan, “Aw..., mitmei venna hi chuan hmangaihna kalkawng a va han tikhûpsûk thin tak em! Rem i tih chuan naktuk lamah i la in kawm ang aw?” a ti a. Rozami chuan, “Ni e,” ti chauhina ehhang a, in chhungah an lut dun ta a. Zan a la rei tehchiam loh avangin serfâng an bawl a, hlim takin an ei tlâng a. Chutia an inkawm ho lai te chuan a rilru têtê-in Rozami chuan,

“Mi tin duh hmangaihna tipuitling tur lah hian mualpho leh hmingchhiat a awlsam si a. A tur rengah tukhaw kha-in kan ngaih sak lovin thiam loh kan chantir zel bawk si a. Nawmchen nan chauh a inngaihzawna hmangtute avangin rilru leh thinlung a kan vei ruk ang pawh sawi chhuak ngam lovin kan lo up bet a. Min hmangaih lotute avangin hmangaih te hmaihma ngeiah pawh kan tlanchhe si thin. An thu min zawh te lah mumang hlimawm tluk pawhin kan chhang let ve ngam bawk si lo. Mahse tun a tan chuan a tawk rih hle-ah ingai mai teh ang. Ka rilru ang hmun thum a then a hmun khat hu pawh chhâkchhuak ngam rih lo mahila, ka sawi chhun kha chu ka rilru zawng zawng nen a sawi ka nih tho kha maw, * tirilru nep nep chungin ser-bawl chu a ei chak chak a. Nakinah chuan lengkhawm pawh an lo tin ta a, anni pawh chu an chhuak ve ta a.

Pianmawii chu Kapthuama mutna sirah chuan thu a. “I e, Thuama, i mi chah ang a ka hrilh bakah zanin ngei a i kawm ka duhsak che avangin Thuamthiani nen lenkhawm kan tlai luihp/i a. Vawiin tlai a i en dan ka hmuh khan Zamthiani hi i duh ve deuh tak tak ni-a ka hriat avang leh nang mi dang tehpu i lo nih bawk si loh avangin i tan hun remchang kan zawng lui ta tih i haiin ka ring lo a. Zamthiani lah hi a felin a hmel a tha bawk si a. I neih theih hlauh chuan a tihzia dawn em a kan hriat avangin Thuamthiani nen inthurualin hun

kan siam sak che a nih kha," a ti a. Kapthuama chuan, "Ka hria a lawm, ka lawmzia chu e, in beng-yar ka ti teh a sin," a ti a. Pianmawii chuan, "Nang kher ni lo la chuan, ani kan thian thaber lo ni si nen, khati ang a kan tih loh turzia mai chu," a ti a. Kapthuama chuan, "In tilawmawm ngawt mai, mahse engah min va ngai ngut suh. Ka thiam ang tawk tawkin ka han sawi ve luam tak nâ a, a beng a rawngah a thun duh ngut ang emaw chu le. Ni e, i hnenah chuan han sawi ta mai ila. Min duh der ve se chuan neih pawh ka duh tak tak a, ka duh loh rual lah a ni bawk hek lo. An chanchin te lah nangnin sâl lovin in hria a. Tualchhung miten tha an tih nula hi chu an lo tha nge nge zelin ka hria. Nula hmel naran deuh pawh hi khawtual tlangval chuankai nak nak tawhna hi chu rin aiin belhchian an dawl viau deuh zel a. Anih in hmuh danin min duh ve mai thei ang emaw chu le?" tin a han zawt a. Pianmawii chuan, "Zamthiani hi hre Chiang fu chuan ka inhria a. I kawm ang a kawm thei ngat tlangval tumah an la awm lo ni chuan ka hria. Thu tak tak la sawi hman lo pawh ni la, khati ang ngat a kawm fal thei awmchhun chu nangmah chauh i la niin ka ring.

"Le, chhungkaw khat a chenpui ta lo chu kan hriat loh hlan a kawm thei an lo awm khiah te a nih nghal loh chuan. Mahse chu pawh chu ka ring chuang lo. An in te zawng ni se, mahni chauh a an awm lai nang fuh a lo kawm fâl te an awm a

nih chuan thu dang. A thu hrimah englai mahin inthlahfal hi kan ching ngai lo a. Keini thian zaho ngat hi chu kan inveng tawn thâm mai a, kan hmel duh kan la tawn rih loh väng pawh a ni mai thei e. Keinin thlah fal che u tum ngial mahila, ani Zamthiani berin a duh miao loh chuan thlah fal theih a ni na hek lo ang. Khatia thlahfal theiha a awm duh mai kha mak kan tiviau nghe nghe a sin. Ia inkawm hlan pawh khan Thumthiani nen kan lo sawi che u a. 'Zamthiani hian a ti ve deuh a ni ngat mai. Mi alai a mi mitmei ven tina chi tak a nih vei nen. Keini a thian thaberte pawh hi ngaihbel tur pawlin engmah min la hrih ngai lo a. Hetia kawm fal theiha a awm duh mai hi chu eng dang varg mah va ni suh,' kan lo ti che u a. Zan-in chuan eng thu meuh nge in sawi dun?" a ti a

Kapthuama chuan, "Kei pawh, min hnualsuat vak lo a ni-awm chuan ka inngaihbel thlamuang ve rawk a. A jawngkamah chuan lawmna tur engmah awn phei zawng a awm hrampa hauh lo a. A thu sawi dan erawh chuan kawh lam chu a nei teh meuh chauh a. A sawi duh dan leh a thu sukthlekpuir dan a fang fu mai a. A ruh langin engmah a sawi duh loh bakah a fimkhur em em si nen. Uang dawn pawh ni ila uan chhan tur engmah ka bre rih lo. A thuhrimah min lo duh der ve ta pawh mi se, chuti mai a mi awlsam chi zawng a ni dawn hauh lo tih chu a hawihar atang ringawt pawhin a hriat theih rghal a. Chu chu ka mi duh

dan tak pawh a ni reng a. Naktuk lamah pawh la inkawm zel a haijal lem loh khu maw, Nangni hian theihtawp min lo chhuahpui ang a, a kawng kawng a awm mahna," a ti a. Pianmawii chuan, "Theihtawp chhuahpui che chu kan hreh hauh lo. Mahse kan beihpui i ngaiin ka ring tlat lo. Ani meuh khatia i kawm fal theih tawh berah chuan awm a awm a ni mai, Hawh Thuama. mut zai i rel tawh mai ang hmiang, ka mut a chhuak tawh deuh tlat," a ti a, an mu ta a.

Chumi zan chuan Kapthuama chu a muhil thei lo ve ta thung a. Mu meng chung a inngaihtuah-in 'Muvanlaiin chhâwl a ban hma chuan va dangten buk hmun khuar zai an rel ngai lo ang hian, Rozami zun-chhâwl chauh hi ka lenlai hun kha zawng khan a lo nghak a nih dawn hi. Khawvelah hian lal fa ang a lo piangin hmangaihtu leng tam lo tawng ve thin tawh mahila, ani ang a ka lung ti-awi leh ka pianpuin a pian chhuahpui duhzawng ang chiah a piang leilung hrin hi ka tawng leh ngai pawhin ka inring tawh lo. A hnen a ka thusawi tâkte khan dawidim angin a thinlungah hna thawkin chiah zawr teh sela aw. Engpawh ni se, naktuk khaw lo var leh tikah heti hian thu ka sawi tawh ang. 'Tlawng tui nuarin Ngaiteii a lem pil hmaloha a lungawi thei lo argin, ka hmangaihna che thinlung râwp tak hian a pumhmawm hmaloh che chuan, kawla ni chhuak hi tap chungin ka chhiar ang a. Lungngaihna pean chawiin zing khawfing-

chat pawh hi ka hmuak thleng thin dawn tawh zawng a nih hi.

“Ka hlawh chhuahna tur che kalkawng hi a bumbolin a hrehawm hle a nih pawhin, chung harsatna zawng zawng chu hmangaihna zirlaibu bung leh chângah a awm thin reng tih hria-in ka pan tho tho ang che. Nangin min tlansan zel pawh ni la, hmangaihna tâng dang a min luhsan a nih ngawt loh chuan i kawngkhar kik ka bang chuang hek lo ang. Amaherawhchu, sirah min hnawl let der a, koh ei zawh rual loh a lehlam min hawisan erawh chuan—Thihna hi thianah ka sawm ang a, ka nu kiang a muthmun rem ve nghal law law turin he ka thi thei taksa hi a inpuahchah ve nghal a ni mai. Amaherawhchu, vanneih a siam a, i tawngkam tha mai ni lo a, i taksa nen lam a pek ka nih mial erawh chuan, van malsawmna khiau keimah chauh hi min lo duhsakin, leilung hausakna zawng zawng chen bian i samzai khat thuk pawhin ka ngaihlu hek lo ang, ka ti ang,” ti-a dawn neuh neuh chungin muthih a tum ta a. Mahse chuti chung pawh chuan a mitthla-ah Rozami chu zan khawthim hnua i a arsi tha-mi ang mai khian a de vâ vâ reng a ni.

6. THLA HLEINGA ZAN



INKHAWMPUI tiak dawn Chawlhni tlaiah chuan. a tuk a chhuak leh mai tur mah ni se, khawthlang kawlkil a ni tla pil ta ruai ruai chu a uiawm hle mai a. Mahse zan lungngaihna hnawt tiaa turin khuangchawi thla fang chuan arkai a rawn deng awu ut mai thung a. Khawchhak lam tlang kar atang khian zan chawimawi tur leh a thuneihna hnawt bo turin a vanglai mawina chu a rawn lar chhuak tan ve ta thung a. A lo chhuah tirh chuan, ni ropuina leh chhun rorelna a la hlimchhawn em avang a inthlahrung ni-awm takin a rawn dak duk duk a. Mahse ni chuan khawthlang lam unaute kai tho tur a hou lam hawi lo lek a mual a liam fihlim veleh chu 'thla hleinga' bial eng pap chuan zan mite tan, kum sang tam tak atang tawha a tuallenna pangngai, chung lam vanzawl zaupui inbiat vel mup maiiah khian a latthutthleng chu a rawn hung chhuak a. He leilung vang hlaipui mai hi a khawnvar eng vawt dai ruih mai chu hmangin, ni rorelna chang ve phak tawh lova vui liam tawhte tan a enna chu a rawn pe paw phung mai a.

Inkhawmpui tiak dawn Chawlhni zan a nih tawh avangin mi tin mai chu tu tur chhuah lohin inkhawn turin an kal sung sung a. Biak-in dar hmasa a rik hma-in thuma chanve lai chu a khat hman hial a. Rozami te thian-zaho pawh thutna chan loh hlauvin hmanhmawh takin an liam ve ta a. Kapthuama

erawh chu in dang a chaw a ei avangin a tlai deuh a. Biak-in chhung pawh chang ve hma¹ lovin pawnah ding chungin thusawi a lo rgaithla ve a. Biakin in-khawm rei taw¹ au ban hnu chuan lenkhawmna lam panin an theih leh ta sung sung a. Mahsein khat mai dawn zawh rual a nih loh avangin Thanthuami te thian zaho pawh chuan Thanthuami te in lam baw¹ chu an pan leh ta ngawt a. Inkhawm ban thingpui leh kurtai (kawrtai) an ei a an in zawh hnu chuan inchâr leikapui, huanthlai chin vel biru ang reng tak, mi hmuh mai theih loh ualau ang reng tak si-ah chuah pawnto turin an phei leh ta dial a. Rei mawi taw¹ an awm hnu chuan Pianmawii leh Thanthuami chu chhuanlam siamin in chhung lamah an lut leh ta a. Rozami leh Kapthuama chauh chuan chu 'Thla Hleinga Zan' erg nuam tak chu pawnah an lum dun ta a ni,

Chu khuangchawi thla arkai (den) zan eng nuam em em hnuaiah chuan, mi tin tan a pawimawh, mah-se pahin inkar tan chauh a mi tur ni si chu sawi dun chak em em-in, engmah an sawi hma atang chuan ril-ru lohmu sa tihriat takin an han inen a, an han nui ringawt phawt a. Chutah Kapthuama chuan, "A nih leh Zami, ka rilru hi i chungah ka ngbat vek a ni tih rin ngheh theih nan palai ka rawn tir chawt mai ang e aw?" tiin a han zawt phawng mai a. Rozami chuan, "Ka ringhlel blei nem che. Ka rilru titlai taw¹ a mi rub loh ka hlaupthawn ayang zawkin duha aw pui-ting ka pawh ngam rih lo mai che a lawm," tiin a

hhang a. Kapthuama chuan, "Chu pawh ni se, pa-
 chhanah meuh chuan i rilru tak tak chu fiahin a
 wwm tawk ang a. Nang chang lo i nu leh pa thlengin
 lang Chiang tawh ang a. Hetia inring ngam tawk
 hiah lo ve ve a inkawm hi a bang tawh dawn a sin,"
 iin a ban umzui leh hret a. Rozami chuan, "Min
 hriat ve hma a ka lo thabat hmasak tawhna che kha
 tunah chuan min rul duh ve dawn em ni ang? tiin ka
 ngaihtuah ngam ta deuh a ni. Mahse mak min tisuh
 w. Ilak a mi awlsam leh sihnip ang tak a ka lan
 ang hian mi dang tuma lakah ka la awm ngai lo tih chu
 farnute hi min hriatpuitute an ni. Tun a kan in-
 kawm dan ang leh nizan a i hnen a ka sawi ang thute
 kha tu tlangval hnenah mah ka la chhakehhuak ngai
 lo. Chu chu a dik a ni tih kan veng tlangval zawng
 zawng hian min hriatpuiin ka ring.

"Chuvangin, ni dang a ka awm duh loh dan
 ang a ka awm ta hi, min hmangaihtute zing a ka
 hmangaih ve nen chauh a ka awm dan tur ni-a ka
 ngaih avangin, ka awm dan duh ka hman phal si
 loh chu i chungah chauh ka hmang phal ta a
 nih hi. Chu chu hmangaihna hnathawh a nih i rin
 loh chuan, kei chuan kawng dang a tihlan dan ka
 thiam rib lo. Tupawh ni se, an hnen a aw ka
 pawh tawhna an nih phawt chuan, palai hmanrua
 a fiah pawh ka dawl zo tho ang tih ka inring a.
 Amaherawhchu, tun a ka dinhmunah hi chuan, chu
 palai hmanrua thleng a kal chu ka la intiam lo
 deuh a. Ka rilru lamah chuan daltu engmah a

awm lo. Ka han brilh tlang vek ang che. Naktuk maiah in haw leh dawn si a. Mihring danin taksa lam ngaihtuah loh theih a ni lo a. Pasal chhia tha nei ve ngai tur ka nih chuan, thil puitlin tur angin han zeldin ta ila: Mizo dan a hmeichhe chhawm tur thil engmah ka la intodelh si lo. Zawl-(ken) puan fahran pawh ka duh ang ka la nei lo a. Pawnpui ni se kumin thâl chho hian kan puah dawn chauh mai lehngbal nen," a ti a.

Kap̄huama chuan, "Chungte chu a ngaihtuah chawp theih vek a lawm. Min duh der ve i nih tak tak chuan inneih hnu pawhin a ngaihtuah theih tho a. Tin, Mizo danah man su hek pawhin mi an kal lawng lawng a, min duh tak tak lo a nih chu," a tingui raih a. Ani Rozami chuan, "Awi chuti lam a ni lo. Thil han tih ve dawn lemah famkim lo tak a tih chu ka tan tak a zahthlakin ka pa awih zawng lah a ni bau si lo a. Keiin aw lo pawh ta ringawt che mahila, tun su-su-ah chuan ka chhungte pawhin rem an ti chuang lo ang. Min hmangaih tak zet i nih chuan ka zai pawh i lo ngaih ve ka ring," a ti a. Chuti ang thleng thleng a Rozamin a pak chhuak duh ve thei mai chu Kap̄huama chuan mak a tiin a lawm rilru em em a. Chutah Kap̄huama chuan, "A nih leh palai chu ka rawn tir lo mai dawn tihna em ni?" tiin a han zawt leh a. Rozami chuan, "Palai i rawn tih loh tih loh loh chu i thu ni se. Mahse ka ngaihdan chuan - Ka rilru tina tur ringawt chuan rawn tir

rih lo mai la ka duh. Ka rilru-ah hlawhchham
 lo mah la, a lang a hlawhchham i nih dawn avangin
 a puitlin theih ngei dawn hunah i lo leng zawk
 dawn nia. Ka inpuahchah chhuah hun chui farnu-
 te hian an hai lo ang, kei pawhin ka rawn zai mai
 ang che. Tin, hetia i hnen a chuti ang thleng thleng a
 ka sawi duh hi i hriatthiam ka ring a. Nang i nih
 avang a palai rawn tir lo tur a sawi ka ni lo, kei-
 ma lam harsatna avang liau liau a ni tih hre thiam
 hram hram ang che. Harna che nilovin, ka duh-
 sak avang zawk che a ni tih hria ang che aw," a
 tizui lawm lawm a.

Kapthuama chuan, "Chu chu i tun dinhmun
 ni se, engtikah nge inbuatsaih zo theia i inrin?
 Hei kum kan vei t-p chu a ni mai a. Nakkum
 favang lam te khian i inpeih thei tawh ang emaw
 chu le? Kei chu ka hmanhmawh deuh a sin,
 Mhiring hi chin hriat loh theuhva nung kan nih
 bakah upa-in 'duhtu za, duh lotu za' an ti angin,
 khaw kar nei deuh ngang hi kan ni a. Kan karah
 eng nge lo thleng dawn kan hre lawk lo a. Keima
 lam atang chuan engti kawng mabin hlauhthawn-
 awmin ka awm lo ang tih ka sawi ngam a. Amah-
 erawhchu, ka hmah phak loh lai che hian kei aia
 f-l leh fng zawk si, hmel mawi zawk si te hian an
 la rawn beisei ang chia. Chutih hunah chuan min
 phatsanin min hersan leh mai lo ang maw? I hnen
 a ka sawi zawng zawngte hi naktuk hian min thawn
 haw loh vek mai ang a. A nih loh a leh, mi dang

ngaihnoabeina parzunin a chiah dâk leh vek mai teh chuan le(h). Ka tan chuan zanin hi tuktin par ang lek a vul tawi, ni tlang san ngam lo hmanghaiha chauh min ban tihna a ni ang le," a ti a.

Rozami chuan, "Nupa rih chu Pathian leh hun kut a awm ni se. I thil hlauhthawn erawh chu : Ka rinawmna chu i hmuh phak loh hmunah ka tinghetin ka vawng tha sauh sauh ang a. Kan inkar a mi dang an inzeh len lohna turin a phui lo lai apiang chu i ven zawh phawt chuan kei chuan veng zo-in ka inring a sin," tiin a han chhang ve a. Kapthuama chuan, "Zanin thla eng chu a va han nuam tehlu em! Naktuk lek atang khian zan ngaihawm leh lung tileng a chang leh mai dawn si a. Mitkhapkar tin hian i hmel hmu phak lo turin kan inthenna hun min hnuk hnai hret hret zel chu a ni si a. A chhe ber dawnin han sawi ta ila: Kan hun te hi lo pelhsawhlin kan thunun theih loh thilin pumpelh rual lohin inpumkhat thei lo turin min tlakbuak ta mah se la, Zami, chutib hunah pawh chuan 'Thla Hleinga Zan' apiang hi chuan i inbre chhuak ziah thin ang aw. Heti ang zan a lo thlen apiang hi chuan ka thlarau-in a rawn zawng chhuak leh thin ang chia. Puak leh kaih fawmin mi nu chan min chansan mahla, ka ngaihtuahna t. l hi chuan a phatsan ngai lo ang che. Kei chuan ka hmangaih chia, ka hmangaih kumkhua dawn si che a," a ti a.

An ngawi dun vang vang a, lengkhawm khuang ri tluk tluk mai lo chu thawmdang a reh thuap a.

Kap̄huama chuan Rozami kut chu a vuan a. Hla taka arsi, a chang a eng sen phe lep lep chu an thlir dun vang vang a. Nakinah chuan Rozami chuan blaithawng aw khur lek lek leh thawk la na deuh chung hian, "I aw ri ngaihnawm tak chu ka thinlung robawmah ka khung ang a, tlangval dangte hmaah phaw angin ka intun hliah thin ang e. Mahse i aw ka hriat hun hi zan a nih miao avangin i tawngvai mai a nih ka va hlau em! Ka mumang lah a ni si lo. Tihah chuan kei pawhin i mi hlauthawn ang bawkin ka hlaithawng ve tho che a sin. Hetia kuhmum hman lova par a chhuang ta mai hi awih bar ka ti a. Mahse a dik si, dik si mahsela duh luatah mi dang lak a i lunglen hrikthlak nan lek a min hmang i lo nih teh hlauh chuan aw. I tawngkamah ka tla pil hmanin ka tla hlum lo chauh a ni tawh si a.

"Nula zawng zawng chawimawitu mipa lak a rinawmna, keia ngei pawhin mi min fak der ka hlawn nachhan leh min tihluta chu ngaihthabin ka inphat tawh si a. Tun hma hu r kha zawng a ka rinawmna lo khawl khawm tawh chu zaninah hian ka hmang ta a nih hi. Mahse paw ka ti lo. Chu ka rinawmna chu min rochungtu tur a ka duhberin min duh ve theihna tur a ka hman loh aliamah. Mutchhuak damdawi thaber chu muthilh a ni ang hian, hmangaihna rultur chuan hmangaihna chauh lo chu inhnang-fakna dang a awm mawlh si lo. Tuma thabat lohin hmangaihna chuan a ba nghal thin a, tu phut chhuah

lohin hmangaihna chuan a panin a pan ruak ruak thin zawng a nih hi. Chuvangin, i mi hlauhthawn ang a ka awm loh nan mi i thlahthlam loh hi ka duh a. In-chawm nung reng tur chuan hmangaihna hmel chauh hi a nunna tuihna a ni si a. Aw le, i sawi ang khan—Khi kan chung thla hleinga bial mawi takah khian zanin a kan intiamna thuthlung hi hmangaihna hawrawpin ka zia ang a, arkai den zan apiangin a engah kan chhiar dun thin dawn nia,” tiin nula a nih avang a inthiam lo hmel tak chung hian zawi sepin a sawi ve a.

Kapthuama chuan, “Aw, zan a rei leh mai dawn chu a ni si a. Hun lah hian kan inthlahhlelna min hriatpui hauh lo leh mi âmpui reng tum lovin mual a liam zel si a. Zan reina te chuan min hnawt hawng leh lo thei dawn si lo. Zanin hi tu nge tahna zana chhâl awm? Chungte nen chuan chhim leh hmar angin kan iuhlat a, lei leh van angin a insan hleih bawk si. Zanin hi ka tan chuan ka lunghnun tlukin a pawimawh a, ka nunna hmanraw pakhat angin ka lawm lut ve ta si a. Chuvangin, ka duh dan tak chuan, tun atang hi chuan kan inkarah khaw kar chauh lo chuan min dai-dang tawh lo se ka va han duh em! Tlangval dangte mawina leh ngamthlemna chu leilâwtah paihin awm se. Kan inhmuh leh tik apiang a hlim zawk leh thlamuang zawk a kan intawh leh theih nan zanin hi malsawm a awmin, kan nunna thubu-ah ziah nghehin awm bawk rawh se aw. Naktuk lawk a ‘nizan’ ni leh mai tur leh nakin lawk a ‘hman’ ni leh mai tur hi keini tan

‘t.nah a thar’ i ti reng zawk ang aw.” a ti ngawih ngawih a. Rozami chuan, “Ni e, i sawi ták zawng zawng kha pakhat-mah ka theihngihl lo ang. Hawh, Thuma, lengkhaw n pawh an tin tawh si, i lut tawh zawk ang hmiang? Thil a nih rih hma si chuan ‘mawi lo’ hi dawn tel a tul si a,” a ti a, an lut ve ta rih a.

Rozami haw ta chu a khua a har em em mai a, an in chung pawh luh a chák lo hle a. Thla luh chu a en pangngaiin a eng paw ruih mai a. Lengkhawm lungleng zual hnukhawi khuang chu a la ri dup dup reng a. An kawtkaiah chuan a ding vang vang a, “Hei hi hmangaihna zun phurh dan a nih teh ngai chuan a va han retheithlak dawn em! Tun hma kha zawng a ‘ka ngaihzawng’ ka lo tih ve thin kha chu hmangaihna hlimthla leh a thlalak pawh tluk lovin ka lo hmangaih ve mai mei thin a lo ni e. Hmaogaihna mawhpnurh dan ka va lo pawh phak lo ngai em! Tun a ka awm dan hi mite in hmangaih dan a nih thin ngai chuan an va lo khawngaihthlak dawn ve. Amaherawhchu, kei chauh hi heti ang a tuar ka nih teh ngai chuan le. ! Van-duaina khua leh tui mai ka ni tihna a ni ang. Heti khawp’a ka lak runthlak si hi engmah lova a thâmral leh mai teh chuan, ka beidawng aw-rawl chuan thihna ánychia a sawm ang a, leilâwt kawngkhar chabi a dil thei hial ang. A va han mak em! Ka beisei loh lam atangin ‘dubber’ a lo piang a, ka tum lohna

lam aʔangin ka rilru zawng zawng kuai hertu a lo chhuak ta. Ka vawi khat hmuh aʔangin ka pianpui sual tluk a nghetin ka hmangaih ta si a, thil thiang pawh em ni dawn ang le. Ni tin a min heltu chu ni se awm pawh ka ti

“E....., ka hre ta, ka hre chhuak leh ta, a mak leh lem lo e. Mite pawhin an beisei loh mual aʔangin hmangaihtu an lo tawn tawh tak kha maw le. Kan Pathian lehkhahu ngeiah pawh a chuan kha. Suamhmang tawktu pawh khan a beisei loh lam aʔangin lainattu a tawng a, Davida pawhin a dotu fapa hnen aʔang a hmangaihna a chhar hlahh bawh kha. Mahse chungte pawh chuan nuamsa-in an hman-gaih chu ka ring bik lo. Tuma zirtir ngai lovin mi tinin hmangaih te hmangaih nachang kan hre mai thin zawng a lo ni e. Nu leh pa pawhin fate hnen-ah ngaihzawng nei turin tu nge zirtir ngai? Tu hrih leh zirtir lohin anmahni hun theuhah khuarelin a rawn hring chhuak mai thin dawn zawng a nih hi. Chu khuarel chu kei hian engah tehlu nge dawi-chhe ei ta ang hrim a ka manganpui bik ang? Hmangaih tlak an nih miu si chuan tu nge inchhir thei awm ngawt i. Kan thinlung a duh theihra kan pianpui hi an duhawarna chuan a cho chhuak a, anmahni-ah kan rilru chu kan vawm bei ta a, chu chu kan taksain a nemnghet ta a nih si chuan, kei hian tumah ka dem thei lo ang. He thilah hian keimah liau liau hi a mawhphurtu ka ni e. Mah reng reng se..., engah nge a kal pawh i lo kal ve reng reng? Aw,

mut ka va ban châk lo tak em! Inthenna nghak chhuak tur ringawt a han mut chu ... !" tirilru ngawih ngawih chungin thla eng nuam tak chu a luhsan ta a.

A tuk a Rozami lo tho chhuak phat chuan Thawhtanni a nih leh Kapthuama hawn tur thu chu a rilru-ah a lut hmasaber a. Tukthuan ei kham chuan mikhual haw tur chu an insul huai huai a. Lenkhawmna inah lah chuan mihlim lungleng zual fuan khawm Thawhtanni chu hawn thiang lo deuh-thaw a ngaiho chu an zai dup dup a. Haw lo thei si lo, hawn la hreh si thenkhatte lahin an pawn-thuah ak lek lawk chungin lenkhawmna in lam an pan bawk a. An pawnthuah chu khumaiah an vawm kai lawk a, an lamsan ang lâwp lâwp a. Thenkhat hawn luih tumte lah chu an inchelh buai-in an puanthuah inthuhruk sakín an lo inkai hñang hle hlawm a. Chutih kar a thenkhat lo inchibai ta lawp lawp lah bo lo. Khawtual thenkhatte erawh chu favang lo lam singsak tum a hnathawh-kawr nen a lo bu liam ta nghawng nghawng lah awm bawk. An inkhawmpui tiak tuk rilru chu a inang lo hlawm hle awm e.

Chuti ang karah chuan Kapthuama te unau pawh chu haw turin an inak chhuak ve ta a. Than-thuami leh Lalpianmawiin an rawn thlah a, an thiannu Rozami an thawng pheí a, kawtchhuah lam chu an pan tlâng ta a. Anni chuan chám rih turin ngen eltiangín an unau pawh chuan chám leh chu

chāk ble mah se, an kal dawna a pa thuchah kha an hre reng a. A pa chu an ngaihtuah deuh avangin chām khawmuang hman an inti silo. Thanthuami leh Lalpianmawii chuan Hlunchhungi chu an kal hmasakpui a, Kapthuama leh Rozami chuan hman-hmawh lo takin an hnungah an pahnih chauh chuan an zui a. Inhmuh vawi khatna a hmangaihna vawrtawp a inchhar chhuakte pahnih chuan, hmangaih thu chu nghet takin suih dun tawh mah se, an taksa chu suih kawpa a la awm rih si loh avangin, hun eng emaw tichhung chu khawhar tak chung a chhun leh zan hmang hrang rih turin an inthen dawn ta.

An hun hnung ber darkarah chuan reilote atan kawtchhuah lai-lungdawhah an han thu tlang leh rih lawk a. Chutah ohenna khua a hmun loh avang a inthen turin inthlablette kut invuan vawng vawng chu ban chatin an inthlah ta. Muat an liam hmaloh a thlin rengin, kal ta lahin a lehawi leh thin a. Chutah kawng a kawi ta, a tu ve ve mah an lang thei ta lo. An lan theih loh meuh chuan—Khawvel hi a mawina leh a ropuina zavng zavng nen a liam ta vung vung nün a hria a ni.

Anni unau haw ta chuan zanriah bawp man hman hramin an veng an thlang a. Kapthuama chu a kal bah deuh bakah a thlen zan chuan thien pawl chakra it pawl a ni lo a. Zan thipui ag thui a mahai chauh lungien hithla turin Hman-hmawh hman a kal ta dawna a. Tala lah chu a

hma zan ang bawkin a eng nuam em em mai a. Naupang tualchai leh pawnto lah chu mahni hlim hlimin an hlim em em a. A then an inlenthul a, a then an intirameikai bawk a. Veng lehlam naupangte nen inchil lo tum tawk lah bo lo. Ani Kapthuama thung erawh chu khawhar em em-in Hmunhlui tlangah chuan a ding vang vang a. Thla-sik tan tir boruak nuam tawk khaw thiag fiah fai kuk majah chuan thla chu amah chauhin a eng ngawi ruai mai a, Zan thla eng mah ni se khawvel chu a lang thui ble mai a. Zan thil a nih avang a khawilai nge tih hriat loh ral hla takah te chuan mei a rawn de sat sat a, a mit leh thin a.

Chhun a aw-rawl chhuah thin rannung chuan mutmu an tuah nget hle tawh a, zan lumtute erawh chu an lo tho ve thung a. Kawlui te chuan tuikhur hnarah an zan hla an sa leuh leuh a. Perhpawng hnukhawi dam chhunte pawhin thiante hnulai ramah tuma zai hla sak sak lohin an lo inzai lam bawk nen. Vauk (vazun) lahin chhun lama a bihruk hruibuk chu, zan khawthimah meuh chuan mi hriat loh hlau ni-awm fahrarin, a rawl tawi te chu chhuahin a lo 'tik' ve loh loh bawk a ni. Chuti ang, naupang leh nungcha hlim thawm chiapcha karah chuan, Kapthuama chuan a hmangaih Rozami chauh lo chu lungkham leh rilru feh chhuahna dang nei map lovin, zan thla eng hnuaiah a mitthla chu kawm falin, hmun fianriah a khawharna chu thah dingin zan a tum tawi mek thung a.

Chutia amah chauh a khawhar taka a awm lai chuan, lai ina an lalpa hova zu lo zu te pawh chu an lung a leng ve thlu ta ni tur a ni, an zai ta hlat a. He hla kher hi an han sa lehngal a:

*'Ka lunglen thudi hi hril turin,
Sawm ka nuam e chhawrthlapui chhingmit rualna;
'I ngaiin zai tñ a chhiar,' ti-an,'*

tiin. Kapthuama chuan, "A ni tak a sin maw! Aw... hun, aw... hun, engtikah nge ka vanneihna ni chu hringlam khawvelah hiao i rawn ber chhuahtir ang a, i mi duhsakna zarzo tur a i kum hun bi te chu ka tan i rawn thlen dawn ang le?" ti-rilru vawng vawng chungin a ni te in lam chu thatho lo takin a pan ta a.

7. BUHSENG RAMRIAH

BUH seng a lo hun a, lam hla neih kum ngang a nih avangin ram lamah mi an tâp fai hle a. Kapthuama te chhung chuan in nghaktu tur nu an neih tawh loh avangin an in chu an nî kutah an dah ngawt a. Buh seng tur an ngah deuh si avangin an chhungin an riak lut vek a. 'Bukpui lam zawng kan inmuan chhuah e' tiin an thlâm bulah buk an sa a. An piaa lawk mualdung khai remchang takah chuan 'bukpui thimtham takin mi dang pawlbuk chu a intlar po mai a. Buh lu chu' tul a nat em avangin chhungkaw thenkhat phei chu ui-ar nen, a lungphur bu-in, a khau kap a khau kapin, buh sirngsak zawh fel hma zawng a hawn chhuah leh pawh tum tawh lovin in an kalh hial hlawm a. Chuti khawp a ram lam a an tap fai avang chuan in lam chu a reh hian a reh tlawk tlawk mai a.

Naupang tualchai tur awm hek suh, 'mu-in a la ang e' tih hlauhawn khawpin a reh a. Kapthuama chu zan tin bukui lamah chuan a leng phei thin a. Zan khat chu a ni fapa Sanghleia chuan, "Thuama, vawiin chu ka bawng enin Liankhuma ka hmu hlauh mai a. 'Naktuk zan hian rawn len chhoh ve ka tum a, Thuama kha rawn leng phei ngei ngei rawh se,' a tih che kha," a lo ti a. Chu avang chuan a tuk zanah pawh Kapthuama chu bukui lamah chuan a leng leh ta a. A va

thlen ve chuan Liankhuma chu a lo thleng chho daih tawh a, vanlaibuk pakhata a sa lar lar thawm chu a han hria a. Liankhuma chuan a hmuh veleh, "Thuama i rawn leng pheï maw? Nimin a Sanghleia ka rawn chah kha hria a rawn leng pheï em i nih?" a ti a. Kapthuama chuan, "Ka ni bawk a, min chah lo mah la nuthlawi zunin min phuar vel miau si a, hmu lovin awm thei hek lo i. Ti hian zan tin khêl lovin ka luai pheï mai. A tap-hrik hi ka ni ringawt mai a sin," tiin a han chhang a.

An inhmuhna buk nuthlawi Zachawii chuan. "Keini vang a lo leng zawng i nih ngai chai loh kha, dâwt hian pawt pawt lo la a ni mai," a lo ti a. Kapthuama chuan, "Ram chin hre tawh nuthlawi thankin zunin min phuar fuh a, kan â lo chauh mai zawng a ni c," a han ti leh a. Zachawii chuan, "Zan tin i lo luai pheï tih zawng tun kan hai hlei nem. Thlâm-neiliaon te buk bak khawi dang nge i pan ngai? Tang ang mai i thawm chauh hi kan hre zan tin a. Zaniin pawh heta Liankhuma awm hi hre lo la chuan khawia thlichhia mahin kan bukah te zawng a rawn len lut chai hlei lawng che. Eng laiin nge i mawng phe pawh hi kan hmuh hman ngai," a han ti leh a. Ani chuan, "Zanin chu Khuma nen inkawm kan duh si a le, ka kawm hman loh zan che a ni dawn a nih hi, zan a pâmhmai dawn teh e," a han ti leh a. Liankhuma ve thung chuan, "Ni e ti rawh, kei pawh amah avang hiar chhuanlamah ka hmang chia, a hla a hla-in ka rawn tleh thleng hram hram zawng a oi. Mahse heta

kan inhmuh takah si chuan inkawm rih lawk pawh chu a tha si a. Tih leh le, ama chungchang tho sawi tur kan ni a, zanin chauh na na na chu mi dangte len vena kan kian pawh a ni ang chu maw le, ti rawh, khawiah nge kan nuthlawi phiar chuan kan inkawm ang?" a ti a.

Nuthlawi chuan, "Khawi dang khawi dang pan a ngai lo. Hetah inkawm tha reng reng ula a nih chu. In sawi duh te zawng ka hre em mai, han zep thutak tehchiam tur va ni suh, tlang hriat a lawm," a tifiem vel a. Liankhuma chuan, "I va han hre awm hlei lo e aw . . . Ti ila(h), kan sual thluk tum ber te beng hriat lai ngei a sawi zawng min hmusit dah ang e. Ti teh, nuthlawi lengleh phiar chuan inkawm teh tak ang hmiang maw," a han ti ve thung a. Nuthlawi Zachawii chuan, "Khai, khai, khai Liankhum, sawi tam a ngai lo, zu leng reng reng ula a nih chu. I rawn len chhoh tum a i tlawh loh zawngin a vui thinrim i tuar leh lo mai tur a nia," a han ti leh a. Liankhuma chuan, "Ho mai mai, kan chil tiputah ti-khuan lo awm bawih ve mai mai se la, min la duh der ve ta a nih leh a man pawh nei zo ve dawn hek lo i, man bovin makpa chhungkhung a awm turin kan la fan lut chawih ang a, a tawpah kan la sazu-mei dawhsan leh ziai ang a ni mai," a'n tiel vel a. Nuthlawi chuan "Teh chai che chuan aw, in chan-chin³ te zawng ka hre hneh em. Tun Chawlni tlai a in khaw³sak dan te kha ka hai emaw min tia law?"

a han tiŋalh a.

Kapŋthuama chuan, "A..., ti teh Khuma, ŋawng thei sabawp chang mai teh se, phu loh nuthlawi phiarna khua kan tlai zo dawn. A bul a awm hi zawngin 'zawhte mei la' an sawi ang mai kan ni ŋhin. A hetih vang hian a lawm kei pawh zan tin sal lova ka buk pheii tlut tlut reng chu ni. Engmah ang thei chuang si lo hian. Banthenlova te hian min lo thik kawkalh emaw si ang a, a mi chu a nat hmel tehlul nen ka hlaub zawng tak a nia. Mi dang hlir hi mi a dem vei zarh zarh a, amah kan tum tih lah chu a iŋhre duh ang mang si lo, ti teh" a ti a, inkawm turin an chhuak chho dun ta a. Bukpui chhak a thlâm chu an pan chho dun a.

Thla de chho vawmlu chuan mau-hnah chung a dai tla chu a chhun eng set set hlawm a Tlang-val ŋhenkhat buk dang a leng turte chu kawngpui dungah an zai kal rawng rawng bawk nen. Zau tin maiiah chuan uisen rawl leh naupang hlim thawm nen an ri chuah a. An thlang buk tual sum-khamphei a nula buhdeng rim zau dang tlangvalte leh an nula rim te chu an inŋhahh nui ar ar bawk a. An kiang buk a talbkuang khawng a mihlim lungleng lo zai tlang tlang karah chuan, thangfem muttui hnar ri chhawngin choak-in buh a lo nawk ve sauh sauh a. An kiang khiangpui (khiang-khawsa) ler a chhim-buk tui birh ri khur hlak hlak leh an piaŋ ngaw chhêt a ungau lo hram kal raiih raiih te nen chuan buhseng lai hlimna chu an chen tlang mek a ni.

Kap̄thuama leh Liankhuma te ʃhian-dun chuan an dam chhung a pawimawh ber chu an tlangval lai ngei a rel fel tur a nih hre rengin, thlâm leika tlatlan ban ngheng a ʃthu dunin an titi a. Kap̄thuama chuan, “Min rawn chah ta hial chu thu ʃhar eng nge awm ta?” a ti a. Liankhuma chuan, “A tam mai ti ila, inngaih thu hla deuh mai zawng a ni e,” a tizatlah a. Kap̄thuama chuan, “Tun Chawlhni lah khan keini kan châm ta daih si a, chanchin a la ʃha zel ang chu maw?” tiin a zawt a. Liankhuma chuan, “A ʃha a ni mai ang chu. Nimahsela, kan ʃhiani hian ka lung a tiawi tawh lo a ni. Mi phei chu a la hawi ʃu a, keima zir loh nge ni, ngei ʃhut chang hi ka nei ʃain a. Han rel ta ila. Min ngai-zawng ta cheng, nula a pompa thawka phit a mi tin mi tang hnen a mi pak chhuah teha a hmang nazah zen mai hi a zahpuiawm leh lutuk a. Mi'n an ʃhup ʃeng ʃeng a ni ngai a, ani a lova a nazawng a mi a paupui fo mai hi, a chhe zawng leh i te phei chu ni mah suh se, a âthlak lutuk a. ‘Nula fel an ngaihzawng hriat theih loh’ an tih te nen an kar a hla leh lutuk a.

“A chu-a chu thu dang ni se — A nunphung pulh pulh reng reng mai hi, a lei tal a dik lo. A hmel te phei chu a chhia pawh ka ti lo. An in chhung leh an khawsak pawh ka phu phak ni zawk lo hialin ka hria. Mahse chung chu ka it ʃhah nahelö. Heti ang nula zawng an khawsak theih zawh poh leh an lulingin an mi chhipchhuah an tina mai

mai. An khawsak theihna chu nawmsakpui aiin retheih nan kan hmang zawk ang. Chuvangin banka tum nghet ta law law a ni," a ti a. Kapthuama chuan, "Nichin kan nuthlawi khan dem fiam zauh che khan ka hria a. Engtia in khawsa lai nge a lo hmuh che u a?" tiin a han zawt leh a. Ani chuan, "Engtia khawsak a awm lo, tun Chawlhni tlai in khawm ban khan kan pahnihin Hmunhlui tlangah kan leng dun a, chu chu min hmu maw le. Min han sawi rinawm vel mai mai a nih kha, engtin vak mah kan awm lo.

"Ka sawi duh zawk tak chu—Tun Chawlhni mai a thil thleng kha a la ni a. Ka tan pawh thil thar maw le. Chu chu hriih che ka duh avang a rawn chah ta che pawh ka ni zawk a. Chu chu Thankimi chungchang zu ni tlat a" a ti a. Kapthuama chuan, "Engti zawngin maw? Ani nen ber kher chuan eng thu nge ni ta a?" tiin a zawt a. Kar hmasaa kan haw chhuak kha, Thankimi chu Kahairuakawn a mi dangte nen a an kal ho laiin ka han um phak a. Ngawi reng a lehpelh mai ka tum laiin Thankimi chuan, 'Khuma, thu hriih tur che ka nei a, mahse naktukah aw ni ang,' min lo ti a. A mi hriih tur chu: Ka thiani hi ka kawm dan a lâp deuh tak avangin, ani Thankimi kan thenawm hnaivai lo ni ta si chu, eng thu emaw ka hnen a sawi tur a rawn chah a nih dawn hi ka tiriru a, eng teh, ulah pawh ka ngai lo a, ka lehpel a ka kalsan ta mai a.

“Tun Chawlhni Sande sikul kal vanglai tak khan, ka riah-in a ka kal tur a pi te in a tangin Thankimi chuan min lo au leh a. Ka han lut chu a inkhawm kal tep tawh chuan nui har har chung leh mi dang lo ngaih pawh a fiamthu ang tak si, mahse titak tih-hriat thei tur si hian, ‘Khuma, tun Nilai zan khan ka mangah ka lo hmu chia, ka lo ngai khawp mai che a. A tukah pawh chuan ka mang chu ka hre ta deuh reng a. Ka mumangah chuan i mit nen lam ka lo hmu a. Mumang a an mit kan hmuh hi chuan anni pawhin an mumangah min hmu ve thin’ an ti a, i mumangah min hmu ve hial lo maw?’ tiin a mumang a min hmuh thu chu min lo hrilh nghal chawt a. Kei chuan, ‘Ka mang mai maiah ni lo a takah ngei chiang zawkin hei ka hmu che a lawm,’ tiin ka chhang satliah ve a.

“Thu dang sawi leh hman ni tawh hek lo, inkhawm turin min chhuahsan ta a. Chu a thu min hrilh chu a mang mah ni se ka rilruah a cham ve ta deuh a. Nichin a ka sawi tawh ang khan—Chawhnu inkhawm ban a kan thiani nen Hmunhlui tlang a kan leng dun haw chu, ka len ta hre lo lenkhawmna inah ka lut ve ta ringawt a. An lam chiam lo na-a, zai an thiam khawp mai a. Ka va luh chiah lai tak chuan mi kar a Thankimi zai tui lai hmel chu ka va hmu ve chiah a. Chuta tang chiah chuan tha hi ka tithar thut mai zu nia maw le. Ka thilunga riau a neih dan chu sawi thiam theih pawh a ni lo. A hmel chu tha ka tithar ta hluai

pawh a ni chuang em em lo, a duhawmna thuruk-in min vaw thlu tawp ni berin ka hria. Ei theih phe chu ni se ei zawh vek ka duh hial awm e.

"Zan inkhawm a lo hun a. Chawlni zan hi chu tute emaw vang a kan inkhawm loh theih loh zan a nih theuh hi. Chumi zan pawh chuan Thankimi avang chauhin ka inkhawm ve a. Ani chu a thutna pangngai, avang zawng a lamtual sir a thut-thleng pathum hun tlar hmatawng pawn lam vausa-ah khan a thu a. Kei erawh chu mipa lam tlar hnunng ber, mi tawngtai hlan a chhuah ruk rem-na lai turah bawh khan ka thu leh a. Mahse chumi zan chuan khaw dang reng reng hawi thei lovin Thankimi ringawt mai chu ka en ta reng mai a. Kha....., awm tha duh nih pawh ka hlawh ta phian mahna. Ka hmangaih dan lah chu: Ka thilungah bian a nung thar sarh mai a. Amah chu ka nunna hnar ni hliah hliah hian ka hria nia maw le. Han sawi ta zel ila—Inkhawm kan ban pawh chuan nula dang chhawm zai rel lovin ani lo chhuak hnunng-ber chu ka lo nghak a. Min hmuh veleh ka beisei phak loh, min lo ko hmasa khiah mai chu ka lawm teh a sin aw. Lenkhawmpui-ah min sawm a, ka hreh deuh hle na-in, ka hmangaih berin min sawm ta mjaui si chu le kan lengkhawm teh ta poh a lawm. A thuhrimah hmun dang a len chakna ka nei mawli lo mai a, leng mahila nuam chuang pawhin ka rin-hek lo.

'Chumi zan kan leng khawm chu kan ta

fahran lo bawk a, keia kar ka'n tel ve meuh chu min lo um e phian lehngal a. Manilomah a mi-blim intivanvâ ho ka ngaih theih loh nak alaiin ka lung tilengtú ber lah chu mi alai a mi sakhawmi ber leh mi ahluan a lenkhawm peih ber mi a ni ta mauh mai si a, a zia lo zawk teh a sin. Keia lah chuan ka ngaizawng satliah pawh ni lovin amahah chuan ka inling ta a ni ber mai a. Thil hi a mak thei teh a sin," tiin a chanchin thar chu a thianpa Kapthuama a hrilh ta vek a. Kapthuama chuan, "Chuti ni se, i rilru ang chu i hrilh tawh phawt ang a maw?" tiin a zawt a. Liankhuma chuan, "Hrilh chiah lo e. Mahse ka hawiher leh ka khawsa zia atang chuan, a tan hai chi ka ni lo, a ruibin ka rui tlat a ni ber mai. Tin, sawi loh tum pawh ka la ni lo a, sawina tur hun remchang ka la tmu hman lo a ni zawk. Ka tan sawi lova ngawih bopui rual a ni lo. Buh lu chuh tul a nat em avangin ka la tawn remchan loh avang a la sawi hman lo mai mai ka ni," a ti a.

Kapthuama chuan, "A nih, i hmuh danin Ihan-kimi chuan hmangaih ve che-in i inhria em?" a ti a. Liankhuma chuan, "Keiin tihrikna ka la neih loh avangin ani pawhin a la cheh bik hauh lo a. Tin, ka sawi tawh ang khan, a tu ve ve tan pawh sawina hun a la awm hlawl lo bawk a ni. Tun kan tawn riak lut tur pawh hi kawngtluanin kan lo kal a. Mahse mi dangte nen kan ni hlawm si a, sawina hun awm thei si hek lo. Ka pensan dawn

tepah, pen sawm emaw lek a thui hi kan pahnih chauhin kan kal dun hman a Kei, a zak a zak thei ta lo chuan ka'n tiri hram a. Mahse min chhan ve hma-in hnung a miten min rawn um phak chu a ni zui leh ta mai bawk si a. Kei lah chu ka pen a hun chu a ni leh ta mai bawk si nen. Ka pen hnu chuan, 'I lo leng ve thin ang chu ti rawh,' min han tizui a. Mahse chungte chu nula tawng dan ve kha a ni satlah a. Ka ngaihbel e ka'n ti mai pawh a," a ti a.

"A nih i va leng tawh reng em?" tiin Kapthuama chuan a zawt a. Ani chuan, "La leng teh suh a ngei, an lo leh kan lo a intlai loh bakah zanin hi a zan hnihna a la ni chauh reng reng a. Engpawh ni se, i hnen a sawi hi ka duh phawt avangin ka rawn chah che a lawm maw le," a ti a. Kapthuama chuan, "Chuti ni se, Thiani chu thlah fel a, tuna-mi chung a ingghah ngbeh chu i tum tihna a ni maw?" a han ti leh a. Liankhuma chuan, "Ka tum leh tum loh a thil kal pawh a ni lo, pakhat chu ka thlah lo thei tawh lo a, pakhati lah ka hmangaih lo thei tawh lo bawk a. Keima tum vang ni lovin Thankimi zawkin ka thinlung atangin nula dang reug reng chu a um bo vek a ni ringawt mai a ni. Thankimi ka hman-gaihna chuan ka tum lohin vawi leh khatah min vaw thlu tawp a, amahah min suan lut leh tawp a, a chetin ka che hman chai lo. Mi dang reng reng chu ka thinlungah a dah nikum thing thup vek tawh," a ti a, a pui hawk hawk a

Kap̄thuama ɬawng leh hma chuan Liankhuma vek chuan, "Ngawi teh, ka lung a han tih!enzia mai chu maw, i hnen a nia sawi ta mai mai ila. Kan lo aɬang sawn an lo sir tlem hi a lang thei a, Chu ringawt chu zu thlir zu thlir ɬhin ia. Heti ang reng reng a ka awm dawn a nih chuan a retheihthlak ngawt ang. Eng le khaw le, ka'n kawm bul fuk phawt ang a, chanchin kan inhrilh zel ang chu. Taka na, nangni zawk kha, hmanni-a lehkha lo thleng khan eng nge a sawi?" tiin a han zawt ve a. Kap̄thuama chuan, "Rilru dang a la pu lo ni maw ka ti mai a. Amaherawhchu, herhtu an ɬha deuh a, chu avang chuan a mangang deuh a ni awm e..." a tih laiin Liankhuma chuan, "Engti kawng a mangang nge a nih a? A chhungten a duh lohna mualah namseh an tum deuhin a rilru an chawb buai phak deuh em ni?" a lo ti a.

Kap̄thuama chuan, "A rilru lam phei chu la nghet ɬha viauin a rawn insawi a. A chhungte zawkin a inlengte zing a pakhat chu an lunglen deuh a, neih luihtir an tum deuh dawna a hriat avang a mangang a ni awm e. Kal turin min rawn chah a. Kei pawh buh lu chhum zawh veleh hian kal chu lâwm tum chuan ka tum rilru a. Chu lo chu chanchin hriat thar engmah ka nei lo. Kal theih ka tum deuh avangin chanchin pawh hrilh hran ngaiin ka hre lo a, ka chhâng ta bik hlei lo," a ti a. Tichuan, an chungchang a pawimawh an tih an sawi hnu chuan an ɬhian-dunin bukpuj lamah an chhuk thla leh ia a,

8. KRISTA AIA PALAI



dik takin Thankimi chuan Liankhuma chu a tleirawl chhuah tirh atanga a lo ngaihzaun ruk a ni zawk a. Thankimi chu a naupan lai atang a naupang nungchang tha leh fel, an sikul pawhin nungchang tha ber a kum tin an thlan chhuah thin a ni a. Sande sikul lamah ni se, kai kim lawmman leh ekzam lawmman kum tin a hmu zat zat a ni bawk a. A nulat hnu-ah pawh nula nungchang tha leh fel ber a an neih a ni chho ta zel a. Chuti ang mi chu a nih avangin, Liankhuma leh mi dang lo ngaihbel tur pawhin a rilru puthmang chu a tilang ngai hek lo. Naupang Sande sikul atang a puitling lam a sawn rual a nih pawhin naupang Sande sikul zirtirtu turin an chhawr zui ta zawk a. Naupang zirtirtu a nih chhung pawh chuan an chelekin, khaw thenawmte nen a Kohhran thiltih hona-ah reng reng an hmatawn ber a ni thin. Mi chuti ang chu a nih avangin a hmel duh ve ber Liankhuma pawh chu a rukin a hmangaih ve ngawr ngawr ringawt mai a ni.

A nu u pasal chu an veng a an Kohhran upa min ber a ni a. Chu chuan ama fanu ang chiahin a kaibruaiin a enkawl a. Thankimi pawhin a ngaina in a vui a vaina leh a mangan thu thleng a ama pa tak aia a thlen hmasakna thin a ni. Thankimi chu nula lian teh chiam lo, sa nghet tlet tlawt, hang tisen sawk, hmai bial lam deuh, ngaih la tawk a mitkath

lek lek, biang sum nei dawr kalh mai leh khabe phir lek lek, hmelhtha langsar vuh ni si lova ngaihnopei en chet dawl tak a ni. Thil sawi awm tak chauh sawi mi, kawm nuam tak leh zai ngaina tak a ni a. Amah a sakhawmina chuan a pianken ruangam thatna leh rilru chu a belhchhab lehngal nen. A duh mi tan chuan a zun-zam chu pal chah rual a ni lo reng ang. Amaherawhchu, amah a zahawm em avang-in tlangval satliah leh hawklak chi tan chuan fiam mai mai ngam a ni lo. An len luh ve zauh chang erawh chuan kawm nuam chu an ti hle ang lawi si thin a. Mahse mi dangte ang a pawt khum mai mai ngam rual niin an bre lo.

Chutih lai chuan a rualpui tam zawk chuan pasal an nei tawh a. Ani pawh pasal neih hun zen zawn chu a ni ve tawh na-in, nula lêngtûl leh phan-chang pheih chu a la li lo. Amah pawhin engtikah emaw pasal la nei ve ngei turah chuan a inruat a. Khawvel leilung dan a nih miao si avangin pumpelh ngawt theihah chuan a ngai bik lo a. Mahse a duh dan avang chuan khawlh a inti rilru deuh thin a. Tlangval tlangchhuak ve pangai leh tlem a Pathian tih mi a duh a. An veng tlangval han sakhawmi deuhthe lah chu: Tlangval phukphak vak lo, tlem a mi chuanhnuai hret leh hawi harh vak lo chi an ni hlawm lehngal a. Tlangval nungchang the leh fel a an sawi Kapthuama leh a ruka a nginat ber Liankhuma lah chu an fel viau ringawt a. Sakhaw lam chu a hawiin an hawider rih bawk

si lo. Liankhuma tak phei chu a suai hauh lo na-
in a châng chang a zu in ve zauh thin a lo ni
chhap nen. A kumkhaw pumkhatpui tur a ngaih-
tuah chang chuan a lu a hai ru hle thin a ni.

Chuvangin, a ngaina hre lo chuan, 'Pathianin
a la rei mai ang chu,' tiin Pathian kutah a inghat
ringawt a. Chutia Liankhuman a hmangaih tak
that avang erawh chuan ngaihtuahna thar a nei a.
"Pathianin he ka lo hmangaih ve ber thin hi min
pe dawn nge nge a ni ang e. Pathian remruat a
a nih phawt chuan i he lovin ka nei teh poh a ni
ang chu. Hetia ka saisik hmasak pawh ni lova
minrawn hnar ta mai hi Pathianin ka pasal tur a
tan a ruat a nih phawt chuan theihtawp chhuabin
Pathian lamah hrui tum ila, a lo thar ve hlah
chuan a lawmawm dawn em mai," tiin a ngaihtuah
phur ang reng a. Mahse a tan thlemna a rawn in-
tan dawn chauh a lo la ni zawk.

Liankhuma chuan Thankimi mitmei chu ha-
hauh hek lo. A jawngkamah lawmna tur hre ri-
lo mah se, amah tlangval a ni hek lo, Thankimi
lakah chuan a beiscina a sang em em a. Thankimi
pawh chuan Liankhuma thil beisei a hmuhin, amah
lahin a tleirawl chhuah tih atanga a hmeldoh ruk
ve ber a nih bawh si-ah chuan, a tum angin thil a
awlai dawn hauh lo tih chu a hmu ta thoai mai
reng a. Chu harsana rukah chuan, a engamah
hmas a iaven hle loh chuan a tan thukna lungpui
a rawn inbung hui ta nian a bria a. A iaven thiam

theih nan leh a duh ang a thil a kal theih nan a pa (Kohhran upa) chu rawn ruk a duh ta a. Liankhuma a rawn hmangaih tak ngawt dan chu Pathian ruat niin a ring si, Nimahsela ani Liankhuma chu ala khawvel mi nasa bawk si. Thankimi lah chuan a ruk tak chuan a hmangaih ve em em tho bawk si. Liankhuma vang a chet khawvel palh a hlauthawng bawk si. Liankhuma lah chuan Thankimi a hmangaihna chu Pathian thiltih lamah awzâwng a puh teuh bawk si lo. Chuvangin, a pa rawn thuai a tul berin a hre ta a.

Buh seng tul vanglai tak a nih si avangin Thankimi chuan a pa fanu Vanromawii chu buh sengah a lâwm ta ringawt a. Vanromawii te lo-a an feh ni chuan Thankimi chuan bun hmunah a chanchin zawng zawng chu a pa hnenah a sawi fai ta vek a. A pa hnenah chuan: "Liankhuma hi ka tleirawl chhuah phat atang a ka ngaihzawng a ni a. Mahse ka dinhmun heti hi a nih avang leh ani Liankhuma lah heti mai mai hi a nih bawk si avangin ngaihzawng lo enin ka en lui tlat a. Mahse a sum a insum zawh rual loh a min hmangaih ve takah si chuan a mi hmangaihna chu Pathian atang a min hmangaih a nih ringin ka ngaihdan ka hrilh a. Mahse ani lah chuan chuti zawngin a lo thluk ve ta khaw si lo. Tin, hei chen ka nulat ve tawh avang hlan pasal chhia tha fahran pawh neih hun kan nih ve tawh avangin Pathian hnenah pawh ka pasal tur dâ tak min hriattir turin ka dil thin a. Hetia Lian-

khuman mih rawn hmangaih ve takah si hi chuan, ka pasal tur ngei a nih pawh ka ring rilru a. Mahse chuti lam hawi chuan engmah a kiangah ka la tiri chuang lo a

"Tin, ka pasal tur a Pathian ruat pawh lo ni ta teh reng mah se, a nungchang thlak a Pathiana a thar ve si loh chuan innei ta teh reng mahila nupa hlim kan ni thei dawn chuang si lo tih ka ngaihtuah-in ka rilru a buai ru ta riau mai a. Mahse ka hman-gaih ve em em tho si a. Ani lahin min âtphah lo chauh a ni bawh si a. Ka mang a ang ru em a, i hneng sawi hi ka châk a. Tul lai mah ni se, tiin Roteli ka rawn lâwm ta ringawt mai a ni," tiin a chanchin zawng zawng chu a hrilh ta vek a. A pa chu a ngawi vung vung a, nakinah chuan muang chuar hian, "A ni tak maw, i han sawi tâkah chuan tute sawi emaw ni Chiang lo riai chuan ka hre thawi tawh tak e. 'Liankhuman Thankimi a ngaizawng' an tih chu ka hre zauh tawh chuan ka bria. Chu, tun buh seng hnu thil mai a la ni maw?" tiin a han zawt a. Thankini chuan, "A nih a hnukmanah kar hnib hma lam chauh thil kha a la ni. Buh seng ramrah lai ngang hi a nih avangin duh angin min hmu thei lo zawk a. Chuti phe chu ni lo se, a lo leng chamchi ang," a ti a.

A pa chuan, "I dikhmun chu a khawh thei fu dawn tak e. A tu ve ve pawhin inhmangaih bawh si chuan i tan inxen a hun a ni ber a. Chuti taka a nmangaih lai che chu denchenin i theihotawpin

Pathian lamah hruai tum phawt mai la. Chutia a hmangaih thut danah che chuan i tawngtaina Pathian-in a rawn chhanna a nih ngei ka ring e. Amaherawh-chu, amah tisa-mi a la nih avangin i taksa rawn beisei mah se, lo tibeidawng thak zel la. Tisa-mi chuan engkim hi an hmu tisa vek a. Thlarau-mi lahin thil reng reng thlarau lamah kaih luh an tum vek baw k a. Chuvangin, ani pawh tisa a la awm avangin tisa itin a it chia, a thlarau tana a mamawh-na che lam aiin a tisa tan a hmangaihna che chu a kai lut chak zawk tihna a ni a. Mahse Pathianin a tumpui dan zawk chu : A thlarau nunna atan a hmangaihtir ta che a. Mahse thlaraua mit la meng eih loh a nih avangin a hre thiam lo a nih chu. Chuvangin, beidawng lo leh tuarchhel takin insum la, Pathian hnen a tawngtai chungin a thlarau tan theih-tawp chhuah phawt la. Kohhranin kan tih theih loh ti turin i nulatna hmangin Pathianin 'Krista aia palai' turin a tir che tih inhria ang che. I tan ni lo, Krista tan seng lut hmasa phawt la. Chumi hnu-ah zawng i mamawh ang zelin a la pe chhuak leh dawn che zuk nia. I pasal tura Pathian ruat a nih loh tak pawhin lawm takin Pathianin a awmtir tho ang che.

"Liankhuma tan chuan i hlu em em a. Mahse i hlutna tak chu a la hmu chhuak lo zawk a. I thinlung chu a tan pian chhuahna 'ranthleng' angin a buatsaih sak a, i taksa lah 'damna kraws' angin a pawimawh baw k a. Chumi dikna chu engtikah emaw chuan a la rawn hmu ve mai ang. Liankhuma

thlarau chu i kutah Pathianin a pe tawh chia, a taksa erawh chu a pe zel dawn che em tih chu lungkhamah neih miah suh ang che. Anin a duh chuan a chungah ngei kut ngathin tawngtai sak la. Amaherawhchu, hmun fianrial leh hmun falah reng reng awm dunpui hauh suh la. Nangin do zo dawnin inhre mah la, ani tan sual cho chhuaktu Setana tiangneloa bul a nih phah thin a nia. Sual tura a thlemna che kawngah i tihbeidawn avanga a thinrim pawhin pawiti suh. Tunah chuan Pathian tihluihna hruihrualin a nghawngah i hling tawh a, nuarin tih-tauh tum mah se pawiti suh ang che.

"Amaherawhchu, thinrim lutuk chuan siam hauh thung suh. Hmangaihna avang a thinrimna lo kal hi a na em em bik a, khaw hmu hman lo khawpin an thinrim chuan thu hnu an dawn hman thin lo. Kutthlak duh khawp a an ngaihtuahna a at zawh vek thin avangin a thinrimna tur zawng chuan tawng hauh suh ang che. Tin, hmangaihna thikthu hi a na em em mai bawk a. Eng emaw hlek a thik viau zel dawn a. Chu chu hre reingin a thik tur awm lam hawiin nung hauh bawk suh ang che. Thikthu hian mawi leh mawi lo a thlu lo a, mualpho a dawn hek lo. Engmah lo-ah i mualphopui palh dah ang e.

"I dinbmun pawimawh dan chu heti hian tehkhin ta ila: Isaka nupui zawng tura a pa Abrahaman a chhiabhlawh hotu ram hla taka a tirh khan, Rebeki

chu a pu Isaka tan a hruai haw ta a. A hruaitu chuan kha nula Rebeki kha duh ta se la chuan a pu hnen thlen lovin a duhna lamah a pen bopui thei a, a duh leh kawng lakah a bawrhbanglo thei. Mahse chu lam chu hawipui miah lovin Isaka puan-in a hruai luh hmaloha a tawi khawtlaipui lo ang khan, Krista tan a mo zawngtu i nih ang takin Krista puan-in i thlenpui hmaloh chuan khawimah penpui suh ang che. Pathian mit tling tak a Krista ke bul i thlenpui hnu-ah erawh chuan 'a sem darh a retthei-te hnenah a pe a' tih zia angin i mamawh ang zia zelin a la pe leh dawn si che a, Ani Liankhuma ngei a pe lo che a nih pawhin a aia tha zawk pawh a pe thei che tih theihngihl miah suh ang che aw.

"Hei kan khawtlangah pawh fak i kai viau a. Amaherawhchu, fak hlawh duh vang a tum chawp lovin, Pathian faktlak ni zawk turin Pathian kutah inkawltir ang che. A hmasaberin Pathian lamah tan tum tlat la, keini lam hi zawng Pathian tanna tlak a nih loh hi. Pathian lam a i tan hmasak phawt chuan i lamah pawh Pathian chu a tang em em ang. Pathian kan lama a tan chuan tu nge min do thei ang, tih a nih kha. Pathinin hneh tawh mihringin Pathian tlansan ahnehin Pathian lamah an intulut hlauh thin tih kan hai si lo. Josua hnen a Pathian thuchah ang khan, 'huai tak leh chhel tak-in lo awm phawt mai rawh' tih kha lo changchawi tang tang ang che," tiin a fanu chu a thlamuanin a fuih a.

Chawfak a-hun 'tâk avangin an bung chu an bang a. - A pa chuan lo mawng luipuia u-lawng khuangchawi a zuk suah lawk hlanin Thankimi chuan tlam phurin thlâm lam a pan a. Vanromawün be- kang a lo vua a, ani Thankimi chuan zawngtûr (thing- ba) a cho leh a. A pa a lo thlen chuan chaw an fâk ta a.

9. "KA THLARAU I KO KIR LEH DAWN SI A"



INRINNI-ah buh an la zo chiah a, Kapthuama chu ram lam atangin Chawlhni chauh cham turin Rozami te khaw lamah a kal ta vat a. Kawng a bo avangin a thleng tlai hle a. Rozami pawhin a lo kal tih reng a hre lo. A tuk zingah Kapthuama chuan Thanthuami hnenah, "Zamin ka lo kal hi a hre dawn si lo a, va kal ta la, - 'Vawiinah engtik hunah emaw inkawm a duh khawp mai a. A remchan dan ka hriat si loh avangin aman remrawn ruat rawh se,' a ti," ti-a hrilh turin a tir a. Rozami chuan, "Vawiin chawhnu inkhawm banah inhmu ila, remchang chu a awm mai ang," tiin arawn chah a. Chawhnu inkhawm banah chuan Kapthuama leh Rozami chu Tnonthuami pateate in, veng bitla leh mi lun lohna deuh turah chuan inkawm turin Thanthuami leh Pianmawii te nen an kal a. Mahse anni thian dun chuan chuktuah huanah an luhsan ta daih a. An pabnih chaubin an inkawm ta a.

Kapthuama chuan, "Zami, i lehkha kha ka lo hmu a. Mahse lehkha vek arawn chhan che chu tawka tih loh bakah i hmuh loh palh ka hlauh fawm bawka avangin nahnirawn kal tluk awmin ka hre lo a. Chu lo-ah hmuh leh che hi ka chak em avangin hna tul karah ka lo kal hram hram a. Inkhawmpui tiak tuk a ka haw ta kha maw, ka khua

a har em em khawp a. Tun thlengin ka ni tin ngaihtubhna hi i tan ka hmang zo thak a ni ringawt a. Inleng i neih thu minrawn hrilhna lehkhah ka hmuh tih pheichuan ka mang a ang em em mai a. Pasal nei tur ang a ka han dah chhin che pheichuan ka khaw en te hi Chiang lo zo vekin ka hre thin a. Chawp leh chilh a lo kal ngahal ruak ruak tak ka nâp a. Mahse kan tulzia lah chu tul a phung pawh a ni si lo. Lo kal thuai thuai ka duh avangin kan bub seng pawh lulêtin ka tang a. Nimin piah khan kan seng zo chiah a. In lamah pawh haw hrampa tawh chuang lovin ram lam atangin in khua ka rawn en zawn a; ka rawn rin kal ringawt a. Kal-khân ka hre si lo, ka han bo leh ang châk châk thin. Nizan inkhawm ban hla an sak lai tak khan lal lungdawh ka lo thleng chiah a.

"Tunah hian i inleng hlawnte chu in tibeidawng ta nge ni, eng zai nge in rel tâk?" tiin a han zawl a. Rozami chuan, "Kan tibeidawng thawkhat zawng a ni mai ang chu. Hman a i hnen a ka sawi tawh ang khan — Ka la inpuahchah chhuah lohna chu chhuanlamah hmanin kan hnar ta rih kha chu a ni a. Thu dekhah engmah pawh a awm lo a. Ka chungte, hnenah pawh pasal nei hrim hrim ka la duh loh thu ka sawi a. Mahse lo inpuahchah tawhin kal mai thei dinnanah lo ding hmanila chuan, keia hmanla te chuan an in dazawng lak a an mi tih hlin a. Khel chung hmanla ka ring lo. Ka kan chhuanlam a thar rih em avangin thlin anah min

en rib lo mai mai niin ka hria. Chuti phe chu ni lo se, min tir nasa ngawtin ka ring.

"Thuama, kei zawng hrehawm ka ti em mai, duh hun hun a biak phakah i awm si lo. Khawhar-na leh lunglenna te hi chu tur rengah ka ruat a, thinlong lam a thlamuan hi chuan tuar dan dan pawh a awm a. Ka chhungte mawlh hi a ni hrehawm ka tihchhan zawk enu ni. Ka nu chu ka chungah a tha em em mai a, kan inkar thu chen hian ka hrilh fai vek a. Mi a hriat thiampuiin ka duh lohna mualah chuan min tir lui hauh lo ang tih pawh ka hre sa vek a. Ka pa mawlh hi a ni. I hnenah chuan han sawi ta ula : La-upa a nihna a hre si, mi neinung leh tlem a khawsa thei deuh lo chu mi neihtir hi a tum aniah lo tih lah a tawngkam atangin a hriat sa vek a. H nangailhna lam hi chhe tê pawhin a thluk mawlh si lo. A hming a kamding chan chang leh sawrkar hnathawk hlek hmu se, a zu rui hian mi a zuar a ni ringawt mai zel a. Mi phe chu a mi duat dan dan chuan min duat fu a. Ka sawi loh loh ka lam kher loh pawhin ka mamawh tura a rin hi chu mi a lam sak mai thin a. Incheina lam te phe hi chu a bengvar vena lam a ni a, sawi rik hlek hi chuan awh ang ang hi min lei sak zel a. Amaherawh, chu a mi chhuan dan hi bungraw chhuanin min chhuang a. Min duat hle e ti lo chuan apui pasal chungchangah erawh hi chuan ka duh-zawng ta n hi a ngaihtuah ther tê lo mai a. A mi duh-zawng chauh thlir run mi, kan jalpa hova nileng

leng a zu in a ruih loh lai reng reng hmuh tur awm mumal lo a ni a. A ruih lo mial chang hi chuan a mihring mihrinna ringawt chu a sual hranpa hauh lo a. Mahse thu a chhan a lâk a thiam loh deuh thin avangin kan chhungkua a nawm loh phah em a ni.

"A ruih tawh lah chuan a chapo si, huât tur hi a zawng a, a âng a âng mai thin a. Thinrim a rawl rin teh chiam chi a ni lo hlahz zawk a, kan mualpho tur angin kan mualpho lo hlahz zawk thin a. K'u Hnuna lah hi mipa a ni ve ringawt a, ka nu lamah a kal a, a ngawichawi si, sual hlei lo awm mai mai a ni ringawt bawk si a. Kei a kawhrâwng zawk lah hi hmeichhia ka lo ni si nen, kan in chhung chu khua a var lo tak tak a ri. Ka pa chu han sawi leh thin ila. Lal nen a inkawp reng mai, ni tin a lal ina tâp chawt mai a ni a. Lal-in lah chu mi-tin mi-tang chuankaina leh Sorkar hnathawk dêk dêk tawh apiangte innghahna a ni a. A ruih lungpuam tawh lamah hi chuan mi a chhuang pheng hian chungho hnenah chuan mi sawi tehah a nei a. Ani ngaih chuan min duhsakah pawh a inggai ang a, keia ngaihnan lah zah-thlak leh mang ti-ang lek a ni thung si a.

"Kei chuan hmangaihna kawng ka thlang a. Ka himna chu nêh sum leh khawakna lam a inghat lovin, hmangaihna chauh hian ka damchhung nun a thlim dawn si a. Chuvangin tun hma-zawng a ka mi lo tawate leh tun thlang a ka hma a lo

chhuak zawng zawngte lak a ta, nang hian min la hrangin nangmah min seng lut ta a. He hmun atang hi chuan tuman min tinghingin min tisai leh ngai tawh lo ang. Nangin nin tiansan loh chuan kei zawngin ka phatsan ngai lo ang che," a ti a.

Kapthuma chuan, "I mi hmangaihna dawngtu nih chu lei rokhwmtu nih aib ka thlang zawk a. Sumdawng hlawhtling ai pawhin sawi a siak lo ro blu telu-ah ka inngai ang. Kei min hawisanir tumin i hnenah ka chanchin a chhuanchhe zawng leh leiko tak a zuako awm mah se, an hmel chu hawisanin ka lam lo hawi la, an aw chu menah thlakir sirah lo hnawl thin ang che aw. I thinbung la tur a an mawina famkim leh an bum tumna che tawngkam thlum nen phurh thluk an tum che pawhin, i lak a nghing leh ngai tawh lo tur hi min vuan la, tichuan, nghet takin kan ding dun dawn nia. Mi thenkhat chu i lak a an tuitlak tawh loh hnu-eh pawh, mi fing zawk te finna purin, neihnunna hmuimer nen i nu leh pa lam atangin an rawn thawn ang chia. Chutih hunah pawh chuan tan lo khawh hram hram ang che. Ka hmangaibna che hi i rilru nghehna chuan a lo puang chhuak thin dawn zuk nia," a ti a.

Rozami chuan, "Ka nu leh ka pa min tirh luihna chu ka hnialthla ang a, an mi vauna pawh ka tuar hlawchhuak haw ang. Keimah avang a tlangval i nih chhung chuan ka nulatna hi humhim ka tumin, i nupui ka nih thlengin ka rinawmna chu vawn reng

ka tum dawn si a. I tan ka nulatna a tawp ni-ah chuan ka vanglai ni chu ui haub lovin ka rawn chhawm tawh ang. Nang chu ka tan thlamuanna te, hlimna te leh nun-khawnewmna hnâr i ni si a. I mi hmangaihna chuan ka lungngaih ni-ah hlimna khawvar min hmuhtir ang a, ka tah ni-ah lawm hla min saktir dawn si a. I tel lova zan rei thin te, chhun khawhar, ni vui zo lo hial khawp a ka ngaihna che hi, ka duhthusam tihpuitlinna kawng a nih phawt chuan, hrehawmna hleiluak zawk lo thleng dawn mah se ka cho. Chung hrehawmna te chuan chhun leh zan min hual vel mah se, chu hrehawmna piaa lam a kan inlawm hun tur hmel hlim chu ka rinna mitthla-in ka thlir ang a. Hmangaihna leh-khathawn angin ka chhiar chhuak thin dawn si a. Nang chu ka nunna laihrui i nih avangin, ka hnukchah dawn darker pawh hmang mek tawh mahila, i mi hmangaihna aw chuan, ka thlarau chu i ko kir leh dawn si a. Ka hmel i hmuh phak loh lai a mi dang lak a min hlauhthawn chuan, kei pawhin ka hlauthawng ve tho ang che. Khaw eng hmu ngai lo pangpar chu a vul ngai lo ang hian, i hmel hmuh phak lehna ram atang hi chuan ka hlim ngai lo. I hming sawichhiatna chu ka hmangaihna che belh-chahthu a ni a, faktu che lah ka laina an ni bawks. Chavangin, mi dang nei tur a ka chhungte min tih luhna thupok a khaub zawh poh leh i tan ka do nasat ang a, min thlem nasat zawh poh leh ka duhna che hi ka puangzar muapho deuh deuh bawks ang, tin lungawi hmel ngai rei sin a han rul a.

Kap̄thuama chuan, “Thla hleinga zan arsite chuan an eng an chhuah ngam lo ang hian, i mi hmangaih-na eng chuan mi dang mawina leh ngaihnoheina chu a hlih vek a. Nang chauh hi ka damchhung ni kal zel dan tur hrih lawk theitu zawlnei awmchhun chu i ni si a. Chuvangin, ka damchhung rorelna chu i kut a ka nghah vek avangin ka tan roreltu fel tak i nih theih nan khawnbâwlah min hmang la, keiin lalnu berah ka vuan kumkhua ang che. I tel lo hian Zami, mitthi vui haw lam angin ka nun hi a khawharin a hrihai thin a. I kiang a ka awm erawh chuan — Nausen tuihal hnute châk tap vawr vawr tawh a nu tângnema a bei hle hle thin ang hian ka thla a muang thin a sin. Khawnge, tunah an awm loh lai hian vawi khat chauhin”

Than̄thuami te nen leng ho an an theih nan a an tiam lawk angin an rawn sawm ta a. Zan inkhawm banah Kap̄thuama chu Rozami te inah a lêng a. Mah-se inlêng dangte an awm ve nual avangin eng han sawina chi chu a ni lo. Lehkha te a lo zial sak a, rei mawi tawk tak a len hnu chuan a tuk a inthen leh hmabakin an inmutsan ta a. A tuk Thawhtanni tukthuan ei kham a Rozami buh chhek riak lut tur chuan Than̄thuami te in a rawn tlawh kawī zawk a. Kap̄thuama chu Lalpianmawii te in a chaw a lo ei bo avangin a lo awm lo a. A chhuak leh lam nen kawtkaiah an intawng hman hram a. Chibai an inbuk a, Kap̄thuama chuan zawi deuh sep hian, “Kan inhmuh leh thuai

theih nan Pathian i dil ang aw. Hmangaih, mangtha,"
a ti a, Rozami mittui chu a far nghal zawih zawih a.

Kapthuama chu amah chauhin a haw ta vang
vang vang a. Kawng tluanin Rozami'n, 'ka thlarau
chu i ko kir leh dawn si a,' a tih kha a ngaihtuah reng
a, a ngaihna a hre thei lo. A sawitu Rozami ngei
pawhin hre lawk a sawi a nih pawh a ring bik hek lo.
Hmangaihna a sawi chihuahna tawngkamah a ruat sak
ringawt a. Mahse a rilru pangkhingah chuan : Eng-
tikah emaw eng thilemaw tak chu lo thleng tur la
awmin a ring ta deuh tlat a.

10. “KA TAWNGTAI ANG CHE AW”

— *Thankimi*

BUH chhêk tul lai a nih avangin vawi khat
vei pawh thil lua a ni a. Chawlhni pawh haw chhuak
phal lovin an cham hlawm a. Chu Chawlhni chuan
ni dang a cham ve duh ngai hauh lo Thankimi
meuh pawh a cham ve a. Chawlhni a pumpa an
riahpuite lah chu tumah tawngtai inkhawm fahran
pawh rawt lovin an duhna mual mualah an darh
siau mai lehngal a. Thenkhatin hnang an la a,
thenkhat lah luiah an kal thawm nen. A cham ve
ta chu a inchbir rum rum a. A Sande sikul thulh
tur mawlh chu a piwi tih ber a ni. A naute nau-
pang tê tê hotu nei lova an hawihai tur mawlh chu
a mitthlain a hmu reng a. Ni dangah pawh a Sande
sikul thulh hreh avangin Chawlhni cham a khaw
thenawm kal leh renchham avang a Vaikal fahran
pawh duh ngai lo a ni a. Tun a tak a hna duham
avang ringawt lehngal a Sande sikul a han bawh
pel ta leh a hming a inkhawmna chhe tê pawh nei
bawk si lo a Chawlhni a vui liam tur chu panhmai
a tiin a cham ve ta chu manhla lo a tiin a inchbir
em em a.

Pawlbukah chuan amah chaubin a zai a zai a,
nakinah chuan a lung lung a chhe ta hlawm a.
“A..., khawnge, heti ringawt mai zawng a dik lo,
Chawlhni a nih manah fianrial tawngtai talin ka kal

teh ang," a ti a, an lo lamah a kal ta a An lo chu lo bing titih, kil khatah in chhung dung chen lek tur tak tak hi an ri te nen an invah pawh a, an lo chu a zuk thleng a. An thlâm pawh chhêkpui a tan an pawt darh vek tawh a. Buh seng lai a chawfak hmeh bai chhuanna tur an zar tualpuk erawh chu a ngaitê-in thlâm kawtah a la inzar a. Chu an tualpuk zar hliapah chuan thu-in Pathian lehkhabu-a a lung tileng ber thin châng, a chhiar zin em em tawh lai chu a han keu a :+

'Tunlai thil awmzia in hriat avang leh muhil thawh harh a hun tawh takzet tih inhriat avang-in.....,' (Rom 13 11-14)

tihi lai chu a han chhiar a. Chutah bung sawmpali châng khatna chu a han chhiar thleng leh a :

'Tin rinna chak lo mi chu, a rinhlelnate sawisel lovin lawm rawh u.'

tihi lai a chhiar thlen chuan, Liankhuma chungchang a ritru put dan tur pawh hre chhuak uar uarin a inhria a. A chhiar zel a :

'Chutichuan, keini michakte hian mahni lawmna zawng lovin mi chaklote chak lohna chu kan tuar-pui zawk tur a ni.'

tihi thlenga a han chhiar phei chuan, a tan zirtistu tha tak a nih bakah eng emaw rawn tiveng uar uar tur awm hualhle-in a hria a. A chhiar zawk chuan a thinghi a, a tawngtai te ngat ngat a. A tawngtai

zo chiah a han inhawng chuan a kiang a lo ding reng Liankhuma chu a han hmu hmasaber a. Liankhuma chuan, "I va han ṭawngṭai tui-awm ngar ngar ve...! Khati meuh chuan a chhâng ngei ang che," a han ti lehngal a.

Thankimi chuan, "Keima tan ka dil hlei nem, i tan zawk a sin ka dil. Nangin dil i tum si lo a, keiin ka dilpui loh chuan dilpuitu pawh i hmu em ni?" tiin a chhang a. Liankhuma chuan, "Dil sak ka ngai aw kawng lo mai, ka intodelh ve khawp a sin. Kei chu Pathian hian min hmangaih thlu a ni awm e, ka dil dil ngai lo hian min pe leh mai ṭhin a. Nangni chu in dil awl lo chung pawh hian, 'ka chuti ka khati' hi in ti a, in vui in vui a. Pathian hi in tivriin in tithinrim tawh a ni ang. Min hmangaihtu na na na kan nu leh kan pa te pawhin kan mamawh chu dil hran ngai lovin min pe mai zel ang hian min pe mai a. Nangni a lova in mi chikawm bawl a, thawka phita dil chamchi mai te chu a tan pawh in ninawm zozai lutuk ang a sin. Manilomaha a pawk tehlul nen, a tihtauhsan mai che u zawngin in ṭhu hul reng mai tur a nia. I pa Kunga te lai lai hi a ṭap belh ṭba ṭha chu an la ni ta lai nghal a. Mi phal reng si ṭap chungin 'ka dil e' te a ti a Pek belhchhab chu sawi loh, in neihchhun nen lam hian a lak sak vek mai teh che u zawngin lam leh a hnehin in Takam chem bo din zul mai tur a sin," a ti a, a nui hawk hawk a.

Thankimi chu a nuih a za deuh si, hre lo a ti bawh si. A tih ngaihna hre lo chuan, "Engtizia nge maw heti lam lam a i lo kal ve reng reng le? Buk lam i rawn tlawh tawh zawk em ni?" a ti a. Liankhuma chuan, "Hei pawh ka dil loh a Pathian malsawmna bawh maw le. Ka cham dawn ni ni-min khan, 'Kimi chu cham ve se ka ti mang e aw,' ka tirilru a, ka tirilru chauh tak tak a ni. Tukin khan in bukho an rawn leng hlawn a, i cham ve thu an rawn sawi a. Ka tlai deuh tawh na-in ka hria! veleh ka insiam sawk sawk a. Khiti lam a han hei kual ai chuan tiin in lo hi ka rawn en zawn vang vang a, in vau ngawpui atangin ka lo kal tawp mai a ni. A chhengche em em mai lehngual a, thilthek hling ka rap thawm nen, min han khei sak teh nghe nghe." a ti a.

An hling inkhei sak zo chu an thu dun a. Liankhuma chuan, "Kan fiamthu a na lo chuan hei ka hmangaih dan che lah i bai lo a. Hun reipu phei zawng a la ni hauh lo na-in, ka hmangaih ngai loh leh, a dik takin keini ang rual phei chuan ngaihzawn en a kan en ngam loh, ka hmangaih tak tlat danah che bian, tihmualpho hrim hrim che ka duh avang a ni lo tih cha i hre maila ka ring a. Tihmualpho tum ta che ila, tunhma hun kha zawng pawh kha awm a, ka tum dain tawh ang tih ring la. Tutah chuan pasal neih hun i ni ve tawh a, kei pawh nupui neih hun ka pi tawh bawh a. Ka hmangaih che min tih ve si chuan innei

phawt ıla a ni mai. Tunah hian sualpuh-ah ka sawm che a ni lo, nupuiah ka duh chia, ka nupui ni tur-in ka sawm che a ni zawk. Rem i ti thei mai lawm ni?" tiin a zawt tawp mai a.

Thankimi chuan, "I mi sawmna chu mihring mihrinna lamah chuan ka lawm em em mai. Chuti ang tak a kei tehlu min sawm a min duh dertu pawh ka la tawng tehbel ngai hek lo. Amaherawh-chu, tun a jinneh i sawi hi kei chuan tun a sawi rik chi niin ka hre rih lo a. I mi hmangaihna hi eng chen nge ni dawn nangmah ngei pawhin i hre lo a. I tum lawk pawh ni lova vawi leh khat a min hmangaih ta thut i nih angin, i tum lawk loh bawkin vawi leh khatah a tawp leh thut thei a. Chuvangin, kan pahnih hian hun kan mamawh ber a. Tawp lova thil a kal ngai a kal reng a nih erawh chuan, i thil sawi chu ngaihtuah ni-khua a tlai lo ang. Nang lah hian i mi hmangaihna hi tisa thil ngar ngarah i seng lutin taksaa hman i tum tlat a, Pathian hna thawh lamah i chhâl duh si lo. Hman a i hnen a ka sawi tawh ang khan—Kha leh chen kha tuakhatat kan lo nula-tlangval ho a, i mit ngo râng a melh pawh ka hlawh ngai loh kha. Tun a tak a min hmangaih ta hi Pathian hnathawh a ni tib hi ring phawt mai rawh.

"Ka tet té atang a ka theih ang tawh a Pathian rawng ka lo bawl vena leh ka tawngtaina chu mal-sawm a awmin heti hian, kei, mi tling lo tak hi hmangin, Pathian lam a hruai tur che hian Pathian

in min ko a ni tih ka hre chiang si a. Tichuan, i thlarau tan a rawngbawl turin Krista aia palaiah Pathianin min ruat ta tih ka hre chiang em em a. Nang chuan tisa thil a min duh avangin ka taksa hi i it baw k a. Khawvel a awm dun tur a Pathian ruat kan nih chuan a hun takah kan la awm dun mai ang. Tunah rih hi chuan i thlarau tan a ka tih tur hi hlenchhuah a nih hmaloh chuan kawng dang zawh thei ka ni rih lo. I mit la tur a Pathian min cheimawina chu nang chuan taksa tan emaw tiin tisa thilah i kai lut a, tisa itin min it ta baw k a. Nupui atan hial kei tehlul hi min iai ta lo a, mawi a i hmuh ngai loh mawi a min hmu thar ta mai hi i tisa mit a ni lo tih hria ang che aw.

“Tunah hian i duh angin kei hian aw lo pawh ta ngawt che ila, han ngaihtuah teh, eng chen nge min hmangaihna chuan a daih dawn? A rem pawh kan in rem thei dawn em ni? Keiin inkhawm thulh hauh loh te, Pathian fak nan na na na chuan lam hial pawh ka duh ang. Nang lahin chungte chu sawi loh, tawngtai pawh i ngai thei si lo, i ngai thei lo chauh pawh ni lovin i hmusit zawk a ni si a. I nupui ka nih si chuan chung thilah chuan mi khuahkbirh i tum ang a, kejin ka rawngbawlna chu ken tlang ka tum si ang a, tuk leh zan tha pawh kan nei thei dawn em ni? Pasal thu awih lo hmeichhe sual leh brawn harsa nih ka hlawn phah ang a, nang lahin nuam i ti hek lo ang. Chuvang, i thil sawi chu tun a tan chuan sawi rik chi pawh a ta ni

rih lo. Min hmangaih takzet i nih chuan, kan hlim dun theihna turin 'Krista hi zawng ve phawt ang che' ka tih fo thin che kha. Khuma, i tan hian bang lovin ka ṭawngṭai thin a sin," a ti a, a mittui a tla ta zawih zawih a.

Liankhuma chuan ngun takin a lo ngaithla a, tihtak hmaipu-a Thankimin a han hrilh meuh chuan, tlangval azawng a tlangval harh leh hlim thei ber a sawi Liankhuma thinlung meuh pawh a nghawr thîm sulh a. Ni danga a aw ki ang lo tak hian, "Ka duh ang tipuitling tur a ka hmangaih berin a hnial fithlak si chuan khawvel hi puakkeh vek se a ni mai. Luipui luang ang a ka hmangaihna chawl lo leh tuifinriat ang a kam chuang ngai lo hi, nang chuan i sakhuaana aṭangin pumpelh i tum a, i Pathian-na aṭang a mi hnar fithlak i tumna mai mai a ni," a ti a. Thankimi chuan, "A ni lo Khuma, ka hman-gaih dan kalhmang che hi i la hre thiam lo a ni zawk. I mi hmangaihna chu pumpelh tum a hnekin pumpel ka hlau em em zawk a sin. Kan inhmangaih-na hi Pathian hmaah faktlakin lantir phawt ila, ti-chuan, a hun leh ni-ah van malsawmna kan dawn phah ka rin vang zawk a lawm. Pathian hun ruat kan nghah thlen hma a mihring duhamna leh hman-hmawhna a kan tlan chuan, i tan leh ka tan hian a pawl thui dawn em a. He khawvel kan dam lai chauh a pawl tur hi a ni lo a, thlarau khawvel thleng a pawl tur a nih zawk avaugin, Pathianah ingghat phawt la, i ingghah theih nan ka ṭawngṭai ang che aw?" a ti a.

Liankhuma chuan, 'aw' a ti hlei law 'aih' pawh a ti hlei law a ngawi reng a. Nakin deuhah chuan, "Inseih i duh loh tlat danah hian nang chuan Pathian atang a min hmangaih pawh i ni ta ve ang, 'Pathianah chuan nupui pasal a awm lo' in ti si a. Mahse kei a hmangaih dan che hi chu tisa liau liau a ni zawk. Nangni te angin engkimah Pathian puh mi chu ni ve ila chuan Pathian hnathawhah pawh ka chhâl ve mahna. Kei khawvel-mi ni na na na ia, khawnge Pathian hnathawh te chu a nih tehlu ang ni. Inngaihzawna te chu mi tin chung a thleng a ni a, kei ka nih tak bik avang a Pathian hnathawh a nih bikna tur ka bre i khaw lo mai," a ti tlat mai a. Thankimi chuan, "I hriat thiam hun zawng a lo la thleng ve mai ang. Krawnge, ka han tawngtai teh phawt ang che," a ti a, a tawngtai ta a.

Thankimi a tawngtai lai chuan lo inhup duh lovin a lo meng kar a, a tawngtai thu chham erawh chu a ngaithla ngun hle a. Thankimi tawngtai lai hmel chu a han en ru dèk dèk a, eng phêt hian a hre ta tlat mai a, zahawm a ti em em mai a. A rinawmna chu Setana beidawmna leh Pathian duh lai hmel niin a hmu a. Mahse a rilru lam chu a khawih ngahng teh chiam chuang lo. Pathian a rin ve chhun dan lah chu : "Thankimi hi ka nupui atan Pathian min pek tur a ni ang. Tin a rinna chawh chu Pathian a sinna a ni. A tawngtai zawh chuan buk lam an pan chhe dun ta a. Buk en han thleng chuan zhu dang dangval lo langte leh hmun dang maka en rish-

puite pawh an lo hawng tawhin mi an lo awm nual a. Thankimi chuan inkhawm a rawt ta a. Amah bawkin a han tuk khawm vel a. Tumah lah chu hun han hmangawm an awm hek lo, Thankimi bawk chuan a hmang leh ta a. Pathian lehkhahu (II Kor 6 : 1 - 2) a chhiar a :

'Pathian khawngaihna chu sawtpui lova in hmuh lohna turin, amah thawhpuiin kan ngen chiam a che u. Hun lawmawmah ka ngaithla chia, chhandamna ni-ah ka tanpui che, a ti si a. Ngaiteh u, tun hi hun lawmawm chu a ni a, tun hi chhandamna ni chu a ni.'

tih lai hi a chhiar a. A chhiar zawhah a tawngtai a, thu tlem a sawi a, hla an sa a an bang ta a.

A chawlhkar leh tawp a an haw chhuak, Chawlhni tlai zan riah ei hma hret chuan an khaw Kohhran upa pahnih chu Thankimi te inah an leng lut a. Thankimi ngaih that loh ruk ang ngeiin Liankhuma nen a an chungchang rawn zawh tum an lo ni ngei a. Chawlni hmasa a an cham, an changpawl atang a Liankhuma nen chauh a an haw chho dun kha, tuten emaw zeldin dan tha lo deuh neiin a chhuan-chhe zawngin Kohhranah an lo thlen chu niin. Thankimi lah chu an Kohhrana a tupa ber a lo ni si nen. Liankhuma lah nula mi tak mai a lo ni baw lehngal. An khawsak dun dan tak hre lo tan chuan an sawn inzui chhuah ngawt dan chu puh-mawh tur dang avangin, a ngaihthatthlak vak lo reng mai.

Thankimi chuan Liankhuma nen a an awm dan zawng zawng chu a brilh dap a, anni Kohhran upa te pahnih pawh chuan ngun takin an lo ngaithla a. Kohhran pawhin an ringhlel hauh lo na-in thu a lo luh tâkah si chuan dan ang a ngaihtuah loh theih a nih loh thu an sawi ve a. Upate chuan, "Kohhran a kan mi hman ber leh kan chhuan ber i ni a. Mite awm dan ang chauh pawh hian awm la, mi tehna che hi a san bik em avangin i tan eng emaw hlekah hmingchhiat a awlsam bik tih hria-in i fimkburin chin tawh a nei lo ang tih hria ang che. Heti ang nulat tlangvalna thilah phei hi chuan a tuate pawh mai hi hminghliaw awlsamna ber a ni a. Mi sawi duh lam a ni lehngal. Tunah pawh tu'n i sual an ring a zeng a ni law. Mahse thu a lo luh tâkah si chuan kan rawn leng lut khawhawng mai mai a nia, lung loah la lem lo la. Heti kan rawn len tâkah chuan han sawi chho ta zel ila: Zan khat i inkhawm loh pawh hi min an hai hauh lo a, chuti khawpa mi tehna chu i chung a an lek san bik em avang hian awm dan thiam i lo tum lehzuall dawn nia. Tunah pawh i thiam nalai leng, mahse a lehpek hi a la awm a. Mibring hian, mahni pawhin kan tlin loh ang a awm turin mi dang kan phut a, mahni kan sual angin mi dang pawh sual ve turin kan ngai bawh si nen. Mahni'n that tum mang si lovin mi dangto teh ching thin ngang hi kan ni a. Chuwangin, theihawp chhuahin nun i lo fimkbur deuh deuh ang a. Vawite that mah

sawisel i la kai lo a, lawmawm pawh kan ti. I tlin bak chu Pathian pawhin a phut na hek lawng. Tun thilah pawh hian i rilru a zuai phah ang tih kan hlau a nia. Engah mah lo ngai hauh suh ang che," an ti a.

Thankimi chuan, "A nih leh â takin han zawt ta che u ila. Chutia Kohhrana min lo thlente chu tu nge maw ni le?" tiin a zawt a. Anni chuan, "Chung thleng thleng a i hriat pawh a tul lo. Lo hre ta la a chungah rilru tha lo zawk i put phah thei a. Thu a tling lem lo bawk a, sawi kher a tul lem lo e. Heti ang a thu thlentu hi hriat aiin hriat loh zawk hi a tha fo a nia," a'n ti a. Thankimi chuan, "A tua te pawh chu ni se, kei chuan rilru chhia put phah a, thungrulh aiin khawngaihna lantir ka duh avang zawk a zawt mai che u ka ni. Mahse ka hriat aia ka hriat loh tha zawk a inrin chuan hriat kher pawh ka duh chuang lem lo e. Tin, in thu min rawn ang tak chuan nung thei dawn lo mahila ka theih ang leh ka tlin ang tawh chhuah chu ka tum em em ang. Kei pawhin in thu min zawh chu engahmah ka ngai lo. Thudik hriat tumin min rawn zawt a, ka lawm tak tak a ni," a ti. Kohhran upa te pahneh pawh chu an chhuak leh ta a.

Chumi zan bawh chuau Thankimi pa (a nu u pasal) rilru na lutuk chu, a bengvar thilin an Kohhran rawngbawltu pakhat hruaiin thil chian tumin Liankhuma te inah chuan a lo va leng ve a. Liankhuma lah chuan, "A sual a lam lam te chu a teuh-

in a hnai lo em mai. Sual ahnehin Pathian thu min hrilh brep bakah min la jawngtai leh ta nghal. A dik tak chuan ka inchhir rum rum zawk a sin. Nula dangte chu ni se, khawih pawh ka tum ta ve ang chu. Mahse chuti ang ahnehin a bul hnaiah pawh ka thu tha ngam azeng a ni hlei nem. Amah-erawh chu, an thlam kawt a kan pahnih chauh a kan awm lai leh buk lam a kan chhuak chho dun min lo himutu tan chuan puhmawh tur dang chu awmin ka ring lo a. Mahse chuti ang lam lam te chu a teuhin a teuh hnaisai lo em mai. Tu nge ni, a dik a dawk thlu lova Kohhran thleng thleng a min hektu chu? Ka thin hi a thawk path ang e," a ti tan ta a. Mahse anni chuan, "Khaih, khaih, khaih..., chuti ang lam a ni ngai lo e. Tun in sual an ti nem. Keini in lainate hian thudik tlangaupui kan duh avang chauh zawkin kan rawn zawt dilehhut mai zawk che a nia.

"Kohhran a thu lut awm ta chu nichin tlai khan kan upate nen kan han thu khawm lawk a. Chaw tak khuk a khukupi tlak a nih leh nih loh pawh kan hriat si loh avangin a hming a inzawh chian tha-in kan hria a. Nakin lam venthawn thilah tu chung pawh a lo thleng thei a nih avangin, thil hriat nan mahni bengvar thilin kan rawn leng mai mai a nia. Chutia thinrim a lakah kan tihauh lo. Ka jawng i hnat thu subah nang phei chu Kohhran pawhin kut kan thlakna phak i ni lo a. Thankimi zawk erawh chu kan upaten thil kaihman an zawt Chiang ang a. Keini erawh hi chu bengvar thilah kan lainat si che u-in kan rawn kawm che a nia, i lo hre thiam ang chu," an ti a, an chhuak leh ta a.

11. KAPTHUAMA LEH LIANKHUMA



AL hnung zui a Kapthuama pa a zin leh tak si avangin, chutia Kohhranin an chungchang an zawh fiah tuk Thawhtanni chuan Kapthuama chuan a thianpa Liankhuma chu chhêk sa turin a lâwm a. Thlâm tukrawp blui an put thlen chuan Kapthuaman chungdal tur a chik a, a kiangah Liankhuman hnâng a lo hlai a. Chumi zawhah Liankhuman zem tur mau a chik ve leh thung a, Kapthuaman zemzo tur a lo sui ve leh thung a. Chutia awm hmun hna an thawh dun lai chuan Kapthuama chuan, “In chungchang chu Kohhranah an theh lut a maw ni? Nizan kan lenna lam a an sawi thawi ka hria a, tu nge lo theh lut a?” tiin a han zawt a.

Liankhuma chuan, “Ni khanglang e maw le, a titu tak phei chu ka hre lo na-in rin chu ka nei sa mai a. Kan khawsak dan chu tuman min hmu lo tih chu ka hre Chiang a. Tin, min lo hmu ta pawh ni se, kan thut dun bak kha chu engmah awm hek lo. An buk lam pan a kan pahnih chauh a kan haw chho min lo hmutu tuemaw khan a suahsual tukhum pawn chhuahin min hêk ta mai tihhriat reng. An mi rin ang a kan awm lohzia lah chu(h), zabthlak zawkin. Tlangval ve a pompa, khati khawp a hun remchang bmuh tawh hnu pawh a ka han chhuah ziai

mai kha chu pawnsen feng tlak a sin ka nih zawk. Ti ta mai mai ila, hmeichhe lakah hian ka huai ve hle thin emaw ka ti a, a dik takin hmeichhia hi zahna chhe tê mah ka nei ngai lo a. Ka duh a ka herh ngat tawh tang zo tumah an la awm ngai lo.

"Mahse ani Thankimi erawh hi chu ka zah tlat mai thung a. A kiang a ka awm hian nep riau hian ka inhre tlat a, a hu-in min zap tlawm a ni ber awm e. Hmangaih ber ve ta chu a thuk ber thpui-ab pawh ka duhin han khalh vel te pawh ka chak ve tho. Nimahsela, kut hmawr fahran pawhin ka khawih ngam hek lo, ka tim tlat mai a. Rilru takah inthiam lohna lianpui hi ka nei ru tlat mai bik a. A mak ngawt mai, a sakhuana hian ka kut a hnung-khirh a ni ber awm e. A lang a pau chuan innêl tak leh inkawm bawrh bawrh ang pawhin kan lang chuan ka ring. Mahse chumi bak thleng tur chuan ka ngam ngang lo a ni ber e. A chhan ber pawh ka hre lo," a ti a. Kapthuama chuan, "Nupa inham-tawng lo, an tih, khum khat a mut dun reng lai pawh a taksa inngheng ngam lova hlahh ruk eng emaw nei tlat an tih ang te hi emaw ni dawn ang le ? Chuti ang a inhamtawng lo chi chu : Ani pasal te lêng haw turin sumhmun an rawn ran rik te hian an nupui khum a lo mu ngawi reng si khan a lo hlah em em mai thin a. An rawn luh tak tak hnua ah chuti takin an hlah zui ta pawh chu a ni chuang si lo te hian an sawi a," a ti a.

Liankhuma chuan, "Chuti ang pawh chu niin ka hre lo. Eng emaw kawngah chuan 'nu' ang lam hawi lek lek hian enin ka inhria a. Chuti ang a en lek lek e ti lo chuan nupui a tan a ka duh ber chu a ni ang lawi bawk si a. Lal ang a zahawm hmel a ka hmuh laiin ka tisa erawh chuan a taksa chu hmeichhe it-in ka it bawk si. A hmel ka duhna lahin khaw dang hawi thei lo lêkin min phuar hlawm reng mai bawk si nen. Chuti khawp a ka hmeichhe duh leh hmangaih ber tihhmingchhiat tum a Kohhran lam aţang a theihthawh bawltu chu hre fak ila chuan, 'buhfai no khat ei theuh theuh' kei mi thinchhia chuan ka han tihman deuh mai pek a. Kohhran lamah ka tan engmah pawl tur awm ve hek lo. Thankimi erawh chu Kohhran duh lai ni hek, thu dik hriat tumin nizan khan an zawt Chiang a ni awm e. Kan Kohhran pawhin an tiţha khawp mai. Dik takin ka tan chuan — Lo awm khawlo tak tak chu ni ila lawmthu maw le. Mahse engtia khawsak awm si lova ka nula hmangaih ber tihhminghliaw tum a engmah ni bik si lovin, 'ka chuti e,' an han ti chu ka thinrimtui lo thei lo a.

Chawhnu thlangher a vui dar khât raih a invuak hnan khawp a inchawngzawng sual mai pawh ka hnial lo tituai mai pek a. Mahse lehlamah chuan — A lo ngaizawng vetu mit khamna tawkin kan khawsa a ni mai a. An mit tikham e ti lo chuan kela lah chu, hmeichhia zawk tlawm lovin mipa zawk tlawm derah ka ingai thung si a," a ti a. Kapthuma

chuan, "Thankimi an zawh fiah chuan engtin nge a lo chhan i hria en? I lo chhan dan nen chuan a inang emaw chu?" a ti a. Liankhuma chuan, "Ka la hre leh hman nâng, a hmuh pawh ka la hmu leh ta hlei nem. Nizan inkhawm hlan lah khan hmeithainu inah ka len pek a. Nam deuh chung a an in a len ngam chai hek lo i. Vawiin lah chu heti hi a ni leh mai si a. Eng dang vak mahin a chhang bik lo ang, ka chhanna ang bak sawi tur dang engmah awm hek lo. Nangni zawk chu, i zin chanchin pawh kan la inbrilh hek lo. Nangni zawng in inhmangaihna a ngeth tawh a, in awhawm hle e. A hmeithat bakah a fingin a fel si, nei vat ila a ni mai'e, chap-char-ah aw ni ang?" a ti sauh sauh a.

Karthuama chuan, "Min la duh der ve awm tak chuan a lang a. Mahse hmeichhia hi zawng an rinawm emaw pawh ti ila, derthawanna riau hi an nei a. 'Hmeichhia leh uite chu a chulnêl peih peih' tih ang deuhin anmahni herb peihtu leh an hmuh zin apiang hi an lunglen leh mai thin. Khaw kar a hla si, hmeichhe fin tuikhur ral kai lo hian min rawn dawn thleng pha ngut nâ maw chu le. Tak tak a, i fiamthu ang deuh chuan neih mai chu ka duh a, ani pawhin a hnial hranpa bik hauh lo a. Amaherawhchu, 'Pasal neih tak lêmah, phurhblân leh silbên ilo fahran pawh inkim lova kal zawng ka chhungten rem an ti lo ang,' a tih avangin chumi chhuanam chuan hman ni-a a inlengte pawh a hnar

ta rih chu a ni phawt mai a, a sawi hmang kha chuan. Tunah hi chuan a inpuahchah chhuah hun kan ngahak a nih tak ber hi maw. Keini zawng chanchin kan ngah ve lo, in chanchin a ni ngaih-nawm zawk. Kar hmasa a in inkawm bak inkawm-na hun dang te in nei thei em?" tiin Kapthuama chuan a han zawt leh a.

Liankhuma chuan, "Nei thei lo achhâ kan ni e, ram riah lai ngang a ni a, in hmuh chhun pawhin engmah sawi theih loh in mi dang an awm ve ziah si a. Ani lah chuan a sawi duh chu i he lovin a sawi hmiah hmiah zel a, Pathian thu hlii ni si hek. Mi a hrih mawlh mawlh zel a, a sakhuana hian a vawng em em mai a. E....., taka na, ka la hrih lo che a ni maw.....! I ni te khua a i cham ni Chawlhni khan inhmuh fâl na hun remchang kan nei a, ti ila(h), mi dang pawh an awm ve tho na-in tapchhakah an awm a, kan pahni chauh in kawmchar lamah kan awm dun a. Pathian thu mi hrih leh a tum a. A sawi tak tak hmam ka inkhawm thatchhiatzia te, zu ka in leh zeuh thin te leh ka kaihhlek hla sak hrat a vei thu chu Pathian thu nen a hmehbelin a han sawi tan dêk dêk a. A chutih nâk alai chuan keia pek lah chuan a hnute chu a inrin loh lai in ka'n nul zauh hram pek a. Chu chu a ngaidan a ni lo tawp nachungin aw dam tak hian, 'ka tawngtai ang che aw' a han ti leh mauh pek chu. Min hman-gaih dan chu a thianghlim tih ka hria, mahse kei-

in ka tlin si' lo. Pathian lam a lungleng lo napui amah Thankimi avang ringawt a han intih sakhawmi thar teh hluai lah chu ka ngaihdan a ni der si lo. Chumi tum erawh chuan ka kuthlei deuh chu a ngaimawh ngang a ni ang kan inhnial ta deuh a.

“Ani chuan, ‘ka hmangaih che tih i hai lo a, i mi hmangaih dan pawh ka hai hek lo. I mi hman duh dan erawh hi chu sual tihpuitlin nan chauh min duh avangin ka duh lo. Mi sualpui tum reng chung siin engah nge inneih thu te i sawi rik fo? Kan inneih avang a Pathian hmu tur chu ni la ka hnial pawh a ni lo. Mahse kan inneih avang a Pathian i hmuh ngawtna tur lah a awm hek lo. Nang, Kohhran dan chhung pawh a awm duh lo nen hian engtin nge kan inneih theih ang? Kohhran huang chhung pawh a awm si lo chuan tun achinah inneih lam thu tiri leh ngai tawh reng reng suh ang che, ‘ka hmangaih che’ min tih si chuan, mipa zawk mah ni la, ka thu rawn pawh i zawm ve tur niin ka ring,’ min ti a.

“Kei chuan, ‘dan, dan,’ hi in ti a. Kohhran dan ang a innei leh innei lo hi eng nge an lê n chuan-na awm? Pastor hmaa thu intiam a, zungbun tê nen a inchhamphual ho pawh an inthen leh rem rum tho a, engmah a chawbe chuanna ka hre nek lo e a. ‘Kohhran dan puitlingin kan iunei,’ an ti a. An inneih atang a reilote-ah thla kim nau tih hriat reng an hring leh ang nawlh nawlh a. Thenkhatte lah

rai pur chungin 'dan tê' in la ti lai nghal si emaw ni. Pathian mithmuh a an tling tawh lo a nih chuan, inneih an duh leh intlan hruai tawp mai rawh se. Nupa inremna chu dan e, hrai e a ni lo, hmangaihna a ni zawk. Mihring mithmuh pawh a tling tawh lo tih hriat reng pawhin 'a mawi ka zawng e' la tih zawng Pathian an pawisak lohzia tilangtu mai mai a ni zawk. A thu hrimah—'Pathian, Pathian' hi in ti a, eng in Pathian chhuah tâk hmuh tur awm chuang si lo. A zu heh tha tha kan tlangau hlui te hlei hlei an dam sen vel vul a. Buh-bal ni se a intodelh thei thei an ni bawk si. Kohbran upa inti, Pathian thuawi leh a tawngtai hrat hrat te lah chu a ei nei lo leh a retheiah an t̄ung ang lawi si a. In Pathian thu awih hi ek mai a nie ek mai.

“Nang pawh hian ‘Ka hmangaih che, ka tawngtai ang che, de dê ..’ hi min ti fo tak na a, min va hmangaih ngût suh che. Hmangaihna hi in sawi thlungdurût a, a sawiah chauh in ramtang a, a sawi tam tam hi thenawm khawveng lak a mahni thil aikam êk kawm a kawmpui tlat ching in ni fan a ni. Pathian thu awih te chuan in sawi ang tal hian awm ta che u. Mi zawm a tan ringawt sawi tur em ni? Mahniin chetzia a lantir tum leh mang si lo, ‘sakhua-in a ngek a hlawh’ tih zawng zawng in neih zo a. In thu sawi hi dâwt mai a ni e, dâwt mai. Tang ang chauh, a tak hmuh tur awm si lo a thawm chauh tina mai. Pathian thuawihte chuan dâwt dâwt

sawi ngai em ni ?” ka ti erh mai a. Thankimi chuan, ‘Dâwt sawi tur ni lo e, dâwt ka sawi ngai hlei nem. Ka hmangaih dan che hi i la hre thiam phak lo a ni Khuma, i taksa chauh hi ka hmangaih lova i thla-rau chenin ka hmangaih zawk che a sin. Nang chuan ka taksa chauh hi i duh a, chu chu hmangaihna puitling a ni ngai lo. Kan hnam dan leh Kohhran dan kalh a mi khawsakpui i duh reng tih pawh ka hria. Chu chu ka sakhuana chang hian a duh lo a ni lo a, ka chbia leh tha hriatna pawhin a remti hek lo. Krista tlanna hre lo kan pi leh pute takngial pawhin mihring nun tibawrhbanglotu a nih an hai lo a sin.

“Nichin a i sawi Kohhran dan ang a inneih i sawi te kha a pawng a tak a ngaisang ka ni hlei nem. Chhungril lam a thianghlimna awm chuang si lova Kohhran dan ang a inneih duh vang ringawt a dan chhung a awm tum te hi tha ka ti chiah lo reng a ni. Mahse chungte pawh chuan that phih nan an hman dawn chuan, nangoi te anga a tum a tum chhin eih pawh tum lo ai chuan an la tha zawk tho tho. Pathian thianghlimna nen a inneih hi ka duh mai a ni. Chu thianghlimna chu nei turin kan pahnih a tan hun a la awm a, a la awm zel ang tih pawh beisei ila. Chuti ang tak chuan nang pawh Kohhran huang chhungah i la lut ve dawn nia. Tuna Kohhran huang chhung a awm zawng zawngte hi kan thianghlim vek lova, keimah ngei pawh hi a tling lo ber ka ni hial ang. Chuvangin, inkhawm

taima tur a ka fuih nachhan che pawh hi, ringtute tih dan a nih avang a fuih mai che ka ni a, inkhawm taima apiangin rinna an nei tha ka tihna erawh chu a ni chuang lo. Pathian ringtu chuan inkhawm a thlahdah ngai lo ka tihna mai a ni. Mihring tehna aţang chuan mi aiin kan sualin kan rethei hlei hlei pawh a ni ang. Mahse rethei tak chung a hlim tak leh thlamuang tak a min awmtirtu Pathian chu i hmuh chian ve tikah chuan, eng nge, nang leh kei hi Pathian ruat kan nih n  k hmanah chuan kan la innei tur a lawm' a ti a," a ti a.

Kap  thuama chuan, "A va ban ngaihnawm nasu ropui ve! Nangma thil ropui zu tling a maw le, chan-chin dang pawh a la awm hial lo maw?" tiin a zawt zel a. Liankhuma chuan, "A rinawmna chu zahawm ka ti em em a. Ka thlemna apiang chu ngaihawm tak si hian a hnial thla fak fak zel a. H  meichhia a ni na vang vangin zuamawm loh zet mai hian a   thu fel vang mai a. Tapchhak lam a   thu ka pite lah chuan kan thu haw lam leh kal lam hre hlei lo chuan, 'Kimi, hrilh nasa rawh, Liankhuma zawng a chbah leh lutuk a, thu thawi hre phak lo, laipui a thawi harh ngai, kaihhruai theih loh a hnuh a hnuhhruai chi a nih kha,' an lo ti a. Kimi chuan, 'Tisa malsawmna hi ka zawn ber a ni lo a. Amaherawhchu, mihring kan nih chung si chuan, ei leh bar leh silh leh fen te kan mamawh   thin avangin, tlac  bham a kan awm loh nan hnathawh hi chu kan bat a ni a. Pathian thu pawhin, 'hna thawk peih lo

chuan ei pawh ei sub se' a tih avangin ei turin kan thawk a, thawk turin kan ei bawk zawng a nih hi. Ka taksa hmakhawngai ringawtin ka thawk lo a, Pathian min pek ka nunna atan zawk hian ka thawkin ka nunna min petu Pathian chu ka ring a ni zawk e. Lei malsawmna hi ka hnial phal hauh lo, mahse ka dawn loh pawhin ka vui chuang hek lo ang. Khawvel hau-sakna hi ringtute tan chauh a dah ni lovin a hai chhuak thiamtute tan a ni si a. Mahse kei chuan mihausa tawntaw Pathian ring si lo a chuan ringtu tha tak chu ka ngaisang zawk. Chuvangin, nangmah ngei pawh hi hmangaih em em che mahila, Pathiana minungsiam thar i nih hmaloh chuan pasal atao ka duh che ka tingam lo a ni. Mahse ka pasal duh tak i nih theih nan Pathian hnenah ka tawngtawin ka dil thin che a sin' a a ti a," a ti a.

Kapthuama chuan "Chu engtin nge i chhan?" tiin a zawt a. Liankhuma chuan, "Engtin lem mah. 'Chutia pasal atan min duh chuan Pathian dil lovin kei hi min dil la i hlawhtling hma zawk ang' ka han ti chu a ngaihdan a ni lo kher a sin," a ti a, an nui dun ta hawk hawk a. Liankhuma chuan, "Han sawi ta zel ila: Chutia ka han ti meuh chu hre lo hi min ti khawp nge hre thiam duh lo min ti pawh ka hre lo. Keia phei chuan ti tak tak a ti phei chu ka ni bik lo a, ka fiamthu mai phei zawng a ni a. Mahse a fiamthu ta lo khawp mai lehzual a. Thahuemngai hmelpu tak hian min han en a, 'aw, i va han hre thiam lo tak em! Kristian ka ni chu i ti

ve tak si a, ka han hrilh leh teh ang che. Pathianin a hnangaih em em che a. Tisa leh thlarau-a hlim tak a i awm theih nan, kei hmeichhe chak lo tak hmang hian a lam hawitir che a tum ta a. Englai maha i hmangaih ngai hauh loh kei hi a hmangaihtir ta ta che a. Mahse i hriat hriat thiam si loh avangin nang lah chuan khawvel tisa duh dan chauh a kal-puiin Pathian thu lamah thluk nachang i hre ta si lo. Pathian tum dan loh zawngin kei chu mi hman i tum ta a nih hi. Chu chu duh theiin min ring em ni?

“Ningmaha ka tih tur hi Pathian zar a ka tih-puitlin hma loh chuan tupawh ni raw sek sek kawng dang ka zawhpui dawn lo, a thian pawh a thianga hek lo. Pasal hi la nei ve ngai tur ka nih chuan, ringtu ka thurualpui theih ngei Pathianin min pe-in ka ring a, ka dil dan pawh a ni. Nang hi ka pasal atan min pe dawh pawh ni se, i thlarau nun a chian hau-ah chauh a ni min pek ang. Chumi hma chuan keinin hmanhmawhah la lo ila, kan thih hun kan hriat lawk loh avang leh kan chung a thil lo thleng tur pakhatmah hriat lawk kan neih loh avangin Pathian zawh chauh hi muanchanpui chi a ni lo ang. ‘A ram leh a felna zawng hmasa rawh u’ tih zia ang khan. Chuvangin, i nupui atan min zawng a nih pawhin Pathian zawng hmasa la, tichuan min hmu ang. I hmanhmawh a nih pawhin Pathian zawh bawh chu hmanhmawh la, min hmu thuai


thei ang. Chu chu i tan a kawng awmchhun leh kawng hnai ber chu a ni e,' tiin min hrilh erh mai," a ti a.

Kapthuama chuan, "Chu i awih emaw chu, nula naran emaw ka ti a, a thu pak chhuah dan a puitlin viau chu le," a ti a. Liankhuma pawh chuan, "Ka ti a sin, ni dangah te reng reng pawh a thu thliah dan a fng viau zel mai a. A awih a awih lo tur pawhin ramriah lai ngang hi a ni a, hun la awm lul hek lo. Ka awih deuh zawng a ni ang chu, chumi chawlni zan a ka mu tur pawh ka han tawng-tai ve sak kha maw. Ka ngaihzaung berin inkhawm tur a min phut ta em em chu, chumi Chawlni chawhnu pawh chuan Pathian lehkhahu keng meuh-in ka han inkhawm ve sasawi teh a. Ka thu chhung-ril ve ler lawr teh a sin. Khuangpu bulah ka to ve vei lar a, min hmu lang chuan i nuih a za ngawt ang. Ka hawn lam chuan ka lehkhahu ken chu ka keng lang leh ngam si lo, ka kawr chhungah ka thukru sauh sauh a, tum loh thleng thlengin ka lenpui zak zak a sin le. Thenkhat lah chuan, 'a piang thar e' te chu min lo ti bmanhmawh nen, a teuhin a hnai si lo a, Thankimi ka ngaihzaung vang a ni reng si a, a zia lo ang reng teh a sin," a ti a, an nui dun leh ta hawk hawk a. Chawfak zai an rel ta a.

Chawhnu lam chuan chhêkpui zem an kual dun

a. Kap̄thuama chuan, “Zempuiin lge kan kawlh dawn ngunkualin,” a ti a. Liankhuma chuan, “Ngunkualin le, a awlsam deuh a lawm, kan zem dâp a inchen lo em a, awlsam zawngin kual ila a ni mai. Ngunkual han tih pawh chuan nula rim a nam deuh a lawm maw le, a ngunkual reng a inveh nalh kha maw,” a han tifiām a. Zem an kawlh zawh chuan thlām chung hlui thilthek phur tur leh dâp hlui pu turin an inzui liam leh ta a.

12. THANKIMI MANGAN A TAWP

HAPCHAR lai a ni a, Liankhuma mei kawng sial haw(ng) chu khawhar leh chhawlhal takin a kal hnak hnak a, Thâlva-ekchar, nipui khaw sensa vawl vawl karah chuan ralkhat tlang hnai deubte pawh lang chiang mumal thei lovin romeiin luipui leh luite ruam chenin a bawm paw chûk a. Nipui therengte erawh chuan thing hnah tla kawlh lera fu-in khaw sensa hnuaiah tamchhawh leh tuihal dangro pawh hre ve lovin an lunglen hla pianpui chhun chu, duh lam lam a lo inggaihbei lunglenpui turin an kiupui vawl vawl thung a. Liankhuma khaw chhung lut chu a han hawi vela. In chung tin a laikingbel-rawh phe mer mer te, vengchhak nau rilam nu hnute châk a tap hlâk hlâk leh lalnu veng a la her ri ai lauh lauh te, thingkhawh hnuaia a arla dawkdawlak leh a lo chhawntu arhluisen lo dawkdawlak ve te. Nu thingphur haw keuh ri leh a phur phuar-na ramhrui inchuh naupang thawm tih loh chu khawhar hnem tur ri dang engmah hriat tur a awm lo. Liankhuma chuan chaw a bar sawk sawk a, hmanhmawh takin Thankimi kawrzên tah lai chu rim turin a chhuak ta a.

Thankimi chuan a lo hmuh veleh, "Khuma, lo leng rawh, i va rawn lang har ve, ka lo beisei deuh reng che a sin. Vawiin chu ka rilru-ah i awm deuh reng a. I lo len hun a i chbiarah tiin heti lai Pathian

lehkhabu châng hi ka lo chhinchhih kiau a,” a tihpah chuan a kiang a lehkhabu, a chhinchhihna hmawlhthe inzep awm chu a han la a. Liankhuma chuan a engamah hma chuan, “Kha zawng dah rih teh, kan la chhiar chhawm ang chu,” tih pahin lehkhabu chu a pawh thlak sak lawka a dah ta daih mai a. Chutah Liankhuma chuan, “Hetì khawp hian ka hmangaih che a, nang erawh chuan ‘ka hmangaih che’ min ti chung reng siin min hmangaih vena chu engti kawng mahin i lantir duh chuang si lo a. Chuvangin, i thu sawi hi ka tan chuan awih chi a ni tawh lo a. Ka tumna zawng zawng lab chu hnial loh a bleih i nei bawk si lo. Heti ang a intihder khawtlai mai mai hi zawng ka tuar thiam zozai tawh lo. Khawtlangah ni se, tumah min hre lo awm tawh lo khawpin ka duhna che hi a tlangthang tawh a. Eng chu awm lo mah se, nang ngei pawh Kohhran zawh fiah khawpin keimah avangia i mualpho tawh bawk a. Mahse chuti pawh chuan a mawi zawngin i puanhmawr pawh min la hmuh duh si lo. Engti hmangaihna nge ni ta ngai? ‘Hmangaihna mak tak chu a lo nie’ tih chu hei lo aliam hi a ni bik lo ang.

“Kohhran ber pawh an ngaih a that tawh chuan si loh chuan eng nge? Kan tan hian mawi leh mawi lo a awm thei tawh chueng dawn em ni? Keini pahnih kan inhmangaih ber a liamah thil dang eng nge la tul cheu? Pathian te zawng inneih hnu-ah pawh ka la zawng thei tho. Damchhung hun hi

Pathian zawnra tur a hun awl tha chu a ni tluan-chhuak vek a. Tih emah chuan tlangval lai ngei a Pathian hi rin tur, tih a awm chuang hlei nem. Mite pawhin chhangchhenu chhangchhepa an nih hnu-ah a lawm an rin a an lawm hlei hlei, Nang alova nulat-tlangval thil, khawvel pianken leh chatuan leilung dan kal sa thleng a Pathiana hnuh luh tum zel mai, Pathian rorel dan a ni ngai lo. Mihringte kutah hian Pathianin thuneihna zau tak min pe a. Chumi hmang chuan keinin kan khawvel nun dan tur chu kan rel thin a. Chu kan rorel chu Pathian mit hmuhah chuan a fel tur a ni tih chu ka hai bik hauh lo. Tin, Pathian min pek, chu kan thuneihna hmang a ro kan rel theihna chinah lah chuan Pathian a inrawlh ngai hek lo a, tul lah a ti hek lo. Kan tih-theih tura a remtih sa thleng a Pathian kan mawh-phuth zel dawn chuan, mihring hi ran ang lek kan ni tihna a ni dawn a sin. Kan chakna leh kan finna-in a tlin phak tawh ang zia zel a ro kan rel hi a ni Pathian thu chu ni mai ni. Ani chuan, 'in theih bakah ka chuang ang' a ti e, tiin in sawi awl lo a ni lawm ni? Nupui pasal chungchangah ngat phei chuan a innei turaten an duh ber tawh a liamah eng dang vak nge la ngai?

Inneih hi Pathian dan chu a ni mai tawh a. A duhdu tan chuan inneih loh pawh Pathian dan a ni loh mai bawh a, Inneih hi a innei tur beraten an duh tlat loh chuan tu nge tilui ngawt thei? An duh dun tlat pawhin tu nge hnial thei awm i? In-

neih ber hi Pathian dan chu a ni maꞑ. Kohhran dan a inneih te hi Kohhran dan siam chawp mai mai a nih hi. Kohhran dan ang a inneih sawimawi nan lah hian Isuan Kana khuaa innei a lawmpui thu te kha tanchhan tehah in neih a. Tih tak emah chuan khata innei te kha Kohhran dan awm hma thil vek a sin. Duh leh rem tak a an innei kha Isua pawhin a lawmpui mai zawk a nih kha. Thenkhat Kohhran dan ang a an inneih duh vang ringawt a rilra tak a Pathian hlauhna nei a zeng pawh ni si lo, 'Pathian, Pathian' an ti a. Kohhran dan angin an innei têtê a, an mit ngo rang pawhin Pathian lam an melh chuang baw si lo. Kohhran lahin chaw tak khukin in khukpui lehngal. In Kohhran pawh hi engti Kohhran nge maw ni ngai le?

"Tih tak emah chnan in sawi zin ber Pawla pawhin, 'innei rawh se, khum chu tibawlhhtawh loh in awm rawh se' a ti mai a nih kha. 'Dane, hrai e, ba le,' engmah a sawi lo. A naherawhchu, dam-chhung thil tak tak a nih avangin upain 'lawm ang a ban leh mai mai theih a ni lo' an tih hi a dik a. Chuvangin, nupa karah 'hmangaihna' hi hlimna leh inremna thlentü a nih avangin inhmangaih lo chu innei suh se. Thenkhat-in Kohhran dan ang an tlin loh avangin innei tum er teh tawh pawh an han thulh leh vel a. A thente lah man leh mual duh ang intlak theih loh avang ringawtin an tlawh leh ta te hian hmangaihna an nei lo tih a mualpho ngawtin ka hria. Nang pawhin Kohhran huang

chhung a ka awm loh avang ringawt a min iai hi min hmangaih lo tawp niin ka hria. Pathian rawng bawl lovin Kohhran rawng i bawl a. Hei leh chen hi ka ngaichang tawh chia, tun achinah chuan i hnenah ka sawi tam tawh lo ang. A nih nih kan ni tawh anga a ni mai. Hmeichhe pakhatin maw ka bum e, te min han tih vei chu. Ka thawk ang a ka ri sawk sawk mai tur a sin," tiin Liankhuma thinrim chu a âng bawrh bawrh mai a.

Thankimi chuan a khing zawng a chhan loh hram hram a tum a. Fiamthu hian, "Hei, Pathian thu pawh i lo hriat tawh khawp hi maw le, mi hnial nan reng reng pawh rawn chhiar leh ang che," a han ti dêk dêk a, Liankhuma chuan, "Min tiel khanglang suh aw, ka thawk ang a kan ri rum rum mai tur a nia. Hmangaihna beidawng thinrim i tawn zawngin damin i khawchhuak dawn hauh lo a nia," a tibung ta vat mai a. Thankimi chuan hlauthawng leh lungngai mitmei hian a en a, mittui tling piau chung hian, "Khuma, khawngaihtakin, tun tum chauh chu ka tawng lo ngaithla hram ta che," tiin mangang aw khur leh lek hian a puan tah lai chawl meuhin Liankhuma zahngaihna chu a dil a. A kutzungtang ulh niap niap chung hian, "Ka hmangaihna awmzia hi eng a ti nge chu leh chen i hriat thiam theih loh tak chu aw, ka mang a va han ang em! Kohhran zawh fiah khawp a i lak a ka mualphona kha ka hmangaih avang che a ni tih i hre thei si lo. Tun thlang a ka puanhmawr pawh tuma deh lo a ka in-

vawng thianghlím te hi i tan vek a ni a sin. Tih tak emah chuan Kohhran leh khawtlang pawhin i lakah hian thianghlím tawh lo angin min lo ngai ta pawh ni se, Pathian mit hmuh a ka la thianghlím tho chuan paw ka ti hlei nem. Mihring mit hmuh a lang mawi tur ringawtin Pathian ka ring lo a, Kohhran a tlangtlak nan thianghlímna hi ka um hek lo.

“Eng a ti nge sual kawng zawh tur ringawt a ka tan a thlemtu i nih? Mite min rin tawh lohna denchhenin sual lam ka pan thei lo. Ka hmingchhiatna chu sual tihpuitlin nan a hmang lovin sual dai theu nan min hmanpui ta zawk che. Kan inhmagaihna hi Kristaah a ni theih hi ka duhthusam a ni a. Tunah hian Pathianah tharna chu nei la chuan Kohhran dan ang a inneih kher pawh ka phut chuang reng hlei nem. I tlangval lai ngei a i nunin nan thar a nei chuan, nupa kan nih phat atang pawhin Krista hmangaihnaah nghet takin lungphum pakhat chungah kan innght nghel thei dawn a. Tichuan, nupa inrem leh lungruah, hmangaihna dik tak nen a inkawp kan ni dawn a lawm. Chuvang chuan Pathian thu pawhin, ‘i tlangval laiin i Siamtu hre reng rawh’ a tih kha. He i hun thaber a Pathian i hmuh phawt chuan hlím takin a rawng kan bawl dun ang a, kan inneih hau-ah pawh kan hlían dun deuh deuh zel dawn a sin. Chhangchhiat hau a Pathiana lawm ta em em chu tam teh reng e. Malse nula tlangval kan nih lai ngei a kan chau

chuan kan hlim zawk dawn lawm ni? Heti chung hian innei ta pawh ni ila, nang chu i lungawi tho mai thei e, mahse kei chu ka rilru chhuugril takah ka hlim ve chuang dawn si lo.

“Pathian i hnuh ve hmaloh chuan, hmangaih em em che mahila, lehlamah min tilungngaitu mai i ni zawk. Khuma, ka hmangaihna che hi hre thiam tawh la ka va han ti tak em! Sual ka duh loh a-vang a min hmangaihna hi paih bovin, hmelma ang hialin min en mah la, kei chuan ka hmangaih tho tho ang che. I mi huatna a pun zawh poh leh kei chuan i thlarau tan leh i taksa tan theihtawp ka chhuah deuh deuh ang. Ka hmangaihna che hi chatuan a tan a ni si a,” a ti ngawih ngawih a. Liankhuma chuan ngun takin a lo ngaithla a. A tawng ve leh hma-in Thankimi pa mei kawng sial haw hnuhnung chu a lo thleng ve ta a.

Chumi ni chuan Thankimi mangan chuan a vawrtawp a thleng ta. Liankhuma a hmangaihna a sangin anin a hmangaih dan a hre thiam thei si lo. Chumi zan zanriah ei kham veleh a pa (a nu u pasal kha) a pan leh ta chawt a. A pa hnenah chuan, “Ka pa, ka mang a ang em mai engtin nge ka tih ang? A thinlung a khauh si, a mi hmangaihna a sangin kei lah chuan ka hmangaih lo thei bik bawk si lo. Ka hun zawng zawng a tan tawngt'ai nan ka hmang zo a. Pathian lah chu biak thelh ang maiin a reh vang vang mai bawk si a. Ka bei a dawng, min thlah thei se la chuan eng pawh ni tur, mahse

min thlah thei chuang baw^k si lo. Keiin ngaihsak lo ngawt dawn ila, anin min thlah theih chuan si loh chuan min tibuai tho tho dawnin ka hre si a. A kut tuar mai pawh ka hlauthawng hlel ta lo e. Keiin ka hmangaih ve em em tho si avang leh amah ka hlah avangin ka thianghlimna ven zawh loh palh mai pawh ka hlauthawng hlel ta lo. Khati zat kha keia kar min duh der vetu ka lo tibeidawng tawh a. Ani erawh hi chu ka pasal tur a nih ka ring si, chu tak chu ka tan chak lohna thlentu a ni thei ta a. Ka pasal tur a nih ka rinna chu kalpuiin nei ta ngawt ila, tuna a rilru hi a paih chuan si loh chuan hlim theiin ka inring baw^k si lo. Awm ngaihna ka hre lo, ka pa, min han tawngtai ngawt mai teh," a ti a.

A pa chuan, "E..., mangang lul lo e, Pathian a awm a lawm. I mangan tawp hi Pathianin a nghak pawh a ni thei a sin. A nih khawng, i han tawngtai dawn teh ang aw. 'Aw, ka Lalpa leh ka Pathian, chungnungbera bihrukna hmun a Awma chuan, he ka fanu tan a ka dilna hi ngaithla la, malsawm ang che. Chak lohna phuar vel a awm mihring sual lam la pan hi, tung ding a sual pumpelhtir turin nang lo chu belh tur kan hmu lo. A nulat vanglai ni-a i rawng a bawl na chhuanawm lah tak chu nangin mal i sawmin i thilthihtheihna chuan thinlung sak leh khauh te a ko haw a. Mahse chungte tan a thlarau lam chawhlui thianghlim hlui turin he ka fanu-a kut chak lo tak hi i tufa atan a tling lo. Nang i inrawlh loh chuan a chauh-

san ang chia, a tluksan ang che. Chuvangin, aw Lalpa, a hmabak ko tak leh mihringte tihtheih rual loh hi hma rawn lak sak ang che.

'Tin, khawvel a mihring dan ang a nu-leh-pa ni tur a i mi ruatte an nih chuan, an at ang a an hriat thiam loh thu thawiin hrilh suh la, mi a hriat thiam zawng turin puang chhuak ang che. I mit hmuhah i thianghlimna dan chu zawhin, nupa ni tur a i ruatte an nih pawhin, i hmangaihna 'Lal dan' ang a kal a, i hmangaihna palai hmel lan hmaloh a nangma tan chauh a an nun theih nan, nangin i kut thianghlimah kaw! ang che. Tin, he ka funu rilru hahna leh mang-anna zawng zawngah hian hlimna hriak rawn chulh la, nanginan rawn hneh sak ang che,' tiin.

A pa tawngtai zawh chuan Thankimi chu a thaw huai a. A pa chuan, "I beidawng hulhual tawh em ni?" tiin a zawt a. Thankimi chuan, "Dawng teh thlawt lem lo e. Mahse keia finna ringawt hi chuan a tihngaihna tak ka hre tawh lo. Amah a hnial-hratin hnial khan a thiam ang reng si. Tunah lo piangthar ta se chuan mi tangkai tak pawh a nih a rinawm a. A pianphungah reng reng mi taima leh mi rilru nghet a ni a. A â teh chiam baw! si lo nen, chhawrthlak ngawtin ka ring," a ti a. A pa chuan, "A nih pasalaha i duh ve reng reng em?" tiin a ban zawt leh a. Thankimi chuan, "Ka mihrinna ringawt hi chuan ka hnial branpa lem lo. Amah ~~thawvel~~ chhuanawm paw! leh khawtlanga tlangval

tlawmngai vawrh chhuah te an lo ni bawk a. Chu-achhapah an in lam khawsak a chhe zawk zawk lem lo bawk a.

“Pathianah innghat nghet em lo pheii ila chuan hmanah hmanah ka chhe daih tawh ang. Mahse Pathian ka hlah em avangin tun hi ka la thleng thei a ni zawk chauh a. A dik takin ka tleirawl chhuah tirh atanga a ruk a ka ngaihzawng ve ber thin a ni a. Mahse anni an lo khawvel mi bakah kei heti hi ka ni a, ngaihbel tur pawhin ka mitmei hi vawi khatmah a la hmuh ka ring lo a. Mahse hetia min hmangaih ve takah si hi chuan, keia rilru-a hmangaihna riak sa lo awm ve bawk si chu a chawkw tho lo thei lo a. Nula thenkhat angte hi chu ni ila chu ka him tawh hauh lo ang. Mi a hmangaih dan teh thut hi a tum lawk vang reng ni lova, vawi leh khata vawm bei ang mai a min hmangaih ta a nih avangin Pathian hnathawh niin ka ring tlat a. Tin, hmana i hnen a ka sawi tawh ang khan— Ka pasal tur chungchang a Pathian ka dil ang a ka tleirawl chhuahpui ngei kha ka pasal atan a Pathian rawn tirh niin ka ring a. Mahse amah a khawvel si avangin nupa lungruak kan nih theihna tura a mi hman-
gaihna chu denchhen a Pathian lam hawitir zet a, chuta innei tur chauh ni-a ka inrin avangin, Pathian lam hawitir ka tum tih pawh i hai loh kha. Chu chu ka dinhmun a nih ve bawk avang chuan ka mang a ti ang lehzuak bawk a lawm maw le,” a ti a.

A pa chuan, "Pathian hnen a inhlan bang lovin lo tang fan fan la, Pathian a la hmu chêk ang. Hmana ka sawi tawh ang khan hmun fianrial zawn-pui hauh lo la. Tunah chuan Pathian a rawn in-rawlh dawn dawn tawhin ka ring tlat a ni. A tan-puina dil a, au au na na na ia, rei min hlamchhiah lo ang e," a ti a. Thankimi chu a pa tawngtaina avang a hahdam huaiin a haw ta a. An in a thlen chuan a han tawngtai leh a.

13. "KA HMANGAIH CHAUH LO CHU"



L IANKHUMA khawilo kal haw hi Kapthuaman a lo hmu a. "Khuma, min lo nghak lawk teh. Zanin zan riah ei kham veleh kan inah lo kal vat ang che aw. Thupui deuh tak ngaihtuah tur a awm ka ti, ka lo nghak reng dawn che a nia, rawn muangchang hauh suh ang che," a ti a. Liankhuma chuan, "A va han pawimawh awm ve! Eng lam thupui rel tur nge awm ta? A lawmawm lam a ni phawt ang chu maw?" a ti a. Kapthuama chuan, A lawmawm lamah nge maw kan chhal dawn a, a lawmawm lo lamah le. Lo leng phawt la, i la hre mai ang," a ti a. Zanriah ei kham veleh Liankhuma chu Kapthuama te inah a kal ta nghal a. An inchâr thlang lam a Kapthuama khumah chuan bawk dun-in Rozami lehkha chu an chhiar dun a. Chu lehkha chu chumi ni-a Kapthuama hmuh chu a ni a. Liankhuma chuan uluk lehzualin amahin a han chhiar ve leh a:-

"Duhlai lungkham Thuama,

Kan inthuthunna chu chhungril lamah kawpkai tawh mah se, pawn lam taksa nen a la famkim si loh chuan thlamuanna tak tak a awm thei rih lo zawng a nih hi. Chu kan famkim hun tur chu nghakin ni leh thlate rei ti hle chungin hun hla zawk kan thlir dun hram hram a. Then leh rual lak a ka mawi loh hlau-in nang pawhin ka inpuahchah

chhuah hun min ngaithla a. Mahse e..., hei, inleng ka nei leh ta. Mahse nangmah avangin ka la inpuah-chah chhuah lohna chu chhuanlan a hmangin ka nu leh ka pa min tirh luihna chu hnial ka tum a. Tunah rih chuan engmah an la sawi ri lo na a, min tir lui ngei dawn tih ka hai lo.

“Chuvangin, a rang thei ang berin palai rawn tir vat ang che. Nang ka neih che chu ka chhungten rem an ti lo a nih pawhin mi dang laka ka fihlim theihna kawng a ni mahnna. Chung ka inlengte chu ka mitmei hmu leh ka kamkeu avang a lo leng an ni lo tih erawh chu lo hre duh hram ang che aw. I palai hmel chauh lo chu ka tan chuan chhiattu zualko vek an ni si a. Amaherawhchu, palai rawn tir ve tur che chuan ka han ti tak na che a, beidawngin an haw leh ang tih chu hriat sa a ni hawk si. A chhan chu : Hman ni khan ka u-in ka thul a lo hai a, i lehkha min rawn thawn ka dah that leh ka chhan lehna tur che ka ziaak sa ka la thawn hman si loh nen a ching chhuak a. Chumi thuah chuan ka u nen pawh kan inkhak deuh nghe nghe a. Ka u lah chuan lo dah tha leh si lovin a nupui (kan monu)-in a lo chhuar ve a. Ani lah chuan mi-tin mi-tang hnenah a lo sawi zel zul lehngal vei nen. Kan inkar thu pawh hre lo a hlei (thelh) an awm ta lo.

“Ka pa zurui pawhin a beidawnthlak lamin i nming a chham chhuah phah ta hial a. Mahse ka chhungte lakah beidawng mah la, kei chuan ka tibeidawng lo

ang che. Hlawhchham tur sa tih inhre chung reng a palai tirh chu a chakawm hauh lo ang tih chu ka hai lo. Mahse chung i palaite chu mi dang ka hnial thlak-na remchang a nih dawn bakah ka nulatna a venhim phah dawn a. Mi dang nei turin mi an turin an hmelsen pawh ka hmu ang tih ka hria. Mahse palai dang ttbeidawngtu an nih dawn avangin, ka tan himna kulhpui an ni dawn tih hria-in rawn tir ngei ngei ang che aw. Chu bakah i ajawh palai hmel ringawt pawh chu ka tan thlamuanna thuchah kengtu ennawm an ni dawn si a. Thuama, ka mang a va han ang tak em !

“Kan inneih hun tur hi thlirin ni tin a min awm hlimtu a ni thin a. Vawiin thleng pawh hian ka bei chu a la dawng chuang lo. Mahse ka hun tawng hian min tithlaphang thin em a ni. Nula ka nihna hi min tihlimtu chu ni mah se, lehlamah chuan min tilung-ngaitu leh min tahtirtu mai a niin, khawvel dan angin ka nulatna hian mi dang tan kawng a hawng tel lo thei si lo. Kei lah chuan i tan chauh ka hawng hawk si. He thilah chauh hi chuan he khuarel hi ka va han ngaithiam lo tak em ! Thuama, engtikah nge chu i tan chauh a ka kawng hawnah chuan i rawn luh ang a, mi dang chu kawng kan kharkhum theih dawn le ! Sawi tur a va han tam tehlul ngai ve le. Mahse chu thu hmanhmawh chauh chu ka sawi rih ang e, a dang sawina hun chu a la awm leh chek ang chu maw. Tawk ti lo chungin ka titawp rih ang e.

Dam takin mangtha aw,

I hmangaih Rozamj.”

Kapihuama chuan, "Kha kha a thu kalhmang chu a ni ta a. Palai chu tir ve teh reng mahila, hlawnchham tur tih briat sa reng a tirh chu a hah thlawnthlak bakah a tlawngaihthlak in a mualpho-thlak si a. Pakhat lak a hnawn tawh lah hian a nula nazah zawng hian 'ka induh loh hmuh e' ti ni-awm fahran hian an dinhmun bre hawt si lovin mi hi an induh loh hmuh ang mai mai a. Mihring hi mahni tawkah induhna kan nei theuh a. Chuvangin, hnawng tur ringawt a palai tirh chu ka thanat zawng tak a ni. Mahse 'rawn tir rawh' tina ngawih ngawih a ka tirh si loh chuan, hlauhthawn thil lo thleng palh ta se, ka inchbir leh ang tih chu ka hlau bawk si a. Eng nge nang i ngaihndan ni reng reng le?" tiin Liankhuma chu a rawn a.

Liankhuma chuan, "Ka ngaihndan chuan, hetia khaw khat nula chhuanvawr ve meuh siin a ni ni-a a rawn ngen tak hialah che hi chuan a mangang hle a ni tih chu a lang reng mai a. I palaite chu hlawnchham ta, teh reng pawh ni se, amah Rozami'n neih che a duh ngawih ngawih tih leh, a chhunge zawkin an hnar che tih chu kar lo-ah a tlangthang thuai ngei ang a. Chuti a nih chuan i tan engmah a zah-thlakna tur leh i mualphona tur a awmin ka hre chuang lo. Eng nge maw tak tak le a, 'mipa leh lawichal chu hnawn dan' tih kumkhua a ni a. Nang pbei chu i hmangaih berin neih ngei che a duh avanga a inleng dangte hnarna fung remchangah zah Balam a rawn sawm che a ni tawh a, leng vat

ila a ni mai. A thu ang i zawm loh chuan, a bei-dawng hian ‘min duh ta lo a ni ang e’ tiin pasal te hi a nei tak tak mai tur a sin,” a tih avang chuan a rang thei ang ber a palai tirh chu an tum a.

Inriinni zan zanriah ei lai chuan Rozami pa chuan, “I nu leh i pa hian i nawmsakna tur kan duhsak che a. Sailo ni leh tbla kar a leng kan phu loh sum tam nen nang a kara pakar an rawn duh der che a, lawm hlum dawn la a ni mai. Tuna tak a nu leh pa thu ‘ka hnial e’ i ban tih ni. Tunlai thangtharho hi in huaisar ta lua. Hmanlai hun kha zawngah khan nu leh pa tha tihna mualah sawi leh sel nei lovin nula kha zawng kha an liam tawh a. Atir chuan hreh deuh thin mah se, nu leh pa tha tihna lam a kal hmeichhia inchhir leh ta tu an awm ka hre ngai law. Hmanah lah khan kan phu loh pui kan tibeidawng tawh a, khaw hawina min hriat-tir dawn hlei nem. Tha kan tihna-ah chuan ‘ka hnial e’ ti tur em i nih tehchai. I nei ngei ngei tur a ni” a ti hmuar hmuar a.

Rozami chuan chaw a ei thei ta lo a, ei chanve pawh tling lo-ah a tho ta nalh a. A thawh pah chuan, **Ka hmangaih chauh lo chu** neih ka tum lo. In mi duhsakna hi ka tan chuan hmelma inhrailum tumna tûr phul chaw inhlui ang lek a ni. Thihna kawng aia kal chakawm loh zawk kawngah ka kal thei lo,” a ti a. A pa chuan, “E, e, ê . . i mi han jawngkhum duh dan chu(h). I nu leh pa hi maw hmelma nen a min tehkhin, mihurnu, i san Kapthuama

zawng i nei hlek hlei lo ang e. Chaw seh sawm a ka chawm lenin maw 'nu leh pa thu ka hnial e' : han tih chu. Ani khaw te lai zalen mitha satliat fapa ringawt zawngin palai kawn khar pawh rawr tir mah se, se sawm man pawhin ka hralh chai hle lo'ng che. Han tawng leh te dêk, hmuí hlei hma hlei pu lovin ka hlap chiam bei bui mai tur che a sin," a ti tun tun a.

Rozami chu mittui tla zawih zawih chungin a chhuak ta a. Thanthuami te in a pan nghal vang vang a. Thanthuami zanriah ei kham tuiumhunhmun a lading chu kawmchar lamah a kuah phei a. "Thuam thian, kei zawng ka mang a ang em mai. Ka pa-in pasal nei turin min tir nasa lutuk a engtin nge ka tih ang, Thuama tan ka indah nget tawh si a. An lah chu khaw dang hawi lovin keimah avangin tlang val a la hmang chu a ni bawh si a. Palairawn ti vat tur a ka lehkhathawn kha a lo hmu lo em n ang? Aw..., min hnemin, nang ka thian thaber ta hian ka thlamuanna tur thu min hrih tur i hre lu lo em ni?" tiin mangang aw khur zawih zawil chungin a thiannu Thanthuami chu a kuah a.

Thanthuami chuan, "Zaninah i pan a tir leh che em ni, engtin nge a tih che?" a ti a. Ani chuan "Tir nasa lutuk, zanin chang pawh a la ni lo ang kei zawng kan in chung hrehawm ka ti em mai Thuamthian, ka va hian vanduai tak em!" a ti a. Thanthuami chuan, "Palai tir tur a i lehkhathawn

chu a lo hmu a ni ang, ka pa (Kap̄thuama te khuaa Than̄thuami nu laizawn pasal) a lo thleng a. I lo lut khan khua i hawi lo em a i hmu lo a nih kha. Saw, tapaia saw a thut reng saw. Lo len tum a lo kal a nia lawm. Naktuk zingah ka pa nen emaw an lo len ka ring,” a ti a. Chu ringawt pawh chuan Rozami chu a thlamuan huai huai a. Mahse a rilru pangkhingah chuan — Engzat pawh lenpuiin, an tawngkam thiam vawr tawp nen a pa chu dil mah se, an hlawhtling chuang dawn lo tih a hriat lawk avangin a rilru chu a tihlim tak tak chuang lo.

Rozami leh Than̄thuamin an sawi duh an sawi zawh hnu chuan Kap̄thuama ni pasal chu Rozami chuan hmel hlim tak hian a va be sawt sawt a. Kap̄thuama te chhung chanchin te a zawt luam a. Kap̄thuama ni pasal chuan, “Rozami maw i nih a? I hming chauh hi chu keini chhung chuan kan hre lar teh a sin, zuk ni tak che chuan, i hmel enin lar awm pawh i ni reng tak e a. Hei, kawm che pawh ka duh hle a, i kawm theih ang emaw chu le?” a ti a. Rozami chuan engkim hre sa an nih chu hre hlawn mah se, zak deuh hlek chung hian, “Eng nge kan kawm theih loh lêm ang. Keini tehlul min kawm duh phawt chuan kan inkawm tur a lawm. Zanin hi a remchan zan tak pawh a ni ang, inkhawm pawh ka tum loh zan tak a nia sin,” a ti a. Tichuan, in-
~~char lamah an~~ inzwi chhuak a, leikapui a ding dunin
 Kap̄thuama ni pasal chuan a lo kal chhan chu Chiang
 takin a hrih a.

Rozami chuan a dinhmun leh chumi zana a pa tihdan te a brilh vek hnu chuan, "Thuama hnen a karawn sawi tawh ang khan, hlawhtlin inring a rawn leng tur a ti che u pawh ka ni lo a. Mi dang mi neih luihtir an tumna hnialthlak tanfung remchangah chauh a ni zawk a. Nangni ber in rawn len a, mi zawh chian tul ti lo kha, wpa ka duh tih an hriat chian si chuan, ka chung te chu mi dang mi neihtir an tumna kawngah ka hnial huai thei dawn a. Chu phei chu thu tenau-ah ka ngai zawk a. In rawn len ngei ka duh nachhan zawk tak chu — Mihring chin hriat a ni lo a, Thuama nen hian a ruk a inhruai te a la tul thut mai thei a. Palai hmel vawikhat pawh lang si lova inhruai rikngawt hi zawng a tu ve ve tan pawh nawm loh-na lai a awm a. Chhungte an zahawm dan a chung-chuang bik thin em mai e, tih thu-ah in rawn len ve reng reng hi ka duh nachhan tak chu a ni zawk. Ka sawi tawh ang khan, tunah kher ka duh nachhan pawh ka sawi tawh ang khan, palai dang hnarna remchang a nih theih ka beisei e, ka tih tawh kha.

"Khi leh chen atang a hlawhchham tur tihhriat sa reng a ngal-tha hah a kei tehlul avang a i lo kal hi ka minat tak tak che a. Hlawhtling dawn lo mah ula, lo len chu thulh chuang hauh suh ang che u, ka lo beisei tlat dawn che u a nia. Tunah hlawhchham rib mah ula, hlawhchhamah pawh inngai reng reng suh ang che u. Mi dang inti hlawhchham ~~the~~ in hlawhtlinna a nih dawn avangin ka

tan in pawimawh em em a ni," a ti lawm lawm a.

A tuk Chawlhni zing tukthuan ei hma chuan Kapthuama palaite chu Rozami te tapai sut bul dawhchho hmawrah thu-in titi phungleng an sawi hnu-ah Thanthuami pa chuan, "Hei le, Hnunapa, kan thu dang alai chuan—Kan pu Kapthuama tan Zami chu rawn ngaizawng ta miau si hek i, 'zah fakah lu em chhum suh' tiin kan rawn inhmaithinghawn ta ngawt zawng a nih hi. In mi khawngaihna avangin hlawhchham kan tum hauh lo a nia," a han ti a. Rozami pa chuan, "A ni tak maw, keini akar a fa rawn duh der ve ta chu mumang te pawh zu ang rum rum a. Thuamipa, hei tuibur hi han hmuam teh u. Chu Kapthuama in tih chu in pu Phunga fapa a ni maw?" tiin a han zawt tē tē a. Anni chuan, "Ni e, a fa hming koh a ni," a ti a. Rozami pa chuan, "Phunga fapa a nih chuan a fel viau dawn chu. Khaw khat a cheng kan ni lo na-in Phunga kha a tlawmngaih leh chak mi tin hrilfak tling a ni a. Keini takngial pawhin khual khaw lam su a tang pawhin a chanchin kan lo hre phak hial a. Anni fa te chu kan phu rual em an nih ang le. Rozam, hei inlêng duhawm tak kan neih hi, 'chalmar thingpui' ngat kha han lum teh. A nih leh chutia min rawn rim der ve duh ta chu eng nge in rawn inhuam dan ni a, in rawn puanhnuai ve?" tiin a han zawt ngal a.

A engamah hmaa man leh mual a an inhuam dan a hre duh hmasa ta ber chu mak ti deuh hlek

chungin Kapthuama ni pasal (mikhual zawk) chuan
 "A..., chutin engrawn lenpui pawh kan nei hran lo.
 Min lo duh der ve te a nih ngai erawh chuan duh-
 ber man atan nafam chuan in sah ang angah tlan
 kan tum bik lo ang. Amaherawhchu, thenrual tha
 zarah vawiin ni thleng a hâk chham lo leh meialh
 en lova nung ve hram hram kan ni a. Eng han
 chhuan tur nei mah suh i la, Zami chu ngaizawng
 ta miau si hek i, man leh mual lamah zawng harsatna
 a awm bik em lo ang chu maw, kan ti deuh a. Kan
 sawi tawh ang khan, in khawngaihna kan rawn tah-
 awhin chhungkhat a insiam te hi an duh ve mial dah
 law maw tiin inpui sang kan rawn kai ta chawt mai
 a nih ber awm hi maw. Man leh mual thu-ah zawng
 in thliah ang zah zahah tlanchhiat kan tum phal lo
 ang. Mahni neihin a tlin tak loh leh laina ta pawh
 kan hnik zel tawh mai ang chu kan ti. Hlawhtlinna
 thu chauh lo chu engmah dang hawn tum hauh lo-
 vin khi leh chen atang khian in khawngaihna kan
 rawn dil ta a nih ber hi maw," a ti a.

Rozami pa chuan, "Chu lo a liam, phi leh dar
 pawh man phak ve hlei lo tur keini akar a fa te
 man a neih thinglung-khawn pawh huam a min rawn
 dil der duh ta chu kan hnial rual em in nih ang le.
 Amaherawhchu, hei, chhungkua pawh kan kim lo a,
 a hmingin pi leh pu te pawh kan nei ve a. Vawiin
 lamah kan lo inbe khawm ve ang a. In lo kalna
 pawh a bla a, muanchanpui phi pawh zu ni lo che

u a. Naktuk khua lo var leh tê tê se, in rawn beng-var leh a ni ang chu ti rawh, Ṭhuamipa," a han ti a. Tichuan, thingpui an han tuihnih tê tê a. Chumi chhung chuan titi dang an han rawlh leh rih a. Thingpui in zawh chuan an nuphal dunin an chai chhuak ta a.

Thawhtanni zinga Rozami leh Thanṭhuami buh-zing phur chu an pahnih chauhin an kal dun a. Rozami chuan, "Ih maw Ṭhuamṭhian, nizan leng haw hnu khan ka pa nen kan inhnial leh hrep pek a. Hetia a rawn leng ve ta hi ka pa chuan 'i zai a ni e' min ti a. Kei chuan, ka zai a ni emaw, kei chuan ka hmangaih te an nih leh nih loh chauh a ni ka ngaihtuah ni' ka ti a. Mahse nizanah zawng thinrim a inhnial kan ni lo a, atir chuan a han ling leh dawṃ mai pek a. Mahse englai mah a ṭawng ve ngai lo k'u Hnuna a lo ṭawng ve khiah mai a. K'u Rohnuna chuan, 'Mahni fa te a pumpa tirh ṭhat a intirh reng reng awm lova, a vau a zawng hlir a in-ânkhum leh chiam chiam mai ṭhin zawng tu fanu bian nge ngai-thiam se i tih? Tih tak emah chuan nula upa leh lêngṭul pawh a la ni lo a. I tir a nih leh thu ṭha leh thinrim lovin an thatho theihna tur zawngin tir ṭha hle hle la. Nang alova seh ngam hmelsen nen a inpawng vau leh chiam mai ṭhin. An thinrim ve deuh leh a aia hleibluakin i thinrim zawk bawṃ si a, ka pa zawng fate deh dan i thiam lo em mai," a lo ti ve khiah a, ka lawm tak tak a ni.

"Chutia ka û a lo ṭawng takah chuan ka pa

chu a dai ve leh ta a. Aw nem tak hian, 'Rozam, chu, kan tiam angin kar lehah chuan an rawn lang leh dawn a nia, engtin nge kan lo chhan dawn? Kan thu chu hnial fithlak i tum tlat em ni?' a ti ve vei duai duai a. Kei chuan, 'chuti tak a in duh leh nangmahnin nei ula ti nia. Mi dang lem an rawn lenin tawngkam khat pawhin min rawn duh si lo a. Tute pawh ni se, ka mi duh zawng an ni emaw ni lo emaw, pasal neih ka la duh lo, ka la in-puahchah chhuah lo bakah nulat ka la duh rih reng reng. Mi pakhat chauh lak a inpeih lo ka ni lo, tu lakah pawh ka la inpeih chuang lo. Pasal neih hun ni-a ka inhriat hunah chuan in mi tirhna lam lamah pawh kan la kal tur a lawm. Mahse tunah zawng ka la leng rih dawn. A reng reng thu-ah inchhung-khur ngelnghet deuh leh man leh mual rawn lenpui tam thei apiang lakah min tir a, mihring lam tumah in en duh lo a. Mihring lam thlir duh lo e tilovin tuna ka inleng hnahnung pawhin in ngen zah zah rawn tlin huam a lo leng an ni ve bawk a. Tawngkam khat pawhin min rawn der leh lawi si lo. In mi tirhna-ah hian kal ngam pawh harsa ka ti. Hnian a in mi tirh chiamna lah kha reilote-ah nula dang lakah a mualpho-in a lo laklawh ru reng kha niip. Tuna in mi tirhna pawh hi eng chauh nge a an dawn in hre hlei nem,' ka ti ve hrep a. Nizan zawng a zaidam lai denchhenin ka tawng ve phiar phiar a. Nula tawng a mawi lo tak tak te pawh ka mawi hial ta awm e

“Ka pa chuan, ‘kan thu i hnial fo dawn zawn-
in hre rawh, i la rethei hle mai tur a nia. I nu leh
pa ang a hmangaihtu che hi kawh pawh vel la i
hmu hlek hlei lo ang e. Keinin pasal kan zawn
sak loh che zawnin pasal pawh va hmu zo ngût
suh che. Ti hian i leng rawlai mai mai ang a, a
tawpah pathlawi sawn i la pai ang a, fa chuam pawm
chungin nuța belin i la awm ang a, keinin kan dam-
pui tawh si lo ang chia, i inchhirin ban a la chen
mai tur a sin’ min ti a. Mahse ka chhang leh duh
ta lem hlei lo a. Ka pa chu ka tihbeidawn theih
avangin Thuma pawh chu hlawhtling bik dawn lo
mah se, ka awm a nuam ta huai huai a. Tukin
hi i pa te pahnih lo len leh hun tur a ka pa tiam
hun a ni a. An hnenah kei chuan engmah ka sawi
thei dawn lo a. Chuvangin, i pate hnenah chuan
mi dang pawh an hlawhtlin bik loh thu chu i lo
hrilh dawn nia. Palai an rawn tihbeidawn avangin
an hlawhtling tho a ni tih an lo hre lo palh ang e.
Nizan khan Thuma lehkha tur tawi tê ka zia a,
nakinah naupang ka rawn pektir ang chia, i pa chu
i lo thawn dawn nia,” a ti a, tlang an chhuak ta a.

Rozami sawi lawk ang ngeiin Kapthuama palai-
te chu hlawhchhamin a lo tin ngei a. Mahse Ro-
zami chuan tu dang mah a tum lo tih an hriat a-
vangin rilru hahdam takin an awm tho a. Chuta
tang chuan Rozami chuan Kapthuama chauh lo chu
tumah neih a tum lo tih a tlangthang ta nghal a.
Mahse nula tlawng awl a la nih ve chhung si erawh
chuan, nula tha leh fel na na na chuan inleng
chuangkai a haih chham chuang lo. A rilru kawih
hæ̃r tum a herhtu lah a bosal chuang hek lo.

14. "I DUHZAWNG TI TURIN..."



LIANKHUMA mei kawng sial haw-in Thankimi a kawm hnu ni hnih ni thum lek aţang chuan Liankhuma chu khawsikin a na ta vak mai a. Hlauh-thawnawm khawpa a khumbek avangin Thankimi pawh chuan mi dang mitmei veng tak chungin a tlawh thin a. Liankhuma lah chuan a ngaih em em si avangin a chang leh a kohtir thul, a ţawngvaiah lam a chham chhuak thawm nen. Thankimi chuan Liankhuma dam ta lo thut mai chu Pathian kohna kawng khatah ruatin a ţawngţaina-ah pawh a chham chhuak tel a. A ngaihdan takah phei chuan— Pathian a hmuh theihna tur chauh pawh ni lovin, Pathianin Thankini a venhimna tur a Liankhuma suahsual rawngbawl tumna phuar nan a tih ni ngeiin a ring a.

Mahse Liankhuma chuan chu chu a ring ve ther t  lo. "Natnate chu khawvel hri a lawm, nat chang a awm a, khawvela kan awm chhung a mihringte tuar tur a leilung hrin Pathian remtih ve reng a ni. Evi leh Adama aţang tawh a mihring chung a thil thleng pangngai, mi hate leh misualte pawhin angkhat a kan tawh tur a kan nun chhung hun tihre hawmtu pakhat a ni ve hrim hrim zawk. Chu chu a dikzia tilangtu pawh— Khawvelah misual chauh hi an na thin bik lo a. Mi hate hlei hlei hi an bawrhsawmin kan nun thlengin a tawi zawk mah fo a. Unau piangza zingah ni se, a fel leh duhawm awm hi a nun tawiah an ţang duh tih pawh kan hai hlei nem," tiin a ţang ve tlat mai a.

Chumi thal lai chuan lo hal hun tawhah ruah a sur duh ta hle mai a. Thal lai a pumpa fur chhe lai ang hrimin ruahtui a nghal viau mai a. Khawtlang pawh an mangangin, 'Khiangrepni-ah buh chi chawi chawpin kan hal thei chêk ang chu,' tiin an inhnem ringawt tawh a. Isua sun ni (Good Friday) pawh an hlat tawh lo hle a. Chutih lai chuan tlem-in ruahtui a tla tlem ta deuh a. Khua-in san lam a pan tâk deuh avang chuan an thlamuang leh ta deuh a. Khua a han dur leh hlek lahin thawnawp ngang an ni tawh a, an lo hal châk chu an za sek zel a. 'Khaw chin leh nau chin a hriat loh' tih kumkhua a nih avangin ni thum lek sa-ah lo hal zai an rel ta a. Chutih lai chuau Liankhuma nâ pawh a lo changkang tawh deuh a.

Lo hal ni chuan Liankhuma damkawr theithur châk chu lo hal en pah a an ramhuan ser tang rah vai turin chemtê leh chi-thak nen a thawk chhuak a. Kawng kam a hmuṭau hmin la awmchhunte chu a ei thla zauh zauh a. An huan luh dawn ṭep a sekhupkhawn hrul a hmuṭau hmin pawr tha zet mai lawh tuma a ban lai tak chuan, mi pakhat mipa hmelpu, hmel ngainatawm tak hian hlim hmel tak chungin, chuti lai tlangsam (pholeng) buk chung rawn thawi phei vaih a, hmar lam aṭang a lo kal hian, "I duh zawng ti turin ka lo kal e," tiin Chiang tak a rawn hrilhtu a hmu tlat mai a. Liankhuma chuan a han en zui a. Ding tak a chhim lam panin boruakah liam phei ta vang vang hian a hmu a.

Liankhuma chuan mak a ti em em mai a. Rambuai nge ni a Pathian? Thu lah chu a hrilh Chiang hle mai bawk si nen. Chuta tang chuan chu thu chu a rilru-ah a châm ta tlat mai a. A mi hmuh chuan a lung a tilengin hmuh leh a châk rilru hle bawk nen.

A rilru-a a cham tak tlat avatg chuanin a thlen veleh Baibul thu a ni dah law maw ti-a zawt turin an Kohhran upa hnenah a kal ta chawt a. An upa chuan, "Pathian lehkhabu a mi ni e, eng a tan nge i tih tâk?" a lo ti a. Liankhuma chuan, "Ka hre duh thuphung mai mai a nia. Pathian lehkhabu-a mi a nih chuan a awmna lai min hrilh thei ang em?" tiin a han zawt leh a. Kohhran upa chuan, "Khawnge, ka han zawng teh dawn ang aw. Chan-chin Tha lam chu a ni lo phawt mai a, tu ziake nge ni kba aw..., ka chhiar fo thin a sin maw le. A bung leh châng hi ka hrereng thei thin lo. Ka lehkhabu atang lo phei chuan ka zawng hmu thiam lo e â," ti changin, a thingrem hlui tawh tak atang chuan tangkâwng vun a tuam Pathian lehkhabu chu a rawn phawrh a. A tarmit hlui tawh tak darthlang bial kalh chi, a bahna lachhum a blin chu a han vuah chut chut a. "Han keua a phek veilam per thlaah awmin ka hria a, ka hre fuh ta lo em maw ni tak lê, ka'n ngaihtuah teh ang," a ti a, a han ngaihtuah vung vung a. "Chû! ka lejhmawr chuan a hria maw le," tichungin a lehkhabu phek veilam per thla chu bih dun dun chungin a sam nuap nuap a.

An hmuh fuh dun tak loh avangin Liankhuma chu a haw leh ta a. Mahse a rilruah chu thu chu a riak tlat reng a. A tukah chuan, "Lo te pawh kan hal tawh si a, hna tau a tet chu a ni leh ta mai a. Khawnge, ka khumbeu chih loh kha, ni dang a ka chih hman loh tâkin, awm mai mai aiah ka han chih teh hram ang," tiin Liankhuma chuan khumbeu chih tumin a lehkha chhe têt khumsir thûl chhunga a dah that chu a la chhuakin a han ching phelh a. Lehkha chhe têt zingah chuan 'Kristian Tlangaubu' hlui pheh hnih khat lek tur hi a lo intêt tel a. Chu Tlangaubu chuan, 'YLA Thubeih' tih hi a han hmu a. A pheh lehlam chu a han let a. Mi sermon ziak, a bul lam pawh awm tawh lo, laklawh tak, thu chhum bung tak awmchhun la chhiar theih laiah chuan, a ziaktu-in a thu tihchak nana a Baibul châng zeh chu a la chiang hle a. Chuti lai chu : *'Inthawina leh thil hlan i duh lo va, ka tan taksa mi buatsaih sak ta zawk a ; halral a pumpeknaah te leh sual tana inthawinaah te chuan lawmna reng i nei lo. Chu veleh chuan keiin, 'Aw Pathian, ngai teh, (Lehkhabu zialah chuan ka thu ziak a ni a) i duhzawng ti turin ka lo kal e, ka ti a' a ti a.'* (Heb. 10:5-7) tih lai thu hi a lo chuang kalh mai a.

Lehkha pheh tlahlang a chu thu a han hmuh chuan Liankhuma chu phu zawk a. Chuti lai Pathian lehkhabu châng chu amah ngeiin chhiar a chât te a. Chu Tlangaubu pheh tlahlang pawh chu hmang phal lovin a dah tha a, lukhum a chih sawk sawk

a. A lukhum chih zo chuan chuti lai thu chu chhiar chāk hle mah se, Pathian lehkhabu teh reng pawh an neih si loh avangin mi ta hawh turin naupang a tir ta ringawt a. A han keu chhuah chuan, an Kohhran upa sawi ang ngeiin, chutih hun lai a an Pathian lehkhabu hman, a phek tin mawnga a thu zulpui zawnawlna (reference) awm chi-ah chuan, a phêk veilam per thla-ah a lo awn na meuh a. Chuti lai chāng amah Liankhuma ngeiin a han chhiar ve meuh chuan, a thinlungah eng emaw rawn tiharh mai tur awm ni hian a hre ta tlat mai a. Mahse chu chu eng nge a nih a la hre thiam rih si lo. 'I duhzawng ti turin ka lo kal e' titu chu tu nge ni a, chu thu kher chu eng vang a rawn hrilh si nge a nih? Liankhuma duhzawng a rawn tih tur chu eng thil nge ni ta? Liankhuma chuan engti zāwng mahin a la hre thiam phak lo. Mahse chu thu chu a rilru-ah a nung thar sarh reng thung a. A hrilntu hmel lah chu a mitthla-ah a cham tlat bawk a. Chung thil avang chuan Liankhuma chuan Pathian lam hawina chhe tê mahin a la neih phah chuang hek lo.

Chutih lai a sawrkar chanchinbu 'Nitin Chanchin' ah tih atang a an lo hriat danin : Indopui Pahnihna (II World War) chuan khawvel a nghawr nghing zau sawt hle mai a. Mizo tlangval pawh a duh apiang sipai a tang turin 'Hriattirna' an rawn chhuah ta uaia uai a. Chu chu hria-in an khaw tlangval pahnih pawh kal ve an tum avangin an Kohhran pawhin an pual a thlahna inkhawm neih an

tum a. Chu chu Good Friday dawn chwlhkar Thawh-lehni zan a ni. Thiante pual a inkhawmna awm ta chu Liankhuma pawh a inkhawm ve a. Inkhawm ban a Biak-in tuala a haw tur chu Thankimi chuan, "Khuma, i rawn inkhawm ve peih maw? I dam chiang tawh em ni?" a lo ti a. Liankhuma chuan, "Dam chiang tawh e, tunah chuan dam pangngai ka ni tawh e. Ngawi teh Kimi, hman ni kan khaw lo hal ni-a ka thil hmuh, hrilh châk deuh mai che ka nei a. Ka rilruah a cham reng mai a, a ngaihna ka hre bawk si lo nen," a ti a. Thankimi chuan, "Eng thil nge ni â? Min han hrilh teh, hriat ka va han châk ve," a ti var a. Liankhuma chuan, "Chutia khawlai a sawi mai mai phal rual a ni lo, mak leh ropui deuh mai, Pathian lam thil a ni awm e," a han ti chuan Thankimi beng a verh lehzual a. Mah-se Liankhuma chuan a han ngaihtuah nawn leh a, "Ka thil hriat bi ka tihtlangthan mai chuan miin piangthar ta hialah min sawi emaw a ni ang a. Kei lah chuan Pathian-ah danglamna ka neih phah chuang si lo a. Han tha awm ve ngawt ila, engmah danglamna awm si lo chu mahni inbum mai ka ni dawn bawk si nen. A thu brimah khawvel lamah ka la tlan leh duh dawn emaw a ni ang a. Tharna nei lo ta pui, ringtu nun lah ka tlin chuang dawn bawk si lo. Kimi hnenah pawh hian sawi leh lo mai ila a tha zawk ang," tib a ngaihtuah hnuhnawh leh ta a. Kimi hnenah pawh chuan, "Ka han thutak sawi hluai a, thil ho mai mai a lawm maw le, ka tifi am a nih kha," a ti leh ta zawk a.

Thankimi chuan a ringhlel deuh a, eng emaw tak chu hmuh leh hriat a neih a ring tlat a. Liankhuma chuan a thil hmuh chu theihngihl thei lo mah se, a rilru a ti khauh tlat a. Mi rilru sak a nih avangin a thil hmuh pawh chu Pathian thu lam a thluk duh lovin khawvel a thil mak danglam eng emawah a kai lui tlat a, pai ral a tum hram hram a. A tuk a Thankimin dilchhât taka a zawh leh ngial pawhin engmah a hrih duh chuang lo Good Friday a lo thleng ta a, Liankhuma inkhawm ve chu tlar hnuhnung ber lamah a thu a. Pulpit sir tuakah chuan pawndum an zar dul mai a Kohhran an hlim deuh lai a ni a, thu hriltu chuan a hmasaberin hla a thlang a. Chutia hla an sak lai chuan Liankhuma chuan hman a mi hmuh chiah mai kha Pulpit sir a an pawndum zar chhanah chuan khenbeh thi hnuingin a va hmu ta tlat mai a Chu khenbeh lu chung zawn chiahah chuan, 'I duh-zawng ti turin ka lo kal e' tih bawh kha intar fiah kuk hian a hmu bawh a. Chu meuh crawh chu Liankhuma chuan a tuar zo ta ngang lo. Mualpho thei mai dawna a inhriat avangin mittui tla zawih zawih chungin a tlan chhuak ta a.

A khumah chuan a tlu tawp a, lung chhe si, hlahv avang a tap pawh tap hlei thei si lovin a khurhin a khur zawih zawih ringawt a. Chutia manganga a leh hlawm reng lai chuan, eng emawni hian rawn khawih tēk chuai hian a inhria a. Chu veleh

chuan tun hmaa a sualna zawng zawng chu hmaih
 thelh awm lovin a hmaah chuan a rawn inpho lang
 ta ut hian a hmu a. Chu chuan manganna khur-
 puiah hnuk lutin nung tui leh damtlak reng niin a
 in hre ta lo a. Thah duh hial khawp a hawtu a
 hmelmate rilru aiin a inhuatna chu nep chuangin a
 hre lo. Mahse chuti chung pawh chuan a rilru a
 ti khauh lui a, "Zu tlem in ila a zia-awm ang,"
 tiin a tho lawk a, inkhawm an ban hma chuan hmei-
 thai Hauteii zu-tuitling no hnih a va lem khawlh
 khawlh a. Mahse chu chuan chhâwk a hnehin a
 lem thlak aţang chuan a taksa pum mai chu sa tawk
 a mei a hem ang mai hian a tisa ta huam huam a.
 A tlan haw leh vat a, tuiuma tui chuan a han in-
 leih hlawp hlawp a, mahse eng a sawt chuang si lo.

Khawlai len zai pawh rel thei lovin a mu char
 char na a, muthilh te chu khawilam. A taksa hreh-
 awmna ai chuan misual tawpkhawk ni-a a inhriatna
 chuan a nun a tihrehawm ber zawk a. Chuti ang
 ngat chuan awm se, ni thum pawh dam zovin a in-
 ring lo hial a. Mahse Pathian hmangaihna a rawn
 lang ţan ta. Tlai lengkhawm chu an blim hle mai
 a. Ralkhat aţang pawhin an blim a ni tih chu hai
 rual a ni lo. Khawlai dung a nula leh tlangval
 hawklak leng khawthawng pawh hmuh tur awm lo
 khawpin lenkhawmna lamah chuan an fai vek a.
 Chutih lai chuan Liankhuma erawh chu thlaphang
 leh mangangin khumah a let hlawm reng thung a.

A chhungte zawng zawng pawh a nu, khawsakrei tu
chauh lo chu lenkhawmna lamah an kal diak a.

Khua a tlai lamin ni pawh suk chen chauh a ni
tawh a. Liankhuma mangang chu banglai lam hawm
han let thak a. Chutih lai tak chuan Isua khenbeh
bawh kha hmun leh hmunah Chiang em em mai hiar
a hmu leh ta. Chumi tum zet chuan a hmangaihna
hmel duhawm tak, Liankhuma duhzawng ti tur
lo kal a nihzia chu tawng lovin a rawn hmuh chian
tir ta at mai thung a. Chutia a hmuh veleh chua
a sualna zawng zawng chu Isua thisen far chuan
indawt zelin a len bo ta zung zung ni hian a hri
a. Hmai thelh awm lova a len bo zawh chiah chuar
tun hmaa a thinlung rawn khak vaih vaihtu awm
a hriat kha man ta chatin a inbre bawh a. Chut
tang chiah chuan Liankhuma chu 'minung siamthar
a ni ta vah mai. Chu a hriatna thar chu a nei
veleh aw-thangkawk niawm tak hian' 'Lalpan a hm
leh ta' rawn ti hian a hria a. Liankhuma chu
lawm ta em em mai a. A rilru leh taksa hrehawm
na zawng zawng lah chawp leh chilhin a tla fai t
duak si nen. A khumah chuan a thingthi a, a thiar
ang tawkin ban pharin a tawngtai ve ta ngat nga
a. Lenkhawmna lam a kal pawh a chhak hle na a
zu rim a la nam si avangin a kal ngam rih bawh
si lo.

Zanriah ei kham thleng seng pahin Thankin
chuan a rilru te te hian. "Vawiin chu, Khuma hi k

va han hmu lo em, chawhma kha chuan a rawn in-khawm ve teh meuh kha chuan ka hre si a. A damlo leh ta emaw ni dawn chu aw" a tih rilruk lai takin a pa (a nu u pasal) kha a lo lut a. "Kimte, hawh, inkhawm hmam Khuma te inah i va leng lawk ang hmiang? Pathianah lawmna thar neiin an sawi a, Ni dang ber aiin mi hmuh pawh a châkin a rinawm e," tiin a rawn sawm a. Thankimi chu a hlim rilru hle mai a. A rilru-a lawmthu sawi a tawngtai mawlh mawlh chungin an pafa chuan an kal ta a. An in an va luh lai chuan Lienkhuma chu tui tak mai hian a lo tawngtai mial mial a. An pafa chuan a tawngtai chhung chu lo tawngtaipui rilru reng chungin an lo nghak a. A tawngtai zawhah chuan eng thu mah an sawi hma-in an han inchi-bai phawt a.

Lienkhuma chuan hmel hlim tak, sawi hleih theih loh lawmna thuruk nei tihhriat theih chung si hian, "Thu sawi tur tam tak ka neih chu tunah chuan sawi thei rih lo mahila, ka sawi theih chhun chu, "Ka Chhardamtu chu ka hmu ta, ka vah bosan ngai tawh lo ang, anin min tawnpui ang thihna ka van in ka thleng ang, tih hi a ni. Aw le, thil dang zawng zawng aiin kan vaiin i tawngtai vek teh ang u. Ka nu, nangni pawh kha lo tawngtai ve rawh u," a ti a. Thankimi chu lawm avanga mittui luang zawih zawih chungin a tawngtai a,

15. AN TIA LAWM



APTHUAMA chu a palaite an hlawh-chham avang chuan, Rozamin a hmangaih em em tho tih hre mah se, an khuaa awm pawh nuam a ti ta meuh lo a. Chuachhapah a thian kawmngaih ber Liankhuma nen ni dang angin an lungrual chiah ta bawk si lo nen. Inkawm leh châng te chu nei bawk thin mah se, ni dang angin an titi a rual tak tak thei tawh meuh lo. Mihrinna lamah chuan la inhmangaih em em-in. la induhsak tawn hle mah se, an duh dan inan lohna chuan, thian inkawm ngeih thin kumkhuate chu a pawt then ta hle a. Leh-lamah a lo hnawng ta rih bawk si nen. Kapthuama chuan tlan bo ve mai a châk ta hial a, a pa chu sipai a tan a dil ta a.

Mahse a pa chuan, "Nang ber i tlan bo-in engtin nge kan khawsak theih ang? Kei lah chu in chhung hna sekrek khawih a nu chan chan kawp nen ka tul dan lah i hai lo a. I naute i ho lohin kan mangang lutuk ang a sin. I thachhangdal thei chhun lah chu hmeichhia a ni si a, ho an ngaih em hi. Vailem chan te zawng châk ma ta che. I nupui man tur ni se, nang a hmeichhe pakhat man chauh na na na chu kan kawl ve reng a. A thu hrimah mahni lu zuar ringawt a tlanbo zawng ka remtih zawng a ni lo. In tan chhung chuan silhfen leh tangka phék hnih khat zawng in nei ang. Mah-se chumi it vang ringawt chuan tanna tlakah ka

ruat phah lem lo. Pawisa it i nih leh kan sum kawl lai hian inpei ve la, A chu a pawh chu tul-in ka hre lo. Tun a kan dinhmunah chuan hlo thlawh hi a tha rih ber mai. Mihring hian khân-chhuahna lam kan nei thin a. Sa khânchhuak an awm a, nula khânchhuak an awm baw a. Keini pawh Pathian zarah tunah rih chuan buh leh bal hi kan khânchhuahna ni rihin ka hria. Malsawmna kan dawn lai a kan bawh pelh chuan rahbi a tleu hlen ngai. Taima takin in unauza hian hlo thlo sauh sauh ula, Pathian zarah rual kan awt bik lo ang e," a ti a.

Chutia a pa-in sipaia tan a phal tâk si lohah chuan Kapthuama pawh chuan a tum lui duh ta bik lem lo a. Pathianah tharna tak la nei lo mah se, tlangval nungchang tha leh tlawmngai, khaw khat chhuanvawr ber a ni reng a. A aia upa mah ni se, a thianpa Liankhuma pawh tun hma zawng a lo zilhtu leh hau ngamtu ber a ni thin. Thenkhat inti-sakhawmi vanvâte ai aia a lakah tlang mit pawh a rual zawk mah a. An khaw tlangval thenkhat chu sipaiah an liam ta nual a. A thente erawh chu tling lo beidawngin an lo haw leh a. Thenkhat lah inpek a ngam leh tak tak si lo rawn relhru haw taw lah bo lo. Tlangval thenkhat an tluk loh val an tlanbo tâk avang a thawveng ta huai pawh an awm âwm e.

Hnuhhrâm thlawh lai a ni a, Kapthuama te chu an awllêng ble na a, Liankhuma chuan a thianpa

Kapthuama chu Pathian thu lam a hruai a duh a-
 vangin a briatna la tlem hle mah se, a lâwm chhuak
 a. Feh kawng leh bun hmunah te chuan a thiam
 ang tawh tawkin a hrilh ve kaub kaub thin a. Mah-
 se Kapthuama chuan, "I hmangaihber i neih theihna
 tur kawng awmchhun ngang a ni a, nang zawng awih
 tha nasa mai rawh. Kei pawh hian ka duhber ka
 luah theihna tur chu ni se ka ti nasa mai ang.
 Mahse kei zawng, i awm ang a ka awm ve mai
 zawngin nupui ka hmuah zawh loh phah hlawn ang
 e. Ngaihawng neih ka la duh rih chung si hi chuan
 a inrem chiah thei lo a ni," a tihsan a.

Liankhuma chuan, "I ngaihnan ang chuan kei
 pawhin tun hma zawng kha chuan ka ngai thin tih
 i hai loh kha. Mahse tunah chuan a lo ni hauh lo
 tih ka hmu Chiang ta a. Hman ni mai a la ni a,
 tisa tak a nupui tur ka zawn nasatzia leh nulat tlang-
 valna kawng a mi awm mai mai thei lo tlangval
 leplerh leh verther ka nih pawh i hai lo. Nula lak
 a ka tlaktlum theihna tur a nih phawt chuan hna
 thulh pawiti lovin, mi mitmei pawh veng seng lo
 khawpin ka tal thin tih pawh i hria. Nupui a ka
 duh loh pawh nawmsip bawlpui tumin ka hmanhlel
 a. Hlawhtlin tumin tawngkam lawmawm ber hman-
 gin ka daw a, an nungchang duhzawng ber ni-a ka hriat-
 in ka nung lui vel a. Mi thinchhe ber hi zaidam ber
 nunin ka han inti belawm thawm nen. An mit la
 thei ang ber tur a ka inlantirna daw-burin a chiah

ruĭh hnu-ab chuan ka leplerhna chu an lakah ka hri-
thla ta thin a nih kha. I hriat angin kan veng
tlangval-ab hian tlangnuam per kai tam ber nih pawh
ka hauh ta hial ve ang. Ka khatih lai khan soal a
nih pawh ka hre lo, hlawhtlinna ropui takah ka ngai
zaw tak tak a. Nupui a ka duh ngei nula pawh
ni se ka soalpui chāk ber an ni tho.

“Amaherawhchu mi dang nen a an danglamna
chu : Lo soalpui thei ta pawh ni ilā, neihah ka la
duh tho chu an danglamna a ni chauh. Ka duh ang
min duhpui lo nula chuan min hmangaih tak tak lo
ni-a ka ngaih nachhan pawh ka duh ang min duh-
pui thei lo chu a ni. Chuti khawp chuan mihring
rilru hi a soal thei a. Hmən a ka ngaihndan chuan,
inngaihna hi hmangaihna lantirtu ropui ber niin ka
lo ngai thin a. Nimahsela, chu ka ngaihndan chu a
lo ni awzāwng lo tih tunah chuan ka hre ta. Setana
hian hmangaihna kalkawng pawimawh ber angin it-
awm takin min lo hmuhtir lek thin a ni tih tunah
chuan ka hre ta. Chu ngaihndan dik lo tak aṭang
chuan ka chhuak ta a nih hi.

“Hmeichhiat mipatna nen a chawhpawhtute din-
hmun aia nghet leh thianghlim si, Pathian mit hmuh a
tling leh tha siin nula tlangval inhmangaihna hi a
kalpui theih tih tunah chuan ka hre Chiang ta. I
hriat angin i hnənah chuan han sawi ta mai mai ila,
i hriat hnu phei zawng a ni a. Hman a kan Thiani
pawh kha waw eng emaw zah ka chin thluk hnu a

ni. Mahse tuna mi hi chu a puanhmawr fahran pawh ka la dek thung si lo. Dek thung si lo e ti lo chuan kan inhmangaihna chu a letin a thukin a nghet zawk bawk si. Thankimi ngei pawh hi Pathian ka hmuh ve hma a ka hmangaih lai kha chuan sual-pui châkna-in ka khat a. Mahse tunah si hi chuan, chuti lam chu vuak hlumin a awm a, hmangaihna thianghlim tak siin, sual tihpuina lam hawi si lovin ka hmangaih em em ta thung si a.

“A chhan chû eng dang vang mah a ni lo, Pathian hmangaihnaa kan inhmangaih tak vang mai a ni. Tisaa inhmangaihna chu khawvel tan chauh a ni a. Mahse Pathian aţang a inhmangaihna erawh chu he khawvel awm chhung atan ni tho siin, kan thlarau khawvel hawlh thleng phak inhmangaihna-in kan inhmangaih ta chu a danglam em em-na chu a ni. Innei ta pawh ni ila, kan taksa khawvel tan chauh a kan nupa nihna chu hman lovin, kan thlarau khawvel tan leh mite tan kan nung tawh zawk dawn tih ka briatin ka hlim em em a ni. Nula leh tlangval inhmangaihna hi Pathian aţang a chhuak chu a ni teh meuh mai. Kan inhmangaih loh chuan nupui pasal kan inneih theih theih dawn loh avangin inngaizawng tur zawng kan ni e. Mahse kan inngaih-zawna chu Pathian thianghlimna ţawmpui phak, inngaih-zawna ngelnghet leh belh chian dawl takin kan inhmangaih ta tat thung si a ni. Tisaa inhmangaihna chuan a ţa berah nawmchenna bakah nupui-pasal a thleng phak chauh a. Pathiana inhmangaihna

erawh chuan nupui pasal nihna piah lam a thla-muang tak a Pathian rawngbawl dunin thlarau'khaw-vel tan an inhmangaih thin," a ti a.

Kapthuama chuan, "Keini kan nih avang a kan inhmangaihna a thianghlim lohna bik ka hre lo. A reng thu-ah nula leh tlangval inngaihzawwna ni na na na Pathian thu-a hnuh luh tum zel hi ka ngaihdan a ni tawp lo mai. Pathian tihhmingchhiatna leh mahni thiam inchantir tumna lek fang niin ka hria. 'Pathian ring chungin kan inngaizawng' in tih chuan ka hre thiam. Mahse Pathian pek ang hrim a i ngai a nih chuan i ngai thelh ka ti lo thei lo. Inngaihzawwna hi zawng Pathian lak a chhuak a ni lul lo. Unau inhmangaihna leh mirethei hmangaihna te erawh hi chu Pathian hmangaihna pawh a ni ang. Mahse nula leh tlangval inngaizawngte hmangaihna hi chuan dik tak zawngin a tum ruk ran chu tisa chakna tih-puitlin nan a nih tlat thin avangin, kei zawngin Pathian hnathawhah ka puh thei mawlh lo," a ti ve tlat mai a.

Chutia an inlawm lai chuan an khua-ah khawhar an awm a. Kapthuama leh Liankhuma pawh tlangval an nih avangin an riak ve a. Khawhar inriak tlangval dangte chu an phawkin kawm an nuam blawm ble mai a. An zingah chuan Pathian thu a leng teh chiam lo. Liankhuma phei chuan a ruk tak chuan nuam lo a ti lek lek thin a. A rinna a la naupangin Kophran huang chhung a luh ve a tum lai a ni leh-nghal a. Chung an thiante chuan a mize pangngai

an chawkt^{ho} leh mai ang tih pawh a hlauthawⁿ hlel thin lo. Amah mi phawk chi tak mai a loⁿ ve kherin thiante zing a pawt nuam ti mi a loⁿ si a. Mahse a insum hram hram a, Kapthuama nen chu anan mu dun a. Khawlai pawh leng tam lom mahni in chhung bâk chu an riah in chu an thlen tawp a ni deuh mai thin. An riah in te chuan a lo ngai baw^k a, an ram kal bak chu chang dâⁿ kan lovin khawhar inah deuh ngawt chuan an tâⁿ thin a ni.

An riabpuite zingah chuan tlangval upa lam tawh phawk fahran mai hi a riak ve a. A phawk avang a tuman thu tak a an biak mang loh khawp a phawk hi a ni a. Chuti taka a len rei nachhan pawh — Nulate pawhin a thu sawi apiang chu fiamthu-ah an ngaiin tumah reng reng hian an chawtak khukupi loh avang a ni ber awm e. Zan tin leng haw hnu hian mutna an rem tê tê a, a titi ta thin a. ‘An tia lawm’ ti ringawt hian eng eng emaw hi a sawi a, rei deuh deuh hi an men phah a, an nui ham ham zankhua mai thin a ni.

Zan khat chu fiamthu a thawh leh a. “An tia lawm, pa pakhat hi a thikthu a chhe em em khwp mai a. An nupa chuan fa pawh nei lova nupa rek a awm hi an ni a. A pasal thikthu chhe lutuk chuan a nupui chu mi dang lakah a lo sihhnipin a pasal awm loh a thlahlel viau em, tih fiah a tum ta a. ‘Aizawl kal tur angin ka tihder ang a. Zana^h

ka zen ang a, ka hlawhtlin vaih chuan mi dang lakah a rinawm lo hle tihna a ni ang,' tiin Aizawl kal tur ang chuan a inbuatsaih ta a. A nupui hming chu 'Lalsiami' a ni a. Tichuan le, Aizawl kal tur ang than a inbuatsaihin, zan (riak) pawnthuah leh riah chaw (fai) nen, arâwtah arhluisen a khung a, Aizawl kal tum ang chiahin vaizin-bâwm a phur chhuak a, tukthuan ei kham khual chhuah hun pangngai a liam ta a. A nupui pawh chuan Aizawl kal tur ngeiah a ruat a. Mahse kal ikhaw si lovin daitâmah a nileng ta mai mai a.

Zanah chuan a nupui amah chauh a mu chu zen turin zanlai arkhuanah inzen dan pangngai tê a in-ring sa ranin a inah chuan a lut ta them them a. Mahse chuti mai chuan a nupui chu a lo diau ta ikhaw si lo. 'Tu nge i nih a, ka pasal awm loh pawh chu i va han hre ve! Eng lai a ka mitmei nge i hmuh a 'ka zen e' te chu i han tih vei ni. Ka man ngei ngei ang che,' tib leh thawh pahin rapchung a thing hak lai chu a chuh lawka a um ta. A pasal lah chu baklêngin a tlan chhuak. A tlan chhuan pahin leika thilpum a raptliak, a tlahlawlh. A nupuiin a nangching tawh si, a pasal tih hre lovin vuak a tum. Chutah le, a pasal lawm si vuak hlau baw si chuan kut khum dai dai chung hian, 'Siami, i titha e,' a tikhur hlak hlak mai e, an tia lawm,' a tia. Tlangvalho chu an nui khiah khiah hlawm a.

Chutah an zinga pakhat chuan, "Thusawithiama kha," a han tizauih a. Ani bawh chuan, "An tia

lawm, pa pakhat hian Biak-inah thu a sawi ve a. A sawi tur thupui chu 'Phenawm chung a that chhuah thu' a ni a. A han sawi tak tak 'ta mai a: 'Tu-emaw, Jerusalem atangin Jerisako khuaah a kal rawk vei a. Suamhmangete a tawk 'ta hlauh a, an vaw hrep a, kawng thlangah an paih thla a. A then hnimhlingnei zingah a tla a, a then pialtlep lei panah a tla a. Pialtlep lei pan a tla chuan, 'ka tui a hal e,' a ti mai. A, unaute u, chu chang chuan 'ka tui a hal e' a ti lo, thlalara mi aurawl pawh khan a tivawl vawl a. A nakin deuh hnu-ah pawh a ti leh vawng vawng a. Chu veleh Baibul chuan, 'aw' a ti mai. Chanchin tha Marka ziahah chuan 'tin' tih hi ropui takin a chuang a. A ni, chumi avang chuan tirkoh Pawla sawi ang khan awm ka tum ta a. Ka tumna Lalpan mal a sawm a, Halleluia Rom bung nga chhang thum ka nih hi. Chuti ang bawh chuan ka unaute u, Isua hnenah inpe ula, amah nen cheng za (100) in lo ni dawn zuk nia. Hla-in, 'ka inpe ang, ka inpe ang, nangmah nen cheng za turin' a tih hi in hre ngai em? Isua chu cheng sawmkua-lehpakua (99) sim leh chuan tur nei lo a ni a. Kei-ni hi cheng khat (Re.1/-) kan ni deuh ber bawh a. Isua hnenah kan inpek chuan amah nen 'cheng za' kan ni dawn a nih chu.

"Tichuan, buaina te nen kan chhuahsan bawh ang. Unaute u, hla-in 'buaina te nen ka chhuahsan ang' a tih awmzia hi in hria em? Buaina te a awm a, buaina lian a awm bawh thin. Buaina te chu

dan naranin kawnglai huh dup a zun te, kawmthlang te an'am zutna inpaih khum fo te, thenawmte nek zawng a huanpal pin chin te hi buain tê chu a ni. Isua hnen a kan inpek chuan, chung buaina tê zawng zawng chu kan chhuahsan tawh ang. Aw le, kan thu hnuhnung ber hi a pawimawh ber chu a ni, ngun lehzualin lo ngaithla rawh u. Kan thu sawi tâk zawng zawng kha Lalpan malsawm rawh se,' a a ti e, an tia lawm," a han ti chu an nui khiah khiah mai a. Tlangval pakhat pheii chuan a lo lak fch bik a, "Ka laihruì," ti khawpin a let tawp tawp mai a.

Chumi hnu chuan pakhat hian, "Uisa tuizia kha," a rawn ti leh zauh a. Mahse thenkhatin, "I mu tawh zawk ang u," an tih tâk avang chuan mut zai an rel ta a. Chuti ringawt zan tin mai chuan fiamthu dang lo, a chang leh thawnthu an ti, an phûl hlut thin a. Chuti ang fiamthu hawklak sawina kar a khawsak ve pawh chu Liankhuma chuan a zo lo lek lek thin a. Mahse tlangval a la nih ve miao avangin a inthiarfihlim mai thei rih bik bawksi lo.

16. KOHHRANAH



LIANKHUMAN Pathiana lawmna a neih hnu chuan ni khat chu Thankimi nen an inkawm a. Liankhuma chuan, "Kimi, hman a i puan tah lai a ka lo len tum a, 'hei, i chhiar atan tiin Pathian lehkhabu châng ka lo chbinchhiah kiau a sin,' i tih kha i la hria em?" tiin a zawt a. Thankimi chuan, "Engtik lai ka puan tah tumin maw? Ka va han hre tawh lo ê," a ti a. Liankhuma chuan, "Kha maw le, mei kawng ka sial hawn a ka lo len khan," a ti a. Thankimi chuan, "E, e, e, hre leh lutuk ang chu, si a. Khawngaihin khata lehkhabu kha han la teh, ka han zawng leh teh ngat ang, tunah zawng i chhiar duh tawh awm si a," a ti a.

A han keu leh nap nap a, "Heti lai hi a lawm, bung sawm châng sarihna kha," a ti a, keu sa-in a a pe a. Liankhuma chuan a han bih vang vang a, "Tak tak maw, heti lai lo deuh hi a ni lo maw? A nih si chuan a va han mak," a ti vâng vâng a, ringhlel deuh chungin a han zawt a. Thankimi chuan, "Ni e, khati lai chiah kha a lawm, ka la hre Chiang khawp mai. Vawi khat pawh naupang inkhawmpui a tantu ka nih tumin ka chhiar tawh nghe nghe," a ti a. Liankhuma chuan, "Heti lai tak hi a lawm ka thil hriat hmasakber chu. Kan vengte sipai tang tur thlah zan a inkawm ban a ka hriih thawi che, mahse ka hriih leh duh tak tak si loh che kha, i la hria em?" a ti a. Thankimi chuan, "Hria e," a ti a.

Liankhuma chuan, "Tunah zawng thil engkim a in-her danglam zo ta a, ka han hrilh vek tawh ang che. Kha thlahna inkhawm kan neih kha kan veng lo hal zan a nih kha, i la hria emaw ka hre lo. Kha kan khaw lo hal ni khan a lawm mi danglam tak ka hmuhin min hrilh, mak ka tih em em chu," tiin a thil tawn leh hriat zawng zawng chu Thankimi a hrilh fai ta vek a.

Chung a thil hmuh leh a hriat bakah pawh : Mi luhlul leh sakhaw lam reng reng a ngaih sak ngai lohzia te, amah Thankimi a hmangaih dan leh Thankimi thu sawi a hriat thiam phak lohzia te nen lam chuan engmah zep nei lovin a hrilh ta vek a. Liankhuma chuan, "Pathianin nangmah hmangin min ko a, mahse soal remchan nan hman ka tum a. Mahse nang chu Pathianin a ven tlat che avangin ka khawih ngam loh turin i nunna chu ka tan zahawm takin a thuam a. Chumi hnu-ah ka sualna thunun turin natna-a min thunun bakah chu natna chu ka tan kohna ni nghal fawmin min zawng leh a. Mahse chuti chung pawh a ka la hriat theih chuan si loh avangin, ani chuan min rawn hnaihehlih sauh sauh a, ka hmaihmaah ngei ka tana a tuarna chu a rawn hlim lang ta a. A chu a pawh chu kei chuan tlan-san tumin hmeithai zu-tuitling a len botir ka la tum ta zel a. Chumi hnu-ah zawng a ngaihna awm ngangin min hre lo a ni ang chu, hmun leh hmunah tlan-san ngam rual lohin min kar let ta tawp mai zawng a nih hi. Ka thilung hi a chhun tlang a, a

seng ruak leh vek a. Chutah thlamuanna a rawn chhungkhat ta bawk a. Ka hming hnaisailo hian thiam a chan theih nan pa hmaah min din sak tawh tih chu ka hre chiang ta chauh a ni," tiin a chan-chin chu hlim takin a sawi a.

Thankimi chuan, "I hetih hun hi nghakin ka taksa chu Pathian tan leh i tan ka vawng thianghlim hram hram a. I tan mittui tla chung leh mangang râwl tawp chhuahin ka tawngtai thin a. A tawp a tawpah zawng a hun takah Pathianin min rawn chhang ta a nih hi," a ti a. Liankhuma chuan, "A ni khawp mai, amah chauh lo chu min tilawmtu an awm loh avangin Kimi, nang pawhin min lo tawngtaipui reng ang che aw. Kei zawng ka sualin ka luhlul em a. Tunah pawh hian a hmingin ti tē hian lawm ve lêp lêp mahila, eng emaw hlekah ka chau leh bel mai ang tih pawh ka hlauthawng hlel lo a sin. Hun rei daih loh mawlh hi ka inhlauthawng a. Chuvangin min lo dilpui sauh sauh ang che," tiin a ngen a.

Ani chuan, "I tan ka tlanche ngai lo ang. Tirhkoh sawi angin, 'Kristaa siam puitlin a i awm hmaloh chuan nau veiin ka vei reng ang che. Tin, i sawl fo thin nupui pasal chungchangah erawh chuan, ka ngaihdanin hun la rawn inher mai tur awmin ka hria. Kan thirlung chu pumkhat ni tawh mah se, kan taksa lam pumkhat ni tur a remkhawm kan la nih ve rib hma si hi chuan, kan mihrinna hian lo

hmanhmawh lo phawt mai ila. A hun takah Pathian bawkin a la rel maiin ka ring e. Hetia nang i lo awm tâkah hi chuan Kohhran pawhin dan chhungah an lawm luh thuai che ka ring a. Isuan, 'felna zawng zawng ka tan hlenchhuah a mawi a ni,' a tih ang deuh khan, dan chhungah i'n lut ve phawt ang a. Chumi hnu-ah zawng mihring leh Pathian mit hmuh-ah nupa kan la ni dawn nia.

"Hman a nun thim a i awm lai a i duhna leh beiseina zawng zawng pawh kha Krista chuan a hmangaihna khawvar engah kan chungah a rawn tipuitling dawn hnai tawh si a. Hlim taka a rawng bawl dun tur a min buatsaihna chu a rawn thlen famkimtir dawn tih ka hriatin ka hlim em em a sin. Pathian hnenah lawmthu sawi kan va han ba tam em! Kan damchhung nite chu Lalpa rawngbawl nan kan hman tlunchhuah dun theih nan khui lovin i tawngtai thin ang aw," tiin lawm avang a mittui far zawih zawih chungin Thankimi chuan Liankhuma chu a en a. Liankhuma pawh chuan a tuar zo ta ngang lova, Thankimi biang leh a biang insik tirin a hma lam atang chuan a pawm ta ngawih ngawih a Thankimi chuan, "Kan inhmangaihna hi Pathianin malsawm zel rawh se," a ti a. Liankhuma chuan, "Ka lawm e, kan thatna turin Pathianin kan chungah a hmangaihna a lantir a, a lantir zel ang tih pawh ka beisei," a ti a.

Khua a lo favang leh ta a. Khawvel indona chuan a chin san sawt em avangin thuthang then-

khatah phei chuan, 'Kumpinu sawrkarin Mizo tlang-val zawng zawng sipaiah a la lui dawn,' tih te a lo thang zel a. A rana rana lo mah ni se, Liankhuma chuan 'tak dah' dawnin mihring chin hriat loh, a hun hma deuh mah ni se, Kohhran dan chhunga luh a dil ta chawih a. An Kohhran chuan an han ngaih-tuabin awm an tihpui ve avangin, an bialtu Pastor inkhawmpui kal tur lo thlen remchan lai chu den-chenin baptisma a chang ve ta a. Khuangchawi thla vanglai tak a ni a, Kohhrana Liankhuma an lawm luh dawn zan chuan khua a nuamin thla a eng em em mai' a. Thankimi pawh thatho takin a inkhawm ve a. Liankhuma chuan Kohhran mi leh sa nih a duh nachhan a sawi hnu chuan a chanchin tawitê sawi a dil a. Thankimi chuan ngun takin a lo ngaithla a, a sawi lai la la te chuan a hmel te chu tha sawt sawt hian a hria a. Mihlimho hlei hlei chuan ngaihnawm an tiin, an thinlung ziat lai deuh a sawi lai te chuan an lo 'Haleluia' thawt thawt hlawm nen, chumi zan chuan inkhawm an blung hle mai.

17. KHAWMU CHAWI



HAPCHAR lain Kapthuaman Rozami rim turin palai a tir kha a ni a. Mahse a rem tak si loh avangin khawtualah a awm ta mai mai a, chumi kum chuan eng riva dang mah a nei lo. Vahsan lak a lo hun a, tum lawk pawh awm lovin Rozami u Hnuna chu a indan tâk thut si avangin Rozami chuan a u indan thu leh an chhungkaw khaipa ber a nih si avang a tum ang a thil a kal theih loh a hlaubthawn thu chu tawitêin Kapthuama chu lehkha-in a hrilh a. A lehkha-ah chuan :- *“Kan monu leh ka pa an inhrawn thiam theih meuh loh avangin tum lawk pawh awm lovin k’u Hnuna a indang thut a. Mualpho zau hmaa an indan mai tha zawkin kan ring si a. Ka u a indan leh takah si chuan kumin chu ka naute hlo ka han thlawhpui leh lo thei dawnin a lang lo a. Kumin favang lam erawh khi chuan ro kan rel tawh dawn nia. Khawngaih takin min lo ngaithiam hram hram ang che, kan chhungkaw mi an loh vang a ni e. Favangah zawng i tih ang kawng kawng chu kan zawh tawh dawn nia,”* tiin thu dang tampui pawh sawi lovin an chhungkaw harsatna avang a rokhawlh-na a awm tâk dan leh a inhuam dan chawh chu a hrilh thuai a.

Chutia pumpelh theih loh bumrotu thil dangin a tlakbuak leh tak si avang chuan, chumi kum thâl chho pawh chuan engmah riva nei lovin an awm leh ta a. Chutih lai chuan indona a hluarin râl a zual

sawt hle a. Mizo tlangval tam tak pawh indona lamah an liamin khaw thenkhat phe chu khawlai reh rawih khawpin tlangval pâwnthuah-khai chu sipaiah an liam fai tih theih a ni. Kapthuama erawh chu a pa'n kal ve a phal loh avangin mahni khawzawl-ah a la awm a. Vailem chang tlangval thenkhat liam hmasa chu mahni khaw lamah chawlh la-in an lo chuang chhuak leh tawh hlawm a. Tun hma te a eng a ngaih vak hleih loh tlangval thenkhatte chu intivei takin tual an leng a. Nula lahin an lo pâkin an duh duh an thing titih ta mai a. Sawrkar zarzo leh thlakip hlawh la ngang an nih avângin incheina leh khawlai lenna tangka an lo nei deuh nge nge si nen. Tualchhung a mi khawsa thei pangngai fapate ai aiin nula lakah an tlatlum ta zawk mah mah a. Sipaiiah tang ta lo se an neih phak uk loh tur nula tha tha chu an thing ta nawlh nawlh hlawm a. Chung avang chuan Kapthuama pawh chuan Rozami chu a ngaihtuah rilru deuh thin a.

Ani Rozami pa lah chu kamding leh tlem a sawrkar zar zo phak deuh chin tawh fate tan a duh zel mai mi a lo ni chhap nen. Chungte nena a han dawnkhawl chang chuan Rozami pawh chu lung her ve mai tur ang te hian a suangtuah thin a. A chang leh, "Min hmangaih ve em kha maw, chung thil mai mai chuan a kuai her zo em lo ang e." te a han ti leh ang lawi rilru bawk a. Chuti ang a ingaihtuah buai tak chung chuan khawhar takin mahni tual-

chhungah hna a thawk sauh sauh a. Chumi kum pawh chuan Kapṭhuama te lo chu tḥlawh a nuam leh em em mai a. Buh a ṭha si, a nauten ram an ṭan ve tawh hlawm avangin an kut a rualin tḥlawh-hma an la zau si. An lo pum mai chuan chhe lai pawh awm lovin buh kung leh buh kung hlirin a khat hmuk mai a.

Kawl a ni chhuak chhiarin an feh chhuak ve tuk tin na a, tḥlawh tur awm mumal hek lo. Tḥlawh-lai tuai-vakâwl leh chhehhnawk an lawr zeuh zeuh a, chhehrâwp luiah an cheng nileng mai ṭhin a. Chutia anni an awl em em lai chuan lehlamah Thanṭhuami te chu ṭul a sa lohin an lo ṭul ve thung a. An tḥlawhhma hlat kum a nih avang a an buh tuh ramriahin a nghawng a. Hlo tḥlawh ṭul lai takkin a thawk thei ṭha zawng sikserhin an tlu fai vek mai a. A dam hmasa Thanṭhuami lah chuan a pheikhawngah ngangte hling a han vei zui leh si nen. An lam hla neih kum leh an chhiat chhuəh kum a in-nang a, ṭul a phung pawhin an lo ṭul lo thung a.

Chutia an ṭul em em lai chuan tlangkam aṭang-in Kapṭhuama te awllen thu an lo ral hriat a. An mangang chuan hlo tḥlawhpui turin Kapṭhuama chu an chah ṭa chāwr mai a. Kapṭhuama lah chuan Thanṭhuami te puih chu a lo chak sakhai bawḥ si nen. Tichuan, Thanṭhuami te pui tur chuan pheikhai zang takin Inrinni zing chuan a kal ta nal nal a, Chumi zan a Roza ni inkhawm tur chuan Than-

þhuami chu arawn sawm a. A rin loh tak a Kapþhuama a han hmu phut mai lawm lutuk chuan a awmdan a theih nghilh a, a za deuh chûk satlah ringawt a. Titi phungleng eng eng emaw an sawi hnu chuan, inkhawm loh mai pawh duh zawk rilru tak chungin inkhawm turin Thanþhuami nen an chhuak dun ta a.

A tuk Chawlhni chuan Kapþhuama leh Rozam. chuan inkawmna bulfuk tak nei lem lo mah se, an rilru chu engmabin a la kuai her lo tih chiang tak-in an inhre thei a. Chawhnu inkhawm ban pheichuan Rozami chuan YLA thilah pawimawhna a neih avangin Kapþhuama nen pawh inkawm hman lovin a pelhesan a. Mahse rilru ngaihngam tak chung a thenrual dang inpawlsan an nih avang leh Kapþhuama pawh cham khawmuang ve rih tur a nih avangin a tu ve ve pawhin an inkawm lo chu an la runthlak lem lo. A tuk Thawhtanni zing chuan Kapþhuama chuan riah luh a rawt ta tlat mai a. Thanþhuami pa chuan, "Riak lo e, nat a hlauhawm em mai, a phai si a i nat ve hlauh zawngin a pawidawn em mai. Ti hian lângin feh beuh beuh ula, a ni tam zawk mai ula hna a zai tho a nia. Tlang-val tan pheichuan feh kawng leh zan lam a nula rim fahran pawh a thlakhlehawm a lawm," a tih pawhin Kapþhuama berin riah a rawt lui ta tlat si a. "Ka puih theih che u chhung reilote na na na chu lan zawng hna a kal lo em mai. Pathian zarah

eng em kan ti lawng e. 'Vaimim a par tawh hi chuan ram a thiag tawh a, nat a hlauhawm tawh loh' an tih ngai kha maw. Kar hnih bak chu ka pui thei bik kher lo mai thei che u a. Chumi chhung chauh zawng luletin kan tang ve ang chu. Kawlvalenchbam atang a mangang a mirawn chah ta sa sa," a tih tlat avangin riak tur chuan an thawk ta a.


Thanthuami pawh thei leh thei lovin lunglam-tu leh bai fabran pawh lo chhuan sak ve turin a bai liam ve ta a. Kapthuama riak lut tur leh Rozami feh tur chu kawngtluanin an kal dun a. Thlawhhma lan theihna hmasaber atang chuan an lo leh an riahna tur te, Lalpianmawii te lo te chu a kawhbmuh dan dan a. Thanthuami te lo leh Rozami te lo lah chu a inhlathle mai lehngal a. Inthlahlel tak chung a an inpensan dawn chuan Rozami chuan, "Inrinriah chauh inrawn haw chhuak dawn si a, kar a rei duh dawn hle zawag a nih hi," a ti a. Pêngah chuan an ding dun vang vang a. Inthlakhlelhin tawp-intai a a neih chuan loh avangin inen zui vawng vawng chungin an inpensan dawn ta a. Kapthuama chuan, "Inrinri chuan di-hnab suih a he lungpui chung a inchhawlthuaiah aw," a ti a. Rozami chuan remti tihhriat hmel tak a tawng chuang lo hian a melh ngui ngahih a. Inthlahlelte pahnih chu rilru thlamuang hlim si lovin an in-mangtha chuai raih a, an inpensan ta a.

Kapthuama riah lai chuan 'Rozami chuan Thanthuami te lo lam chu a thlir a thlir thin a. An bung

lai an lan theih loh pawhin an riahna thlâm kawngka inhawng thim nal nal tál chu khawhar takin a thlir a thlir a. A feh kal lam lahín a thlir hmasaber a, a lo sul haw lahín a lan theihna hnühnung ber aṭang chuan a rilru-a ‘mangṭha’ mawlh mawlh chung hian thlâm kawngka inhawng thim nal nal chu a thlir liam vawng vawng ṭhio a ni. Chutih lai chuan Rozami pa u fanu Remchhingi chu an unau a tumber a nih bakab an unau hmeichhe piang chhun a ni a. A nula ve ur ur tawh a. Unau sal rual tak kar a hmeichhe pakhat tumbu vuih ve ngawk ngang a nih avangin a nuṭate-ho cuuan an duat tlang hle mai a. A ute leh an chhungkhat linate koh duatna a zarah mi tinin ‘Chhingpui, Chhingpui’ ti-a koh ṭheuh a ni a. Ṭnenkhat phei chuan ‘Remchhingi’ a nih pawh an hre lo hial a. A nutate-ho chuan tum nupui an la nei lo a, an upa-ber erawh chuan chutih lai chuan neih a tum rilru chauh a ni.

Chhingpuii chu unau hung tak kar a hmeichhe mal pian ngang a nih avangin, tuisik khai leh sekrek khawih ilo-ah te, la deh leh in lam pawipang khawihah te a ṭul thei hle mai a. Tet tē aṭanga a thawh ṭhan a nih avangin a naupan ngaihtuahin fel pawh a fel hle a. A nu lah chu mi kawchhung nat nei, ramtuileilo a bawksawp a nih avangin a nu ai engkim thawh a ṭul a. Chuvang chuan, thlawh-hma kawng pawh zawh thei lovin in lam hna sekrek ngawt pawh chu a thawh tham a tling a. Chumkum chuan Chhingpuii chuan a ute riah chaw fai reng

KHAWMU CHAWI



a tul ahnuhmanah a nu enkaw a ngai baw si a,
 tul thei ang reng hle a. A pa chuan enkaw baw
 thin mah se, azawng a zaa thut chilh rawt hman a
 nih si loh avangin in lamah chuan an pafa-in an lo
 tul ve em em thin.

Inrinni vawi khat chu, a ute ramriak haw chhuak
 tur khai chhuah pah leh anhnah leh therhlo dangte
 lak pahin Chhingpuii chu a feh ve a. A ute chuan
 a bun ve chu phut hauh lo mah se, amah zawk chuan,
 "Ka thiante zawng zawng pawh tumah ramtang lo
 an awm tawh lo, hlo thlawh ka thiam lo bik ang,
 ka zir ve dawn," a ti a. A ute karah chuan chaw-
 hma chanve emaw chu a han bung ve lauh lauh a.
 A bula tang a u chuan, "Mami, hei hlo thlawh i
 thiam khawp hi maw le, lawm neiin ramtang ve tawh
 la chuan min zangkhai tawh dawn ngawt hi," a ti
 a. Ani Chhingpuii chuan, 'Ka chak khawp a sin,
 ka feh ve thin tawh tak tak ang aw. In awm ka
 ning tawh em mai," a ti a. A u pakhat chuan,
 "Chutia lawm i neih dawn chuan i lawm tur chu ka
 hria, a hming bul pawh 'R' a nia(h). Chawlhni
 hmasa pawh khan Mualveng lamah," a lo ti a.
 Chhingpuii chuan, "Ka u pui hi i daw roh, a ni te
 chu a ni teuh lo, ka ngei ngei nen," a ti tan tan a.
 A u vek chuan, "Ani a nih lobin tu nge? Ani lo
 sawi tur a awm em ni?" a han tifiang leh a. Chu-
 tia fiamthu nen a an hawk an hawk lai chuan Chhing-
 puii chuan, "Ka u, Aizawl kal ve ka tum a sin,
 ka pa pawh ka dil a, a phal," a ti a. An upa ber

chuan, "Engtikah maw?" a lo ti var a. Ani chuan, "Eh, tun Thawhtan maiah hian, nang pawhin i tum a ni lawm ni?" tiin a zawt nghal a."

A u pakhat leh chuan, "Mami, chutia Aizawl i kal daihin i thawh ai tu nge lo thawk ang?" a ti a. Chhingpuji chuan, "E, tumah, thawh tur a awm hlei nem. Buh ei lak a tul si lo, buhai ni se fairel ka khah bakah ip lian khatin ka dah baw si, thingtuah lak a tul baw si lo. Tui lah chu ka pan a chawi thei tho si a, ka thiante nen kal kan lo tum urh hle a sin," a ti a. "I thiante chu an chhungte kal ve tur an awm em ni?" a u chuan a han ti leh a. Chhingpuji chuan, "Awm awm teh a, tun Nilai-ni khan Mawii u sipai kha a lo haw a, a bungrua la tur a kal an tum a lawm. Aizawl pawh vawi te khatmah ka la kal ve si lo, motor hmuu ve ka chak. Tin, chu lo-ah naupang inkhawmpui hun a hak tur kawr inang theuh kan thian zaho-in lei kan tum a, ka kal ve em em ang. Nangni pawhin in phal ti raw," a han tizui a.

A u chuan, "Chutia nang ber Aizawl i kal daih te chuan 'R' tih lam khua a bar lutuk ang a sin le," a lo tifi am a. Chhingpuji chuan, "Min dem min dem teivet suh, a hmel' chhiat chhiat nen. Nang pawh Thanthuami ban i hmer ka hmu," a han tivin tak a, an nui ta dar dar a. Chumi Chawlnhi tlai zanriah ei kham chuan Chhingpuji chu a Aizawl kalput tur a thiannu te idah chuan a kal a, a u pakhat

Aizawl kal tum ve tho chu a lo awm a. A thiannu chuan, "Naktuk chu hma deuh hlekah aw kan kal ang. Ka rawn sawm pheì hma loh che leh min loh ngah reng dawn nia. Kan kal hma deuh loh chuan tunlai chu tlai ruahsur a ching si a," a ti a. Chhingpuii chuan, "Ni e, kei pheì chu ka insiam zô a ni deuh tawh mai. Naktukah ka ar ken tur kan man ang a, ka inpeih a ní mai," a ti a. An pahniñ chuan phur tak hian, "Awi naktuk thleng thuai thuai se ti rawh, khawi nge kan ban ang?" an ti sauh sauh a.

Chutia an Aizawl kal châk helhhawlh an phul hlut lai chuan Chhingpuii u chuan, "Mami, buhfai kha i lo phur duham viau ang e. Kei pawh naktipah ka lo kal ve dawn tho a, Aizawl-a ka rawn nan hman leh dawn tho che avangin, pawisa i indaih loh deuh pawhin ka pe mai ang che. Lam hla kal thang lo in ni a, ke ruh na duh deuh a sin, zang tê-in phur ang che. Kawng lakah tui a hal e tih vang-in an in teuh teuh ngai lo, chauh na duh bik deuh a nia," tiin a naute Aizawl kal tur chu a lo hrih a. Chhingpuii te in chu Aizawl kawng kawtchhualh tawntirh ber kawngpui chhak chiah a ni a. Kawngpui thlang lamah chuan in dang a awm lo a, favai paihna hmun a ni a. A tuk zingah chuan Chhingpuii ute chu mi ina riak an nih blawm vek avang leh riah luh leh an tum loh avangin an hman-hmawh loh pheng chu tumah an la rawn hawng hman loh a.

Chhingpuii chu a pa chuan, "Mami, hei buh thun khat chauh tak tak laklawh deuh mai a awm a, i kal hma-in han chhu chip lawk ta che. A thlei lam te chu i u Rozami te pawh kan lo thleitir mai ang a, nang nula-ah han chih lawk teh," a ti a. Chhingpuii chuan thatho lo zet hian a chawi chhuak taih taih a. Thlak hnih khat emaw lek a chhu kauh kauh hman, a thiante Aizawl kal tur helhhawlh chhuak hma chuan, "Chhingpui, hawh, i kal tawh ang," tiin an rawn au ta mai a. Chhingpuii chuan, "Ka pa, ka dah mai dawn, chu ka thiante pawhin min au tawh si," a ti a. A pa chuan, "Mami, han chih lawk rawh, a tlem em kha," a ti a. Chhingpuii chuan a han chhu leh kauh kauh a, an thiannu hnunngber chuan a rawn au leh ta a. Chhingpuii chuan, "Ka pa, ka dah mai dawn, ka thian turte pawh an liam zo tawh, chaw pawh ka la ei ve si lo," a han ti leh chu, a pa tbin-butut nei ta chuan, "Han chih law law rawh ka tia ni lawm ni, tuna tak a pa te thu 'ka hnial e' i han tih chu(h). Aizawl chu i va han kal rua lo em" tih leh Chhingpuii ema a ar ken tur a awt a mi chu a chhuah ta daih a. Sumhmuna ar lo tlan chhuak chu Chhingpuii chuan, "Â, ka ar a chhuak," tih leh man a lo rual a. Mahse a pa chuan, "Lo man khanglang sub, ka chhuah a nih kua, Aizawl zawng i kal dawn chai lo e aw," tiin sumhmuna a chhuak a, Chhingpuii chu thingkhawn lama a nam chho dawrh a. Chhingpuii chu a tap ta fa, tap a.

Chutia a ɬap ta chu a pa chuan, "E, e, ê..., ka ɬap i tia lo? Aizawl te zawng kal tum chai suh. Iuna taka 'de, dê, dê,' i han tih chu," ti a ben pah-in, "Hei, vaimim kâwr hi kawmthlangah zu paih rawb," tiin vaimim kâwr dahna dawrawn chhia chu a hmehbel nawk nawk a, a luhsan ta a. A pa chuan tukverh aɬangin a zuk thlir a. Favai paihna hmunah chuan a sir a em ruak tluka a ɬap fap fap lai chu a zuk hmu a. A pa zuk thlir hnu lawk chuan Chhingpuui chu Khawmu-in a rawn chawi ta a ni. Chhingpuui thlaphang chuan a râwl tawp hian, "Ka nû, ka nu, ka nu...", a ti vawn vawn a, ngaw ril lamah a au lut ta vau vau a, a tawpah chuan a reb ta hmak a. Mahse chu a thawm chu a pa chuan a hre miah lo.

Chumi hnu lawk chuan Chhingpuui u, a tuk a Aizawl kal ve tum kha a lo haw a. "Mami chu i phurh rihtir viau ang ka ti. Lam hla kal ɬhang lo a ni a, kei pawh naktukah kal ka tum tho a, a phurh rih viau chuan a chau hle tur a nia," a rawn ti lut a. A pa chuan, "A kal leh hlei nem," a ti a. A ni chuan, "Eh, eng a ti nge? A châk teh lul nen, a peih leh ta lo deuh em ni?" a ti a. A pa chuan, "Buh hak ɬan sa thun khat pawh tling lo a awm a, ka den tir a, 'ka dah mai dawn' a ti a ti fahran a, ka thinrimin ka kaltir phal leh ta lo a nih kha," a tih muk a. Ani chuan, "Leh mai mai ɬhin, an châk teh reng nen. Nizan pawh ka lenna-ah a lo kal a, an helhhawlhin ɬhianta nen a kal tum ngang an ni

a, tun aia remchang pawh hi a awm leh tawh zen zen lo ang a. A thuhrimah buh ni se a deng khawl rei rui a, a tirh a intirh ngeih loh a nih chu, a kal ngei ngei tur a ni. Khaw nge a awm? Vawiinah kal lo pawh ni se, naktukah ka rualin a kal tho tho. Ka pa hi chu i sual thin em mai, tunah khawnge a awm reng reng?" a han ti leh a.

A pa chuan, "Vaimim kâwr paihah ka tir a, nichin kha chuan kawmthlang favai paihnaah khuan a tah fap fap kha," a ti a. Ani chuan, "Tah pawh a tap reng ang chu, nula an ni ve tawh a, inbauh hi chin tawh i hre lo lulai em mai, keiman ka'n ko teh ang," tiin kawmthlang lamah chuan a chhuk thla ve ta a. Favai paihnaah chuan a em chauh chu a lo tlu ngât a, a u chuan, "Mami, Mami," a han ti dap dap a, mahse a reh vang vang mai a. Chutih lai chuan nu pakhat hi a lo kal a, "Ngawi teh, tun lawk tak tak khan hmeichhe mangang rawl tak hian, 'ka nu, ka nu, ka nu,' ti vau vau chung a ngaw ril lam a liam thla ta vawn vawn hian ka hria a. Mahse ka bengchhe ri-ah ka ruat avangin barah ka khawn hlei lo a. Chhingpuii a ni ta phawt ang aw," arawn ti ta mai a. Chhingpuii u thinrim chuan beidawng râwl tak hian, "U hu! tu dang a nih loh tawp chu, a va pawl...", ti vang vang chung-in vin fe hian a pa a au a. "Mami a bo ta, kei chu a zawng turin ka kal nghal a ni mai," a ti a. Insiam leh hranpa tawh chuang lovin, "Mami," ti a au chung zelin ngaw chhungah chuan a lut ta nghal a.

Chhingpuii bo tuk Thawhtanni chu Kapthuaman Thanthuami te a puih kar hnihna tur a ni a. Chhingpuii bo thu chuan khua a khah nghal avangin Kapthuama pawh chu zawng turin a chhuak ve ta nghal a. A kal dawn a tang reng chuan Kapthuama chuan hmutu nih ngei tumin, a hmuh hma zawng a beidawng lova zawn tumin vaihlo pawh a pai am lawk a. Chhingpuii chu Rozami pa u fa ngei a nih avang leh, a hma laia a palai an lo hnar tawhna chu hrengin, ani mi ahluan a tlangval tlawmngaih tina mi si chuan thangthat lak tum urh takin a chhuak a. Chhingpuii zawng tur chuan a khawnawtin nau-pang leikang deuh chin zawng zawng nen an thawk chhuak fai vek a. Mahse thei reh takin a reh vang vang mai a. A hnuhma hmuh tur awm si lo, a thawm hriat tur awm bawk si lo, a ni khat ni a tang reng chuan an beidawng rilru theuh a. Mahse a pachhuakin an pil ta vang vang hlawn a.

A bo ni pheii chuan tlangval tumah hawng an awm lo. A zawngtu tlangval ril tam hlau-in nula hovin chawfun leh tui-um nen ramhnuai lam an pan bawk a. A tuk Thawhlehi pawh chuan an zawng nileng zankhua leh zak a. Mahse eng riva mah hria an awm theih loh avangin inkoh chhuah vek a, zawn dan awmize nei deuh a chan insem a zawn an rel avangin an han inko chhuak leh rih a. Khaw thenawm lamah pawh thu an thanin an khaw thenawmte pawh chuan an dap theih ang angin an lo dap ve a, 'Mihring chin hriat a nih loh avangin tumah thian

nei lova kal fal loh tur' tiin tum bik lam neiin an insem leh ta sang sang a. An inkoh chhuah vek lai a kim lo an han indap chuan Kapthuama chauh a lo awm ve ta lo a, 'ka hmu' ti lah chu tumah an awm bawk si lo. Kapthuama a lo haw ve lo tih Rozamin a briatin a mangang em em mai a. Ni thum lai chaw pawh ei tawh lo a nih avangin rilama a thih hial tawh a ring a. A nau Chhingpuii a ngaihtuahna ai mahin Kapthuama a ngaihtuahna chu a nasa zawk a.

Tichuan le, a thawh hnihnaah pawh chuan an liam leh ta sang sang a. Zirtawpni a lo thleng ta hial a, Chhingpuii thiante Aizawl kal pawh an lo haw leh ta a. Anni chuan engmah la hre hman hek lo, an kawmthlang a an kal lai chuan, "Chhingpuii kan lo thleng, engah nge i kal ve leh si loh?" tiin anrawn au haw a, Chu a thiante thawm chu a briatin Chhingpuii pa chu tapkunah a mittui a lo tla zung zung a. Chhingpuii thiante pawh chuan chanchin an briat veleh an phur an ngath lawk a, hah pawh sawi lovin a zawng turin an liam ngath ve zel a. Tichuan, a kbawnawtin, a khual a tualin an phek zawn ta a ni. Mahse Zirtawpni pawh chuan thawm engmah an la hre chuang rih lo.

Chhingpuii bo tuk (Thawhtanni)-a Kapthuama thawk chhuak ve ta chuan a tum ang ngeiin Chhingpuii chu a hmu ta a. Amah Kapthuama sawi dan chuan :— "Khatia a bo tuk a ka zawng ve ta kha keimah chauhina ka kal zel a. Ram chin ka hre si

lo, zawnng ni fawm chungin ka pingpei kual mai mai a ni ber e. A ni thum ni Nilaini khan ral hla tak a hmeichhe mangang au vau vau râwl hi ka han ral hriat a. Tichuan, a lam pang ni a ka hriat chu ka pawng pan ta ngawt a. Kal-khan ka hriat si loh avangin ka en zawn a, ka kal tawp ringawt mai a. Ka ril lah chu a tam em em tawh mai si a, ka tawn ang ang changel-laimu te, theitit-bum leh raichhawk zik te' chu kal pahin ka han hmawm leh ang mawlh mawlh thin a. Ngawpui ngawta deuh mai hi ka va lut a, mahse khua-in min thim hnan leh ta bawk si a.

“Zanah chuan hnah hlai deuh ka hmuh theih ang ang ka inzar hlah tit tet a. thingbul nghengin ka thu tlaivar mai thin a. A tuk Ningani zingah chuan chu ngawpui atang chuan ka chhuak a, tulno hi ka thleng a, khawi ram nge pawh ka hre lo. Tulno chu ka han sakhi chulram fan thuak thuak a, mahse ka rin loh deuh avangin ngaw lam bawk chu ka hrul thla leh ta a. Fur chhe lai ngang a ni a, ngaw chhung lei lah chu a hminin a nâl em em mai lehngal a. Ka chau tawh bawk a, chuti lai ram zim têah chuan ka nileng ta a. Zirtawpni kha a lo thleng a, ka bei a dawng deuh tawh bawk a, hawn lam hnaih tha zawkin ka ring deuh a. Thiante thawm lah chu a ni hnih ni atang pheih kha chuen ka hre phak tawh lo reng reng bawk si a. Keia ngei pawh chu min ngaihtuah ka hlauh avangin zawnng pah ni siin in lam hnaih ka tum ta a.

“Chawbel hmin vel ka kal hman ang e, a hmun-hma thu-ah chuan fing tam phei zawng a ni lo ang, kawrtê kamah hian a kawrfual chu a lo tla huh niai a. Amah Chhingpuii chu la hre hauh mah suh ila, ani kawr lo chu tun chung ramrilah thlah azengin ka ring lo a, ka chhar a, ka kal leh ta a. Chawfak her zen zawn a ni tawh ang chu maw, dil ang reng, fur tui tam lai dil chauh hi ni tur a ni. Chuti lai chu ka thleng a, dil kam tui chim chin leh chin lo-ah chuan tleirawl hniak rual tak hi a lo tleu pherh vang a. Tuiah a tlak ringin ka inphelh sauh sauh a ka han liluh a, rin ai takin a lo thuk lehngal. Vaw eng emaw zah ka liluh hnu pawh a ka hmuh loh avangin a ke zungtang kawh lam chu panin ka kal leh ta ngawt a. Hnuhma dang hmuh tur awm baw si lo, ka kal ngaihna hre lo chu ka kal chingchivet ta mai mai a.

“Chutah ngawpul ka lut leh a, ruah tam em em a lo sur leh ta nghal, khua lah a tlai leh ta fu si nen. Thingbul belh tur zawn pahin ngawpui chhung lam chn ka pan a, ngaw chhung chu a thim rum rum tawh a. Ka ngaw chhung lut chuan thui pawh ka kal hman lo, thing tluluang lianpui mawih hiap huap hrul a Chhingpuii lo tlu bâm mai ka han hmu phut mai chu ka lawm teh a sin aw...! Ka hmuh tirh phei chuan a thi emaw tiin hlauthawng takip ka pawm thui a. Mahse a lo la thi em lo deuh a, a taksa chu vur vawh tak hian a vawt ngiak mai a. A kawr ka chhar kha ka'n haktir sawk sawk a.

pawm lum tumin ka pawm ta hle hle a. Khua lah chu a thim zui ta mai si nen, ruah lahin ban zai rel bawk bek suh. Tlem a ka pawm lum tak deuh hnu chuan thei leh thei lo hian, 'Aizawl kal ka va han châk e .,' a rawn tih reuh chu maw le, ka khaw-ngaih tak tak a ni.

"Khua a thim tâk mai si avang leh ruahin ban zai a rel duh bawk si loh avang chuan, mahni mai a kalpui ngaihna awm si hek lo, thingluang hnuai lei hil lai deuh chu ka chuh a, mei chhemna khua lah chu a kaw bawk si lo. Ka pawm a, khawvar nghakin ka thu ta ran mai a. Ngawpui chhung lah chu a thimzia chu aimit thlawn chu nep tê. Chuti ringawt a kan pahnih chauh a khawvar kan nghak dun tur chu a huphurhawmin a zamthlak ram ram hle mai. Mahse mut hun zen zawn awmah chuan kan thiante meichher hla tak a eng chu ngaw kar atang chuan ka hmu ta hlah a. An hriat hmaloh chuan ka au ka au ta ringawt mai a. A tawp a tawpah zawng min rawn chhawn ve ta a. Kan awm-na an rawn thlen hma ngawt pawh chu rei ka ti-hman hle mai," tiin Kapthuaman Chhingpuii a hmuh chhuah dan chu a sawi a ni.

In an thlenpui hnu chuan Chhingpuii chu an bual fai 'a, a taksa pum mai chuan kung-zungpuia sjh ang mai hian a pem chhuak vek mai a. A tuk Chawlhni chuan fel tak hian a rawn jawng chhuak ta reuh a, "Ka thiante ka va han ngai e," a rawn ti a. A thiante chu an ko thuai a, Chhingpuii chu an

dinhual ðaih a. Chhingpuii chuan chau tak chung a thei leh thei lo a sawi tihhriat reng hian, "Awi, nangni zawng Aizawl in kal bik a ka awt che u Kei zawng Aizawl hmu lovin ka thi dawn a nih hi I e, ka ðhian, naupang inkhawmpui hunah chuan e. in kawr lei, 'inang vek i lei ang u' kan tih kha nangni chuan in lei phawt ang a," a tih lai chuan a ðhian-te chuan, "En teh hei, kan rawn keng a sin," an ti a, an kawr lei chu an han hmuh sap sap a. Chhingpuii chuan, "Awi! a mawi lutuk, ka va han awt ve e. Inkhawmpui hunah chuan he in kawr lei ngei hi ha chungin kan huan a ka derhken phun leh ka kumtluang phun par khu ka thlanah in rawn dah dawn nia. Kei zawng, ka ðhian, Aizawl kal ka châk ve em mai," a han ti leh a. Chutih lai chuan Chhingpuii pa leh a ute-ho mittui chu a lo sur zung zung a. Chutah Chhingpuii chu a irhfiak ta ak ak a, a maimichhing a, a hmu chu a han phun leh sep na a, a ðawng chhuak zo ta lo a.

A ram chin hre lo ber leh mikhual ber chu a tlawmngai leh fakawm ber a nih avangin, Rozami pa meuh pawh chuan an chhungkaw zingah Kap-ðhnama chu a fak chhuak ve ta hial a. Mahse chuti chung pawh chuan a fanu tan chuan a la duh chuang lo. Chuti khawp a Rozami pa-in Kapðhuama a duh thei lo chu eng dang vang a duh lo a ni lo a. Tun hma an tlangval laiin Zopui nula hmelþha Kap-ðhuama nu ni ta chu Kapðhuama pa nen an lo rim dun pahnih tawh a. Mahse Rozami pa chuan a chan

tak loh avangin, chu chu hre rengin Kapthuama tan a fanu Rozami chu a phal thei ngang lo a ni ber. Chu chu tu-khaw khain an hai lo a, Rozami leh Kapthuama lahin an hai bik hek lo.

Chhingpuii zawng a kar khat tlawng a pelhe leh tâk avangin a kar thumna pawh chu Kapthuama chuan Thanthuami te pui a cham leh rih a tum avangin a chhungte chu a chanchin tawitê-a zakin a brillh a. Mahse a cham leh chhung pawh chuan Rozami nen inkawmna fumfe tak an nei thei chuang lo. Rozami lah chu an chhiat tawh avang chuan ni hnih ni thum lai a awm zawn leh ta si a. Ani Kapthuama lah chu a riak leh dei h bawk si nen. Riak meuh a ni tin ni tla vanvuaia a han puih leh hni chuan, Thanthuami te tul zualpui chu Kapthuama chuan a sut thawlpui ta viau a. Thawitenni lam a haw(n) a tum dawn tâk avangin Kapthuama leh Rozami chuan inkawm fal theih hram an duh a. Chu Chawlhni zan chu inkawm lovin, hman a an inkawmna pangngai, Thanthuami te kawmchât leika-puih bawk, Chawlhni zan chiahah bawk leh **Thla Hleijuga Zan**-ah chiah bawk chuan an inkawm leh ta a. Mahse August thla a nih avangin hman ang chuan thla chu a eng ve lo a, fur lai vaa râng chhum-in a hlih dul ruai a. A hlipta van râng chhum chu a kal avangin a thla zawk chu tlan zur zar bian a hriat a. Khaw lo haw mai tur chuan hmar-**thlang atangin** buh rai nghawr khawpuiin a rawn rum shaih der der a.

Khawdur duk hnim ruih kar a kawlphe thlei zawi zawi chu thlir chungin an thutna pângchuam bawh kha an luah dun leh a. Kapthuama chuan, "Ka cham rei tehluh nen kan inkawm fumfe mang hek lo. Nangnin vanduaia in lo tawh vang pawh a ni ang e. Mahse han inkawmin thu tinreng pawh sawi dun t/in mahila, engmah sawngsawhlawt thei chuang si lo tur duhtusam a ni zel dawn a. Palai pawh rawn tir leh eng ang mah ila 'kei' ka nih chhung hi chuan thil a puitling tak tak thei chuang dawn bawh si lo. Hcti khawp a ka hmangaihna che hi a pâmhmâin a buangbarthlak hle dawn zawng a nih hi. I lakah hian ka bei a dawngin engtin nge ro kan rel tâk ang? I hmel ka hmuhin ka tawngkhawp zo chuang si lo chia, ka hmuh loh che leh khawharin fa vân ka vân leh thung bawh si a. Ka hmuh loh rei zawh poh che leh a hna-leh nghawng a na ting mai bawh si nen. I nu leh i pa tan lah chuan ka hming lam ri ringawt pawh hi anchhe inlawh aia ngaihthlak hrehaw'n, thih thu thlentu zualko aw ai pawhin ngaih a chakaw'n loh hual emaw a ni awm si a. Chuti khawp a min duh lotu chuan a fanu chu min pe phalin i ring emaw chu? Teuh lo mai, wawh sawm pawh piang nawnin mi lenpui aia a let eng emaw zat a tam pawh lenpui mahila, kela tan zawng beidawna chauh lo chu puakchhuah tur a awm dawn chuang si lo. Ka hmangaih dan che leh hi, ka nunna a pang a then hian ruat lobin ka thisen a tuan sin tawh si a. Chuti khawp a ka hmangaih chu ka

ta a nih theihna tur a, chuti khawp a min duh lotu si chu engtin nge ka tih lungawi tâk ang le? He thilah hian kei zawng ka beidawngin a ngaihna ka hre thiam tawh lo. Ka finna a tawp a, ka ngaihtuah-na-in kawng a bo zo ta. Engtin nge kan kalpui dawn?" tiin beidawng hmel takin Rozami chu a en a.

Rozami chu a ngawi vang vang a, a tin seh uiap uiap chung a bla tak a kawlphe eng kikiau zawr zawr thlir chung chuan, "I tan chauh a ka indah hrauna tithlawn tur a ka tumna min pawt kir turin van Pathian chauh lo chu ka chung a ro min rel sak thei tumah an awm lo. A hun leh ni a lo thlen a, 'awm' ka tih chinah leh 'thiam chang' ni-a ka inhriat tikah chan, ka chhungte min phuarn hrui chu ka chai chat ang a, tuma um phak loh turin i hnen lam ka rawn pan mai ang. An aw hre lo turin ka beng ka hup ang a, i aw chauh hre turin ka rawn zawng dawn che a sin Chuvangin, i iarin loh lai pawh-ia ka rawn thawng thut thei chia, i mi zai hmasak loh pawhin ka rawn pan mai ang che. Hmangaihtu dang nei lo chuan hmangaihtu awmehhun chu, ram sakawlh leh thosi karah pawh tuma ven loh pawhin, ka hmuh hmaloh a zawng turin ka pan dawn che tih lo hre lawk ang che.

"Tlang ngaih a mawi tak a inneih hi a tu ye ve pawhin duh mahila, kan hun tawngin a zir miau si loh chuan, hmangchhiat leh thangtlawm chu ka phum

bo ang a, zahna khengbetin nangmah chauh ka hma-zawn a dahin ka fin tho tho ang che. Mahse tun-ab hi chuan chumi thleng thleng a kal chu tulin ka ring lo. Ka pa meuh pawhin kan inchohung khurah i tlawmgaihna chu a sawi chhuak ve duh ta hial a. He i fakawmna zabawm tak hian ka pa meuh pawh a khawih nghing hialin ka hria. Chuvangin, tun chapchâr hian lo leng leh phawt la. Chuta an lo la hnar cheu che a nih chuan, duh leh pawh lo, kan tlan dun daih tawh anga a ni mai. Duhthusam chan tawh berah hmingchhiatna chuan awmzia a nei phak tawh ngai lo.

"Ngawi teh, zanin hian inkhawmpui lai a kan inkawm kha min ti hria. Thla lah chu a hleinga zan a niin, min tiam ang khan 'Thla Hleinga Zan' tawh hi chuan chhuanlam ka siam a. Mahni chauh mah ni ila, tuna kan inkawmna hmun hi luah leh turin ka kal ziah thin a sin. Zaninah erawh hi chuan kan pahnih ngeiin kan luah dun leh ta a nih hi Aw...! heti kumkhua thei tawh ila ka va han t ngawih ngawih tak em! He Thanthuami te leikapui h raikhat atang a ka hmuah châng leh chhun-lawn a k kal chang te hian min ngaihtuah thuitir teh thin sin. Kan veng a i cham ve chhung lah in zanin chauh hi lungsi deuh a kan inkawm thei chhun a ni chauh si a. Nang zawng Thuamthiani pa pawhin riah lo a rawt a rawt pawhin nangmah zawk hian i tum h tlat a, min thlahlet ve lo i ang em mai. Riak t daih lo la chuan hlim tak a inkawm thei fo tur :

kan ni a. In riah hlan khan kei lah chu khawhar-in a haw lam a kal lamin in riahua thlâm kawng-ka inhawng phât kha ka rawn thlir ka rawn thlir thin a. I haw hnu-ah pawh Thanthuami te thlâm chuan lung a tileng hlen tawh dawn a nih hi. Awi, Thuama, chu! inkhawin an bang leh der tawh. Ka hawn mai loh chuan iñkhawm banah tih tur pawmawh deuh ka nei lehngal. Khawnge, ka hlabu kha, zanin chauh chu lo leng ngei ngei ang che aw.

“Naktukah i haw tawh dawn si a, ‘kal kawng zuk tur ka nei lo’ i tih kha. Awi! kei zawng, hawn loh theih pawh a ni si lo a,” tih pah chuan a tho ta a. Khawdur chhan a thla eng fiah lo ruai hnuaiah chuan hnaih tak a inbmatawn a ding dunin, Rozami chuan Kapthuama nghawnga a kut khing-hnih suih a hnai tak a en chung hian, “Ti hian nupa ni tawh mai ila, a nih, ka mangtha rih dawn lo che a nia. Mahse,” an hmui nuai zaub chungin in chhungah an lut dun ta a,

18 ROZAMI SAWI A DIK TA

FAVANG a lo thleng a, Rozami leh Than
 thuami chu Thanthuami te lo-ah chawhmeh lain lo
 lam an kal dun a. An haw lam chuan Kapthuama
 chanchin hlii an sawi a, an titi a tui dun hle a
 Tlangchhuah an thlen chuan an chawl a, an fanghma
 tai phurh pakhat chu an inphel a an ei dun a. Ro-
 zami chuan, "Ka fanghma ei vang nge maw ka khua
 te pawh sik ta ur urin ka hria e, khawnge, ni lum
 ah ka'n thu hial teh ang," a ti a, ni lum hnung
 puakin a thu a, a ham zi ar ar a, a mittui a nuai
 chat chat a. Tichuan, zawitê-in an kal leh ta a
 In an thlen a Rozami insil zoin kawr a thlak hma
 chiah tih chuan a pai ta awn awn a, sût vuanin a
 thu raih raih a. Chutah iuring lawk hman miah lo
 in a luak ta puat puat mai a. A luak pawh ngaih
 sak hlei thei lovin bawkvakin a khum lam a pan
 jawk jawk a. A khumah chuan a mu ta hle hle a
 A nu-in puan a sintir paha a pang a han khawh
 nak chuan a lo sa huam mai a, a khua a lo sik nasa
 chu niin. Reilotêah chuan a jawngvai ta bual bua
 a, an biak pawhin mumalin a chhang ta hek lo
 A lu chu tuivawtin an leh a, chumi zan chuan chhi
 khat mah chhing lovin an bawisawm tlaivar ta a
 Ani lah chuan tuisik ringawt a hap nghek nghek ma
 a. A tuisik in lah chu kar lo-ah a luak leh zel baw
 si a. Khawvar dawn lam atang phei chuan a jawng
 vai jawb bawk hek lo, a muhil a nih leh a meng

nih pawh hriat theih lohin a mu ta chawrh chawrh mai a. A tukah pawh zing dai nci miah lovin a khawsik chuan a thlah ta reng reng lo.

Chawfak hun hma lam hretah a rawn tawng chhuak phawng mai a. A nu a rawn ko a, "Ka nu, ka thla a va han phang tehlulem! Min kalsan hauh suh ang che aw. Thuamthiani a awm lawm ni, va ko teh u," a rawn ti a. A nu chuan, "Thlaphang reng reng suh, thlaphanna tur a awm hlei nem, tunah chuan i dam a ni leh tawh a lawm. I kiangah hlir ka awm ang, ka kalsan hauh lo ang che," a ti a. A nu chuan Thanthuami puan tah lai chu a va kohtir a, ani chu hmanhmawh takin dawhkilh la tawn reng chung hian a lo kala. Thanthuami chuan chuti ang takin a thiannu chu a nâ tih pawh a lo la hre hman lo a. Thanthuami chu a thiannu khum tlâng a thuin a kut vawn sak chung chuan a bengvar lohzia thupha a chawi mawlh mawlh a. Thanthuami tawng ri a hriat veleh Rozami chu a rawn meng iau a, maimichhing leh chung hian "Thuamthian, tun tum ka nâ chu ka thla a phang em mai, tuar khawchhuak zo dawnin ka inhre tlat lo. Ka hnukchah hma ngei a Thuama hmuh ka va han châk em! Hmu ila chuan ka dam phah huai loh pawhin thlamuang leh rilru kokim takin ka kal thei dawn a. Ka mang lamah hi chuan hlim takin kan lo inkawm thin a. Kei zawng ka thian, engtin nge ka awm ang?" a ti a.

Rozami thlaphangin chu thu a sawi lai hmcl a hmuh chuan Thanthuami chu a hnukukh teuh mai a. Mahse a insum bram hram a, "Zamthian, thlaphan tur a ni nem, idam leh mai ang a, chutih hun ah chuan Thuama nen hlim takin in la inkawm leh dawn nia, lungngai reng reng suh," tiin a han hnem ru bram hram a. A rawn meng chhuak leh a, mit-tui tla zawih zawih chung hian, "Kei zawng Thuama chauh lo chu" a ti a, a mittui chu Thanthuami chuan a huk sak a, Thanthuami chuan, "A nih l h e, Zamhian, ani chu awm ta se dam leh maiin i in-ring em ni?" ti-a a han zawh leh chuan a biak theih ta lo a. A han ko sateh thin na a, thingbul biak ang chauh hi a ni zui ta tlat mai a. Rozamin Thanthuami hnena a thlaphan thu leh Kapthuama hmuh a chak thu a sawi lai chuan Rozami nu chuan a lo ngathla ve reng a. Thanthuami chuan a theih tawh a bawisawm chu duh mah se, tingaihna dan vak a awm lovin Rozami lah chu a mut ngaiin a mu chawh chawh mai a. An biak lahin chhang hek seh, a taksa lah chu dah ang angin a awm ringaw mai ta. Thanthuami hnena a sawi loh chu a sawn leh ta reng reng lo. Chumi zan chuan Thanthuami chuan a thianu chu a thavarpui ta a. A tuk khu a towar leh meuh chuan Rozami chu a thaw an ei a hi ta qeen mai a. A chhungte pawh an mangan takhtak ta.

Rozami nu chuan Thanthuami hnena a Rozami thusawi kha a bre reng a. A dam phah emaw, pha

lo emaw, a chhe ber dawnin a tlin ta ngang lo a nih pawh a rilru kokim taka a kal tur ringawt pawh duhsakin Rozami thu sawi chu a sawi chhuak lo thei ta lo a. An thil sawi chu an pa'n a hriat vele leh lehlam a hawi hmuk a, a tuibur pik zuk pa'n chuan, "A mak awm thin teh e, mangan tawpah pawh 'ngaibzawng' in la sawi ta lai a. Thangthar hian zah pawh hi in bosal zo tawh a nih hi. Doktor leh damdawi ang hial a ngaihzawng te dampui han inrin tak mauh chu, eng kan ti zo ta chu ni maw," a lo ti hmuar hmuar a. An nu chuan, "Mangan a tawpavang tak chuan a lawm mawi leh mawi lo leh zah pawh a sawi hleih theih tawh loh achang reng a ni. Fa te thi dawn a, tuisik pawh khak liam thei tawh lo a, an dan na tur a nih phawt chuan eng pawh kan huam tur a ni dawn lawm ni. 'A tirtun min tih chuan saphungah pawh kan kui ta tur e,' an lo ti ngai a.

"Tawngkhawlo ni suh se la, tunah lo tlin ta lovin, amah Rozami sawi ang a rilru lungkim taka a kal theihna tur tehchêng pawh kan duhsak tawh a nih hi. A duh ang a kan tih loh zawngin kan inchhirin ban a chenin 'kan lô chuti ta lo a' kan ti leh khaw hnu si emaw a ni leh ang tih hlau vang chauh zawk a lawm. In tih loh phei chuan ti ila pawh ka tilai ngam bik hlei nem," a ti a. Kapthuaman a bo a chhar chhuah Chhingpui u chuan, "E chutin Zamin a lo sawi a ni maw? Chutia a tih phawt chuan i ko mawh ang u. Ka thu pawhin kan ko tur a ni, Zami

tan leh kan tan pawh a rilru tikalhkimtu a nih nâk-hmanah chuan eng nge? Amah Kapthuama lakah a inthlahruonthlak deuh e tih thu lo-ah chuan engmah zahthlak a awm lo. Daktawr mah sum sengin kan ko e kan tia lawm. Kei, Kapthuama kha ka mi ngainat zawng tak a sin ni nghe nghe. Mami chungah reng kban tlawm a ngai mai a. Tunah pawh hian kan koh phawt chuan a lo kal em em ang. Hmanah lah khan amah vangin Mamin dawm hlum a hlawh tawh a. Tunah pawh hian min chhandamtu a ni leh mai thei a sin. Heti ang mangan tawpah chuan tu-pawhin an ngaithiam ang. Ka nu pawhin i lo sawi har mah mah a ni tawh zawk chu. Ani berin chutia a tih phawt chuan koh vat tur, koh vat tur. Chuti lo zawng thil a pawl hau-ah kan inchhirin ban a chen leh si ang a sin. A mi hmuh châk ber na na na chu, tikthuh tibchhiatna ebi a nih tawp loh chu, kotu tur zualko i zawng vat ang," a ti sawt sawt a.

Kapthuama koh chungchang an sawi lai chuan, Rozami u Hnuna chuan Rozami bawisawm chung chuan, "Chutia in sawi tak a zarah chuan— Hman-a Rozami thil ka hai avang a kan inhau deuh tum khan, Kapthuaman Rozami lehkha a rawn thawn ka ching chhuak a. A hma lai a Kapthuama hnen a Zami thu lo sawi, Kapthuaman a hriat thiam loh: Ka hhukebaw dawnin i mi hmangaihna chuan ka tirau i ko kir leh ang tin ang lam hawi niin ka hriat a, a zakh ang takin ka hriat chuang tse lo a. Chuti lam hawi a Zami thu sawi, Kapthuaman a rawn zawh

lehna chu ka chhiar tawh tak a sin, ka hre chhuak leh zawk mǎi, in thusawí a zarab. Muthmunah pawh Vanbrangi (a nupui) nen kan nuihpui kan nuihpui tak a sin maw le," a rawn ti ve a.

Chhingpuii u vek chuan, "Chuti a lo nih leh-nghal phei chuan zualko i tir vat ang, engmah a zahthlak loh. Khawnge, keiman zualko tur ka'n zawng teh ang, 'bei nge sei run dung,' tih a lawm," tih pah chuan zualko tirh tur zawng turin a chhuak ti nghal a. Fehrehsan lai vel chuan Kapthuama ko tur zualko pahnih chu an kal ta vang vang a. Kapthuama hnenah pawh thukhuh hauh lo leh thil nih dan chu chiang tak a hriih rawt turin an chah a. Zualko pakhat phei chu Rozami inleng hlui, Rozamin a dub loh avang chauh a nei ta lo hi a ni nghe nghe a. Thawmngaih chhuah a hun si a le, Rozami tan a Kapthuama kotu zualko nih pawh a tan a tha-natthlak hle ta ve ang.

Chumi zan a Kapthuama zanriah ei kham chu a ní te inah a kal a. Fawng (kho)-ah hian lenmual hmin leh pangkai hmin hi an lo chhun fin rui a. Chu chu a ni fanu nula duhawmpui mai nen chuan an ei dun a, thei ei chungin an titi zel a. A ni fanu chuan, "Takana Thuama, naktuk chu zongam min venpui ta che, i tha ka la rui leh dawn che nia. Zongam chin chu ka inchhir tak tak a ni, sava ven reng mai a hautak lulai em mai. Vasuih leh varit hi chu ven an nuam deuh a, pit (pittê) mawlb mai

hi a ni chimawm chu ni. Sawphrui thlun leh benthek an hlau ve si lo, bu-ruk lah chu chuti hlauh. A hmun a hpawh a ngai ziah mai bik a, ka ning tawh teh mai a nia. Hmanni lah chu ka sairaw-kherh' hrui chat hmawkin ka zungpui ka'n perh mai a tun thlengin a la nâ," a ti a.

Kapthuama chuan, "Ka hman nang, favang ngawi dawh an sawi deuh a, ka pa khan kal veah min duh deuhin ka hria, ka kal ve mai thei a ni," ti-a a sawi lai mek chuan Kapthuama farnu a nau nula Lh-hlungchungi a lo lut a. A ni fanu chuan, "Eng nge i duh tak Chhungbawih?" a lo tithuai a. Hlu-chhungi chuan, "K'u Thuama ka ko dawn, mikhe l pawimawh deuh an lo kal a, k'u Thanthuami te khua atang a lo kal zualko an ni awm e, amal-erawh chu, k'u Thanthuami te rawn tirh chu a ni lo," a ti a. Kapthuama chuan, "Engti hawi a zualko maw? Sawi Chiang law law la," a ti a. Hlu-chhungi chuan, "Rozami a dam lo a, a thi lek lek a, a lam a lam che a ni awm a, an mangangin an rawn ko che a ni awm e," a ti a.

Kapthuama chuan a nui rah rah a. A ni fanu chuan, "Eih, i va daktawr awm ye, nge fawngei dam thei? Tidamtu pu kan lo nei reng che zu nia. Tun achiah chuan damloh pawn a lungngamthla lo deuh tawh ang chu," a lo tifi am a. Kapthuama chuan, "Bengchheng sub, ka thiam ka chhuah ta' tak fawngei a tukit te saw ka daw ngil zo vek ma

tur a sin. A mawi i tihlai ber a khabe-a a khua-
 vangchhinchhiah te lam sawn ka daw i bo vek tir a
 nia," tichungin an unauin an inzui chhuak ta a.
 Kapthuama chuan an in a thlen hma chuan,
 hman a Rozami thu lo sawi tawh, "Ka hnuk-
 chah dawn darkar pawh hman mek tawh mahila i
 mi hmangaihna chuan ka thlarau chu i ko kir leh
 dawn si a' ti a, a sawi chu a hrechhuak zawk a.

An inah chuan zualko pahni chuan an lo
 nghak ran a, a pa chuan thil awmzia chu a lo hrih
 hmawh hmawh a. Kapthuama chu a ngawi vang
 vang a, a pa hnenah chuan, "Ka pa, nangin eng nge
 i ngaihndan?" a ti a. A pa chuan, "Keim eng nge
 ngaihndan ka neih ang. An mangan a tawp a, mawi
 leh mawi lo pawh thlu lo in khu leh chenah an rawn
 ko che a ni a, i tlawnngaih theih chuan tlawnngaih
 chhuah a hunah ka ngai ma, muanchanpui chi lo
 a ni lo a," a ti a. Kapthuama chuan, "Ka kal dawn
 a nih chuan ka'n irsiam nghal ang e, kan thiante
 chuan chaw pawh in ei tawh em ni?" tu a hman
 zawt a. Anni chuan, "Kan lo ei kham chhuah e," an
 ti a.

Kapthuama chuan, "Kan thiante chu khu leh
 chen atangin hmanhmawh hah thikulin in rawn ti n
 ni tla vanvuai a ni awm si a. Zanin su su chuan
 in let leh peih tawh hauh lo ang a, tu nge ka kal-
 pui ang aw... A, kalpui kalpui a ngai leh lo e, kawng
 chin ni se hriat loh ni hek lo," a tih lai chuan zual-
 kote chuan, "Kan hah hlei nem, kir lehngal tum

rilru a lo kal kan nih avangin hei khawnvar pawh kan rawn sin sa diam a. Ni khat kawng kal mai mai te chu tlangval tan hahna tham a tling hlei nem." an ti a. Kapthuama chuan, "Chutia kir lehngah in tun chuan a remchan hlahu chu, kan kal tlang dial dial ang a, kan inhlimehhuahin kawng pawh a tawi deuh mahna. Ama'rawh chu, favang lai ngang hi a ni a, ruah a sur duh viau mai a, khumi keng ila. Kan zan kal dawn a, meichher ringawt zawng a buai thlak deuh takin Chhungbawih, ka ni te kawlphe-khawnvar tui tum hnih han la lawk teh, hei kan thiante khawnvar hi keng mai la, ka insiam chhungin i lo thleng leh mai ang," a ti a. Tichuan, leng len hun zen zawnah an liam ta vang vang a.

Kawngtluan chuan inbe mang lovin an kal ngat ngat a, zunzung a an ding zawk tih mai loh phei chu thaw la fahran pawhin an tawi miah lo a, thian-te zunram thiar pawh inngahak lovin diing takin an kal zel a. Zanolai pelh hret awm velah chuan ruah-pui-vanawn namen lovin a sur leh ta ngah a. An meichher an siam tha sauh sauh a, an chhit lai chauh chu an nei tawh a, an kal leh ta a. Ruah lah chu ban zai reng rel lovin a tam reng mai si a. Vangvat fahran pawh thiar hman hek lo, a zuk (seh) na zual chauh chu kal pahin an han mal ang nawlh nawlh a. Kluan-hmasa a hnai tawh hle ang e, an meichher chu a tawi luat tak avangin an pah a, kawlphe-khawnvar chhiin an kal ta zel a.

An han kal leh hlek a, 'zotui' an thleng a. Zotui

in lam mual 'thingkhuangram' chu dumde ruang chen (tlûk) chu an kal hman zet ang e, 'lal-lomual' an tih-ah chuan thla ai an hre ta a. An ding dat a, an hian ngaithla ngun a, Rozami rawl chiah niin an hre ta theuh a. A hriat tirh chuan Kapthuama pawh a mur sakin a pangah tang a vak cham cham a. Mah-se Rozami rawl ngei a-ni tih a hriat chian chinah chuan a hluihna zawng zawng chu a bo duak a. Anmahni lam panin a rawn ai zel tih a hriatin Kapthuama chuan ring fe hian, "Zami, Rozam, engah ngei thlaphan em em? Nangmah chhan turin ka lo kal a ni tih i hre na nge? Thlaphang reng reng suh, ka phatsan tawp lo ang che. Heta hi ka awm a lawm, ka lo nghak reng a che. Ka khawmvar eng hi rawn pan ang che aw. Rozam, nang chhan tur chuan vanhnuai-thang Hrangtinchhinga tuchhuan hi engti kawng mahin ka diau dawn lo. Ka kapkar hi rawn chuh la, ka tangah hian lo bei ta che," ti-chungin a inhrosa a, kawng kam thingte chu a sat buan buan a.

Thla ai chuan ai tuar tuar chungin Kapthuama chu a vel (kal hel) ta the ther mai a. A tawpah chuan ai chung zelin Kapthuama kapkarah chuan a ai lut a, Kapthuama chuan lo man ta chawt ni hian a inhria a, chu velch thla ai chu a reh ta hmak a. A kalpuite pahnih lah chuan an hlau em em mai a. Tlanchhiatsan tak an nâp a, 'em a' an ti ve deuh si a. A kiangah chuan an lo ding khur dun zawih zawih a. A kalpuite chu thlaphang deuha a hriat

avangin Kapthuama chuan hnu a dal a, khua an thlen chuan zing sumsu hmasain thawm an lo nei tawh a. A hla na vang vangin an diing bawh a, an thleng hma hle.

Thanthuami te in pawh pan kaw i lovin Kapthuama chuan Rozami te in chu a pan ngal a. Kawtkai a rah chiah lai chuan an han tap hak a, sumhmun atang a ardan-bang kavgkap ti a hawn dawn lai tak chuan, tuum-hunhman a Rozami pa tuum la tur lo phei chuan beidawng tap rawl tak chung a, "Mihring a tling tawh lo a ni ber lawm ni?" a ti chu a han hre zui leh a. Kapthuama hmel chu an hmuh veleh a chungah an mit a fu-in an en thap a. Engmah sawi lovin ani chuan an Rozami mutna lam chu a pan ngal a, ni dang lo bawisawmtute chu an kiang ar ar a. Rozami chu a lo chau hle mai reng a, a mar a lo la awm che che a. Kapthuama chu khum kawmah thu-in Rozami hmel chu lungchim tak hian a han en vawrg vawrg a. A kut khing leh lam a Rozami vuanin, lehlan in a chal a thlan chhe lo bawl chhuak tiam tiam chu a bruk sak a. Khât tak na tak si hian awm kang dawrh dawrh khawp hian a thaw a. Kapthuama chuan ngaihawm tak hian, "Zami, nangmah vangin ka lo kal a sin, maw...meng ta che, min hre lo em ni?" ti-a a biak lai chuan, bang kil ngheng a thu Rozami nu chuan, "Kan mitmei veng reng reng suh. Mangan a tawp a, kan rawn ko che a ni a, tul i tih ang ang khan enkawl ang che," a lo ti a.

Kapthūama chu a kun hniam a, biang leh biang
 iesiin a thaw ngaithla chung chuan, "Zami, ka koh
 min va chhang har ve, Nizanah ka koh kir leh daih
 towh che kha, mawh... harh teh," a han ti leh a.
 Rozami u a mar la khawih ve rengtu chuan, 'Kap-
 thūaman a han bawisawm chinah ngat chuan, Ro-
 zami mar tai nua i tawh chu damlo na pangngai mar
 ang hian a rawn phu leh ta mai a ni," a ti. Chutia
 Kapthūaman Rozami a bawisawm lai chuan tapchhak
 lamah an zualko pakhat, Rozami inleng pawh lo ni
 ve tawh chuan, Rozami thla ai Kapthūaman a koh
 thu chu— "Keinin kan hlauh nâk alaiin kan lun
 panin a rawn ai leh ta nghal. Ani Kapthūama lah
 chuan hlauh ahnehin a ko reng mai zawk si a. Kan
 kiang rawn thleng ta lo pawh ni se, Kapthūama
 zawk chuan chuti ang rampalaileng zan khawchhe
 thimtham hnuaieh pawh chuan um ruak ruak duhi
 a mawi thung si a. Rozami rawl ngei a ni tih hre
 eng ang mahila, a thla ai ka han hrait meuh chuan
 ka khur hlum lo chauh a ni. Pa leh pa kan lo in-
 thlau thei hle zawng a ni e," tiin makti leh tluk lo
 inti tak chungin bahip (hubip)-in a tluk lo thu a lo
 sawi ve mek a.

Chu Rozami inlengpa hlui titi a briat chuan
 Rozami pa chu a thlamuang ta huai huai a. Kap-
 thūama chuan Rozami chu a vil ran a, a kut chelh
 ran chungin a khât tawh hian a ko leh thin a.
 Tukthuan ei a lo lun meuh chuan Rozami pawh
 chuan muhil hmel a pu ta a. Rozamin Kapthūama

enkawl a ngeihzia chu, "Khawnvar tui kang eng chuai ruai ruai tawh a tui han thun belh a, a eng leh ta tual tual ang hi a ni," a tia lawm, Rozami nu Hnunan. Rozami nu chuan, "Thuama, i awm dan kha a hrehawm em mai, i kawr huh nen, vangvat zukna che lah a la thi ang ngiai nguai a. Khat lutuk zawng a ni em em lo e. Tuilum pawh a awm a, han intleuh fai deuhin inthlak hul rih teh. Khat lutuk zawng a nihin a ni lo, a zia lo lutuk em mai. I lo thlen tirh ata tawh thaw pawh la hman lovin ngai ngaiin i la awm a, Zam nami pawh eng a ti hman hlei ang," a ti a. Kapthuama chu a han in sil sawk sawk a, Thanthuami chuan, "Thuama, i thawmhnaw bal kha chu ka hawn ange, vawiiinah ka in su dawn tho a, ti khan dah rawh," a ti a.

Rozami nu chuan, "Mai mai a, keimahnin kan su ang, nang a suk a ngai awzâwng lo min buaipui na rawh, i thiannu pawh tunah chuan a thahnem chhawm zel ang a, nizan lah i tlaivar ve leh si a Vawiiu lamah hna i thawk peih bik dawn em ni? Hmeh nei lo mahila hetah bar ve mai mai la, eng nge in hmeh dawn bik?" a ti a. Thanthuami chuan "Engmah phej zawng kan hmeh bik lo ang, mahsa ka hawog zawk ang e. Thuama, ei châk zawng leh mamawh i neih chuan sawi mai ang che aw," a ti a tukthuan ei turin a haw ta a. Kapthuama insings zo chu Rozami kiangah bawh thuthmun a rem le' a. A kut cheh sak ran chung hian lungchim taki a en vawng vawg reng bawh a. Kapthuama ch

chaw ei tur a an sawm ngial pawhin a tang tlat mai a, "Ka ril a tam lo, ti khan puar takin ei rawh u, ka lawm khawp mai ka ei tluk a ni," a ti tlat mai a.

Mi dangin chaw an ei hlan chuan zawitê hlan Kapthuama chuan, "Zami han meng tawh teh, i kiang a hi ka awn reng a sin, ka kalsan phal hlei nem che," tiin a kun a, a hmuï chu Rozami hmuïah chuan a zuk ngat riï riï a, "Engah nge ka awm loh hlan a mi kalsan i lo tum? Ka hmangaih tehlul che nen, min ngai ve lo em ni? Maw .., Zami," tiin a biangah chuan a chul liam liam a. Chumi ni chuan Kapthuama chuan chang dang kan miah lovin a thutpui nileng a. Zin lam a ruahpui-vanawn hnuai a hmanhmawh a kal tlai var ngang a nih avangin a chau hle na-in engmah a sawi lo. Chau-in a mut te pawh chhuak ve em em mah se, mutchhuak lo ang maiin engkim fel tak leh hawihawm takin a tizel tho a. Fehrehsan lai vel chuan Thanthuamin Kapthuama ei tur artui pum li leh balhla (banhla) thlar khat hi a rawn keng a. Rozami nu chuan, "I ti-zahthlak em mui Thuami, kan nei ve tho a, i naute eïah hawn leh zawk ang che," a ti na a, Kapthuama'n a ruk a Tnanthuami a lo chab a nih avangin hawn leh chu a tum lo. Kapthuama chuan chaw tel lovin a ei ta a.

Rozami chhungten an hnar dan leh an tawng dan Kapthuama chuan a bre reng a, Rozami pa pheï chuan a chhipchhuah zawng leh hmuïit takin

a tawng chhuah kha a ni a. Chu chu sal lovin Kapthuama chuan hre mah se, an lak a theihtawp a that chhuah a tumna chu a bo chuang lo. A tan Rozami chu an pbal lo tih hre reng chungin an tan theihtawp chhuah mah se, an ei leh bar leh thil dang reng reng chu hek sak loh a tum tlat a. Rozami damloh thu-ah pawh a tûr a hrang a tan huan chungin an in chhung erawh chu engti kawng mahin nuam a ti lo. Chumi tum ngei pawh chuan an chhungkuain an lo lawmin an lo duat nangiawng rawh mahse a tan hlimna tur awmin a hre thei mawla rih lo a ni.

A zan hnihna-ah pawh chuan Kapthuama chu chhin khat pawh chhing lovin a meng tlang leh ta a. Mumal a chaw a ei bawh si loh avangin a chau ve ta hle mai a, thingpui chauh lo chu Rozami t thil engmah ei a nei lo. A tuk leh zing buh den lai chuan Rozami chu fel takin a rawn meng chhuak ta a. Kapthuama chuan, "Zami, min han en teh, tu nge ka nih min hria em?" tiin a han zawt a. Rozami chuan Kapthuama lamah a mit chu a han len rial rial a, chau tak chung hian a han nui hram a. Ehg emaw chu sawi a rawn tum thei na-in a tawng chhuah zo rih lo a. A kut erawh chu zawitê hian a rawn lek chhuak a, thei leh thei lovin Kapthuama kut chu a rawn vuan hram hram a, chuti chung chuan a maimichhing a, thlamuang takin a muhil ta sang sang a.

Chutia a muthilh hlan chuan Kapthuama chuan

chaw ei a kalsin tunin Rozami kut chu zawitêin a a dah thla riai ri ti a. Rozami nuten chaw ei a an sawm lahin ei a tam bau si lo. Rozami nu phei chuan a ngaithian lo lek lek a. Mahse lehlun a Kapthuama dinhmaun a han dawnpui chuan a hriat thiampui em em thung a. Chuti tak a lung lha a la chu pawl a ti deuh a ni. Chaw ei tur a Kapthuama a haw ta ka a, a chaw ei kham a Thanthuami khuma a han thuzal chu a lo muhil ta vang vang a. Ruahpui hnuaia a kal tlaivar hnu-in a tukah mu hauh lo-in damlo a bawisawm nileng leh a. A zan lnhna-ah pawh chhin kl t mah chhing lovin a meng tuarchhuak leh ta kha a ri a. Amah nu tlawngat tawpkhawk a ri chungin chutia a thuzal lawk a lo muhil ta pawh chu a mawh lo e.

Thanthuami te pawh chuan, "A damlo ber a changkan deuh tawh zawngin a hab lutuk em ma, a rimtawng net pawh a na ve blawn ang e, tikka a theih chin chin chu deh leh mu rawh se," an ti a, an kai tho duh lo a. Chutia Kapthuama a met bo hlan chuan Rozami cuhil kha a rawn hah a. Kapthuama a hmu ta si lo. A bula thu a nu hriat tham chauh hian, "Khawage Thuama?" a rawn ti a. A nu chuan an pa mitmei ven vang chuan, "Khaih, insum deuh thin la," a tichauh chu a ni na-in, Rozami biargah chuan mittui a luang ta zung zung a.

Kapthuama chu kar khat lai a chaw leh ta a. Rozami damlo pawh a changkan leh ta fu a. Ama'

rawhchu, a natna a nat em avangin a khawsikin a thlah hnu-ah pawh a chak lo rei hle a. Rozami lah chuan tun hma zawrg aiin Kapthuama chu a ngai a. Kapthuama pawhin la thlahlel em em mah se, ani Rozami ber a lo leikan leh tâk deuhah chuan hawn lam zai a rel leh dawn hnai ta a. Tuk khat chu Rozami nu-in chaw ei-ah a sawm a. Kapthuama lah chuan thih hreh takin a hreh thung a. Rozami nu labin koh hlawhchham a tum bau baw si lo. Kapthuama kal hreh chuan, "Thanthuam, ka kal ai nang kal ta zawk che," te a han ti vei thin. Ani Rozami nu lah chuan sawm eltian a chhuah ve si, "Ka ei tluk tho a ni, in chaw ei turin ka lo kal hlei nem, Zami damloh avang chaubin a lawm ka lo kal, chaw ei lam lam zawng ka duh awzâwng lo," a tih pawhin, Rozami nu chuan kaih tak tea a kaih duh hial dawn si avangin Kapthuama chu a mang-ang letling khawp mai a.

Nakinah chuan Rozami nu chuan Kapthuama chu ko falin a bekbawr ta a. Heti tak a kan in a chaw ei i hreh nachhan hi ka hai hlei nem. Kan in a chaw ei hrehin tang bechhe hle ta pawh ni la i thiamawm e. Kan chung a hmangaihna i tihlan zawhzaizia leh i tlawmgalhna hi kan hai lo a. Kan hlimin hai hlim a tiatin kan lawmzia sawiin a siak lo tak meuh meuh a sin. Kan tan chuan hmuh theih pathian leh chhandamtu reng reng i ni a. A khat a khatin keini chhung leh keini chhung hlir min buai-puill min thlamuantu ber i ni a, rampui talh hial

tawh i phu kan ti. Mahse neih a awm si loh avang-
n min ngaithiam a ni ang chu.


“Amaherawhchu, tukin a i lo kal duh loh chuan
rozami pawhin a ngaithiam bik dawn hauh lo a nia.
rozami ngaih that nan tal a hming chauh pawhin
awn kil ve reng reng la. Hmanah lah khan nang-
mah avang chauhin Chhingpuii kha khati kha a lo
ni tawhin tunah lah Rozami mihring tling lo tur
nangmah bawkin i chhandam a. Chu chu Rozami pa
pawhin a hai bik hauh lo a. Tukin-ah ngei pawh,
‘Tunah zawng khaw dang hawi thei kan ni ta lo.
Hetia Rozami a lo dam lehah hrim chuan hun rem-
chang hmasaber kan en tawh ang. Hei lo liam a
‘Khua-tuah leh Pathian samsuih’ pawh an awm leh
chuang thei bil a mawi a ni lo e. Kapthuama pawh
hrilh tlang law law mai a tha ang,’ a tih hial kha.
Chuvangin, tun achinah zawng inthlahrunna leh
inkiltawihna nei miah lovin mahni in ang a i rawn
chuankai tawh hi kan duh a ni. Tukin a heti khawp
a chaw ei tur a kan rawn sawm ngawrh nachhan
che pawh, kan pa’n i hnenah eng emaw sawi duh a
nei a ni ang tih ka ring a. Nangin min duh der ve
tak tak a nih chuan kan lakah engmah hlauthawng
miah tawh suh ang che,” a tih tâk hial avangin
Kapthuama chuan a zui ve ta nge nge a.

Chumi ni chuan Rozami damkawr chhuat dung
kal zir tan ve hlawng hlawng nen chuan nilengin
inawm a. A nat tirh atanga a ngaihzia te, hmana

a thu lo sawi tawh, a sawi lai a ani Rozami pawh-
in a ngaihna a hriat bik loh, '*Ka hnukchah dawn dar-
kar pawh hmang mek tawh mahila, i mi hmangailna
chuan ka thlarau chu i ko kir leh dawn si a,*' ti-a a
lo sawi tawh thlen dik theih dan mak a tihzia te chu
Rozami chuan a sawi melh melh a. Tin, a thla a
chhan lai a natna khum atanga a lo hriat vek thu
leh a chhungte chu d. Itu an nih dawn tawh loh thu
thleng chuan rilru thla nueng leh bahdam takin khum
thu-mu chungin a sawi siam siam a.

Chumi ni na na na chuan, an hrehawmna zawng
zawng chu theihngihlin, an hun lo kal tur beisei
awm tak lam chu thlir dun chungin an inawm dun
heuh heuh a. Chhunah phei chuan tumah dang an
awm ve lo bawh a; Rozami nu chuan chhungte dang
thlimin ar a kan sak a, bawnghnute leh antui hâng
nen. Rozami pawhin a kil ve a, a châk loh ngaih-
tuahin a ei" ve ta teuh nghe nghe a. Chu mi ni chu
an inhmangaih tih a ta an thlamuan ber ni leh an
hlim dun ber tum a la ni. Tichuan, inhmangaih te
pahni chuan, an zeldinna hlimawm tak nen ni chu
an leng dunin an hma lam hun chu nghakhlel takin
an hmusk dun tan ta a ni.

19. JAPAN SALAH KAPTHUAMA

HUMI kum vek buh seng dawn tep 'buh-pui nau-chawah a lawr theih' tih hun lai chuan Than-kimi leh Lianknuma chu hlim leh induh takin an in-nei ta a. Kapthuama chu a la leng rih na-in, ani pawh duhber nei thei ngei dawn a inhria-in ngaih-tha takin a awm ve baw a. Kum a lo thar a, vah-san an han la leh a. Rozami khan, "Chapcharah palairawn tir leh lu, chutah pawh a la reah chuah loh chuan kan nih nih kan ni dun tawh anga a ni mai," a ti kha a ni a. Mahse manganna avang a inremna ngaihngamawm zawk a lo awm leh theih tak avang chuan, duh hun hun a neih mai theih tir a nih tawh avangin, lo vah zawh vleh a nih ang tumin an lo chu thangawt takin a vat sauh sauh a. A rilru tak phei chuan Rozami chu a vah kep rlu nghe nghe a.

Nimahsela, 'vanduaia hi sal kh t khatin a ked love' tih zawng zawng neih zovin, an lo vah zawh dawn ni tak a Kapthuama thingzar sah thlak chu hri-in lâk a, a pawt then lo kir leh chuan a vanduaia siamin a hrut thla ta hlauh mai a. A tlakna a sung vak lo chungin a tla na viau mai a. A pa chuan a han bawisawm thuai a. Mahnia kel rual a nih loh avangin rite au khawmin an zawn haw ta hial a. Hun eng emaw ti chhung lai phei chu zun leh ek pawh thiar thei lovin muthmunah chaw an pe a, tlangval a pumpa a bawksawp chu a ni ta reng mai a.

Kapthuama a inhliam tih a hriat veleh Rozami chuan a rawn kan vang vang a. A tan a tha awma a rin artui leh ar a rawn keng a. Tuma bawisawm-pui pawh ngai lovin Rozami chuan mittling (tlung) tak a thla-a leng lo lai a enkawl hnu chuan Kapthuama pawh chu tlemin a lo lim-ik ve thei ta deuh a. Rozamin damlo a enkawl thuhla bakah a chetzia leh a nungchang chuan vangtlang a lëmin mimir fak a hlawh hle mai a. Ral a khata a hmelthat an sawi ai mahin a hmun ngei a belh chianin a duhawm lehzual niin an hria.

Rozamin Kapthuama a enkawl lai chuan in lamah a nu a na em em tih tlangkam atangin a hre zui ve leh thung a. A lehlan a lehlahmah damlohna leh damlohna ringawtin a tlakbuak a, Rozami tan pawh a luhaitlak hle mai. Chutia ani Kapthuama ber a lo changkan leh tak deuhah chuan, breh tak leh la inthlahlel em em chungin Rozami chuan a hawnsan ve leh ta a. Chumi kum chapchar lai chuan eng han relna khua kaw ta hek lo, hlo thlawh tulin a nang chho chu a ni leh ta mai a. Lo an zawh a favang a lo thlen chuan Kapthuama pawh insawi selna nei lovin a lo tha fel ve ta a. Mahse favang lai chuan Rozami nu chu santenin a thi ta hlahh mai a. Inneih an tum pilruk lai apiang a eng eng emaw tlakbuaktu leh bumrotu apui awm ta ziah mai chuan an mang a ti-ang dun em em a.

Chhungkaw remtih lohna-in muat a liam hnu-ah pawh an duh ang a roreltir thei reng reng lova

awmlai leh thihna hialin ro a rel leh thin chuan an ngaih a titha lo rum rum a. Mahse an inhmangaihna chu, chung ang thil pawhthen mai rual a nih loh avangin kum leh thar an tiam dun leh ta a. 'Kum tharah chuan thihna em a nih loh chuan i puitlin ngei ngei tawh ang aw' an ti dun sauh sauh a. Buh seng tulin a rawn nang a, chutih lai chuan khawvel indona chuan Mizoram pawh a nghawng bual ve phak tawh hle a. Kumpinu sipai chi tin-rengin Aizawl tlang an rawn chuangchhuak a, Japan ral lah a zual sawt na rawh. Tlangkam titi-ah pawh 'Khuangphahah Japan an lut' tih te chu a lo thang ta nawk a. Chuvangin, khaw tin Kohhran pawhin Pathian hnenah humhimna dilin tawngtai inkhawm an nei chamchi hlawm a. Mizoram pawh a thlabar ta hle mai.

Chutia an talaphan nak alai chuan N. Vanlaiphai (Chhura Vanlaiphai) Damdawi in Japan thlawhna-in a kap a, Compounder pakhat a hliam thu te chuan a rawn deng zui leh ta chhap nen. Ral a ti tih hriat reng maiin sawrkar thupek lah chu a chhuak ut mai a, 'zinah thlawhna a lo thlawhin mei tihen loh tur' tih thupek thlengin an chhuah ta hial a. Chu thupek chu changchawiin pitar putar thenkhat chhun pachang a thlawhna a lo thlawh lai a kawng lo khar thim tawh lah bo lo. Tukthuan leh zanriah chhum laklawh lai pawh sawi lova mei lo leih mit tawh awm bawh, ral a hnai hle a ni ang e. Mizo tlangval tam tak chu indona lamah liam mah se, an

la kal belh zel bawk a. Kumpinu sawrkar pawhin Aizawl tlangah ngei sipai hmunpui 'Lushai Brigade' tih hming sa-in a hawng thar a. Chutah 'Pasaltha Pawl' ('V' Force) an tih chu a din bawk a.

Chu pawlah chuan 'A' pawl leh 'B' pawl an awm a. 'A' pawl chu tualchhunga silai nei sate kha a tul hun huna a tul dan dan a hman theih tur a tih an ni a, thla tin cheng nga an pe a. 'B' pawl erawh chuan sawrkar atengin silai leh a mu tam tawk an dawng a, thla tin cheng sawm an hlawh a. Kumpinu sipaiin indo dan an zirtir ve thin. Tin, Mizo tlangval tan Biata-ah sipai pawl thar 'Biata Sipai' an tih mai 'The Lushai Scout' an tih chu an din bawk a. Chu sipai pawl thar pawh chuan Japan ral an tuk nasa-in an zinga mi thenkhat phei chuan huaisen tangkapui an dawng hial hlawm. Sawrkar chuan mi pawimawh vei vak tanpui ngai apiang lo tanpui zel turin mipui chu a ngen a. Mahse a lo thlawng ngawt a lo buaipui ngawt aiah in kawkipin thla tin cheng khat a pe vek a, chu chu 'khaw-hlawh' an ti a. Chutih lai chuan cheng khat chuan man a la man fe a ni.

Sawrkar chuan indona hmanrua leh a tul apiang phur turin 'Labour' pawl a din bawk a. Sipai tang ve lo tlangval tam takin inblawh nan hmang a. A fel deuh chu, chung puakphur ho sawmthum vel hotu-ah dahin 'sawldar'-ah an tang a. Chumi chung lehah chuan Sawldar ho thum vel hotu 'Kawmandar'

an awm leh thin. Chu indona hna sa hrang hrang thawktute zingah chuan Lebawr-ho chu an hniam ber zawng a ni. Mizo tlangval khaw tin atanga funn khawm za tam rual zingah tawh lah mi chi hrang hrang, zahnmwh sawi hrat tak tak te, phawk tak tak leh lungleng thei tak takte leh zu heh fe fe chenin an kim chiat zel tawh si thin a. Chumi karah mi sakhawmi zet mai lah bo bil na hek suh. Chung Lebawrho lah chuan fiamthu an dawl lêk mai lehngal a. Mi tinin tihd hdaah leh sawisak teha an hman hlawm thin avangio, khawilo nihna-ah êk hmu se la, "Hei chu mihring êk emaw ka ti a, Lebawr êk a a nih hi maw le," te hi an tikhum mai mai a. An ni lahin fiamthu an duh baw. An dinhmun hrianzia an insawi dan pawh: "Kawmandar a lo kel a, 'khawnge Sawldar?' a rawn ti a. Sawldar a lo kel ve leh thung a, 'khawnge Lebawr ho?' a rawn ti ve leh thung a. Keiniho chu kan tho tak tak a, 'khawnge ka nghawngkaw?' kan han ti a," tiin a: mahni ngei pawh insawisak tehah an iahmang tho mai.

Chu indopui lo thleng chuan Zoram hi a tihmasawn em em a. Lehlamah suahsuahna a punna chen chu awm baw mah se, khawsakna kawng engkimah a ti changkang a. Ni dang a tangka a tuallen loh thin tabul nen, sawrkar zarzo an lo tam tâkah chuan Lebawr takngial pawhin, "Khawnge, zirtirtu hlawn zat lek lekin zu i lei teh ang aw," an ti a, an thaw a yeng zaw phian a ni awm e. Chutih lai chuan sawrkarin sikul lam a la hna tel lo a, Mizoram si-

kul zawng zawng chu Kohhran sikul vek a la ni a, an hlawh pawh chêng nga chauh a la nih avangin Lebawrho hlawh la thawveng tawng awm tak pawh a ni reng reng.

Zoram chhungah ngei hian Kumpinu sipai chu indo turin an inbuatsaih mup mup reng a. Chung lamah lah chuan indo thlawhna chi hrang hrang chu chhum lo chat lovin a chhun a zanin a sawm têt têt hian khawchhak leh khawthlang hawi zawngin a thlawk muah muah reng baw a. Mizoram khawchhak daideng a awmte phei chuan inkap thawm leh thlawhna 'bomb' thlak ri pawh an hre phak hial a. Chû tih karah chuan sumdawng, leh hlawhlâm a thil zuar, indoa sum fuan bua ruh tumin mi thlabarna karah mi thenkhat chu an lo hmanhlel ve thung a. Khaw tin hrut a sum peiin, mawng pawh hung hman lo lêkin an lo phili ve thung tho mai.

Chutih 'lai a an tawag-lerh pakhat phei chuan Mizoram chhim leh hmar, chhak leh thlang a deng chhuak tak meuh a. Mian han koh a an 'eiih' leh, "Eiih' an tia(h), a kawmnawm awm," an ti a. An 'eiih' loh leh, "A'n eiih chuh lo a, a kawmnawm awm," an ti leh tho si a. Fiamthu khum awm leh awm lo thiu hlei lo hian a tuate pawh mai chuan putar putar pui puite pawh pawimawhawm fahranin an ko a. An eii emaw, eii lo emaw an ti zui tho si a, mi a tihrilhai thei ang reng hle thid. A lo rei deuh chiah chuan an koh a te zawk khan, "Ka eiih ngbakin min ko a, a kawmnawm awm thid,"

an tihkhalh leh ta thung a. Thutak mang mang sawi tur tin pawh an chutih chin luat avang chuan an inbe thei lo achhâ a ni. Tawnglerh chingho zingah pawh chuan Lebawr-ho bawk chu a ching hluar an ni. Kil tin kil tang hrut a chhim leh hmar dai dar bertute an nih avangin a pu darhtu tak pawh an ni.

Chu indona avang a mi tin mi tang inchiahpiaha karah pawh chuan, Kapthuama leh Rozami chuan tu dang mah lungkham chuang lovin an inhmanghaihna chu dul lai nei miah lova pawt mar reng chungin an inneih hun tur chauh chu an thlir dun a. Rozami lah chu tû beisei ngam rual a ni tawh lovin Kapthuama lah mi rilru nghet a lo ni a. Chu indona meuh pawh chuan an inkar chu chhetê mahin a khawih nghing ve phak lo. Nula thenkhatte erawh chuan an ngaihzaung te sirah hnawlin, tun hma kha zaung a an hming an hmel pawh an la hriat ngai hlein loh tlangval lakah an mualpho a. Vai khaw thleng thleng a lo um ta vawn vawn lah bo lo. Nula thenkhat Sap sipai lo nei tawh awm bawh. A awmeu zualte lah sum avanga Vai sipaiin an lo puanven hnan ta mai mai lah bo hek suh. Indona zet chuan a chhe lam a tha lamin Mizoram hmelhmanang a tidanglam hle mai.

Mizo tlangval sipai a an liam runpui tirha a pa-in kal ve a phal tak loh avangin Kapthuama chuan a hnu lamah pawh lehpek a nei ta lem lo a. Indona zarzo tum a mi tin an phet huai huai lai

pawhin khawi thuang mah zawh tum lovin mahni tualchhungah a lo uichum awm ve mai mai a.

Ni khat chuan vengah dandawi zuar sundawng pakhat a lo kal'a. Chu sundawng chuan Paite ram a indonā thuum thil thansan a tamzia leh an phurh thu chū, eng emaw titi remchangah huhip (hahip)-in a sawi a. Chu chu bria-in Kapthuama nī fapa Sanghleia chuan a bengkhawm ta deuh viau a, a zawt Chiang sauh sauh a. Sumdawngpa chuan, "Keini han kalna ber chu Tuikhiang a ni a. In kal ve duh a nih pawhin chuti lai bawh chu pan ula, bungrua na na na chu in duh a thu à ni mōi. Thil chi tin-reng mai hi a let rem rum mai a, itawm tak a ni. Amaherawhchu, lam a hlat em avangin it zawng ang pawh a phurh hleih theih loh pawh a. A hmun thlen menh chuan thil tha tak tak kan la hmuh ngai loh, eng a nih pawh kan hriat loh hi a tam teh a sin aw. It chawp apui kan ngah lutuk a, kal dawn a kan tum ang lah kan tum thei tawh hek lo, kan it lutukin kan let khawtlai atalangan lak tur a hlei hriat bar tak a ni. In peih chuan han kal ve mawh rawh u," a ti a.

Sanghleia chuan, "Japan an hlauhawm loh em ni?" a ti a. Ani chuan, "Hlauhawm teh suh a ngei, an that nak alaiin, tawog te kan inhre lova a chuti zawk mai pawh a. Chutih thu loah chuan kan han kal ve pawh keini ang rual chu barah min khawn reng reng lo. Kan darah min beng thep thep a, mi

an nuih ver ver mai a. Keini bungraw chhe duh angte lah chu anni tan eng khaw-kha a tangkai ni tawh hek lo, chu lamah chuan hlauhawm awzâwng lo mai," a ti a.

Sanghleia chuan kal ve chu a châk ta hle mai a, a thianpa nen kal chu an tum dun ta a. Buh an seng zo a, ral zual lai a nih avangin buh pawh ni dang ang a chhêk an tum hlwm lo a. A hu-ho a chhêk sa lovin a him lai ni-a an rin lai deuh deubah an thukru hrang vek a. Chutia buh chhêk an tum mumal loh avang chuan Sanghleia chuan a pu Kapthuama pawh kalpui atan a sawm ve a. Ani Kapthuama chuan a châk vak mang lo a. Mahse Sanghleia chuan tihtak zet hian, "Tualchhungah i tawm sen reng mai a, tun ang ram inlumleh lai han angah te hi chuan hawi zau nan pawh a tha a law n. Mite eng angin nge an insingsak hriat nan reng reng pawh han kal ila. Spaiah kan tang ve tawh si lo, tuna sawrkar zarzo ve kan tum loh te chuan mi hau kan um bik ang a sin. Nang alo a, thlasik chak i ang mai a mahni kaw tawp a tan khawh rikngawt mai chu a tunlai tlangval hna lo em mai. Rozami chauh hi i ngaihtuah a nih hi, tuman an neih khah lo ang che. Kan han kal ang a, kawng tha zawk pawh kan hriat ch'uah phah mai thei a sin," tin a sawm ta heuh heuh a. Tih tak hmaipu a Sanghleian a sawm ve tâkah chuan Kapthuama pawh chuan kal chu a tum ve ta a.

Kap̄thuama chuan chutia tum lawkna pawh nei hman lova khawchhak zin a tum thut thu leh a lo haw veleh a inneih a tum thu chu lekhain Rozami a hrilh a. Tichuan, a ni fapa Sanghleia leh mi dang pakhat nen an pathumin an kal ta a. Kawng laka Tuikhiang kal hmasa haw(ng) an tawhte chu an hlawh-thing viau hlawn a. Anni pawh chu phur tak leh thatho takin an kal ve ta zel a. T̄iau lui an kan lai chuan tute emaw hian lekhathem hlai vak lo inang vek hi T̄iau kam chhak lam kawng dungah chuan an thlahh kawngtluan mai a. Anni chuan eng a nih pawh hre lo leh a lamdan deuh reuh avang chuan an chhar a, eng a hmanah ti lo lem lo mah se, an ak mai mai a. Tuikhiang chu an thleng a, sumdawng-pa sawi ang ngei chuan bunraw chhia na na na chu duh a thu a ni mai a. Lam a hlat em avangin an-ni thian-zaho chu an duhtui deuh hlek a. 'A la tangkai takin' tih thil ringawt chu lak tum lovin an fang kual an fang kual a. Nakinah chuan Kap̄thuama chu a vak hrang ta deuh a. Chutia a vah hranna lamah chuan 'parachute' (parasut) puan tha em em mai chi hi an lo vawm vum hnuk mai a.

Chumi lakpui tur chuan a thiante chu a han au a. A thawm hria chuan a liam lawk a Japan sipai pathum chu an lo kal a, Kap̄thuama chu an rawn din hual titih a. Pakhat chuan eng eng nge a lak tawh ti ni-awm takin Kap̄thuama ip̄te chu a han zen sak a. Biskit (Biscuit) fun leh kawrkilh thil bawr tam deuh, mai bi a han khai chhuak a, Kap̄thuama en

chung chuan a nui var var a. A dab leh pahin a ipte mawng chu a han dap leh a. Kawng laka an lehkha them chhar a ah tak mai mai kha a han phawrh chhuak a. Japan sipaite chuan an bial ta lat lat a. Chutah eng khaw sawi set set lo chuan a palian ber an hotu ni-awm tak chuan Kapthuama chu a mit a dumde leng chuai khawpin a han beng chawrh mai a. Kapthuama chu a pai chawn chawn a. A chutih lai tak chu ral atangin a thiante khan an rawn hmu a. Chutia Japan sipaiin Kapthuama an ben tak vak avang chuan anni pahnih chu an inlan ngam ta lo a. Kapthuama chu hneh fahran mai hian an kai liam ta hlawk hlawk a. An liampui fel chiah tihah chuan silai a ri ta thuai thuai a. Chu velch an ni thian dun chu baklêngin an tlanchhe ta a. A tihngaihna hre tawh hek lo le, an duh ang pawh la hman lovin, Kapthuama lah a thih ngei ringin an insiam sawk sawk a, an haw ta vang vang a.

20. "HMANGAIHNA HI KA TAN HMELMA"

— *Rozami*

SANGHLEIA te thian dun haw ta chu beh-hil leh hrilhai em em chungin, Kapthuama rawn um phak leh beisei ngam chiah si lo, beisei ang reng chung siin kawngtluanin an tawi khaw-muang eltiang a. Mahse eng riva mah a awm theih si loh avangin thlabar lungchhe tak leh inchhir ru ngawih ngawih chungin an kal zel a. Sanghleia pheii chu a tap kawngtluan a ni ringawt a. A pu ngei a nih a hnunhmanah a hneh chung chung a sawm chhuah lau lau a nih avangin a mawh a inphurh lo thei lo. Kal ye tura a sawm ta kher kher chu a inchhir tak meuh a. Mit a hmutu a nih ahnunhmanah a damaia a, thih a rin zawk si avangin an khaw thlen hlan pawh a nghakhlel lo ngei mai. Mahse thlen loh theib chu ni si hek lo, rilru kim lo zetin an kal zel lo thei bawh si lo.

An khua an thlen ni pheii chuan en lai pawh a lut ngam lo-in daiah khua an nghak thim te te a, zanriah bawp man hman tawkin an khua chu an lut a. Sanghleia te thlen zan tak chu Thanthuami zin chho-in Sanghleia te ina chaw a ei zan tak a ni a. Sanghleia chuan thu dang engmah a sawi hma-in Kapthuama chanchin chu a sawi hmasaber a. A sawi veleh a nu chu a tap ta a. A tap thawm hria-

in thenawm an lo zuang lut a, Kapthuama pa te pawh a rang thei ang berin an hrilh nghal a. Hlunchhungi tap bang hlei thei lo phei chu a han tap chau leh rih thin nen. Sanghleia chaan, "A thi chiah tih phei chu kan chian bik hauh lo a nia 'mai thei' tih thu lek a la nih chu. Hriat chian loh lamah kan inang tlang vek a. Rawn chian leh zual pawh ka duh hle na-in a ngamawm tawh loh em mai a. Pathian zarah dam tē-in a haw pawh a la rawn haw leh thut mai thei." a tih lai chuan Kapthuama pa chuan, "Pathian thu thu le, an hruai liamna lam a silai a rik thuai thuai zawngin dama a lo haw loh beisei ngam a har ta deuh a nih chu," a ti koh koh a. Sanghleia chuan a rin dan chiah a sawi duh lem lo na-in, a ni pawhin a dam ai chuan a thih a rin? zawk.

Thanthuami pawh Hlunchhungi bawisawm hlei thei bik lo-in a hruk a hruk sen 'ohin a mittui a thi zawih zawih reng a. Chu thu chu a hriat phat atang chuan a rilru-in a thiannu Rozami a hre hme-saber a. A chanchin chiang a hriat ni ta si lo chu, thi neih a neih loh theih pawh a nih tâk loh avangan ring phal lo tak chungin thi neih chuan an han neih ta phawt a. Mahse thi tak tak neih a neih ngawt chu an phal meuh bawk si lo. Tichuan, rilru pang-khiang tak leh ngaihngam lo tak chungin, ngaihdan fumfe nei thei mumal chuang bawk si lo rilru tung-khang takin an awm ta ngawt a. Sanghleia thlen hnu chuan Thanthuami chu ni thum emaw a han

cham leh a. A hmaa a lo cham rei deuh tawh avangin an unau chuan rilru rit t̃euh chungin an haw ve ta a.

Rozami zanriah ei khamin an buh leitu turte a tuk a teh chhuah an tum thu a hrilh haw lam chuan, a t̃hiannu te ina a t̃hiannu aw ang tak a hriat avang in, ani Thañthuami zin haw nghakhlei a ring lo fan lo fan ta si chu a t̃hiannu a nih beiseiin a lut kawı zawk a. Thañthuami chuan a hmuh veleh a lo ko vat a, an inkuah chuk chuk a. Khumpui lu zawn thingrem a t̃hu dunin, Thañthuami chuan a thu hawn, Rozami tan a ngaiht̃hlak chakawm l̃oh ber mai chu, harsa titak chung leh sawi thiam ngai titak chungin a hrilh th a. Rozami chuan mittui tla zawih zawih chungin ngun takin a lo ngaiht̃la kiau a. Thañthuamin a sawi zawh veleh chuan ngawi rengin a tho a, kawmchar lam a pan a, leikapuiah a chhuak nghal a. Hman a an lo inkawm tawhna t̃hin, leika pui chhak lam, diso farfem zawn aia chhung lam hret ch̃ar bang ngheng a hmarchhak lam hawi a an t̃hu t̃hinna l̃ai takah chuan a tlu tawp a, a t̃ap ta cha char mai a.

Thañthuami chuan a t̃hiannu chu a um chhuah thuai a, a han pawm t̃hu a, "Zam̃thian, t̃ap suh a. a t̃hih chiah pawh hriat a la ni lo a nia, dam tak a lo haw leh m̃ai thei a sin. A pa te pawhin a neihin an la neih hlei nem. Ka sawi veleh ka p̃hei chuan, 'a la t̃hi lo' tawp ang, min den dana

ka hre mai,' a lo tithuai nghe nghe a. Heti ang
 thilah hian ka ou hian thil hre dik thei deuh a sin.
 Chuvangin, nang pawh thlaphangin lunglohah la duh
 reng reng sah. Dam taka a lo haw ngei a nia ka
 rin," tiin a hñn hnem a. Rozami chuan mittui tla
 zawih zawih chung hian, "Dam takin a lo haw leh
 zên a nih pawhin a tan ka tahna mittui hi ka ui chuang
 lo. Lo haw tur a awm ta lo a nih erawh chuan,
 ni eng khi ânchhia min lawhtu a ni kumkhua tawh
 ang a, zan khawthim lah hi an than tur ama thlan
 an laih hmasaktir tluk zetia a thathothlak loh dawn
 baw si. Aw, Thuamthian, 'Thla Hleinga Zan' hi
 ka tan chuan mittui thlem chhuaktu zualko, hrem-
 hmun meipui eng ang lek a min hremtu zan khawn-
 var mit leh ngai tawh lo tur a ni zo dawn ta a nih
 chu. Favang khaw thiang leh khuangchawi thla fang
 vanglui te chu, ka thihna sar zam ai pawhin hñuh
 a hrehawm tawh zawk dawn si a.

"Thuamthian, in leikapui chen hian thihna ko-
 tlang a min hnuk hnaitu a tling zel tawh dawn zawng
 a ni maw. Aw .., ka va han vandui tak em... ..!
 Hmangaihna hi keia tan ve zawng 'hmelma kumhlun'
 mai a lo ni ngai maw ! Mittui chauh min duhsak-
 tu, damchhung nan hrehawma zawng zawng min
 punh maw ntirtu lungphum chu hmangaihna hi maw
 lo ni ngai? Hrehawm ka va han ti tak em! Thuama,
 Touama, dam takin lo haw leh ta pawa ni la, chuti
 khawp a thih hlauhthawna hmun a i tla lut ta chu
 i tan mittui ne a i thlavang lo hauh a, i thla lo

hual chu kei hian ka ba reng reng a sin. Awi...! kei zawng Thuamthian, hrehawm ka ti em mai ka ti.. i.. i...i," ti tlawk tlawk chungin a tho a, a han inhuith mam thuak thuak a. Hnarping tah rawl teh chung hian, 'Leng rei hman pawh ka ni si lo, ka va hawng ta'ng e aw. Ka va han ngai teh lul che em!' a ti-lawm lawm a.

Thanthuami chuan, "Thiam takin tuar tum ang che aw, Zamthian, engmah thlaphanna tur a la awm lo a nia, a lo haw leh mai ang, tui takin mut tum hram hram ang che. Naktuk eng nge thawh i tum ang?" tjin a han zawt nghal a. Rozami chuan, "Tuar thiamna hi hmangaih te vanduai tawh thila ka tlakchham ber a ni hial awm e. Mahse mio hmangaih lotute mitmei ven a tulna hi ka tlakchham min phuhurutu a ni thei thung a lawm le. I e, naktuk chuan buh teh chhuak a lo lam kal kan tum a. Mahse lo haw thuai ka tum ang, kan inhmu leh ngei ngei dawn hia, mungtha," a ti a. a haw ta hngang a.

Hun a lo kal zel a, Krismas leh kum thar pawh an hmang liam ta hial a. January thla pawh a ra leh ta a. Mahse Kapthuama chu a chanchin hri reng teng tumah an awm thei ta lo a. Chu leh chanchin pawh 'Puellanga thlang tla' an sawi ang va-
rang a nih takah chuan an bei pawh a dawng iin
a leh hian a. A nru nghing lo ber Than-
a dawng pawh a ni dawng thu a sawi chhuak

HMANGAIHNA HI KA TAN HMELMA 233

ta hial a. Rozami chu a khawngaihthlak em em mai a, inchei pawh tum lovin a ta mai mai a. Nihlat chu an unau-in pawldelh-ruah sur hmehhawn(g) lai hian chul an kal dun a. Chu an chul kawng chu kum hmasa lama an thlawhhma lam bawh, a aia hla zawk mah a ni a. An chul kawng chuan Thanthuami te lo hlui, an thlam bul setah a hrul phei a.

Thanthuami te tul, thlam hlui bul a an unau a an kal dun lai chuan, kum hmasaa Kapthuama riahna thlam hlui chu tul-bawa hrui buk chuan a lo bawh luk tawh a. Chungte chuan Rozami lung chu a tileng em em mai a. Manilomah a, ni dang pawh a chu thlamin a rilru a tithar thin tehreng nen, chumi tum meuh chuan a insun zo mawh lo a ni. Thlamram, tah tichhuak leh nun hlui mual lian hnu dawn thartirtu a chang zo ta si a. A khua a har ngawih ngawih mei a, khua lah chu a thatin a tha vawng vawng mai a. Pawldelh-ruah tlenfai romei kian hnuah dawn titam tawh lekin romei thar ziang tan tir chuan tlang a zem hnam riai a. An unau te chuan an kal zel a, buk hlui lumtu thuro te chu an thawng darh chiaia chiaia a. Ramriah-sumkhamphei hrul a sum fuan bul buate chu pawldelh-ruahin a lo nan to tak chiik chek a.

Pawlbuk hlui tual laia a khawkharg zawng a ram-suk lo tlu ral te, hman a hlim em em a an buk lum hlui te chu, chhun lamah chungleng savaten duh tawh a an chen hnu-in, zan lamah zupawl rualte

chuan ei rel nan an lo hmang ve thung tihhriat reng
 bian, pawlbuk thuk hlui vut leh tuallai leiah te chuan
 an hnu a chuar dip dep a. Chu hun khawharthlak
 takah chuan Rozami chuan engti kawng mah a lung-
 awina leh himna hmu zo tawh lovin sulhnu hlui
 chu a chhui zel a. A chung a thil lo thleng leh
 inmu chu na a ti lutuk. Khawvel vanduaia zawng
 zawng chu a tan a rawn inhnawk khawm ta hialin
 a hria a. Eng pawh thawkin khawi kawog pawh
 zawh mah se, a tan lungngaihna phurrit a chang
 zel tawh niin a hria a ni.

Chutia chin hriat loh a Kapthuama a reh vang
 vang lai chuan Rozami chuan inleng a nei leh ta a.
 A inlengpa chu Rozami pa duhzawag mi tak mai,
 an khaw mitha leh challang ber pawl a an neih kum-
 khua thin Pachuau saphun Ngurhnema fapa Thanseia,
 sipai bel hnih kai a ni a. Tun hma atang a Rozami
 lo hmel duh ve em em thintu hi a ni reng a. Chutia
 inleng a nei leh ta chuan Rozami chu a timangang
 em em mai a. Kapthuama lah chu beisei ngam rual
 loh in 'a khuangcher bo' a ni ringawt tawh bawk si
 a. Sanghleia te lah chuan Kapthuama an malmak
 avanga a thi lo pui thi-a sawi duh mai tur chi lah
 an nih haub bawk si loh avang a, ngaihngam taka
 Thanseia pawhin Rozami chu rim ngam a ni tih chu
 hriat sa a ni. Rozami lah chuan Kapthuama ber
 beisei bo a ni tawh berah si chuan a pa duhthusam
 a lo thlengin, Thanseia chu nei turin a tir lui dawn
 tih a hre kar mai si a. A rin ang ugeiin a pa
 chuan a tir ta teh meuh mai.

A pa chuan, "Rozam, hetia khawhar tak a awm reng ai chuan tun a i inleng hi tlasemin nei mai la tha berin ka hria. Ani Kapthuama chu awm se zawng mi dang tu han mitsir ngam tur kan awm hauh lo a. Mahse ani ber a awm tak si lohah chuan tu dang kan phu azeng a ni chuang lo a, engtin nge i ngaih ve reng reng? Kan inrem mai dawn lawm ni? Thu pawh muanchanpui chi a nih loh hi," tiin ni danga a tawngkam ang lo takin a han zawt khaw mawi vei duai duai a. Rozami chuan, "Ka pa, rei-lotê tal min nghak thei lul lo em ni? Kapthuama ka neih hi in remtih tawh rau rau si chuan kumin tal hi chu nghah ka tum a ni. A thuhrimah kan chhungkaw chung a tlawmngaihna leh hmangaihna lantir zozai kha zahawm kan ti theuhin ka ring a. Amah lo haw tur a awm tawh lo tih lo hre chiang teh reng pawh ni ila, kumin chhung tal sun hi chu mawi ka ti zawk reng reng. Keia duhdan tak phei chuan ani ka neih loh rau rau si chuan pasal lova awm mai mai hi ka thlang zawk," a ti a.

A pa chuan, "Ngun takin ngaihtuah la, i tana tha turah lo chuan kan tir dawn hauh lo che tih hria la. Tun a thil tihfel nghal ka dub nachhan pawh:— Dik takin Kapthuama chu dam tê-in lo haw leh pawh ni se, ani neih ai chuan Seia neih chu i tan nawmsakna zawk tur a ni ang tih chu nang pawhin i hai hauhin ka ring lo a. Kan hmuh phak ah tualchhungah in hrang i changin, nupa tualthu ebhiat chang leh vui leh vaina kan hnenah i thlen

zung zung thei dawn a. Khuandim a pasal neite chu vanlai a tla ang an ni tib kan briat hnu a nih avangin, kan hmangaih vang che leh kan duhsak vang che a nih hi. Kapthuama zahawmna chu kan hai awkawng lo. Mahse sawi bova a awm takah si chuan a rang lam a thu kan pawhchah mai a dik ang. Thla khat chauh chawlh hmu a lo chhuak a nih avangin muanchanpui hman a ni lo, thu i pawtchat mai ang aw," a ti leh a.

Rozami chuan, "Ka pa, i mi tirhna chu ka nawmsakna tur niin i hria pawh ni se, hmangaih loh te neih chu ka tan nawmsakna a awm chuang lo ang. Pasal ka neih aini Kapthuama avang a ka len rih chu vangtlang pawhin min thiam zawk ka ring. Ani chu lo haw tur a awm ta lo a nih leh u Seia pawh chuan min duh ve takzet chuan a nghah pawh min lo nghak ve turah ka ngai. Hei, kum tin lo chhuak thein a awm a, kumin-ah la la pawh kan ianeih nikhua a tlei na'ng," tiin a han knial leh a.

A pa chuan, "Ka hria a lawm, Kapthuama chu zahawm em em mah se, a lo haw leh lah tu'n an ring dawh na hek lo a. A kalpui, mit ngei a hmutu a ni fapa meuh pawhin a dam aia a thih a rin zawk si chuan kumin lo nghah pawh chuan awmzia a ne lo ang. An thi ngei a dam tib pawh briat hleih loh lo sakpi ser nghah ngawt chu mahni hamthatna tu leh nawmsakna tur puangpeline mai mai a ni. Tu ang a do baaina karah Seia te pawh nakkuin lam. pui kni chuan a lo chhuak leh thei ang nge thei."

ng tih pawh chin hriat a ni lo a. A rana rana lo, ahni thu-a awm an ni lo vei nen, tifel ila a ni mai," iin a han nawr leh a.

Kapthuaama awm loh denchhenin a pan Thanseia iehtir a tum loi dawn tih a hmuhin Rozami chuan, "Kapthuaama chu dam takin lo haw leh thut si se, keiin pasal lo nei hman tawh si ila, inchhir leh khawharin ka thi thei hial mai lo ang maw? Heti reng reng a ka lo piang vanduai bik hi chu, lo piang lo law law ila tha tur," a ti ngawih ngawih a. Chua-tah le, a pa chu a ling ta thut mai a, "Sê sê sê. tih a ngai lo, 'ka hreh e' te ti chai suh, i nei dawn khawp e. Kha leh cher kha i thu-in kan kal tawh a, tunah zawng i thu ka ngaithla dawn tawh lo. Ka thu a ni, chhuan-lam zawng chai suh," a ti han hê hmuk a, a kalsan ta a.

Rozami mangang chu a uindang tawh Rohnuna hnenah a kal ta ringawt a. "K'u Hnun, nang talin ka pa hnenah thla khat tal ka nehah min dij sak thei lawm ni? Reilote-ah Kapthuaama hi lo haw leh dawn hian ka ring rilru tlat reng si a. Chumi hnu a thawn engmah a awm loh tâk leh ka pa thu ang pawhin ka kal ta mai lawng," a ti lawm lawm a. A u chuan, "Lo haw leh mai tur a i rinna chu i duhna avang mai a nih ka ring a. Lehlamah Seia lah chu thla khat chauh chawh hmu a lo chhuak a ni a. Tunah nei kar khat a ral leh tawh a. Ani Kapthuaama chu awm ni se, khawnge len pawh a rawn len ngan teh-

lul ang ni. A awm tak si lohah chuan, ani lo duh der ve em emtu che chuan a rawn beisei ngam ta che a ni mai a. Hetia khawhar tak a awm ai chuan nei mai la i tan khawhar hnemtu a ni zawk ang. Ka pa pawhin Kapthuama pumpelhtir che a tum avang a nawr che a ni lo a. I pumpelh tawh avang zawk a tir che a nih hre thiam ta che. Ani ber beisei bo a nih tawh si chuan i kal mai hi kei pawhin tha zawk in ka hria," a lo ti ve leh a.

Chutah ani Rozami chuan, "A nih leh tunah thu pawtchat rih lovin, kar khat chauh min lo ngaithla leh turin ti ila, kar khat hauh pawh riva engmah a awm theih loh leh in thu ang pawn chuan ka ka teh poh ta lawng," tiin a han ngen leh a. A u chuan "Thanseia a hmanhmawh tawh si a, kar hnih chaul tih theih hun a nei tawh a. Kohhran dan ang a in nei tur tad chuan kar khat chhung tal lehkha tar tul lo thei dawn si lo. Chu pawh chu sipai chawl kal leh hmanhmawh tur a nih avang chauh a Kohhran ngaihhnathiamna a ni zawk a. Tualchhung awm chu ni se a eng a pawh a ni tur a. Chuan, ng puitling takin i rilru siam la, naupang chhia paw i ni tawh lo a, awm lo ngen a tap rual lah i ni taw hek lo. Mibring hi nupui pasal nei tur a piang ka ni a. Mahni tum tawh i he lova nei hmasa apian mai hian fa tha an chawr hma ting mai a ni. Nang phe chu nei hma pawh i ni tawh lo a. Chvargin, nghet takin i rilru cha siam fel law law !

ka pan thu a pawhchah diam tawh kha," a ti ta mai a.

Rozami chu a mang hi a ang em em ta mai a. An in lama a va haw leh chuan a inlengpa Thanseia pawh a lo to vang a Mahse kam khat pawh a be lovin inchar lamah a pheisan nghal daih a. A pa chuan, "Rozam, khata va inthiarfihlim daih tur em ni? Lo pheirang rawh," a ti khur khur a. A pa a hlauh vang chauhlin hreh zetin tapchhak lamah a thu pheirang ta a. Chaw fak hun vela an inlengpa a tin veleh chuan Rozami chu Thanthuami te inah a kal a. Thanthuami chuan "Zamthian, Biak-in bang chu in tial ta nge nge maw? Nichin khan tlangval ho-in an sawi a, 'tun maiiah khan kan Kohhran upa-in a tar lai kan hmu a,' an ti a," a lo ti a. Rozami chuan, "Awi kei zawng, Thuamthian, chu pawh chu ka lo hre ve hlei nem, hrehawm ka va han ti tak em! Heti leh mai tur si eng a ti nge Thuami khan a chhan pawh min lo chhandan? Keini tehreng pawh engin nge min mawh a kan lo koh buangbar tak chu aw...? Midadang neihsan leh mai mai tur hian ein ni khati khawp a hmangaihna kan lo um dun? A ni lo, a ni thei lo, vanluaina sal a tang tur ringawtin a ni maw ka nu leh ka pa hian min hri?" a ti vawng vawng a.

Thanthuami chuan, 'I hriat lohin a ni maw lehkha pawh chu an lo tar?' tiin a zawt a. Rozami chuan, "Ka hre lo, engmah hi ka hriat phak a awm tawh lo. Vawjin ti te hian a thlarau chuan min rawn hmu reng awm si a. a lai a na-in demawm min

va hah ti dawn tak em! Chhungte hnial thlakna fung tur lah ka haihchham zo tawh si. Thuamthian, Thuama ka neih loh rau rau chuan, kei chu nung damin min hmu tawh lo ang," a ti a. Thanthuami chuan, "Chung thleng thleng a ngaihtuah chu a tha hlei nem. A nih leh nang lo awm lo ta la, Thuama hi lo haw leh ta thut si se, engtin nge Thuama chu a awm ang? I khawngaih lawm ni? Lungleng khawharin a thi ve tho thei hial lo ang maw?" a han tih chuan, Rozami chuan, "Chu tak chu ka thil hlauhthawn ber chu a ni si a lawm. Amah avang a mi dang zawng zawng ka hnarthlak hnu-in, a mi hmangaihna chuan amah duh lotu thinslung sak chu a su nem a. An hnial ngam rual lohin a tlawnngaihna chuan a kutkawih liau liau-in min thawk chhuak a. Hun nghahhlelhawm tak chu vauchher dunia tun hi kan thleng a. Mahse a mi hmangaihna-in a hlawh chhuah leh si chu: Thihna aia tuar brehawm, damchhung tahna, thih ni pawh nghah thlon huphurhaawm hial khawp a damlai hremhmun. Aw... engah nge tum loh leng tan ringawt a min lo chbandam chu ni le. Ka chhungte lah chuan a mi phu ve rengna avang chaubin duhlohna aw an sum a, a thihna denchhena an duhthusam tun din na, dichimpa tilu nen tirh luhna hmanrua-ah an hnang ta si a. Aw... tunah te hian lo thleng ta phut mai se..." a ti vawng vawng a.

Thanthuami chuan, "I rilau brehawm dan tur chu ka hlat thampui khawp mar che. Mahse ani

ber beiseiawm a nih tawh loh ber aliamah a lung-
 lthe zawngin ngaihtuah duh ma ta che. Tun a mi
 hjin a hmangaih ve em em tho si chia. Anmahni
 ah an neinungin an khawsa thei si a, i nuamsa
 "awkw daih ang," a han ti dêk dêk a. Rozami chuan,
 "Thuamthian, nang leh zelin chuti zawng chuan min
 ti suh aw. Ka hlimna hi sum leh pai a innghat a
 ni lo tih chu i hai hlei nem. Engah nge chutia min
 tawngkhum? Khawvelah hian retheihna leh hrehawm-
 na chauh lo chu hmabak ka nei ve lo a nih hi. Ka
 lo piang ve hi chu a va han pawl ber mai tak em ..,"
 a ti vawng vawng a. Ngawi reingin Thanthuami te
 kawmchar leikapui-ah chuan a chhuak a. Kapthuama
 nen a an inkawmna thin leikapui chhak lam kil
 dithlifarfem hliap hnuaiah chuan a indawm kun ta
 tlawk tlawk a. A tan khawvel chu tawpin a hre
 tawn a, thih chauh lo chu hmabak awmin a hre
 tawh lo.

A pa lah chuan Rozami chu a thi a nih ngawt
 loh chuan engti kawng mah a thulh a tum baw lo a.
 Rozami mitmei an hmuhin ngaih that lohna ruk an
 neih avangin an inneih dawn zan a man leh mual
 an hlan a, manthang eitu lainate pawh an tin hnu
 atang chuan Rozami chuan tum loh loh a tum ang
 tih hlau-in zankhua-in an veng tlaivar tak meuh a.
 Rozami lahin chhin khat mah a chhing baww hek lo.
 A tuk an inneih ni tur tukthuan ei hma chuan a
 thiannu tur Lalpianmawii chuan a rawn tlawh a.
 Rozami te tukverh leikâ a ding dunin Rozami chuan,

"Mawithian, mite zawngin nupui pasal neih ni hi hlimna ni-ah an chhâi thia a. Mahse keia tan zawng damchhung hlimna tur ka phum bona ni leh lung-ngaihna tawpintai nei lo nun hrehawm a ka luhna ni a inanna a ni thung dawn a nih hi. Nizan a i haw hnu khan tlan bo daih tumin ka inbuatsuih rilru reng a. Mahse ka chhungten ka mitmei an lo hriat thiam avangin min veng tlaivar ta ringawt a. Ka tum dan chuan: Thuama te khaw lam ka pan ang a, amah awm tawh lo mah se, an in chhung ringawt pawh tun ka dinhmun ahi chuan vanram a ni ringawt dawn si a. Chumf chhung chuan he ka pasal neih tur hi pumpelh thelin ka inring a.

"Ka lo tum dan pawhin kan inneih dawn zan chiah a tum ka ni sa reng a. Mahse a tum a tum rual lohni miq veng ta bur mai si a. Aw, Mawithian, khati zat hrehawmna kba a sut tlang hnu-in ka dawm hlum pawh hlawh lovin maw leilung min chansan? Ka va han ngaithiam lo tak em! A mitmu pawh a keh hma-in kei lah chuan mi dang lakah ka rinawm lohsan dawn chu a ni ta si a, min dem ale ang ti rawh. Mahse eng thil mah hian ka hmangaihna h a chiah da dawn si lo. Chiah dak a hnehin min tihrehawm deuh deuh dawn chauh zawk a nih tak hi. Kei zawng ka sual a ni, ka thiam loh vek a ni A nih pawh la ring obiah si lo hi engah ng hman a hman a ka tlan bo loh? Mawithian, ngaidan rawk aw? A ni dawm dawm a!"

Pianmawii chuan, "Thiam lohna engmah i nei hlei nem. Ani lah beisei bo a ni tawh a, nang lah mahni duh avang reng a kal tur azeng pawh i ni bawh si lo. Thuama pawh lo haw leh ta teh reng mah se, engti kawng mah a demawm i nih theihna tur a awm lo. Chu lam ngaihtuah ai chuan intihlim hram hram zawk la, a lo haw leh ta a nih pawhin ta tan pawh kan lawmthu a ni theuh ang chu. Nang a tan tak hian a sin hmuh leh chakawm ang ni. Hlim lo duh reng reng suh. Thil a nih tur a nih tawh hi chuan tuar thiam apiang hi an nihlawh ting mai a nia," tiin a thiam ang tawh tawkin a hnem ve ringawt lo thei tawh bik si lo. Rozami pasal nei tur chu chhungkhat laina zualin a khalhin an khalh chhuak a ni ber a. Thanseia tan pawh thanatna rawih khawpin a hlim lo a ni.

Chu an inneih ni tlaiah chuan mikhual sumdawng pahoih hmar-khawchhak lam tlängval hmeh fel tak tak hi Thanthuamiten an mikhual a. Zanaah chuan mo an lawm ve a. A tuk a tukthuon an ei lai chuan Thanthuami chuan, "Nizan in mo lawm chu hmehtha in ti em?" tiin an mikhualte chu a zawt a. Pakhat chuan, "Ti khawp mai, tu nge ni kha, khawchhak khaw pakhat a kan rim tawn, kha nen khan an inang khawp mai lehngal a," tiin a thianpa chu a han zawt a. A thianpa chuan, "Chuti ngawt chuan ka va han hre lo, khawchhak lamah nula kan rim tam si a," a ti a. Ani chuan, "Kha maw le, an khaw hming pawh Paite khaw hming deuh tak, Japan

man tlan chhuak mikhual tlangval pawh an neih kha. Tlangval hmelchhe lo tak, kan nula rim pawhin, 'A dam sam mang lo a, a cham rei tawh ang reng.' a tih nghe nghe kha," a han tih tâkah chuan a thianpa chuan, "E, kha nula nen khan maw, an inang khawp tak e. Mahse nizan a kan mo lawm kha chuan puamruaah a tiat lo deuhin ka hria," a ti a.

Chutia Japan man tlan chhuak leh thu an sawi tâkah chuan Thanthuami te chuan an bengvar ta hle mai a, an zawt dilchhût ta viau a. Anni chuan, "A., chutin lo zawh chian nachang pawh kan lo hre hlei nem. Nula rim a zan khat chauh leng kan ni bawk a, nula lo chu bengkhawn tehchiam nei lem hek lo i. Chuachhapah, kan bengvar loh chu thu dang ni se, min lo zawt lehtu an awm ang tihngaihna reng reng kan lo bre lem lo bawk nen. A va paw ve, a hmang kha chu kan nula rim a koh ka hriat dan kha chuan, 'U Thiang,' a ti nge 'U Thuam' a ti zawk pawh ka hre lo, mahse chuti lam hawi a thluk phe a ni phawt mai. A vawi khat koh hria chauh kan ni a, lo uksak vak loh nen, in va bengkhawn ve, eng tizia nge ni ta a?" tiin a'n zawt a.

Thanthuami te chuan Kapthuama chanchin leh an inchnghkhat dan te chu a hrih ta vek a. Mikhualte chuan, "A nih chiah chu, amah pawh tlangval kan zo, zawt, hang ngaihnohei tak, zai pawh a thian ang reng lu a ni. Kan lenna kawmchâr lei kapuh chuan ring vak lo hien a zai a, kan lo ngai-

thla thap mai a, thiam kan ti teh a sin. Chutia
 'kan pu' in tih tâkah chuan a an pawh in inang
 deuh tak e. He in tlangval nen pheih chuan inputu
 lehzuat tak an ni," an ti a. Thanthuami nau tlang-
 val leh Kapthuma chu an inang hle mai reng a.
 Thanthuami chuan, "A nih leh in hmuhna a rei tawh
 em?" tiin a han zawt leh a. Anni chuan, "Rei uk
 suh ei, kar hmasa mai kha, tunah pheih chuan a hawn
 pawh arawn hawng thla ve tawh mahna, amah pawh
 a dam viau tawh kha. He lamah kan kal dawn tih
 te pheih chu hria se chuan kan rual a kal emaw, thu
 tal mi chah emaw a duh ang chu. Keini bengvar
 ta lo chuan min be lo chu be ta'ngei kan ti hlei lo
 a," an ti a.

Thanthuami chuan, "Bengvar loh a i â pawh a nih
 loh chu, chuti ang nula inah te zawng tuman an beng-
 var bik lo ang, in rawn hriat chian viau zawk chu,"
 a ti ve mai a. Thanthuami te chuan dam takin Kap-
 thuama a lo haw leh dawn tih an hre chiang ngam
 ta a. A pa te pawh lehkha a hrilh tak an nâp na-in
 mikhual te chuan a lo thlen tawh hial pawh an rin
 avangin an hrilh ta lem lo a. Thil a nih tur tur a
 nih zawh tawh avangin Rozami pawh hrilh lem loin,
 ama hriat hun hunah hre ve mai se, chuti lo chu a
 pasal mithmuh laia a mualp^ho mai pawh an hlahu-
 pui deuh a ni.

Chumi ni chiah chuan Thanthuami nu leh Pian-
 mawii nu chul kal hawng dun chu in an thlen dawn
 hnaihah an hnungah Rozami tuichawi chuan ngawi

rengin a umphak a. Pianmawii nu chuan, "Thuambuwihinu, chawnteum chi kha i la kawl hlek em? Kumin chu chin ve ka duh deuh ka ti," tiin a han zawt a. Thanthuami nu chuan, "Ka la neih hlek awm kha maw tlem chu. Mi'n min pawh darhsak nasa a, ka roh viau tawh a. Kapthuama nu min chi chhuah kha a ni a. Min chi-chhuah tu ber lahin min boralsan leh ta si a, a chi ka khawl tawk tawk a. Chutia i duh ve chuan nakinah Mawiteii i rawn lam tir dawn nia. Ngawi teh, kan thu dang a la chuan, taka ka va han a em! Sawi nachang reng reng ka lo hriat loh chu. Kapthuama kha dam tein a lo haw leh dawn awm e, tiila(h), a chianna fak phei zawng a la awm lo na-in, nizan a kan mikhuat ten an hmuh thu an sawi a. An sawi hmangin Japan man tlan chhuak a nih bakah a pianhmang leh a kimtlang te, tin, a hming chiah an hre fuh fak lo na-in an hre teuh khawp mai a. 'In chhungkaw hmel nen pawh in inang khawp mai,' an ti leh zel a. Ani Kapthuama lo chu tu va ni suh, kan ti mai Tunah chuan a thlen pawh a lo thleng thla tawh mai thei, an sawi dan hmangin. Khaw kar nei deuh ngang hi kan pi a, kan la hre lo lek pawh chu a n mahna," tiin Kapthuama chanchin an hriat thar thu chu a hrih a.

Unuua Kapthuama lo hawn leh tur thu an saw lai chu hre thawiin Rozami chuan hriat chian tumi a beng a dawh sauh sauh a. Ngawi rengin an hnung an chuan a lo ngathla kiau a. Kapthuama lo haw

leh tur thu an sawi a hriat chian veleh a kawchhung
 chu let but hian a hria a, a tha a khur a, a kal
 thei ta hauh lo mai a. Kawng thlang lam hawi a
 ding vang vang hian, "Ka damchhung ni te chu ka
 pasal neihna chuan ânchhia a lawh hlawhtling kum-
 khua dawn ta a nih hi. Nimin zing a ka hriat chu ni
 se, lei rimawi zinga a tluk tur awm reng reng lo
 a mawi chungchuan ber tur a nih vei nen. Mahse
 vawiinah erawh chuan hremhmun meidil palai aw
 mai a chang zo ta. Ka pasal neih ni chu ka tan
 lungngaihna bui intanna tur a hlimna tawp ramri,
 hun ânchhedawng leh damchhung hlimna tibawrh-
 banglotu, Aw..., hmangaihna man ka têt ve zawng
 vanduaia sangsawm, lungngaihna thuahriat, hreh-
 awma tawpintai nei lo. Chu ka thu hriat chu
 nimin a ka hriat chu ni teh hlauh se chuan — Ka
 hmelma chu mal tin mal za ka sawm ang a, min
 hawtu lah ka duhsakna sang ber ka hlan nghal
 bawk ang a. Chutah mi zawng zawng hi uaau angin
 ka en vek tawh ang a, ni leh thla leh kumpui vei
 chen hian 'nimin' rorelna hauaiah ka dah kumkhua
 tawh bawk tur a. Mahse....., a tawke, vanduai
 fa zawng vanduaia bawk lo chu min têtlu dang a
 lo awm lo a nih hi. Aw..., ka va han inkhawngaih
 tak em!" ti rilru vawng vawng chungin in lam chu
 a pan leh ta hram hram a.

21. KAPTHUAMA A LO THLENG

HLUNCHHUNGI mu turin hmùn a phiah
zawh a thutthlengte a rem fel hnu chuan zunram
thiarin pawnah a va chhuak a, a u Kapthuaama a
ngai em em mai a, zawitê-in a zai a. Thla chu a
eng lo na-in 'thingchangvar' an tih ang deuh hian
arsi eng chuan a en deuh ruai a. Chutia zawite a
zai chung a pawna a din lai chuan an kawmthlang
te archhiara ar chu a khuang ta a, ar dang a kai
tho a, an khuang thliai thliai zel a. Ar khuang
chuan a khua a tihar tulh tulh mai a. An luhka
ban lawr chu a vuan a, a u Kapthuum'an chu luhkâ
a dawh laia chu ban a phun lai hmel te chu a mitthlaah
a lo lang uar uar a. Chutia khawhar tak a zañ rei
lama an luhkâa a din lai chuan, an kawmchhak te
ui chu a bauh ta chiam mai a. Chumi hnu lawk
chuan khawlai kawngpuia mi pakhat lo kal hi a
han hmu hang nal nal a, an in lamrawn pan ni
hian a hria a. Mahse, tu a nih hriat rual a nih si
loh avangin thlir rih deuh pawh duh mah se, amah
nula ngang a ni bawh wei nen a luhsan ta a.

A lut fel hman chiah, a kawng hawn sa rawn
ring ve hman deuh thaw-in a u Kapthuaama chuan
a rawn zui lut a. Mei a en that tawh loh avangin
Hlunchhungi chuan tu a nih a hre mai lo a, a u
nih te lah ring phak huah hek lo. Kapthuaama zaw-

chuan, "Chhungbwih, in lo dam hlawm em? Ka pa hi a mu tawh em ni?" a han ti ta mai chu(h), Hlunchhungi chu a plu zawk mai a, a lawm em em mai a. A ðah a chhuak ta thut a, tungchaw vianin a han ðap leh rih a. Lawm vang a ðap rawl ðeuh hian, "K'u Thuam, awi .., ka lawm lutuk, ka pa, lo tho vat teh u, k'u Thuama a lo thleng. Mami, Mama, tho teh u, ka nite pawh han hrilh hlawm teh u," a ti chul a. Tichuan, zanlai arkhuanah an chhugkaw kim chuan hlim em em-in an inbiat laih laih a. An nite chhung-ho pawh a zan a zarin an rawn fuan khawm nak nak a. Kapthuama pa chu a han ðawngtai tẽ tẽ rih a, chutah Kapthuama chuan a charchin tlangpui chu a han sawi zawr zawr a, haw tur chi-ho chu an haw leh ta a.

Hlunchhungi chuan, "K'u Thuam, tui ka han lum ang e aw, chhu i inti vira si a, inbual la, i mu mai dawn na," a ti a. Hlunchhungi chuan tui a han lum sak sawk sawk a, Kapthuama chu a inbual hahjam a. An chhungte dang an ðin hau chuan a vahvaihna lama a thil to chhar chu a rawn phawr ta a. A kumkhaw thila a hmel pawh an la hmuin ngai loh tangka tamzet mai chu an chhungkaw mit hmuin a rawn phawr ta rui mai a, an lawmzia chu sawin a siak lo. An (unau a) tẽ ber chuan, "Ka pa, pawisa kan ngah siah, khua zawng zawngah kan lalber ang ti raw?" a han ti a. A u, a chhangtu chiah chuan, "I â, Vuana te an lal zawk daih, anni

chuan fuherkhawl an nei a sin, maw ka pa," a lo ti a. A pa chuan, "Ni e, Vuana te an lal zawk daih ang, han mu leh tawh u, in duhzawng engmah pawh a hawn loh hi," a ti a, naupangho chu an mu leh ta phak phak a.

Kap̄thuama chuan chaw te a ei fel a, a insingsak zawh hnu chuan Hlunchhungi chuan, "Ka u, ka khumah khan mu ta che, hah i inti viau si a, kei chu ka pa bulah bian ka tlu ve mai mai ang e," a ti a. Kap̄thuama chuan, "Ka mut a chhuak viau a sin, ka mu mai ang e. Ana'rawhchu' ka pa, zan a rei deuh tawh nain ka thilrawn hawn kha chhiar fel law law ta che u, in peih chuan, a remchan lai pawh a ni mai tur a sin," a ti a. A pa chuan, "Engti zat lai nge ni-a i hriat a?" a ti a. Kap̄thuama chuan, "Ka hre hauh lo, atir atangin ka la chhiar ta lo reng reng a. Sanghnih sangthum te a tling ang emaw chu le. A tih chu ka tibo hauhin ka hre lo a. Mahse kawng lak a ka hritlan avangin ka hmang heu viau a, ka damloh chhungin ka thlenin te ka chung a an that em avangin ka lo haw dawn bian lawmmanah chēng sawmhnih karawn pe a, an nula kawr leina tur ka pe bawk a," a ti a.

Lehkha pawisa chēng khat (note) deuh hlir a ni a Hlunchhungi te pafa chuan an chhiar ta ngat nga a, chhiar aul an hlau si a. An chhiar zawh chuan "Cheng sangsarih leh zaruk leh sawngiat palamh. siki a nih hi." a ti a. uluk takin thingremah a

a. Mahse an lo tlaivar der tawh chu niin, chhin khat mah chhing leh lovin Hlunchhungi te pafa chu an meng tlang ta law law a. Chutia thi neih a an neih tawh dam tak a Kapthuama a lo haw leh ta chu thenawnte leh khawtlang pawh an lawmin an inah chuan inleng chuangkai lawmpuitu an awm deuh reng a. Hlawhtling tak a thi neih a an neih tawh lo haw leh ta a nih avang chuan Kapthuama pa chuan Pathian hnena lawnthu sawina ni fawm si a Kapthuama thlahual nan hun remchang hmasaber en a ranpui tal a khualkhaw lam lainate nen ruaipui tihtham deuh buatsaih a tum a.

Kapthuama rawn lawmtute zinga a chanchin Kapthuaman a sawi dan chu: "Ka thiante nen bungraw thlithlai a kan vah hona atangin kei chu ka per hrang ta deuh a. Nakinah chuan 'parachut' puan tha chi dah khawmna hmun hi ka va thleng a. Chumi lakpui tur a ka thiante ka au thawm chu hria-in Japan sipai pathun hi an lo kal a. Atir chuan mi tih tumawm hmel pawhin an lang lo. Pakhat chuan eng nge ka ah ti ni-awm takin ka ipite chu a han zen a. Biskut leh kawrkilh khai bawr a'n khai chhuak chu mi a nuih var var a. Nakinah chuan ka ipite mawng a lehkha them, Tiau lui kama an thlahh ka lo ah tak mai chu a phawrh leh a. Chu chu an hmuhin an pathum chuan an en ta tâl tâl a. Chumi hnu chuan sawi set set lo hian an zing a palian ber chuan ka beng chilhin ka mita dumde leng chuai khawpin min han beng pai ta awn awn

a. Keia lah chuan chu lehkhah chu a pawimawh ang
 tingathna lah ka hria azeng pawh chu a ni si lo.
 Chumi hnu chuan ka kawr awmah min tham lawk
 a an awmda lamah min hnuh liam ta hlawk hlawk a

“A liam lawkah chuan an thian dangte chu an
 lo awm teuh chu niin. An hnen min hruai thleng
 hman chiah, an zing a pakhat chuan sawi set set
 lovin a silai chu a kap ta thuai thuai mai a. An
 hotupa ni awm tak chuan silai kaptu chu a han
 lawk let nghal ve thuai mai bawk a. Chumi ni tla
 chuan min kalpui ta daih mai a. Min that ang tih
 chu ka hlau rilru deuh na a, an mitmeng-ah mi thah
 tuma an lan lem loh avangin chuti takin ka hlau
 thawng ta lem lo a. Amaherawhchu, an jawng a
 mik a mak ka hriat loh avangin zaizir ringawtin kan
 inbe, thin a. Nakinah chuan Paihte pakhat Lusei
 jawng thiam liam luam hi kan zingah chuan a tel
 ve taha. Min man zan a min kalpuina hmun a kar
 riah zan chuan an hotupa lal deuh zawk hnenah chu
 Paihte tlangvel chuan anin hruai a. Ka ipte atanga
 an phawrh lehkhah kha an hotupa chuan a lek vu
 vut a. Ka chanchin min zawt a, mahse barah phe
 chuan a khawn lem pawhin ka hrie lo. Chum
 hmen a hi thum lai min chimpui hnu chuan mi
 daiha hmunah kha Paihte emaw hi kha a lo kal
 a. A jawng ka la hriat dar chu : ‘Lusei gamah ni
 chiah ding reh, chi chiangah Ti lam lamah pak
 no hriat ding a hih kangte Japan galkap mite
 lam mah mah e, a ti in ka hria.’ Chu Paihte ja—

chu ka bengah chuan, 'ngaihruatin lunglen a hril chang chang' tih ang lek a ni a. A thusawi awmzia ka zeldin dan chuan— 'Lusei ram a i haw phal a ni a. Mahse naktuk hian puak phurin Tiddim lamah an hruai rih dawn cle a. Japan sipai pawh i chung-ah an tha khawp a nia,' til na niin ka ring a. Chumi zan atang chuan an mi khuahkhirh dan pawh an tizal ta hle a.

Paite tlangval min hrilh ka zeldin dan ang ngei chuan a tuk leh maih chuan Tiddim lamah puak phur chuan min hruai ta tak tak a. Thawmhnaw tlem min phurhtir a. Kawng lakah chuan rehrukna ringawt ka melh kawngtluan mai a. Mahse silai keng pakhat hian min vent bik tiith deuh reng a, min thlah fal duh miah lo mai a. Ni nga hnu-ah Tiddim kan thleng ta a. Chumi tum a bungraw tlan-san ka itzia ka itzia hlawn tak kha aw. Bungraw duh a kal kan ni bawka, thapui pui hi a let rem rum kawngtluan mai a. Mahse tihngaihna awm si hek lo le, it lo kalin ka kal ve hmawh hmawh a. Tiddim-a ni li ni nga min champui hnu chuan min chhuah tawh ang chu tih nak laiin hmar lam min panpui leh ta a. Chumi tum chuan engmah min phurhtir ta lo a. Sarjak a min hruai ve rikngawt danah eng ti turin emaw mi chhawr an tum ni-a rin rukna ka nei deuh tlat a. Chuta min hruaitute chu mi huan an ni leh tawh a. An hotupa phei chuan mi a ngaina fu emaw tih turin sikret te mi a theh yet roh a, a buluh alir mi. kaltir nghe nghe a.

Ni thum teh meuh kan kal hnu chuan Paite khaw lian tak hi kan va thleng a. Chutah chuan Japan sipai hi an lo tam em em mai a. Kan va thlen lai te chuan 'Banzai, Banzai' tiin an lo au thup thup a, eng tihna a nih pheii chu ka hre lem 'hleii lo a. Chu Paite khaw daivel leh tlangah te chuan kua an breuh a, an lutin an chhuak zung zung reng mai a. Mahse kei chu an khaw hreuhah chuan min awmtir ve lo. Khaw pawna an puan-in kaihah min awmtir a, mahoi-a ka kal hnan chu an remti bau lo maj a. Chuta ka awm lai chuan ka khua a har em em mai thin a. Ka chinchang hre lova u Sanghleia te thiandun awm tur leh an khawsak zui zel dan hre lova ka awm ta chuan min timangang rilru bawk a. Japanin an man ve a nih chu ka ring lo a. Man ve se chuan kan inhmuh ka ring a. Pawi ka tih ber chu : Kei chu thi-ah min ruat ngeiin ka ring a. Chu chuan ka chhungte a tihmangan dawn em avangin chu mawh chu pawl ka ti ber zawk a ni.

Ka khawhar ka zai thin chu Japan-ho chuan an ngaitbla duh lek mai a. Min rawn kil hnoi tuat tuat thin a, an lo bu ve thut thut a, an lung a leh ve pawh a ni ang chu. Ka zai an hriat atang chuan min ngaina zuat ta niin ka hria. Ni tin min zaiti ta mai a, anni labin ka memawh a an hriat meizu. tur leh hmawmsawm ilo te min han pe vei ngia thin. Chami himon a kat khat dawn min champi leh hnu chuan Gurkhan vai pakhat Mizo jaw thian an reng deuh mai hi ka awmna-ah chuan

rawn dah ve ta a. Chu vai chuan a chanchin a sawi dan chu : 'Ka pa chu Assam Rifles pensawn a ni a. Aizawl atangin Champhaiah kan pem ch'ho a. Kei chu Burma ram ih latin Burma Rifles-ah ka tang a. Japanin Burma an rawn lak khan kan Battalion chu Japan kutah kan inpe a. Singapore ta' inah pawh rei fe chu ka tang ve hman.

" 'Chumi hnu chuan Subhas Chandra Bose-a sipai INA an tih mai, Indian National Army-ah ka lut leh ta a. Japan chakna hmangin India kan la ang a. India ram atang a Kumpinu sawrkar kan hnawh-chhuah hnu-ah keimahni ngei huan India ram ro kan rel dawn a ni,' tiin min hrih a. Chu an pawl INA-a tel tur a min sawm tur chuan chu Gurkha-pa chu Japanin ka hnenah an rawn tir lek a lo ni a. Ani chuan, "Chu pawla tel ve chu i duh phawt chuan huan eng emaw ti chhung kan zirtir ang chia. Mahse ralkap tur ni lovin, Lushai Hills-ah i haw thla leh ang a. In ram atangin Japan tan enthlatu hna i thawk ang a. Hmanraw tul tur biakhlatna leh thla-lakna te a rugin i kawh ang a. Pawisa tam tak an penghal bawh ang che,' tiin min thlem ta heuh heuh mai a. Ka han ngaihtuah vang vangin an thu hnial lo ang a ka awm chuan, tlan chhuah theihna hun remchang awm phah thein ka ring ta a. A mi sawma chu pawm angin ka awm ta a.

'Chuta chinah pheih chuan Japan sipai chu ka chunghah an tba ta leh zual a. An zing a tel ve ang

thlapin min ngai ta a ni. Chuta tang chuan ka hna tur min zirtirna hmun panin min hruai ta a. Kawng-tluanin kha Gurkha tlangval khan min hruai a, Japan sipai ang chiahin min thuam ve thlap a, silai erawh chu min kentir lo. Kawng a kan kal lai chuan chu Gurkha tlangval chuan an INA hla pakhat min zir tir ka la hriat reng chu:

'Qadam qadam age barhae ja,

Khusi ke sath gaye ja.'

tih lai tē chu ka la hria.

"Chumi tum pawh chuan kawngtluanin tlan chhuahna remchang ka melh reng nain ka hmu thei lawk lo a. Ka duh aia kal thui dawn a ka inhriat chinah chuan a rem emaw, rem lo emaw, a khawt pawh chu ka ram chin la hriat ngai loh vek a nih avangin ni thum aia tam chu kal ka tum lo hulhual rilru ta a. A ni thum ni chawfak her zet zawt awm ah chuan kan chawh a. Kan chawh lai chuan dai kal chhuak chhuantam a kawng atang a ka peng tu chu Japan sipai pakhat chuan mi ven zui a tum a Manse Gurkha pa khan mi ven zui tul a ti lo a n ang, min veng ta lo a. Ka pen dawn chuan intil rinawm nan kir leh ngai tur angin ka lukhum lei ka kawngren leh ipse chu kan chawhna lungpu chungah chuan ka dah sauh sauh a. Daileng tu ni awm takin intil rinawm nan faifuk chungin ka kal yet ngial a. Ka thlang thuk tahl tahl a ka thawn ka dim leh leh bawh a. Ka kal bla lawk ta ma

tihah chuan tlan tak tê hian ka tlan ta chiam mai a.

“Ka ram chin hriat ngai hleih lohah chuan ka pawng kal ta ringawt mai a. Japan hmuh leh ka hlau si, chumi ni pheichuan tukthuan lo pheichu ei engmah ka nei ta lo nghe nghe. Ka ram chin hriat loh dan chu : Kan chhuah tirhna kha Thân tlang a nih ka hre ringawt a. Thân thlangah chuan Run lui a luang tih ka hre leh ringawt a. Run lui thlangah Lentlang a awm leh a, chumi thlang lehah chuan Tiau lui a luang a, chumi thlang lam chu kan ram a ni tih ka hre tlangpui ringawt a. Japan sipai inthuada ka inthua avangin Kumpinu sipaiin min hmuh pala a min hai hlauin ka hlip a, ka paih phal leh chiah rih loh deuh avangin kekawr leh kawr chu a tumtêlin ka zakzeh a. Tichuan, kawr pawh ha lo saruak tak meuhin rampalailengah ka kal ka kal ta mai a. Ka ril a tam pawhin ei tur dang awm hek lo, ram hnim itawm deuh deuh chu ka pet lawr a, a tui loh leh ka chhâk leh mai a. Ni thum ka yahvaih hnu chuan Paite khaw pakhat hi ka thleng ta a.

“Chu Paite khua-ah chuan Japan an awm leh awm loh ka zawt a, anni chuan, ‘An lo kal zawk a, mahse tun lawk khan an kal leh tawh,’ an ti a. Ka ril a tam tih an hriatin an chaw neih ang tawh kawh-haw leh ra-um (rathur) min pe a. Ka tan chaw tih lo mah se, chumi tum crawh chuan ka ei tui

kher mai. Saruak ringawt ka nih avangin puan ka dil a, pahnh chhe zet zet mai hi min pe a, pakhat chu ka veng a, pakhat ka bat baw k a. Kawng a kai ngam ni hek lo, ka hma zawn khua chu ka en zawn a, ka kal leh teh poh a. Mahse chu khua chu ka han luh chuan khaw-ram ringawt an rauhsanga la rei si lo hi a lo ni a. Tichuan, khawthlang lam hi ka rawn pawng pan ta ringawt mai a ni. Puan min petu Paite khua atang a zan hnihnaab chuan rampalaileng a thing-zung thlarah hian riah ka tum a. Ka mu tur chu ka tawngtai a. Chuta ka tawngtai tui ang reng rengin ka pian a hnu lamah ka la tawngtai tui ngai lo.

"Ka chaub tawh vang ni maw, ka tawngtai vang ni maw, chumi zan chuan ka mut a tui khawp mai a, ka mu hlu lo chaub hi a ni. Zan dangah chuan thin thain ka mu tak tak ngai lo. Chumi tuk a ka han harh chu ka bul hnaito maiah chuan keipui sum ruk sa zet tur hi min hmachhawn dawngin a lo uthot ngawi run mai a. Ka hmuh tih phat chuan blauna ka n nei dawn a. Mahse ka lo ah chawp ch phibin ka blauna chu a be leh ta duak a. Ani ceipui pawh chuan min haw lo chaub pawh ni loin, min minat thlir zawk ni hian ka hre ta thaj mai a, i mak ngawt mai. Zan ka mut dawn a ka tawngtai chu ka n hre chhuat zawk a. Chumi hnu chuan ta can Pathian rawn tih min ka ring ta flat a. Ka hre ch chuan, minnamin, rattang chhuak chu sa-
 min a hre ch chhuak min an tin ka lo kriet thawi

awh avangin, 'hei pui min hruai ve tur a Pathian
awn tih che i ni vei roh tak tak mai awm mang e,
i mi tbiir dan roh chu, mi hruai i tum a ni phawt
ang,' tiin ka ngaihtuah a.

"A mak ngawt mai, ka han tho chhuak chu in-
siam buai tur engmah nei hek lo i, ka kal nghal a
ni mai a, chu sa pawh chu ka zui nghal ta ringawt
mai baw k a. Tichuan, ka zui ta zel mai a ni. Ani
lah chuan khân-châng tha leh lui-khan kaina rem-
châng a hre em em mai a. Kan inzui hnaih lai ber
phei chuan a mei vuan phakin ka hnaih a. Chumi
ni chuan hma takah Run lui min kanpui a, Lentlang
min lawnpui leh ta a. Khawilai-ah emaw ni chuan
min hruai suai ve theh a, Japan awmoa kan pawh
teuh awm hlein ka bria. Mahse kan inthlauh lai tak
a ni a, a rawn let leh nghoh a, kawng dang min zawh-
pui ta a. Zunram thiar a ka dinsan chang leh eng
emaw avang a bablahna ka neih chang te chuan ka
zai ngai takin mi hi a lo nghak vei vun thin a. Zan-
ah erawh hi chuan a riahna ka hmu phak ngai lo
na-in a awm hlat phei chu ka ring lo. Zingah chuan
min lo nghak voh voh hman ziah tawh thin a ni.

"Chutia Lentlang pang chhak lam a kan kal lai
chuan, ram-palailengah hian Kumpinu thlawhna
thawhnaw phur chi hi a lo tla sawp nuai mai a.
Ka han bel Chiang a, a tlakna pawh chuti lua a la
rei hmelin a lang lo a. A mi chuangte ruh pawh
kang ut ang thial thual hian a let rum mai nghe
nghe a. Ka ngaihbel emaw ni, a la nam lek-lekin

ka hre nghe nghe. Ka han bel Chiang a, kah thlak tihhriat reng hian silai mu denna chu a chik nuk mai a. A thil phurh sa-tin leh thei-tin te pawh la ei tlak awm hial hmel a pu. Ngun leh zualin ka han thlingthla leh deuh a. A thir pheh hmun hul lai Chiang houai tak maiah chuan sayun-ip lian tha deuh mai hi him pialin, chu thir pheh ngheng a in-chhawng chuan a lo intung hul phak mai a.

Ka hmuh tih chuan puak thei lam thil hlauh-awm a nih ka hlauhthawn avangin fimkhur takin ka an a. Mahse chuti ang lam thil ni hmel a lan loh avangin ka la ta a. Ka han hawng a, a chhungah chuan pawisa tlem a zawng hi a lo awm a, tiin a pawisa chhar zat pheh chu a sawi duh lem lo. Kap-hruama chuan a sawi zel a, "Pawisa pheh khat pawh nei lo ka nih avangin a ip chawp chuan tihbo hlau takin ka pawm ta hle hle a, ka kal leh ta a. Ka kal paipa nen chuan kan inbe tlem dun na vang vang-in ani tluk a min thlanuan zo kalpui tur dang an vang leh tawh ngawtin ka ring. A tawp a tawpah chuan Hlau kam min rawn thlen thla ta nge nge a.

"Tiau lui kan rawn thlen thlak dun meuh chuan a hmel atangin mi kirsan a tum tawh tih ka hre leh mai nia may le, a hmel atang chuan. Tunah zawng a salawng chip ka thlen tawh chia, i tao baba tur a awm tawh lo va, ka kirsan tawh ang che, thlen thla hian ka hre thak mai a, a meuh ngawt mai. Mahse chuti ang lai chun thla kan tawh. Ani awm

chu Tiau kam rairuang buk chim chin leh chin lova
dingin ka Tiau kan lai chu min rawn thlii voh voh
a. A kam lehlam ka kai a, ka hawi kir leh lui te
chuan mi la rawn thlii zui ta vung vung a. Chutah
kal ka siam dawn chuan ka kutin ka han zap a,
chu veleh chuan min hawian ta nghoh a. Cami
hnu-a mahni chaub mai a ka han kal ta chu ka khua
zu tihar viau a maw lo. Sakei kher kher hi chuan
khua a tihar mawh viau a ni ngai a. Chumi tum
meuh chuan, mahoi chaub a Tiau kam ka han thual
chho ta chu zu theihngihl thei nang hauh lo ia.
Keimah avang a chu leh chen chaw pawh zawag
hman lo lek a min hahpui dan chu ka ngaituahin,
amah chiah kha chu hma leh thei ila chuan ranpui
talh sak a phu hliah hliahin ka hria.

“Kan ram ka rawn thleng thla leh ta chu ka
thaw huai huai mai a. Mahse kar thum tlawag
chaw-kaw puar lo leh mutan pawh tuah mumalova
ka awm avang a ni ber aag chu, ka khaw tlawh
hmasak ber a ka riah zan atang chuan ka khua a
sik ta hluah mai a. Mahse ka thlenin te an beng-
varin ka chungah an tha em em mai a, na ta vekah
na fuh pawh ka inti khawp mai. An nula mawh
chu a fel mai, a hmeltha si, a zaiin damlo bawi-
sawm a thiam si, damna sawng sawng awm tak
reng pawh a ni. Ramhnuia kar hnih dawn lai ka
rawn thang nen, ka nat chhung thlaa leng lo lai nen,
kan veng kan chhuahsan atang chuan thla li thaw
a nih chu. Tunah zawng kan hrehawm lai ber hun

te pawh kan chanchina ngaihnaawm lai ber a chang thei ta a nih hi," tiin Kapthuama chuan a Japan sal tan thu a sawi a ni.

Dam tak a Kapthuama a lo haw leh tâk avang chuan a pa chuan a thla hualna ni fawmin Pathian hnena lawmthu sawi nan ran lu kim talh a tum a. Thanthuami te chhung leh Lalpianmawii te chhung pawh kokim tak a tel turin an chah a. Rozami chuan dam takin Kapthuama a lo thleng leh tih a hriat chuan awm ngaihna hlalw hi a hre lo a. A chhungte a mawh chhiat leh a sawt tawh si lo. Kapthuama pa lawmthu sawina turah chuan Thanthuami te leh Pianmawii te chhung chu a kal thei zawng zawng kal vek an tum a. Thanthuami kal tur khawlai dung a Pianmawii sawm kawia a kal lai chuan Rozami chuan mi mitmei veng ru tak chung leh a pasala chhungten an hmu nge hmu lo tih mitmei en zak zak chung hian, "I e, Thumthian, Thuama hnenah chuan e, 'Ka damlai ni hi thlan a ka pelh hmaloh chuan ngihh ni a awm dawn chuang lo a nih hi' a ti han ti ngawt teh ang che aw. Awi kel zawng dam hi, ka thian, hrehawm ka va ti tak em! Nangni zawngin in han hmu bik dawn a. Mahse hmu ve mahila . . . hrehawm ka ti em mai, chibai min rawn buk (sak) mawlh mawlh dawn nia aw. Khi, kan nu-in min lo thlir reng tawh pek khi. Ka thian, mangha ngawih ngawih," a ti a, a kalsan ta chhat chhat a.

Kapthuama pawh a lo thlen tuk tlai a, a nau Lalhlunchhungin Rozami pasal neih thu leh a hreh thu te, a pa tirh luih dan zawng zawng leh lo nghah fan fan a duh thu a han hrilh meuh chuan engmah sawi lovin kawmchar-ah a chhuak hmak a. An leikapui tlangban bawh a mittui sur zung zung chung hian..., "Aw..., thlante u, rawn inhawng ula, in duhamna chintawk nei lo in ka âng zaupui mai khan min han dawlh ve nghal law law mai teh u. Aw, hun! Eng tikah nge i ni kin ni chu he lungawi lohna khawvelah hian i rawn chhuahtir dawn? Rozam, Rozam, ka hmangaih leh duhber, lungngaihna phurrit hi ka tan tam zo sa lovin nang leh zel hi ka tan phurrit leh lungngaihna i chang zo ta a maw, a va han mak dawn ve! Hun leh ni tawi tê chauh ka tan inzuah zo lovin, chuti khawpin a ni maw mi thlim i lo châk ni ngai le? I tan a hrehawm ka tuarna zawng zawng te kha, hei hi i mi thungrulh duh dan a lo ni dawn maw? Mahse a tawh e. Ka tan hian hrehawmna leh lungngaihna hi ka pianpui uuau thlak-hlehawm loh tak, ka tuithlar theih si loh chanvo chu a ni a nih hi," tiin ni tla tur kawh sen phûl lûm chu hawiin, mittui sur karah khawthlang kawkil a chhum dum nal nal chu a thlir vawng vawng a.

22. LEHKHATHAWN



KHAWCHHAK lama Kapthuama te an kal chhawnglawtah, Liankhuma pawh Lebawrah a tang zui ve nghal a. Sanghleiaten Kapthuama Japan in an man thu leh a dam pawh an rin ngam tawh loh thu an rawn sawi lai chuan Liankhuma chu an veng a chawlh zawk lai tak a ni a. A thianpa, a chhuk a chho-a lo inzui thin leh a sangawi zawnpui ber boral ta ni hial awm a an sawi a han hriat chuan a tuar em em mai a. Nung-dam a la awm ngai te a nih pawha a lo haw leh tik apiang a Pathian rawngbawl tlâng tui leh, a chhe ber dawn a, lo haw tur a awm ta lo a nih tâk pawh a, a thlarau chu van Pathian hnen ngeia thlamuang tak a chawl turin mittui nen lungchhe tak leh thahœmngai takin an tawngtai nupa chamchi a. A la piangthar chiah lo si-a an hriatna chuan thil dang zawng zawng aiin an rikru a tihah-in an awm a tinuam lo ber a.

Mahse chutia dam taka a lo haw leh tâkah chuan an tawngtaina Pathianin, a chhangin, Kapthuama an rawngbawlna hun awm thei dawn a an hriat nupa avangin an hlim dun hle a. Kapthuama lo haw lai tak chuan ani Liankhuma chu a hna avangin Aizawl-a a awm lai a ni a. An vengte vai-kal ka atangin a thianpa Kapthuama hawn leh thu chu a lo hria a. Chuvangin, Liankhuma chuan a thianpa an lekhathawn a ziak ta a.

Ka thian hmangaih tak, Thuama,

Manganna leh hrehawm tam tak i pal tlang hnu-a hmuah leh che ka beisei theih avangin Pathian hnenah lawmthu ka sawi a ni. I awm loh avang a kan thlophannain awrawl tawpin Pathian min auhtir tak meuh a. Kan nupaa chhun leh zan bang lova i tan kan dilna chu zahngaihna Pathian chuan khawngaihna avangin min chhang ta. Chuvangin, Pathianin nangmahah tum a nei a ni ang tih ka ring a. I chungchangah hian thil pahnh lo lang a awm a. Chu chu i hmu ve emaw ka hre lo.

Palhatna-ah cheau :- *I khawchhak kal dawn a sawi, 'Rozami tan hrehawm eng pawh tuar ka huan a. Kan nawmsak dan theih nan ka inbuatsaih duh bawh a ni,' i tih kha i la hre rengin ka ring. I sawi ang ngeiin hrehawm chu i tuar ta ngei a. Mahse i hrehawm tuarna zawng zawng chu Rozami lakah chuan a thlawn ta vek a, nang erawh chu hlawhtling takin i lo haw(ng) thung si, tih hi.*

A dawt lelah chuan :- *I hmangaih Rozami tan hrehawm i tuarna zawng zawng chu a thleksan ta si ang hian— I tan thih thleng a tuartu kan Lalpa Isua Krista chu lehlamah i thleksan a, hmangaih-a zawngtu che chu i zawng ve duh si lo. Chuvangin, ngun takin ngaihtuah la, i hmangaih Rozami tana i tuar laia mual a lo liamsan ta che mah na i tih chuan, Rozami i hmangaihna aia a let tam tak a hmangaihtu che i hawisan hi eng ang fakawin nge a tuar nat ang*

le? Chuvangin, Krista hmangaihna chu i hriat thiam theih nan i hmangaihber chu a tihrehawmtu-ah che a hmang ta a ni tih lo hre thiam hram ang che. Kristan a hmangaih che avang? a tuarna i lo zir lawkna a ni si a.

Japan kut atang a chhanhimtu che leh, kawng bona ram atang a mak tak a hruai chhuaktu che chuan hausaknain a vurh zui chia. Chum hnu a i hmangaih Rozami leh zel a pek che chuan, chu i malsawmna dawn zozai chu hmeichhe pakhat i inhlahtir a hlauh sak che avangin, chu hmeichhia chu a seng kiang ta a ni zawk. Rozanu pasal nei kha Pathian remtih a ni tih lo hre thiam mawlh ang che. A tan hrehawm tam tak tuar a, thangthat i la ta pawh kha a thlawn ta-ah ngai reng reng suh, Pathian chawimawi tum dan che a ni zawk e.

Aw le, kei chu hmeichhe pakhat hmangin nun tha ka nei a, chu chu i hai miah loh khq. Nang erawh chu hmeichhe pakhat hmelthatna-in Pathian hmel i inhlahtir theih dawn avangin, chu hmeichhia chu i hma atangin a seng kian sak ta che a. Pathian vek chuan a duh phawt chuan Pathian hmel tilang chiang turin i hma-ah hmeichhe dang a la rawn dintir leh thei tho tih pawh hre tel bawh ang che. Tunah ngei pawh hian Pathian chuan a lo ruat ru diam tawh mahna kan sawi thei hlet nem.

Heta hlawhtling tak a i lo haw a hnu a, Rozami heta a lo nih tawh bawh si chuan, i hma-ah nula tam

tak an rawn inlan ang a, thenkhatte phei chu Pathian Thlarau behchhanin an la rawn inhmur mai thei. Tunlaiin kan ramah Thlarau Thianghlim chhal a hmeichhia leh mipa inti bawrhbanglo tam tak an awm ta. Mihring chak lohna chak tak hi Setana leh mihring tangrualin an hman dun vaih chuan a chulhlehawmin mihring pianpui ropuina a tichhe sam em em si a. Chuvangin, nang pawh hmeichhe nazah zawng lakah lo fimkhur hram hram la, nupui tur dik tak chuan 'bantal an rawn nawt mai ngai e' an ti nia.

Ka thu rawn sawi hi tunah chuan i la hre thiam rih lo pawh a ni thei e. Mahse i hriat thiam hun a la awm mai ang. Harsatna leh tanpui i ngaihna apiangah kan tih ve theih a awm chuan, keini nupa chuan kan phatsan ngai lo ang che. Ka thiannu kha ka khingphel, kei aia i thlarau tan a mittui seng tam zawk a nih avangin i lo kawm thin dawn nia. Ka lo hawn tikah pawh Kristaa i hmel thar rawn hmuh tawh che ka tum dawn a ni.

Kei pawh, tawngkhawlo ni suh se, ka taksa lam chu a tha viau a. Mahse ka thiante an ho ve lehchhawng khawp a, ka khua a har thin khawp mai. Hetia damte-a i lo hawn leh thu ka hriat chinah phei hi chuan hmuh che ka chak em em mai a. Mahse kan hna lamah ka laklawh rih si a, ka'n bei rih hram hram ang e. Reilote-ah chawlhsan ve mai ka tum tawh a. Naktip khian 'V' Force Sap hruiin chhim lamah ka'n zin leh rih phawt ang a. Chumi ka lo kir tikah zawng

*chawhsan zai ka rel tawh ang. Dam tlang tak a kan
inhmu leh theih nan Pathianin min vehg tawn zel
rawh se.*

I thian i hmangaih,

8.4.1944

Liankhuma (Lebawr)


Kapthuama chuan a thianpa lehkha chu a lo
hmu ngei a. A hrehawmna zawng zawnga hruaitu
chu Pathian a ni ngei tih chu a ring a. Mahse
Rozami pasal neih chungchang a Liankhuma sawi
ang a Pathian nehtir ang hiala a ngai erawh chu
niin a bre thei haoh thung lo. Rozami pasal neih-
tirtu chu tu dang ni lovin a pa a ni mai. A ngaih-
dan chuan: 'Pathian hian min hmangaih tak zet si
chuan, ka hmangaihber pawh min pe ngei ngei ang.
Ka thianpa sawi ang a, Pathianin khawvel a hmangaih
em em lai a, khawvelin a hawisan si nen chuan
tekhin theih kan ni lo ang. Khawvel chuan Pathian
chu hawisan teh reng mai e. Mahse Rozami chuan
min hawisan ve hlei nem. Chuvangin, thianpa thil
rawn sawi hi thil intlai lo lutuk, tawngkam thlawn
bat duh leh yang a inhnemna thil lek a ni,' ti-zawng-
in a ngaihthuan ve tat mai a. Pathianin Kapthuama
a hmangaih avang a Pathian hmel hiahtu ang a
Rozami a sawi leh, chumi avang a seng kiang ta
ang a sawi phei chu a awih thertê lo mai a. Pa-
sal a hawisan ta chuan namemlo-in Pathian a hiah

ta zawkin a beidawn phah zawk niin a inhre tlat bawk si a.

A ngaihndan chu a ni bawk tak a, reng a -- A hmangaihberin pasal a lo neihsan tak avang chuan Pathian lakab a vuiin, a beiscina zawng zawng pawh a tblawn ta vek si a. Chuvang chuan, Rozami chungchangah na na na chuan Pathian chuan hmangaih thlawtin a hre lo a ni. Tin, hmeichhe kal tlang a Pathian a la hmuh mai theih thu a rawn sawi phei chu, a thil ngaihthiam loh kumkhua a ni sa reng a. A thianpa Liankhuma chungchangah ngei pawh a ngaihthiam theih loh a nih nâk alaiin, hmeichhe hmang a Pathian hmuh tum ta ang hrima a rawn sawi phei chuan a luak a tichhuak hial a ni,

23. "I TUM RENG MAW LO NI?"

— *Kapthuama*

 **CHUMI** kum vangpui lai 'buhpui a balhla ti tuih' an tih thin hun lai chuan Thanthuamiten vawk talh an tum a. Kapthuama puala talh tum ngang an nih avangip Kapthuama te unauza leh an ni fate nen kokim takin Thanthuami te khuaah an kal dap a. An han inhmukhawm chu an hlim hle a. Chutih lai chuan Rozami chu a pasal chuan a hna lama a kalsan hlan a ni a, a pasalte in lama pheichuan a laawm tho a. Rozamin Kapthuama hmel ngei a han hmuh menh chuan a tirilah a khur zeh zeh mai a. A hmel pawh ni dang aia tha zawk leh duhawm zawkin a limu lehngal a. A hmangaihna lah chu leilungah fang khat mah a la hloh chuang bawk si lo. A biang ngei biak chu inthlahrung hle mah se hmuh a chakna chuan a buk thlu si a le, inthiam lo leh zak rilru tak chungin a hmu ta nge nge a. Rozami chuan, "Thuama, kan inhmuk leh ta maw? I dam thin em?" tih pahin chibai a buk a. A mit mengah chuan hmangaihna chuai chuang lo leh in-chhirna thinlung riangvai khawhar nun hmel hlim lo tak chu a lang chhuak thei hial a.

Kapthuama chuan, "Dam thin e, Pathian zarah ka dam thin a sin. I thianpa chanchin i hre ngai em?" tiin a han zawt a. Rozami chuan, Kapthuaman 'i thianpa' a han ti ta chuan a rilru a tina em em

mai a. Kapthuama chuan a tusual lo tih chu a hai bik lo. Mahse Kapthuama ni lo 'thianpa' a nei ta chuan a rilru a tina ngawih ngawih a ni. Chhan bram pawh Rozami chuan a tum na a, mahse a hrawkah eng emaw hian rawn hnawh up upin a hria a, a chhang thei ta hlawl lo a. Kapthuama vek chuan, "Dam takin ani pawh a awm ang a, hlim takin in la inhmuh leh thuai ang chu," a ti a. Pianmawii te in lama leng turin a kalsan ta a. Kapthuama chuan hlim takin a be sawt sawt a. Rozami erawh chuan a hmel a han hmuh meuh chuan a hnaa a ngaihna let eng emaw zatin a rilru hrehawmpa chu punluhin a hre thung a ni.

Kapthuama khawlai kal vel te chu a hmuh loh hlan hian mit tla lek lekin a lo thlir ru reng thin a. Engti kawng mah a tihngaihna dang awm ta si lo chu a ruk a tah tlawk tlawk mai lo chu a tan kawng dang a awm tawh lo. Thanthuami te khuaa Kapthuama te an zin lai hun chu, hmana inkhawmpuia an kal lai bun ang chiah kha a ni a. Hman ang bawh khan favang ni eng mawi leh zan thiang khawhar lunglenthlak tak bawh hunah chuan Rozami chuan 'hmanlai' lo kha chu dawn tur dang a hre mawlh lo a. Tun hma te angin a thiante inah chuan leng vel leh thin mah se, tun hma kha a ang thei tawh bawh si lo. Lungchhe van kai a tah vawng vawng mai loh chu tih theih dang a awm tawh lo.

Kapthuama erawh chuan intihpachan a tum hle a. A hmel leh a mitmengah pawh ngaihbel tur

pawhin hmanlai hun leh Rozami ngai-awm hmel reng pawhin a lang lo. Hlim tak leh nuam tihmel takin a lang lui tlat a. A hmuh chang a Rozami a biak pawhin, hmel danglam hauh lo leh ni danga a biak angin a be bawrh bawrb thei zel a. Chutia hmel danglam pu hauh lova a be thei chu Rozami chuan hrehawm a tih phahin vei ve lo ni-a a inngaih-na chuan a tirilru hrehawm lehzual a. Nula dangte nena a leng vel a hmuh chang lahin a thik rilru tlat bawk si nen.

Kapthuama te chu ni li ni nga lai an cham hnu chuan hawn an tum leh dawn ta a. An hawn dawn zan chiah chuan khuangchawi thla fangin ar kai a rawn deng ut mai a. Khi thla fang khian chuai chuang hauh lova kum sang tam tak a vanglai a hman liam hnuah, a ngaitê-in chumi zan pawh chuan a vang-lai bawk chu, a rawn her chhuahpui leh a. Kapthuama chuan a rilru tikbaubin luhlul chhuah eltiang mah se, chumi zan meuh chuan a intih pachanna zawng zawng chu a rawn hlipin khawharna rilru no tak chuan a lai-ril a rawn fang a. Hmanlai lo chu dawn tur a hre ta mawlh bik lo a ni. Thla chuan a tuallenna chung van sang lam chu panin a rawn invawrh sang zel a. Chutah zet zawng mi thai chang hnu Rozami lo chu a thihlungah thil dang a leng ta bik lo.

Zan a rei deuh deuh a, chang dang kan lova a leh kumkhua-na thih van boruak zaupui mawh khian chu thla hleinga chuan, hntangaihte intiamna thuthlung

chu tuma nuai reh rual lobin a rawn ziaak chuak thar leh ta. Inkhawmpui laia a kawng zawh hlui kawng-ruh chu rawn rap dik leh chiahin, a kal dan 'spit' (speed) pawh danglam chuang hauh lo chuan a eng fâl nuluh mai a. Chu zan meuh chuan a buk thlu ta-in a insum ta lo. Zan te chu rei thawkhat tawhin mite chuan mutmu tuah hlawm tawh mah se, ani zawng mutchhuahna te chuan a la zêm ve rih si lo. A lungleng awm ngaihna hre lo chu, Thanthuami te kawmchar leikapui ngeiah khan tlangban vuan a ding-in, hmangaih ber nen a inhriat chhuah ziahna tur a an intiam hun **Tbla Hleinga Zan** leh an intiamna hmunah chiah leh an intiamna champhaphakah ngei bawh chuan a lungleng chn a kiu ta ruai ruai lo thei ta bik lo a ni.

Kapthuama zai chu Rozami chuan a lo mang hriat a. A mumangah chuan a khua lo har em em a, a lo tap ta hial a. A tap chuan a tiþhangharh a. A han harh chuan Kapthuama zai chu a ral hriat vau vau a, awmngaihna hlawl hi a hre ta lo. Muthmunah chuan a let tawn þhuai þhuai ta mai a, mah-se eng a sawt thei tawh si lo. Kapthuama chuan he hla 'Zantiang si-ar' tih hla a châng tawp ber a sak:

*'Val ngnak Chawngmawii mah a ding reng van
zawlah,*

Kei ka lungdi thal-tui ang min ngnak lo te hian :

Khiangawi zamual min liamsan hi Bawihle,

I lung tum reng maw lo ni'... kei zawng

Tlei dang tanglai belh ka kham zo lo.'

tih lai hi. Rozani chuan Kapthuama zai leh a hla sak kher chu a. tuar zo ta mawh lo a, zawitein a tho them them a, pawnah a va chhuak a. Hla tak a Kapthuama zai chu ngathla chungin a han thir a, a kawr hak chauh chu zan thla engah chuan a hmu var va, va thei a. Rozami chuan ania hriat tham chauh tur hian, "Thuama, ka hmangaih leh duhber, ka lung tum reng a ni lo. Hrai tam pawh chawin tlei dang tangah bei mahila, ka nghilh reng reng lawng che damchhungin," ti-a ke per thuai thuai chung hian, "Thla Hleinga Zan hian inhre thin ang aw, kan ti maw kha, ka hria ang chia, ka hre reng ang che. Aw ..., hmangaih dai chuang ngai lo ka lawmna par mawi, mahse, mahse ..., ka lei pangpar ni a chuai, khuarei hnutiang ngaih a va han na dawn tak em Thuama, i hming ka tahpui a bang thei dawn si lo," tlin a han chham a. A mittui chu a bruk a bruk sen ruai loh hian a surin a sur zung zung a. Chutah a filru chu bing chuk chuk leh a khaw en pawh tawi tual-tual hian a hria a, mumal nei lovin a tlu ta a.

A rawn harh chhuah leh chuan a taksa chu a lo vawh ngak tawh a. Luhai khaw en phe ruai chung hian, "Engtin ngo ka awm a, engah ngo heta ka mut reng chu le? E ..., ka hre ti, ka hre chhuak leh lai. Aw ..., hrebawm ka va han ti tak em khawver hi," filru ngawih ngawih chungin zan thla engah hribhah takin Thapthamani lo in lam chu a han thir leh vawng vawng a. Mahse vemah timah tur an lo awm tawh lo.

24 NUPUI A NEI VE TA



KAPTHUAMA pawh nupui neih hun zen zawn a lo nih ve tâk avangin, Rozami a chan tâk lobah rau rau si chhan, hmana Japan kut ațanga a tlan chhuah hlin a khaw pakhata a dam loh laia a thlenin nula Hmingdailovi kha a rilru-ah a lian ber a. Rozami lo vekah chuan a hmuh phakah ani lo chu lunglen dang tumah a nei lo. A dam loh leh theih loh chhung zawng a hmangaih em em a lo bawisawmtu chu a tum rilru ta a. A rilru khawhar pawh hnem berin a ring a. A pa hnenah pawh a tiri ta a. A hmelah lah Thanțhuami te mikhual sawi angin, Rozami nen a dawr khat a nih bakah a hlei-tingin Rozami aia dawlhkai țha zawk, pian thiam si, mi sakhawmi leh nun tlang a lo ni chhap nen.

Hmingdailovi chu nula a ni na vang vangin a chanchin pawh thu ngaihnawm leh sawi tham a tling a ni. Kum khat chu a țhiannu Salkungi nen an in-lâwm a. Salkungi te lo chu ngwpui ngaw-tâ deuh mai bing si, ram kheng lutuk mi neih peih loh ram tâng, Salkungi nuțapa te pafa, mi taima leh awm-khauhia an țhiah ramchang khawng zet mai hi a ni a. An ram tuk a khawng em avangin an vah zawh dawh hnaiah Salkungi pa chu herhpuiin a inherh leh ta nghal a. Chumi kum phei chuan thlawhhma kawng pawh zawh thei lovin awmhmun randâng mai a ni ta nghe nghe a. An unau chauhin an thlawhhma chu an hai dun ta a. Chutia Hmingdailovi nen a

an inlawm lai chuan Salkungi nutapa chuan hawrh-zaw a vei leh ta nghal a. Mahse an lo chu ram-ngaw tuk darh mei la lut ngai lo kumkhaw leng ngang a nih avangin a awl em em thung a. Salkungi chu a kut a mal na vang vangin buh chungah blo a leng hman bik lo.

Pawhchhiat hnaih lamah chuan Salkungi chuan a lawmntu Hmingdailovi chu a ruai a, mi dang an theih loh avangin an pahnih chauhin an feh dun a. Chawfak dawn a Salkungi bai chhuang tur chu tui-thawl nen tui chawi turin an lo mawng luiah a zu kal a. Khaw dang hawi lova tuithawl a tui birh tuma a kun lai chuan, a mak a makin lui hnar lamah ruah a lo sur niin, 'sabereka-khuangkaih' chuan a rawn hnawl ta thut mai a. Salkungi chu a reh rei tak em avangin amah chauh a lo bung Hmingdailovi chuan lui lam a thlir a thlir tawh a. Mahse riva engmah a awm thei si lo. A ngaih tha lo chuan a han au a, chhangtu awzawng a awm ta lo. Hmingdailovi ngaih tha lo chuan thlam a han en hmasa phawt a, mahse a ngai te-in mei pawh la nun lobin a lo reh thep mai a. Hmingdailovi mang chu a ang ta a, a thianu tui chawina lo mawng van lui lam chu a nan ta rinawt a.

Kau chim leh chin lo-an chuan a kal lam hniak chu a hnu ngei a, a haw lam hnu a hnuh loh avang chuan hnuhawng nicy tak chungin lui chu a zuk thlen a. Lui a zuk thlen chuan sabereka-khuang-

kaihin a la tih hriat reng hian luite lian chuan lui kam a lo hrut pe tharlam sul mai a. A thiannu pawncche-lukhum pawh vaukam chheh-khangah a lo la inbang far kauh kauh a. Chutah zet zawng a thiannu chu luite lianin a li a ni tih a hre ta a. A mangang em em mai a. Mi tumah dang pun tur awm chuang lo, lo bingah mah chuan an lo lawng chen a tuma zawhpui loh khawp a bing a ni si. A tihngaihna hre lo chu vaukamah chuan a han tawng-tai tê tê phawt a. Hawnsan mai chi ni a a hriat bawk si loh avang leh, luite lian thut ngang a nih avangin a kam leh chu a ni tituai tawh bawk si a. Khaw en lai a hmuh mai inbeisein zawn zai a rel ta a.

Thlâm lâm pawh pan leh ti chuang lo chuan a tuthlawh chu a keng a, chu chu a hriam neih tawk a ni ve miao si a. Luikam chu a hrul thla ta zel a. A mittui a han hru leh bawk thin nen. Mi tlawng-ngai mangang duai tum lo chuan blauih chu siwi loh thih pawh tih lovin luidung chu a pawng thual chhuk ta ringawt a. Chawfak zai pawh rel hman bik tawh hek suh. Chuan vau lui lah chu a chheng-chhia-in a khawkrawk em em mai lebngal a. Khavilai laiah emaw chuan hmeichhe tan a kal hleih theih loh hel ngai lêngkir leh kurung te a lo awm ve leh bawk si nen. Hmingdailovi chuan a tân rul pawh râi a chang thei tih hre mah se, a tum a ruh en avangin a lawmnu chu phatsan mai a tum aw-

zawng lo. Hmuh ngei tumin luidung chu a hrawh thla zel a. Kar lo-ah chawhnu a lo thlang her a, naurual zanraih chbum a lo hun leh a. Mahse a lakah hunin ro a rel ve hman tawh lo.

Khua a tlai lam tan ta hle a, ni dang ang chu ni se, losul hawn pawh a hun leh ta. Mahse Hming-dailovi zawng hawng hman a intih ve loh avangin, chu nula mal tlat, thian te lak a tlawmmak thangthat lak tum rilru huaisen chungchuangi erawh chuan lui mawng lam a pan ta deuh deuh a. Ram pilril nel-awm lohna te chuan a tihlau phak tawh lo a. tam-chhawl leh kokar tawh lah a dawn chang tawh hek lo. Ramsa-kawhnten rampalailengah a vanglai mawina an pet darh ta a nih pawhin, a thiannu tan a nih berah chuan a ui tawh hek lo. 'Tun-favang' tlai khaw thiang kawh a lo eng a, phai-vapui leh luidung chinrang te pawhin an zan tin lawina fuk-hmuo pangchuam an pan tan leh ta. Khua a lo ngui a, ngaw chhung dumde leh hnaphkawhral te pawhin tumah chhit kep lovin an zan khawhvar eng yawt raih mai chu tu-mau leh dawhvarnei buk karah an dawn chhi tan leh ta.

Zan thibaiawm tak len ram reh tang kawp chuah phung leh ramhuai a tihuangtauin, ramsa-kawh huaisar chite pawh a lakah an fawn ngampa lehzuai dawn ang lih te a ngaihtuah chuan a thla pawh a phang ve tho mai. Chu avang chuan a tan aw raw tawp a Pathian aih mai loh chu tib theih dang ndia a luhlat tawh leh avangin, a rilru a siam

sauh sauh a. Ngaw pan deuhna zawna vaukam lungpui tohlawt a thu-in Pathian hnenah a inhlau leh ta ringawt a. Cautia thiolung pawt thler a, khawvel laka a rilru ram khek leh a sual duh rukna rilru nen lam a Pathian hmae a inhlum langrawn inhawng leh chiah chuan, ngawpui pan lai van-varin a chhun en phê riak karah chuan hmuh a nei ta a. A thil hmuh chu mitvai ram ram chungin a zu hnaih hret hret a. Eng a nih a briat chian loh chu, lungpui intawksir kara tui lian len zeh, a thiannu malpui inhlum var a ni tih a hre ta.

A pawnehhe lukhum chuan a khuh thuai a, pawh chhuah mai a han tum a. Mahse hmeichhe thlabar tha khur pawh chhuah mai zia a lo ni si lo. Tap teuh chungin a han ko a, mahse ani Hmingdailovi pawh chu thlaphang leh chauvin a thidang zui ve leh ta a. Lung khawkrawk kar tui tlinga a tluk avangin a lo harh leh thuai a. Tihngaihna hlawl a briat tak si loh avang chuan a thiannu tanna lungpui chungah chuan chau thaw hlawp hlawp chungin a han chawl leh rib tê tê a. Chutah tlem-in a han hahdam deuh a, a thiannu lah chu a thi nge a dam tih pawh a la hre si lo. Tichuan, a tanna lung kar ahang a lak chhuah ngei tumin ama beih beihin a bei ve ta ngat ngat a.

Losul hawn hun pawha Hmingdailovi te lawm dan chu an la hawn ve tak loh avang chuan an chhangte chu in lamah an lo mangang ta a. Naupang

tira a tu zawk zawk tal an haw law maw ti-a an inzawh tawn zar zar lai pawh chuan khua a thim tawh a. Salkungi te lo, kheng lutuk leh a kawng ni se tu zawh tawm hleih loh a, anni nula pahnih chauh feh dun an nih avang chuan an ngaihtuah ta em em a. Zanriah ei kham a, a tumah pun rih lova a ruk a mi pahnih khat chauh lam tur an in-tirh dawn lai chuan, anni nula ve ve la ni ta si chu an ina len tum tlangvalte avangin hre lo-a hlei an awm ta lo a, a khua-in an tlangchim ta a.

A kal hmasaten thlâm an zuk thlen chuan an chawfun ei lohin an bunsan ang angin an phurhlân te nen a lo la awm tih an hmu a. An tuthlawh erawh chu a awm lo tih an hriatin bun hmunah sapuiin a la ta mai a nih an ring a. An bunna lam tur awm chu an pan a. Chhun lam a an hlo thlawhna sulhnu chu an hmu ngei a, mahse hnuhma dang an hmu si lo. An han au vak vak a, mah-se ral lehlam vauk bram leh tui luang ri mai lo chu chhawntu dang awm lovin a reh thiap a.

Chutah val-upate chuan ro an rel ta a: "Hei le, kan nau te ni chin hriat an ni ta lo a. Anni a pum-pa engti kawngka mahin pasaltha dungthul a an rammut lah a rihawm na hek lo. Amaherawhchu, tawng khawlo ni suh se, eng phei chu an ti haph lo ang a. Thlawhlai kan dap chhuak tawh a, va-hmim thisawn pawh awm se kan chil chhuak tawh hui ang e, tih turin kan thual kim tawh a. Chu-

vangin, naute u, tumah inphatsan lovin vau ngawpui chhung zawng zawng hi kan dap chhuak tur a ni. Tupawhin sulhnu thar leh eng emaw kan hmuh pawhin kan vah thlawn zau loh nan kan inhrih tawng zel ang a. Lui mawng lam zawh tawng awn ila, lui hnar lamah a then kal bawng ila. Thenkhat ngawpui chhung dap tawng awn bawng ila," tiin ro an rel ta a.

Tichuan, meichher eng tawng chhiin an vak darh ta sung sung a. Lui lam pante chuan sulhnu thar an hmu ta thuai a. An chawfak tur vau lua an insil harh lai luite tui lianin a lak pahni a nih an ring ta a. An inau khawm a, luidung chu an zawh thla ta a.

Khatia Sabereka-khuangkaih-in Salkungi a la ta khan mangbung a vuan hlauh mai a. Luite lian vaw leh khat a sah hakin a len thla puat mai chu, ar indi chen lekah lui kawi tam a len liam hman a. Mahse mangbung a vawn tlat avangin tuizangkauh chuan a len chak theih loh phah a. A tawpah lungpui insi karah a len zep a, engmah hre lovin a thidang ta vang vang a. Tui chu a kam leh thuai a. Hmingdailovin a zuk hmuh chhuaha a tihngaihna hre lovin a tanna lungpui chunga tlaivarpui a tum lai thimhlim velah Salkungi chu a rawn harh chhuak leh ta hlauh mai a. Tichuan, eng emaw ti tiin an inhnuak chhuak thei ta hlawl a. Thimthama lungpui chunga an inbawisawm lai chuan lui mawng lam atangin sakein a rawn hrawk zui leh ta nghal.

tira a tu zawk zawk tal an haw law maw ti-a an inzawh tawn zar zar lai pawh chuan khua a thim tawh a. Salkungi te lo, kheng lutuk leh a kawng ni se tu zawh tawm hleih loh a, anni nula pahnih chauh feh dun an nih avang chuan an ngaihtuah ta em em a. Zanriah ei kham a, a tumah pun rih lova a ruk a mi pahnih khat chauh lam tur an intirh dawn lai chuan, anni nula ve ve la ni ta si chu an in a len tum tlangvalte avangin hre lo-a hlei an awm ta lo a, a kbua-in an tlangchim ta a.

A kal hmasaten thlâm an zuk thlen chuan an chawfun ei lobin an bunsan ang angin an phurhlân te nen a lo la awm tih an hmu a. An tuthlawh erawh chu a awm lo tih an briatin bun hmunah sapulin a la ta mai a nih an ring a. An bunna lam tur awm chu an pan a. Chhun lam a an blo thlawhna sulhau chu an hmu ngei a, mahse hnuhma dang an hmu si lo. An han au vak vak a, mahse ral leh lam vauk baram leh tui luang ri mai lo chu chhawntu dang awm lovin a reh thiap a.

Chutah val-upate chuan ro an rel ta a: "Hei le, kan nau te hi chin hriat an ni ta lo a. Anni a pum-pa engti kawngka mahin pasaltha dungthul a an rammut lah a rinawm na hek lo. Amaherawhchu, tawng khawlo ni suh se, eng phei chu an ti hauh lo ang a. Thlawhlai kan dap chhuak tawh a, vahmim thisawn pawh awm se kan chil chhuak tawh hial ang e, tih turin kan thual kim tawh a. Chu-

vangin, naute u, tumah inphatsan lovin vau ngawpui chhung zawng zawng hi kan dap chhuak tur a ni. Tupawhin sulhnu thar leh eng emaw kan hmu pawhin kan vah thlawn zau loh nan kan inhrilh tawn zel ang a. Lui mawng lam zawh tawh awn ila, lui hnar lamah a then kal bawh ila. Thenkhat ngawpui chhung dap tawh awn bawh ila," tiin ro an rel ta a.

Tichuan, meichher eng tawh chhiin an vak darh ta sung sung a. Lui lam pante chuan sulhnu thar an hmu ta thuai a. An chawfak tur vau luia an insil harh lai luite tui lianin a lak pabnih a nih an ring ta a. An inau khawm a, luidung chu an zawh thla ta a.

Khatia Sabereka-khuangkaih-in Salkungi a la ta khan margbung a vuan hlah mai a. Luite lian vawh leh khat a sah bukin a len thla puat mai chu, ar indi chen lekah lui kawh tam a len liam hman a. Mahse margbung a vawn tlat avangin tuizangkauh chuan a len chak theih loh phah a. A tawpah lungpui insi karah a len zep a, engmah hre lovin a thidang ta vang vang a. Tui chu a kam leh thuai a. Hmingdailovin a zuk hmu chhuaha a tihngaihna hre lovin a tanna lungpui chunga tlaivarpui a tum lai thimblim velah Salkungi chu a rawn harh chhuak leh ta hlah mai a. Tichuan, eng emaw ti tiin an inhnuk chhuak thei ta hlau a. Thimthama lungpui chunga an inbawisawm lai chuan lui mawng lam atangin sakein a rawn hrawk zui leh ta nghal.

Mahse an yanneih a siamin chutih lai tak chuan a zawngtute chuan an rawn hnaihchilh ta hlauh a, sapui pawh chu a insaseng leh ta a.

A zawngtuten lai mawrg lam an zawh thla ta chuan an au thla zel a, Hmingdailovi chuan mangang rawl tawpin a lo chhawn vau vau a. Nungdam a hmuh leh pawh an rin phak tawn loh Hmingdailovi te thiandun dam tî a an hmu leh ta chu an lawm em em mai a. Salkungi chu a chauh em avangin tawlaia zawn ngam pawh a ni lo a, a zawnna turin tlangvalho chuan hlangpui an han siam thuai thuai a. Hmingdailovi pawh a chauh em avangin zawn an tum a. Mahse zawn a duh loh avangin a a zai ngaiin an chhawm haw ta a. Thi lova ruang a anni thiandun lo khawchhuak leh ta chu Salkungi pu chuan an pahniha thla hual nan ni hnih ni thum hnu-ah sechal a talh ta nghe nghe a ni.

Chutia Hmingdailovin tlawmgai taka a thiannu a chhanchhuah kum chu, Kapthuaman khawmu chawi bo Chhingpuii a-hmuh kum nen, a hnu-a an han sawi tlan leh chuan a lo inangin a thla nen lam a lo indph chiah mai a. A khual thu than lai pawh a inang reng a. Ral-a khatah an lo ingngaisang tawnio, a tu ve ve pawh inhmuh an lo châk rikru ve ve hle, nghe nghe a ni awm e. Chung thil chu tuo tla khawhnua an han sawi chhuah chuan. — Upa pheichuan, 'Chu lo aham a Pathiaa samsuih tur a piang, innei lo thei lo tur a khawtuah leh khavang zawlthu thluq sa, an ti hial a ni.

Buh lu chhum zawh veleh Kapthuama te chuan Hmingdailovi be turin palai an tir ta vang vang a. An beisei ang ngeiin Hmingdailovi te pawhin an lo hnial bik lo a, buh chhek tul lai takin an innei ta a. Hmingdailovi pawh Thankimi ang mi a Pathian tih mi a ni a. Au khaw Kohhran pawhin kawlvallenchham a pasal a nei bo tur chu an ui hle a. Kohhrana a chanvo ang a chelh zui reng an duhsak avangin an Kohhran pawhin pem lehkhah ngaihsanawm tak an siam sak nghe nghe. Kapthuama te khaw Kohhran pawhin rei hlamchhiah lovin an khaw lama a chanvo ang chu an pe ta thuai a. Thankimi nen lah an inkawm ngeih na rawh. An pasal te inkawm ngeih tluk zetin anni pahnih pawh chu a chhuk a chho-ah a thim a var thlu lovin an inzui rawt pahnih thin.

Amaherawhchu, Kapthuaman sakhaw lam a uk-sak vak loh avang chuan a nupui Hmingdailovi rilru chu a tihrehawm deuh a. Engti kawng mahin a nupui rawngbawlna chu phunin dodal lo mah se, Hmingdailovi rilru chu a kim thei lo. Kapthuaman nupui a neih dawn chuan Liankhuma chu a thian tur a nih avangin a hna atang chuan a rawn chawl zawk a. Mahse ani pawh vahsan lak dawnah a lebawr hna atang chuan a rawn bang fel ta a. Anni nupa leh Hmingdailovi chuan Kapthuama chu Pathian lamah theihtawp chhuahin kaih harh an tum a. Duhsak taka kaihhrui an tumna chu Pathian pawhin mal a sawmin a harh chhuak ve ta thuai reng a.

Nilai zana Hmingdailovi tan tur chuan a pasal inkhawm hreh chung chung chu inkhawm turin a tur chhuak lui a. A hun hmang chuan, Phil. 2:5-11 'He rilru, Krista Isua pawh a awm bawh kha, nangmahni-ah awm rawh se' tih lai a chhjar zawh chuan hla a thlang a. Hla Thar Bu 7-na (chung lai chuan Hla Thar Bu-ah a la awm) 'Aw, hmangaihna sawi thiam ila' tih châng hnihna 'Ka tan huanah a tawngtai a, Nangma tan pawh a tawngtai' tih an sak lai chuan Hmingdailovi chuan a pasal tan a ngaihbel bikin a tap ta a. A chang li-na, 'Ka sual lungngaih-thlak a kal pui, Ama tan a inbelin, A phur Kalvari-a nghatin, A tuarin a tlan zo ta.' tih an han sak thlen meuh chuan Kapthuama pawh a insum zo ta bik lo a, a tap ve ta zawih zawih a.

Chumi zan atang chuan Kapthuama pawh chuan a thlappa Liankhuma ang maiin hmeichhe rawngbawl-na atang bawkin Pathian lama tharna chu a lo chhar ve ta a ni. A rilru hliaptu Pathianin a hlim lan sak atang chuan Kapthuama chuan a thianpa Liankhuma lehkhathawn awmzia pawh kha a hre ve ta chauh a. An nupa tuak a an inkawm tum khatah pawh: Kapthuama chuan Pathian rorel dan a lo briat phak lohza leh a thil ruahman dan reng reng, amah Pathian bawkin mihring rilru a chawh hah hmaa briat thiam phak a lo nih lohza te a sawi a. Kapthuama chuan, 'Thlamuanna chi bi hrehawmna lei thaah a tla tiak thin ti ka hre chiang ta.' a ti hial a ni.

25. “KAN TIAM ANG TAL KHAN AW....”

— *Rozami*



KAPTHUAMA chuan tisa leh thlarau lam-
ah nun tharrawn tan chhuak ve tawh mah se,
mihring taka a tun hma hun ngaihtuah leh thin châng
a neih leh loh theih thin loh avangin Rozami chu
theihnghilh harsa a ti em em reng a. Theihnghilh
tak tak nî awm dawnin ring lo mah se, a rilru ti-
hrehawm lo tal turin Pathian hnenah a dil chamchi
thin. Hun inher zelin kumpuisul a rawn veitir a.
Ni leh thla leh hunbi tê tê chuan hun liam hnu ang
chiah kha a rawn din thar leh meuh hi chuan, Ro-
zami chu a hre chhuak lo thei thin lo a ni. ‘Thla
Hleinga Zan’ meuh pheih hi chuan a rilru chuan chang
dang a kan theingai lo. Engti kawng mahin a hai-
der thei ngang lo a ni.

Rozami pasal kha sipai ah a la tang reng a. Amah
mipa leplerh deuh ta chu a veiyahna lamah nuli
dangin an lo uai lungleng ta a. Reilotê chawlin a
lo chhuak zawk a, chuta a haw thla leh lam chu
Silchar kawng dung nula pakhatin a um miau mai
a. Hnar haw ngaiha a hriat si loh avangin Rozami
chu a rawn ral mak ta ringawt a. Rozami pasala nu
leh na chuan Rozami chu ui em em mah se, a neitu
beyin rawn ma ta miau si chu chelh rualawm si hek
lo. Ani Rozami lah chu a lo ruaklo hman khang-

lang tawh si nen. An in lam a Rozami a haw leh tiri chuah, a thu an awih loh avanga a chan hrehawmzia leh a thu ang chuan kal se, a chungah vandaina a thlen loh turzia chu engphiarin a pa a ankhum chiam a. A pa pawhin a khawngaih thlu ve si a, eng dang mahin a chhang ngam lo reng a. "A heti ang tih kan hre lawk bik si lo a, kan van a duai tlang a nih hi," a ti ve ringawt mai a ni.

Rozami kir leh chuan hrehawm a ti em em mai a, a thiante zawng zawng lahin blim takin pasal an nei zo tawh si a. Ani lah chu nupa te inah mo mithei veng chung a fachuam pawm hmabakin, a damchhung hun tumtawi turin khawsak a tan leh dawn chu a ni si a. A rilru hahna leh hrehawm a thina zawng zawng a phawrhna ber a nu lah chuan a boreisan tawh bawh si. An ina a haw leh zan phet chuan mobil thei lovin an dawh chawp sak khumah chuan a mu meng reng a. A pasal neih dawn atanga a rilru-a lo inmung tawh, engtikah emaw chuan lo la thleng ngel tura a ruat rilruk reng: Fur-pui hmahruai tomir haw turin hmar thlang kawklil a rawn luah duk thim kuhl mar a, to haw tur palai thawk hmasa thli ro chuan vaivut a rawn ohnem khu run run a. Thingzar vatofak a rawn sep kang dawn dawn a. Kel ruah haw thanchilia in lam padin muat an rawn lau var haw zang zung ang huan la rawn len chingchiver ngel tor ang a sang ruah hui chu, ohnem hui chu a ni thia hre ohnem la a. Chu to haw chuan a haw huan a dihamun

pawh a rawn len kar ta ni-a a hriat avangin, chumi zan pawh chuan chhin khat pawh chhing eih lovin amah chauhlin khumah chuan a tal tlaivar zak a.

A damchhung bumrotu hun khupsuk tak chu a rawn hmanng tan ta tih a hriatin a lung a awi thei mawlh lo. Nau pai lovin, hringkir leh, hmeichhe kawtlawng tal te chu la ni se zawng, a pa leh a pasal elsen nan reng reng pawh thinrim hrikthlak nan a ni a thla a ral hma pawh a tâng dang vawn leh vat pawh duh dawn mah se, hmeichhe pangngai a nih puangtu a ruablohna chuan kum thun chhung chu engle-khawle a chelh khawtlai dawn ta reng reng si a. A lungdum loh lakah a nula hnahkhat thianghlimna chu chen chulin a awm a, a pa lakan thinrim tawpintai nei lo chuan a thoh reng bawh dawn si nen.

Hreh chung chung a pasal a neih dawn a, a duh loh em avanga a inhnemna-ah kha chuan, "Eng pawh ni se, karah fanau an lo la awm ang a, mahni rila rahte ngei chuan kan inkarah hmangaihna pawh a rawn din thar ve-in min ti-hnambet chhawm ang chu. Khuarei leh kumpui vei zel te pawhin ka rilru hrehawmna hi a rawn dip ralin thlasik mumang a la chantir em ang chu maw," ti-a a inhnemna chu, tunah chuan tu palai mahin an sawi rem leh thei ngai tawh lo ang. Engti kawng mahin Rozami pawhin sawi rem leh chu a duh tawh bawh hek lo. Awm-mawh leh leplerh vang pawh ni si lova fa-chuan

pawm a nuta bel a, mahni duhzawng pawh thlang leh thei ngai tawh lo kumkhua tura a hun hnunhng lam kawng rawn iohawn dan chu a tuar thiam thei mawlh lo a ni.

A hun lo kal zel tur ai mahin a hun kal tawh a hman that lohna mawlh mai chuan a ngaihtuahna a ti tam a. "Ka pa min tirh luihna kha ka hnial tawh lo a ni. Engah nge ka lo tlan bosan mai loh? Thuama lah kha a dam tawh loh ring azeng pawh ka ni si lo. Ka thiam loh leh ka zir loh vek a ni. Thuama, min ngaidam ang che aw?" ti te-in a rilru chuan a han ehham leh thul thin a. A thinrim chuan chin tawh nei lo lêkin a pa pawh a mawhchhiat zing na rawh. Hmeichhia mah ni se, a an-hla hriat zawng zawng leh a tih a mawh lo thlengin a pau chhuahpui leh tlai khawhnu tak na a, phengphehlepah khua a tlai zo ta. Din thar leh rual lohin tuisik baw hnu a chahng zo ta a ni.

Thenrual pawl pawh a chhak tawh lo a. An in chhung lah chu nuam tihna chhetê mah a nei hek lo. Nei lo e ti lo chuan khawlai len a thenrual pawl a chhak chuan si loh avangin a taptawmin a chhung-tlum hle a. Khawilo kala a feh chhuah tihngawt loh chu theawm in fahranah pawh a chuang kai ngai lo. A awmkhawhar zual chahng erawh chuan - Hman a Kapthuama nu thih avang a Thanthuami te an thlanthut ni-a Kapthuama te chhung thlalak an kha te turin Thanthuami te inah a kal thin a. An

kawmchar leikapui ringawt pawh chu a thlakhlelh ngawih ngawih avangin a tlawh nghal ziah bawk a. Kapthuama thlalak a kawl ve lah chu a pa thinrimin a lo rawh sak tawh si a. A tawpah pheih chuan Thanthuami te kawl lai chu kawh hawhah a dil ta ngawt nghe nghe a ni.

A thlalak hawh chu en chungin a be mawlh mawlh a. A châng leh thupha a chawih a, a khawhar thu leh a hmangaih thu te chu chin lem awm lovin a han chham khum leh thul thin nen. An lehkhah inthawna hlui a ruka a la dah that, rokhawma lehkhah tluk ngawta a roh te chu a hai chhuak leh a. Chung lehkhah a hmuh lai hun te chu a rilru-ah a rawn thar leh uar uar a. Khawvelah hian beiseina a nei tawh lo a, mihring danin kawng a kharkhum ta. Kapthuama nena hun duhawm hmang leh tur chuan leilung hian phalna aw a pawh thiang tawh si lo. Dan bawhchhiatna a vang emaw leh, vandui-na emaw pawhin mi tlawngawl-ah siam leh hnahnawh ta pawh ni se, intawng tir hnakhhat hmangaihna ang chuan engmah a kal thei tawh chuang hek lo ang. Mahse chu takngial pawh chu duhthusamah pawh a sam phak a ni ta lo.

A ngaitê-in fur leh thâl chu khawvel leilung dan angin a rawn inher chhuak leh a. An hun theuhah nungcha tinrengte pawhin sal lovin an hun chu tuma luah khalh lohin an rawn hmang leh kum tin si a. Mihring erawh chuan ngai awh theih a ni si lo. Bar

thla fang a lo de a, pawchhiat hun leh vangpi hun
thengthaw-ah khuangchawi thla fang a lo det atang
tawh hi chuan, zan rei luat pawh sawi lo leh mut-
mu tuah lo lêkin a khawhar chuan dai leh kawm
a thual chhuak a. A thinlung hruai dingtu zan
khawhar chuan thlan piah lam ram ngaihtir rum
rum khawpin a nun chu a zem â lek lek thin a ni.
A tan chuan dam hi hlimna hmel na, retheihna suak-
sala zuartu, Setana ânchhia leh Pathian thinurna tang
kawp ni hialin a hria

Sal khat khata a chung a vanduaia lo thleng lo
chu, a nulat laia amah lo hel thintute dichimna leh
sawichhiatna remchang a ni ta bawk si a. Mangan
thawpui la huam huam khawpa a hlei-hluaka a chung a
retheihna rawn infawk khawm ta bik chu, lei anchhe
rokhawmtu ni berin a inhria a ni. A zan a telin
khuangchawi thla fang chuan khawchhak atang khian
an intianna thuchah thuthlung hawrawp lang kim
zawngia than a rawn la a. A hleinga zan a lo thlen
meuh hi chuan Rozami chuan:

*'Chung chhawthia hleinga a dang chuang lo,
Ka chhiar chhuak e sakhmel ngui rii riai sialin;
Lung tileng chang zo ta e, kan tiam kha,'*

tih bla te chu chham chhuak hial khawpa khawhar
insum zawh lobna chuan a rawn zem chjai leh thin
a ni.

A châng erawh chuan Rozami chuan a rilru sang
marâ a pau ti khaub luit, "Chan tawka khawrel-in

ka tuar tura min namseh a nih ber tawh a liamoh eng nge chuti taka lung loha ka han lak bikna tur? Kei chang hian khawvel hripui hrehawma hi ka pusum tel ta bik a ni hlei nem. Kei aia rethei leh vanduai pawh an tam ve tho. Pathian remtih a ni mai a lawm. Tih emah chuan hmeichhe phanchang lutuk leh mahni tum tawh pasal haihchham tur pawh ka la ni bik lo a. Ani Kapthuama chauh hi khawvela mipa awmchhun lah a ni hek lo. Kum thum lekah ka fa chu a tlei ve leh mai ang a. Pasal chhia-tha zawng ka la hmu tho ang a sin," tiin amah leh amah chu inhnem lungawi a han tum sateh thin a. Mahse tum lawk loha a rilru-a khawharna lo chhuak leh thut thin chuan, a dana rual lohin a rawn zem â leh lek lek mai thin a ni

Ni khat chu Thanthuani pa chuan an kawmchar leikapui kha a thiat dawn a. Rozami khawhar len luh ni tak a ni a. Rozami chuan a rilru tak takin a ui ru em em mai a. A thiah hma chuan Kapthuama nena an thut dunna, kawmchar kawngka chhak lim dithlifarfem hnuai chhung lam hretah chuan khawhar takin amah chauhin a'n thu leh ren rawn a. Thanthuamipa'n a sawi nghin dul dul lai te chuan lungchim takin a lo thlir vawng vawng a. Chu leikapui, a khawhar zual chang apianga a tlawh loh theih loh, Kapthuama a hriat chhuah apianga a mitthlaa lang tel ve ziah thin chu, leikapui mai mai mah ni se, a tan chuan hnemtu leh an khaw chhunga a hmun ngainat ber a ni si a.

Chumi kum chapchar lai chuan Kapthuama silai hmuh Aizawl kal haw chuan Rozami te khua chu a tlawh kawi a. Chawhnu thlang her hreta an khua a luh dawn, kawtchhuah lal lungdawh thlen hma in lam kawng laiah chuan paikawng (thingphur-em) leh thing fawm sa tlem hi a lo awm ngât a. A neitu chu kawng thlang maih chuan a ri sâl sâl a. Kapthuama chuan ngaihtuah mang hlei lo chuan a zuk en kher a. A rin loh deuh maiin Rozami a lo ni reng mai a, "Zami, nang i ni maw, i va har khawhar awm rak rak ve?" a zu ti a. Rozami chuan a hmuh veleh a hmel a dâng nghal sâwp sâwp mai a. Tirila khur hlek hlek chung hian, "Awi...! Ke zawng Thuama, mi dang daih emaw tih nâk alai che chuan, nang zuk ni reng chia. I dam zel thin maw! Aw....., ka lung i va han tileng thin tak em! I e mak min ti suh la, min ngaidam ang che, kei zawng hrehawm ka ti em mai. Ka dinhmun hi heti lo n tawhin, beisei phak loh lung tileng thlawn mai n tawh mah la, kan intiam ang khan e, 'Thla Hleing Zan' chauh hi zawngin.....kan intiam ang tal kha aw..., Chibai, dam la, dam takin mangtha ngawil ngawih," a ti lawm lawm a. Khiang hlimah chuan a thu hnawk a, a indawm vawng vawng a, a thinlung ah aw-thangkhawh ni-awm tak hian:

*'Ka nu, lungtlu lova khiangawih zawng,
Tuahpui leh vau an vul zolentu htuaiah;
Di kan tawng kan tah a tul leh thin,'*

rawn tithang kal reih reih hian a hria a.

MIZORAM STATE LIBRARY

Acc. No.

Acc.

Class.

1287

Catal.

Sub.Hc.

17

Transib

Location No.
